

The Ohio State University



3 2435 06846534 3

THE OHIO STATE UNIVERSITY BOOK DEPOSITORY



D	AISLE	SECT	SHLF	SIDE	POS	ITEM	C
8	07	28	02	7	07	002	7



احمد رفیق

تاریخ مدینت

عصر حاضر

پارس دارالفنونى معلم لندن شارل مہنیوبوسک الک مشهور آثارندندز .

طابع و ناشرى



استانبول

کتابخانهٔ عسکری - تجارزاده ابراهیم حلمی

۴۶ - باب عالی جادہسی - ۴۶

۱۳۲۸

11 85

1116 11

1116

1116

کتابخانه اسلام و عسکری

تجار زاده ابراهیم حلمی

آرتین آصادوریان و مخدوملری مطبعه سنده طبع اولنمشدر .

برنجی فصل

اون سکزنجی عصرده اوروپا حکومت جدیدہ سی

مدینت ہاضرہ نیک مبرائی . — مدینت حاضرہ بی ۱۷۸۹
تاریخندن بدا ایتدیرمک اوتہ دن بری عادت اولمشدر . فی الحقیقہ
مدینت حاضرہ نیک طبایع میزہ سنی وجودہ کثیرن بویوک
تحوّلر فرانسه انقلابی ایلہ برابرظہور ایتمشدر . فقط بوتحوولات
اودرجه ظاہری اولیان داخلی بر تحول ایلہ احضار ایدلمشدرکہ ،
بوداخلی تحوّلکدہ مبدائی اون سکزنجی عصرک بدایتہ قدر
واریر . فی الواقع بوتون آوروپادہ نظامات قدیمہ بی اساسندن
بیقان ، اولاصلاحاتہ و دہا صوکرہ دہ انقلابہ بادی اولان اک
یکی دساتیر سیاسیہ ، اون دردنجی لوئی دورینک اواخرندن اعتباراً
تشکل ایتککہ باشلامشدر .

عین زماندہ حکومتلر بینندہ کی مناسبات دہ تبدل ایتمشدر .
آمریقادہ ، انکلیزلرک مستملکات ایمپراطورلنی تشکل ایتمش ، یکی
بر بویوک حکومتک ، حکومت متفقہ نیک ظہورینی احضار
ایلمشدر . آوروپادہ دہ اسپانیا ، اسوج و فلمنک کبی اون یدنجی
عصرک اوچ بویوک دولتی ایکنجی درجہ دہ کی حکومتلر مرتبہ سنہ
ایتمشدر . کذا حقوق سیاسیہ سنی فائب ایدن فرانسه نیک یانندہ دیگر
درت دولت دہا ظہور ایدرک اون طقوزنجی عصرک بویوک

دولت‌لری صره‌سنه یکم‌شدرکه انلرده: اون دردنچی لوئی به غالب کلن انکلتره، مملکت‌نندن عثمانیلیری چیقارمقله کسب قوت ایدن آوستریا، سوکره ایکی یکی حکومت، یعنی پروسیا قراللی ایله روسیه ایمپراطورلیقیدر .

پروسیا

پروسیا قراللی . — ۱۷۰۱ سنه‌سنده تشکل ایدن پروسیا قراللی (۱) همان بوتون آلمان حکومتلری کبی خاندان حکمرانی طرفندن برر برر طوپلانمش بر طاقم مالکانه لردن مرکبیدی . بوراسی بوتون بر مملکت دکلدی . مثلاً غربده (رهن) نهرینک تا صول ساحلنده بر قاج مالکانه ، شرقدده ایمپراطورلنک حدودی خارچنده پروسیا ایالتی ، مرکزده (براندبورغ) اولوق اوزره هپسی ده فقیر ، نفوسی قلیل (تقریباً ۲ میلیون) ، اتصالاتدن محروم ، آلمانیانک اوتنه‌سنه بریسنه طاغیلیمش بر طاقم یرلردن عبارتدی . پروسیا انجق اوافق بر حکومتدی: فقط هوهنزوله‌رن خاندانی انی بویوک بر دولت حالنه کتیرمشدر . هوهنزوله‌رن خانداننک اداره حکومت

(۱) قراللی عنوانی براندبورغ آلکتورینه یاره ایله صاتمیش اولان ایمپراطور، انی بر آلمان ایالتنه ربط ایتمک ایسته‌مش، اوزمانلر پروسیا ایمپراطورلوق اقسامندن معدود بولونمادینی ایچون پروسیایی موافق کورمش و یکی قرالده (پروسیا) قرالی دکل ، فقط (پروسیاده قرال) عنوانی ویرلشدر .

حقننده کی فکر لری، زمانلرنده کی پرنس لرك افكارندن باشقه برشی دکلدی . بونلرده «عائله پولتیقه سی» تعقیب ایدر لر ، هرشیدن زیاده مالکانه لرنی ، نفوذ و اقتدار لرنی بویولته رك خاندانلرنیك قدرتنی یوکس لتمکه چالیش لیرلردی . کذا انلرده مقصد لرنینه نائل اولمق ایچون هر درلو وساطی استعمال ایدر ك «تدبیر حکومت» قاعده سنی تعقیب ایدر لردی . - فقط بونلر ، طرز حیات لری ایله سائر پرنسلردن تمیز ایدر لردی که ایشته موفقیت لرنینه سبب اولانده بوایدی . هوهنزوله رنلر بر سر ای خلقی بولوندیرو بده ضیافتلر ویره رك واردات لرنی طاغید اجق یرده وارداتك کافه سنی صرف مصارف حکومته ، بالخاصه ده اردونك محافظه سنه حصر ایدر لردی .

سر ای . - ایلك اول قرال عنوانی حائز اولان برنجی فرهدریقك ده اون دردنجی لوئی کبی غلبه لك بر سر ای خلقی واردی . فقط خلقی فرهدریق کیلیوم بو سر ای خلقی کاملاً صاومش ، یالکنز ۴ ماینجی ایله ۴ جنتلمن ، ۱۸ ایچ اوغلانی ، ۶ اوشاق و ۵ اوطه خدمتکار براقشدی . فرهدریق کیلیوم مائی اونیفورمه و بیاض بانطالون کبیر ، بلینه دائما قیلج طاقار ، لندن هیچ باستون اکسیك ایتزدی . سراینده نه قولتوق صندالیه سی ، نه خالی ، یالکنز اخشابدن صرملر و صندالیه لر بولونوردی . یك زمانی اوقدر غیر منتظم ترتیب اولونوردی که چو جق لری قارنلری آجیق دینی زمان یك بیه مز لردی . قرال بوتون آقشاملرنی

جنرال لری و ناظر لری ایله برابر اوزون هولاند اپولریله توتون ایچمک و یایره چکمه کله کچیرردی. حتی دیگر برنس لک جانی صیقان بو قبا حیات، کندیسنه (چاوش قرال) عنوانی قازاندرمشدی. خلغی ایکنجی فرهدریق ایسه بالعکس ایی تحصیل کورمشدی.

فرهدریق موسیقیدن حظ ایدر، فرانسزجه بی سهولته یازار، فرانمزجه شعر انشاد ایدر، فیلسوف لک آناریخی مطالعه ایلردی. فقط اوده پدری کبی همان غایت ساده برطرزده امرار حیات ایتمشدی. فرهدریق (پوتسدام) ده اوطورر، ضابطلرندن، مأمورلرندن و برقاچ فیلسوفدن باشقه کیمسه ایله دوشوب قالمزدی. فرهدریق سرای خلغی یوقدی. (حتی قرالیجه دنده آیری یاشار و قادینلری ده قبول ایتمزدی). یامالی البسه کیردی. موبیله سی، دائما یاننده یاشایان کوپکلر طرفندن بیر تلمشدی. وفاتنده البسه طولابندن چیقان اشیانک کافه سی ۱۵۰۰ فرانغه ساتیلیمشدی. اک زیاده مراق ایندیکی شی، طبقه قولکسیونی ایدی. وفاتنده یوز اوتوز قدر توتون طبقه سی براتمشدی.

بروسیا قرال لریک بورجه سی. — بروسیا قرال لری شخصی مصرفلرندن تصرف ایستکلری پاره بی اردولرینه صرف ایدر لردی. فرهدریق کیلیوم کندی شخصی و سرایی ایچون سنه ده انجق ۵۲۰۰۰ طالر (یعنی ۲۰۰۰۰۰ فرانق) خرج ایدردی. قرال لنگ وارداتی ۶,۹۰۰,۰۰۰ طالر (تقریباً ۲۸ میلیون فرانق) ایدی. بو وارداتک همان همان یاریسی اردویه، یاریسی ده مصارف

سائرمیه تخصیص اولونوردی. فقط حقیقت حالدہ قرال مصارف عادیہ نك ۱,۴۰۰,۰۰۰ طالہ رینی (یعنی ۵,۲۵۰,۰۰۰ فرانغی) اردویہ تخصیص ایدردی. حکومتك سائرمصارفی ایچون انجق ۹۶۰,۰۰۰ طالہر (یعنی ۳,۷۵۰,۰۰۰ فرانق) قالیردی. متباقیسی یا اردویہ ویاخود احتیاط آچہ سئ تشکیلنه تخصیص اولونوردی. قرال ۸۰,۰۰۰ کشیلک بر اردو بسله مکہ موفق اولمشدی . وفاتندہ بر اقدینی نقد ایسه ۸,۷۰۰,۰۰۰ طالہر (یعنی ۳۲,۵ ملیون) . بالغ اولیوردی. ایکنجی فرہدریق دہ باباسی کبی بارہ سنی اردویہ و احتیاط آچہ سنہ تخصیص ایتمشدی. فرہدریق ۲۰۰,۰۰۰ کشیلک بر اردو بسله مش ، بوتون قرال لنگ خرایسنہ بادی اولان (یدی سنہ حربی) اجرا ایدلیدی حالدہ وفاتندہ ینہ ۵۵ ملیون طالہر (۲۰۰ ملیون فرانقدن زیادہ) ثروت بر اقسدر . اردو . — پروسیا اردوسی دہ اوزمانك سائر اردولری کبی کوکللو عسکرلردن مرکبدی . افراد طوبلامق ایچون آلمانیا نك هر طرفنه افراد طوبلامغه مأمورضا بطر کوندریلیردی . بونلر لوقانطه نك برنده بر قلم تشکیل ایدرلر ، پروسیا قرالنك خدمتنه کیرمك ارزو ایدنلری قید ایلرلردی . عجمیلرک قسم اعظمی سرسریلردن ، بر چوغی دہ هرهانکی بر آلمان پرنسنگ اردوسندن قاچان فراریلردن عبارتدی . اکثریا افراد طوبلایان ضابطان قرالک پارہ سنی قبول ایتدیرمك ایچون انلری سرخوش ایدرک ویا قاچیره رق حیلہ ایلہ ویا جبراً طوبلا .

رلردی. حتی بوضابطلردن بری اوزون بویلی برطوغرامه جی بی
غره نادیه صنفنه قید ایتمک ایچون کندیسنه بوی صیغه جق
قدر بر صندوق سپارش ایتمش، طوغرامه جی صندیغنی کتیرمش،
ضابط: «بوصندوق پک کوچوک!» دیمش، طوغرامه جی صندیغک
حقیقه بویوک اولدیغنی اثبات ایچون ایچنه کیروب یاتمش،
بونک اوزرینه ضابط صندیغک قاباغنی در حال قاپایارق موقعنه ارسال
ایلمشدر. صندوق آچیلدیغنی زمان طوغرامه جینک هواسزلقدن
بوغولدیغنی کورولمشدر .

فقط بو قدر قوتلی براردوی توپلامق ایچون بو صورتله عسکر
طوپلامه لر کفایت ایتمیوردی. ۱۷۳۳ سنه سنده قرال آلایرینی
کندی تبعه لری ایله اکمال ایتمک ایسته مش و بر نوع خدمت
مکلفه عسکره اصولی قبول ایلمشدی. بونک ایچون ده قرالغک
بوتون ایالتلری (ناحیه) لره آیرلمشدی . هر ناحیه بر آلیک
موجودینی اکمال ایچون لزومی اولان قرعه افرادینی ویره جکدی.
زادکان ورهبان اولادلری ایله لا اقل ۶۰۰۰ طاله رثوتی اولان
بورزووازی به منسوب عائله چوجقلری مستثنی اولمق اوزره
اهالینک کافه سی عسکره داخل اولاجقدی (ذاتاً او قدر زنکین
عائله او فقیر پروسسیا قرالغنده همان یوق کیدی) . ایکنجی
فره دریق حربلری اثناسنده افراد او قدر آزالمشدی که نهایت
مکتب طلبه سنی ده عسکره آلمغه لزوم حاصل اولمشدی. برچوجق
چابق بوپومکه باشلادیغنی زمان ابویینی: «اوپله پک چابق بوپومه،

صوکره سنی عسکر طوپلاییحیلر یقالار. دیرلردی .
 پروسیا عسکرلری غایت آغیر بر انضباطه تابعدی . ضابطان
 آلدرنده باستون اولدینی حالده نظارت ایدرلر، حرکاتی طوغرو
 یایمانلری باستونله دوکرلردی . تکمیل آلیک فردواحدکی
 برماکنه صحتیه تعلیم ایتسی لازمدی . افراده اون ایکی حرکتده
 سلاح طولدیرمه تعلیم ایتدیریلردی (بوکا اون ایکی ته،پولی
 طولدیریش دیرلردی) . بر طابور آتش ایدهجکی زمان یالکیز
 شمشک کی بر پاراتی کورمک و برسس ایشتمک لازمدی .
 هیچ بر حکومتک بودرجه معلم اردوسی یوقدی . پروسیا
 تعلیمی بوتون اوروباده شهرت بولمشدی . فقط بو حیات اودرجه
 زحمتلی ایدی که عسکرلر قاجماسینلر دییه قیشله لره نظارت ایتک
 لازمدی . حتی بویوک فره دزیک وقت حریده یورویش حالنده
 بولونان آلیلرینک اطرافنده فراریلری توقیف ایچون
 سواریلردن مرکب بر قوردون تأسیس ایدردی .
 بو اردوده عسکرلر ایچون ترفیع امیددی هیچ یوقدی .
 ضابطان، هپ کنج زادکان میانندن انتخاب اولونوردی . زیرا
 پروسیا زادکانشک کافه سی قرالک خدمتنه داخل اولوردی .
 بونکه برابر ممالک سائرده ضابطلک التماسله ویرلدیکی ویا پاره
 ایله صاتیلدینی حالده پروسیاده انجق بر مکتب عسکریدن
 (قاده لر مکتبندن) چیقما دجه ضابط اولق قابل دکلدی . بویوک
 رتبه یه نائل اولق ایچون همه حال آشاغی رتبه لرده بولونق

لازمی . حتی عائلہ قرالی پرنسپلری بیلہ خدمت عسکر یہ دہ بولونارق ہررتبہ پی برر برر قازانغہ مجبور لردی .

اوزمانلر اورویانک ہیج بر حکومتی تبعہ سنک نفوسنہ نسبتاً بو قدر قوتلی بر اردویہ مالک دکلدی . ۲,۵۰۰,۰۰۰ بر مملکت ایچون ۸۰,۰۰۰ کشیک بر اردو ، آوستریا اردوسنک آلتی ، فرانسه اردوسنک دہ درت مشلی دیمکدی . حال بوکہ اون ساکننجی عصرده اقوام بینندہ تکون ایدن کافہ مسائل ہب حرب ایلہ فصل وتسویہ اولوندیغی ایچون بر دولنک قدرتی دہ اردوسنک قوتیلہ حساب ایدیلردی . پروسیا قرالی او اوافق حکومتی وبویوک اردوسی ایلہ اورویانک اوچ بویوک دولنلرندن برینی تشکیل ایلشدی . بواردوی (چاوش قرال) حاضر لامش ، بویوک فرہدریق قوللانمشدی . فقط قرالغنه (سیلزیایلہ پولونیا پروسیاسی کچی) ایکی ایلت علاوہ ایتش ، ۲,۲۴۰,۰۰۰ تبعہ تسلیم آلمش ، بوکا مقابل ۶,۰۰۰,۰۰۰ نلق نفوس براقشدر .

اصول ادارہ . — پروسیا قرالری کندی قرالقلرنده ادارہ مطلقہ اصولنی تعقیب ایدر لردی . حتی بونلر زمانلرینک بوتون حکمدار لرندن دہا زیادہ اصول مطلقہ پی تعقیب ایلش لردی . ہیج بر پرنس آلمان قرالری قدر تبعہ سنہ چوق شی تحمیل ایتزدی . فرہدریق کیلوم ، اوزمانہ قدر ویرکیدن معفو اولان زادکانندہ وپرکی آلمشدی . بونک اوزرپنہ زادکان اعتراض

ایدرك بر استدعا تقدیم ایتمشار ، بو استدعا به « بوتون مملکت
 محو اولاجق ! جمله سی ایله نهایت ویرمشردی : » قرالده بوکا
 جوابا : « هیچ ظن ایتتم . یالکز زادکانک نفوذی محو اولاجق ،
 بن حکومتی طونجیدن بر قایا اوزرینه تأسیس ایدیورم . »
 دیمشدی . قرال کندینی تبمه سنک برافندیسی عد ایدر ، انلرک
 البسه سنه وارنجیه قدر هر شیننی نظام آلتنه آلمق ارزو ایلردی .
 یوڭ قاش کیلمسنی منع ایتدیکی ایچون اویسنده یوڭ قاش
 بولوندیرانلر جزای نقدی به ویا لاله جزاسنه کرفتار ایدیلردی .
 کذا قرال حرمت واحترام کورمک حقه ده مالک اولدیغنی ادعا ایدردی .
 حتی برکون ، کندینی کورر کورمر قاچمه باشلایان بر فقیر
 یهودینک یا قاسندن طومش ، یهودی به : « بدن قورقیه جتمسکز ،
 آ کلایوره بسکز ؟ بنی سوه جکسکز . » دیبه رک باستونله بر تمیز
 طباق آتمشدی . — ایکنجی فرهدریق ده مسکراتی تحت انحصاره
 آلمش ، بوتون تبمه سی شکایت ایتدیکی حالده بونی فرانسز
 ملتزمله احاله ایلشدی . فرهدریق ، امرلرینه قارشی طورولسنه
 هیچ تحمل ایده مزدی . « سوز دیکلیوب ویرکی ویریکزده
 ایستدیکنز قدر بیان مطالعه ایدیکنز ! » دیردی .

بو حکومتک طبایع میزه سنی تشکیل ایدن شی ، قرالک
 حکمدارلق صنعتنی بالذات طوغر و بر صورتده ایفا ایتمکده اولماسی
 ایدی . فرهدریق مأمورلرینه نظارت ایدر ، هر شینک منتظام
 یاپیلماسنی طلب ایلردی . فرهدریق : « بر حکمدار مملکتک حاکم

مطلقی دکل ، انک اک برنجی خادمیدر . « دیردی . ایکنجی فردریقک ۱۷۴۹ سنهسنده ویردیکی براسنامه کنندیسنک ملتنه نه صورتله نظارت ایلدیکنه برمثال تشکیل ایدر . فره دریق بو امر نامهده دییورکه : « بعض مأمورین کویلولره باستونلرله سو معامله ایتمکدن و ذات شاهانه ایسه تبعهسنه قارشى بویله مظالم اجراسنی اصلا ارزو ایتمدیکندن مأموریندن هر هانکی برینک برکویلولی باستونله دوکدیکی ثابت اولور اولماز بومأمور حتی هر کسیدن زیاده ویرکی ویرمش اولسه ، ینه مرقومک درحال و بلا امهال آلتی سنه مدتله قلعه بند ایلمسنی ارزو ایلمکدهدر . بوتون ایشلر قراله عرض اولونور ، قرال اوراقی مطالعه ایدر و کنارینه کنندی ایله حاشیه لری یازاردی .

ایشته بواققتصاد وانتظام اصولی سایهسنده پروسیا حکومتی سائر حکومت مطلقه ارهسنده یکی برطرز، ودهامتنظم اولدینی ایچوند سائر حکومتلردن دها دواملی بر (حکومت عسکریه) وجوده کتیرمش ، ایشته بو صورتله پروسیا قرالری زمانمزه کلنجیه قدر حاکمیت مطلقه لرینی محافظه ایدرک آلمانیاک سائر حکومتلرینی ده آلدیه ایتمک موقق اولمشلردر .

روسیه ایمپراطورلنی

روسیه ایمپراطورلنک مبدائی . — (اودهر) نهرندن (اورال) نهرینه وارنجیه قدر شرقی اوروپانک بویوک صحرائرنده،

دها قرون وسطی بدایتنده، اسلاو اقوامی او طور ردی. اسلاو،
 اورویا اقوامنک منسوب اولدینی طبقه دن و بیاض جنسنددر .
 لسانلری لاتینجه ، یونانیجه و آلمانجه کی السنه آریه دندر .
 غرب عرفلرینک اک قوتلیسی اولان اسلاو عرقی بر چوق
 ملتلدن مرکبدی . بونلرده: غربده بوهمیا چهلری؛ جنوبده
 خرواتلر ، صربلر ویزانس ایمپراطورلغنه یرله شهن بلغارلردی.
 شرق اسلاولری طقوزنجی عصره کلنجیه قدر برطاقم قبائله منقسم
 قالشلردی . بونلر اراضی بی زرع ایدرلر ، اخشاب اولر داخلنده
 کوی کوی طویلو یاشارلردی . شهرلری طوپراق بر دیوار وبر
 خندقله محاط سورلردن باشقه بر شی دکلدی . وقت حربده
 دائما بورالزه التجا ایدیلیردی . — اسوه چدن کلن جنکاور
 نورمانلر (شمال آدملری) بو قبیلهلری بر ملت حالنه قویمشلردی .
 بو ملتده رئیس لرینک منشائی اولان مملکتنه اضاقله (روس)
 ملتی دنیلمشدی . روس پرنس لری بر اردو تشکیل اتمش لر ،
 اورتودوقس مذهبنی قبول ایشلر ، تبعه لرینی واقفیز ایتدیرمشلردر .
 ایشته بو صورتله روسیه حکومتی اون برنجی عصرده
 (قسطبطنیه) کلیساسیله متحد بر اورتودوقس مملکتی حالنه
 کلشدر . بو اسکی روسیه ، اوزمانلر کوللرک بولندینی مملکت
 ایله (دینه پهر) حوضه سنندن یعنی شمدیکی روسیه نك، (کوچوک
 روسیه) نك غرب قسمندن مرکبدی . مملکتک ایکی پایتختی
 واردی : انلرده (ایلن) کولی ساحلنده تاجرلر شهرندن

معدود اولان (بویوک نووغرود) ؛ دیگرده (دینه‌په‌ر)
 نه‌ری کنارنده درت یوزکلیسانی حاوی (مقدس‌کیه‌و) ایدی .
 آلتون زمینی بیزانس چیچک‌کلری و بیزانس یازیسیمه مزین
 (سنت صوفی) کلیسامی ، ایشته بوراده انشا ایدلمشدی .

بو روسیه ، دائمی بر حکومت تاسیسنه موفق اولاماشدی .
 هر پرنسک وفاتنده مملکت اوغللری بیننده تقسیم اولونوردی .
 اون اوچنجه عصرده بو پرنسک‌کلرک موجودی ۷۲ یه بالغ
 اولمشدی . - اوزمان آسیادن کلن ۳۰۰,۰۰۰ تاتار سوار یسندن
 مرکب براردو بو اوراق حکومتلری کاملاً محو ایتمش ، بوتون
 روسیه اراضیسی اون اوچنجه عصردن اون بشنجه عصره
 کلنجیه قدر (وولغا) نه‌ری کنارنده اخشاب برشهرده اوطوران
 بر موغول پرنسنه ، (آلتون اردو) نک (بویوک خان) نه
 تابع قالمشدی . یرلی پرنس‌لر خانک خدمتکارلرندن
 باشقه برشی دکلردی . بونلر پرنسک احراز ایتدکلری زمان خانک
 سراینه کیدرلر ، اوکنده دیزچوکرلر ، بو عنوانی رسماً خاندن
 آلیرلردی . خان کندیلرینه بر نامه کوندردیکی زمان قیمتدار
 خالیز سررلر ، نامه‌یی کتیرن هیئته آلتونله طولو بر قوبه تقدیم
 ایدرلر ، و مکتوبک قرائتی دیز چو که رک دیکرلردی .

ایشته بو ائنده غرب روسلری شرقک جسیم و بوش
 اورمانلرینی تدریجاً استعمار ایتشلر ، یکی بر روس قومی
 وجوده کتیرمشلردی . (موسقووا) پرنس‌لری تاتار خانک

حسابنه ویرکی طوپلامنی درعهده ایدرک مملکتک اک مقتدر حکمدارلری درجه سنه کلمشردی. بونلرتمام ایکی عصر مدت ناتار اردولرینک یاردیمی ایله پرنسلکلری ضبطه چالیشمشلردی. حتی کندیلرینه «روس طوپراغنی برلشدیرنلر» عنوانی ویرلشدی. اون آلتنجی عصرده (موسقووا) نک بویوک پرنسلری ناتارلردن قورتولمشلر، دردنچی ایوان (چار) یعنی (قرال) عنوانی آلمشدی (۱۵۴۷). آرتق او تاریخدن اعتباراً حقیقی روسیه یی (وولغا) مملکتی، یعنی (بویوک روسیه) یی تشکیل ایلشدر. (قره ملهن) قلعه سنک اتکنه انشا اولونان (موسقووا) قصبه سی ده یکی ایمپراطورلنک پایتختی اولمشدر.

ماه. — اوروبادن دها واسغ اولان بو ایمپراطورلنی اداره ایدن چار، صرف خصوصی ماهیتی حازر بر نفوذ مطلق صاحبیدر. — چارک بوتون تبعه سی کندیلرینه (اسرا) عنوانی ویرلر. بونلر شرق اصولی اوزره آلنلرینی یره آ کهرک چارک حضورینه چیقارلر (حتی روسجده (استدعا) آلنی یره اتمک معنا سنده در). چارک مملکتنده انسان و اشیا هر نه وارسه هپ کندیسنگدر. چار، یالکز بر امرله تبعه سنک اموالنی استرداد ایتمک ویا انلری اعدام ایتدیرمک حقنه مالکدر. چارک ارزوسندن باشقه قانون یوقدر. روسلرک ییکانه قانونلری (اوقازلر) دن یعنی چارک امرلرندن عبارتدر. — عین زمانده اهالی ده چاره «مقدس روسیه» یی نفسنده تمثیل ایدن بر شخص

مقدس ، دیناً حرمت ایدلمسی الزم بر بابا نظریله باقارلر . حتی بر کویلو چاره (بابا) دیه رك لا ابالیانه بر صورتده خطاب ایدر . (بیصقوو) اهالیسی بر چوق عصر لردن بری هب بریره طوبلانهرق ایشلرینی اداره ایتک حقوقنه مالک بولونیورلردی . فقط واسیلی ، اهالی پی اجتماعه دعوت ایدن چانک قالدیرلماسنی امر ایلدیکی زمان بونلر : « بز ، سنک اوکسوز اولادلرک ، سکا دنیانک صوکنه قدر اطاعت ایدرز . چونکه ملک موروثکده بر الله ، برده سنک ایچون هرشیء یایق ممکندر .» دیه جواب ویرمشلردی .

روسلر بر افندییه ، بر بابایه ، بر وکیل ربانییه نصل اطاعت ایدیلیرسه چارهده اولیله خوف و محبتله قاریشیق بر اطاعتده بولونورلردی . روسیهده بو قدرت مطلقه قارشی طور اچق هیج بر قوت موجود دکلدی . - روسیهده چارک اطاعته مجبور اولانیله جکی نه نظامات ، نهده تعاملات قدیمه واردی . روس حقوقی چارلر طرفندن ویریلن اوقازلرک هیئت مجموعه سندن باشقه بر شی دکلدی . - کذا نه ویرکیلری مذاکره ، نهده هرکسک ارزوسنی بیان ایچون بر مجلس ده یوقدی . اون آلتنجی عصر اواخرنده (روریق) خاندانندن کان چار مائلهسی منقرض اولمش ، بر پولونیالی ، برده اسوه چلی پرنس روسیهیه استیلا ایتمش ، بونلردن بری (موسقووا) ده ، بریده (نووغرود) ده یرلشمشدی . روسلر بو اجنبیلره قارشی عصیان

ایتمشله ، ۱۶۱۲ ده بویوک ذاتله ایله شهرلردن کوندریلن
 سرخصلردن مرکب بر مجلس عمومی یکی بر چاری ، میشل
 رومانوفی انتخاب ایتمک ایچون اجتماع ایلمشدر . فقط چار نصب
 اولونور اولونماز بو مجلس اداره حکومته اشتراک ایتمکسزین
 طاغیلمشدر . - روسیه نك منتظم بر عدلیه سی بیله یوقدی .
 چار کیمی ایسترسه (قونوت) جزاسنه دوچار ایده بیلیردی ؛
 (قونوت ، مشین صاچاقلی مدهش بر تانار قامچسی ایدی . بو
 قامچی وجودی یارالار و بر اوروشده موتی موجب
 اولوردی) . بو جزا برچوق زمانلر عادت یرینه کچمشدی .
 اکثریا چارلرک اصول اداره سنه «قونوت اداره سی» دیرلردی .
 اک بویوک ذواتک قفاسنی کس دیرمک ایچون چارک یالکز بر
 امری کفایت ایدردی . چار بونلردن اکثرینک باشنی کندی آلیله
 کسردی . مدهش ایوان ، حیاتنک صوک زمانلرینه طوغرو
 کسیدیکی آدملر حقنده کلسایه دعا ایتدیرمک ایچون بونلرک
 بر جدولنی ترتیب ایتدیرمشدی . بو جدولده کسین باشلر
 ۳۴۸۰ نه بالغ اولیوردی . یالکز ۹۸۶ سنک یاننده (زوجه سی
 وچو جققریله برابر) ویا (چو جققریله برلکده) دیبه بر قید
 واردی . چارک بوتون عائله یی رئیس ایله برابره کس دیردیکی
 اولمشدی .

زارلان و کویبلر . - روسیه ده شهر یوقدی (موسقووا
 بیله بویوک بر قصبه دن عبارتدی) . بوراسی عادتا کویبلر حکومتی

ایدی ، و بو سبیدن ده روسیه ده بورژوا صنفی بولونمازدی .
 یالکوز ایکی صنف واردی : انلرده کویلولر ایله زادکان ایدی .
 روسیه زادکانی اوروپا زادکاننه بکنزه مزدی . بونلر ده
 بدایتده سرای زادکانندن عبارتدی (زادکان دینه ترجمه
 ایتدیکمز (دووریانو) کلهسی (ندیم) دیمکدر) . زادکان ،
 اولاً : عائله ایمراطوری تعلقاتندن ، (قینیازلر) دن (روسیه ده
 بونلر پک چوقدی) ؛ ثانیاً : سرایده بر مأموریت ایفا ایتمش
 کیمسه لرك احفادنن ، (بویارلر) دن عبارتدی . روسیه ده
 برچوق زمان قاعده تشریفات اسکیدن جدلرینک احراز ایتمش
 اولدقلری مقامه کوره تنظیم ایدلمش ، بو یوزدن ده شدتلی
 منازعلر وقوعه کلهشدی . هر عائله اعضاسی عائله لرینک مرتبه سنی
 محافظه ایلمکی وظیفه ناموس عد ایدردی . حتی چارک
 سفره سنده زادکاندن بری ، اجدادی کندی اجدادنن وقتیه
 آشاغی رتبه ده بولونمش زادکاندن برینک آلت طرفنده کی یره
 اوطوره قدن امتناع ایلمشدی . چار بو یاری اوطورتمق
 ایچون او قدر زورلامش ، فقط بویارینه دیمدیک یرنده طورمش ،
 نهایت یرینی باشقه سنه ویرمکدسه ققاسنی کسدرمکه راضی
 اولاجغنی باغیرارق سویلیوب صاووشمشدر . فقط اون یدنجی
 عصر او اخرنده چار بو منازعانه نهایت ویرمک ایچون
 سلسله تشریفاتک یازیلی بولوندینی کتابی یاقدیرمشدر .
 او تاریخدن اعتباراً زادکان صره سی هر کسک

اشغال ایتمکده اولدقلری رتبه یه کوره تنظیم ایدلمشدر. — زادکان انجق چارک ارزوسی ایله زادکاندن اولابیلردی . انلره بو رتبه یی چار ویردیکی ایچون ایسترسنه کرى ده آلابیلردی . حتی چار برنجی پول اجانبدن برینه شوپله سویله مشدی : « موسیو ، بن مملکتده کندیسنیله لاقیردی ایتدیکم آدمدن باشقه وکندیسنه لاقیردی سوبلدیکم زماندن غیرى بر زمانده هیج بر بویوک سه نیور طانیام .»

زادکانک اهمیتلرینی آرتدیران بر شی وارسه اوده چارک کندیلرینه ویردیکی اراضی ایدی . زیرا شرق حکومتلرنده اولدینی کبی روسیه ده بوتون اراضی حکمداره عانددی . کویولر طوپراغی بالکیز تصاحب ایدرلردی . اراضی یی یا چارک ویاخود خدمتکاری بولونان زادکانک حسابنه اکرلر وعادی بر صنف تشکیل ایدرلردی . بونلره (موژیق ، کوچوک آدم) دیرلردی . اون آلتنجی عصره کنجیه قدر موژیقلر هر سنه (سن ژورژ ، ۲۶ نشرین ثانی) ده بر مالکاندن اوبرینه کیتمک حقنی حائز ایدیلر . حتی بو اثناده افندیلرینی ده دیکشدره . بیلیرلردی . احوال اجتماعیه لری فرانسزلرک چفتلک یا ناشمه لر . ینککینک عینی ایدی . اون آلتنجی عصر او اخرنده وقوعه کلن حرب داخلیلر اثناسنده چارلر عمله لرک جنوب طرفلره مهاجرت ایتملرینه مانع اولق ایچون کویولرک (سن ژورژ) ده اراضی دیکشدرملرینه مانع اولشلردی . او آندن اعتباراً موژیقلر

زرع ایستدکاری اراضی به باغلی ، مال صاحبانه مؤبداً تابع
 قالمشردی . موژیقلرک طرزحیاتی اوروبا حکومتلرنده کی (۱)
 کویلولرک طرزحیاتندندها کران برحاله کلمشدی . مال صاحباری
 بونلره هفتهده اوچ کون آنغاریه خدمتی کوردیرلرلویا انلردن
 سنوی بر ویرکی (اوبرون) آلیرلردی . کویلولر افندیسنک
 و وکیلنک هر درلو هوائلکلرینه بلائمانعت وحتی فرانسه
 اسیرلرنده اولدینی کبی کویلرنده برقیامق حقنده تأمیناتده
 استحصال ایدمدن تابع اولورلردی . مال صاحبی بونلری
 کندی اوینده خدمتجی کبی چالیشدیرر ، انلره مالش ویرمز ،
 ایستدیکی کبی اولندیرر ، عسکرویا مهاجرصفتیه بریره کوندیرر ،
 حتی اوزاق یرلرده صاتبیلیردی . کذا بلاسئوال ایستدیکنی
 دوکر ، حبسده ایده بیلیردی . بو کویلولر قرون وسطی
 اسراسندن زیاده ازمئه قدیمه اسراسنه بکزرلردی . روسجهده
 بونلره (قونسولیده) ، فرانسهجهده (سهرف) دیرلردی .

روس کلیداسی . — قسطنطنیه میسیونرلی طرفندن
 خرسیتیانلنی قبول ایدن روس قومی ییزانس کلیساسنک دین
 و عاداتیده قبولی ایلشدی . روس قومی اورتودوقس ایدی ،
 الیومده اورتودوقسدر . روسلرده ایکی درلو رهبان صنفی

(۱) شمال شرقی منطقه سننده زادکان اولمادیفی ایچون بو منطقهده
 کویلولر حر قالمشدر ، (اوقرانیا) ده ، (دینیه پهر) سواخلنده ایسه
 جنکاورانه باشامقده دوام ایلشدردر .

واردی : (قاره رهبان) تعبیر اولونان راهبر مناسب ترلرده
 اوطوررلر، و تاهل ایتک حقنه مالک اولمازلردی. (پوپ) دنیلن
 یاپاسلرایسه اجرای آیین ایدرک (آق رهبان) لری تشکیل ایدرلر،
 و تاهلده ایده بیلیرلردی. قاعده تاهل همان مجبوری کیدی .
 کلیسای قاره رهبان اداره ایدر ایدی . چونکه بسقبوسلر
 بیسکار اولق مجبوریتنده بولونقلری ایچون یالکیز راهبر
 میاندن انتخاب اولونوردی . پوپلر همان همان ، برلکده
 یاشادقلری کویلولرک براز فوقندهلردی . بونلر عملی بر صنعت
 یاپار کچی چراقلق ایدرک پوپ اولغه حاضرلانیلردی .
 بونلر یالکیز الهی اوقومنی ، آیینلر اجرا ایتکی اوکره نیرلر ،
 اوقومه پیده شوپله بویله بیلیردی . حتی برچوق زمانلر بونلرک
 وعظ ایتلریده ممنوعدی .

روس کلیسای (بیزانس) کلیساسنه تابع دکلدی . کندیسنه
 مخصوص اسکی اسلاوون لساننده یازلمش بر دعا کتابی واردی .
 اون آلتنجی عصرده چار بوتون روس کلیساسنک رئیس اولق
 اوزره بر بطریق نصب ایلشدی . صیق صیق قوپیه ایدیلان
 دعا کتابلری قرون وسطاده پک زیاده بوزولمش اولدینی ایچون
 بطریق نیقون ۱۶۵۴ سنه سنده مستنسخلرک خطا و نواقصنی
 تصحیح ایتک و بوتون متنلره آیینلری اسکی صفوتلریله
 تأسیس ایتک ایسته، شدی . حتی موسی الهی بوتون بسقبوسلردن
 مرکب بر مجلس روحانیده التزام ایتش ایسهده بو اصلاحات

ینہ رزالتہ میدان ویرمشر . روسلر عباداتک ظواہرینہ پک
 زیادہ اہمیت ویرلردی؛ حالادہ بویله درلر . بیزانس کلیسا سنک
 او صیقی پرهیزلرینہ رعایت ایدرلر ، تمام قرق کون نہ ات ،
 نده یمورطہ بیرلردی . ہر اودہ بر اعزہ رسمی (ایقون)
 بولوندرلر ، بونک اوکنده دعا اوکورلر ، وموم یاقارلردی .
 روسلردن بر چوغی اسکی عبادت لرنده اصرار ایتشلر ،
 بطریقک تصحیحاتی قبولدن امتناع ایدرک اصلاح ایدیلن
 عباداتک جاری اولدینی کلیسالرہ کیتمکدن امتناع ایتشلردر .
 بونلرہ (معزلہ ، راسقولنیک) دیرلر ؛ کندیلری ایسہ (اسکی
 معتدلر) نامنی طاشیرلردی . بونلرہ اورتودوقسلرینیندہ کی فرق
 یالکز ظواہر عاداتہ متعلقدر . اسکی معتدلر اوچ پارمقلہ
 استاوروز یا عیوب ایکی پارمقلریلہ یابارلر . حضرت عیسی ایچون
 (ایسوء) دیمزلر ، (پی سو) دیرلر . صقال تراش ایتمکی ویا
 توتون ایچمکی عفوایدلر برکنہ عدایدرلر . ایشتہ راسقولنیکلر
 بو صرف شکلہ متعلق مسئہلر ایچون کندیلرینی دوچار ظلم
 ایتدیرلر ، حبسہ کیرلر ، اعدام ایتدیرلردی . بونلر ایکی
 عصرمدت ، ظالم کچیرمشلردر . حتی بوکونده بالخاصہ شمالدہ کی
 کویلولر ایلہ شہرناجرلری آرہ سنده بونلردن پک چوق بولونور .
 روسیہ غریب مدینتک ادغالی . — روسلر اون آلتنجی
 عصر ختامندہدہ آلآن آسیا اقوامندن معدود ایدیلر . بونلر
 اوزون صقال بر اقبیرلر ، شرقیلرکی اوزون وبول البسہ کیرلر ،

قادیئلرنی اولرینه قاپارلر ، یوزلری اورتولو اوله رق سوقاغه چیقاریرلردی . غرب صنایعنگ هیج بری ایله مشغول اولمازلر ، غرب بیلردن نفرت ایدرلر ، قاتولیکلرله پروتستانلره بلاتفریق رافضی نظریله باقارلردی .

اون آلتنجی عصر اواسطده (۱۵۵۳) چین یولنی کشف ایتمک ایستهین انکلیز کیمجیلری (بحر ابیض) ی کشف ایتمشلردی . اوزمان چار ایمراطورلغنه مجاور بوندن باشقه دکز یوقدی (بالطق ساحلاری اسوچ قرالنک ، قره : کز ساحلاری ده عثمانلی پادشاهنگ ایدی) . (آرقانجهل) لیمانی تمام بر عصردن زیاده مدت روسیهنگ آوروپا ایله یکانه نقطه مناسبتنی تشکیل ایلمشدی . چار بوراده شهر تأسیسنه مساعده ایتمش (۱۵۸۳) ، بوراده اوطوران انکلیز و فلمنگ تاجرلرینه تجارت انحصاری ویرمشدی . مدھش ایوان ایٹالیالی معمارلرایله مهندسلر کتیرتمش ، حتی برده مطبعه تأسیس ایلمشدی .

بونکله برابر روسلر حالا باربارلنی محافظه ایدیورلر ، چارک آره صره آوروپا سرایلرینه کوندردیکی سفارت هیئتلیر ایلان وحشی کومه لری حالنده کلیورلردی . ۱۶۵۶ سنه سنده (لیوورنو) یه کلن ایکی سفارت هیئتی سردارلقلی و قابلقلیله ایٹالیانلری حیرت ایچنده براقشلردی . بونلر البسه لرنی آرقه لردن هیج چیقارمادن یره یاتورلر ، مندیلارنی کلاهلرینه صوقیورلردی . سفرده یمکه چتالی باتیرمق ایچون

یك پارچه لری صحنن اللریله آلیورلردی. روسلره برچوق
 ارزاق ایله فوجیلر طولوسی شراب ویرلمش ، بونلر ؛
 عودتلرنده بویوکجه بر آغراق کوتوره لم دیسه فوجیلری ده
 برابر کوتورمشلردی. روسلرراق ایچه ایچه سرخوش اولورلر ،
 خدمتجیلرینه باستونله طباق آتارلردی . حتی شاعرلردن بری
 هیئت سفارتدن برینک شرفنه بر شعر تنظیم ایتمش ، اوبری
 حدتلمش ، بو سفر اونک شرفنده بر شعر تنظیم ایدلمش ،
 فقط بودفعه اوته کی کندیسی ایچون یاپیلان شعرک اوقدرانی برکاغده
 یازمادیغی ایچون کوجنمشدر . بونلر روسجه بیلمدکلری
 کبی کوندرلدکلری مملکتک جغرافیاسنی ده بیلمزلردی . چاره
 کوندردکلری راپورلرده کچدکلری شهرلرک اسملرینی هپ
 یا کلش یازارلردی .

روسلر بو جهالتلریله برابر قاعده مراسمده صوک درجه
 رعایت ایدرلردی . ۱۶۸۱ ده بر تجارت معاهده سی عقد
 ایتک ایچون اون دردنچی لوئی نزدینه بر هیئت سفارت
 کوندرلشدی . هیئت سفارت رئیس پوته مکین ، معاهده ده چارک
 هراسمی کچدکجه : « حشمتاب چار حضرتلری ! » دیسه تکرار
 ایدردی . حتی فرانسه قرالنک کوندردیکی جوابنامه نک چاردن
 آنان جوابنامه دن پک کوچوک اولدیغندن طولایی شکایت ده
 ایتمشدی . بونک اوزرینه مومی ایسه جوابنامه نک یازلدیغی
 سختپانک ده بویوک اولدیغی و بویله کوچوک کورونمسنک

سببی غایت ایجه قاتلانمش اولماسندن ایلری کلدیکی بیان اولونمشدی . اون دردنجی لوئی مومی الیهی حضورینه قبول ایلدیکی زمان پوته مکین بر قاج لاقیدی سویلدکن صوکره طورمش . بونک اوزرینه ترجمان: «دهاسویلیه جکسه ک سویله . یوقسه بن سویلیه جکم .» دیمش ، پوته مکین بوکا جواباً : — کورمیورمیسک ، بن چارک اسمنی تلفظ ایدیورم ، قرال نه یرندن قیملدایور ، نده شابقه سنی چیقاریور . « دیمشدر . مکر پوته مکین ، چارک اسمنی هر تلفظ ایدیشنده اون دردنجی بوئینک هب آیاغه قالقماسنی آرزو ایدرمش !

فقط بو وحشی قومک اویله اوزون مدت خرستیان مدینتندن اوزاق قالامیه جغنه شبهه یوقدی . مع مافیه روسیه یه مدینتک قاتولیک پولونیادنی ، یوقسه شهمالده کی پروتستان مملکتلردنی داخل اولاجنی تمام بر عصر قدردوشو نولدی . یالکیز ، روس سه نیورلرندن بر قاجی پولونیا قیافتنی قبول ایتشلردی .

شمال اقوامی طوغرودن طوغروه روسیه نك قلبگاهنه کیردکلی ایچون اولا بو خصوصده شمال اقوامی تقدم ایتدی . چازلر اجنبی بر مملکته استیلا ایتدکلی زمان اهالیدن بر قسمنی حکومتلرینه یرلشدیرمک ایچون انلری بر لکده کوتورمکی عادت ایتشلردی . حتی ۱۵۶۵ سنه سنده ایوان بالطق ساحلارندن آلدینی ۳۰۰۰ آلمانی (موسقووا) یه کنیرمشدی . ایشته بو صورنله راهبلی و کلیسازلی ایله بر اجنبی صنفی تشکل ایتشدی . بو

صنف اون آلتنجی عصرده چار طرفندن جلب ایدیلن ویاخود پاره قازانمق ایچون کلن مهندس ، دولکر ، معدنجی ، طبیب ، اجزاجی ، تاجر وضا بطرله بر قات دها بویومشدی . بونلرک ایچنده هر مملکتدن آدم واردی . فقط اک زیاده حاکم اولانلر آلمانلر ، فلمنکلیر وانکلیرلردی . بونلر اولا روسلره مختلط برحاله یاشامشلردی . ۱۶۵۲ سنه سنده پک مغرور ، قیافتلری منتظم بر حالده ایدی . کندیلرینه روس البسه سی کیمک منع ایدلمش ، کافه سی (موسقوا) خارچنده آیریجه بر محله یه یراشدیراشدی . بو محله یه اجنبی (صلوبودا) سی دیرلردی . بونلرک نفوسلری ۱۶۷۸ سنه سنده ۱۸۰۰۰ کشیدن عبارتدی . روس قومی بو اجنیلردن نفرت ایدر ، عادتلرینی قبول ایتمک ایسته مزددی . چارلر ایسه روس دینه حرمت ایدرک بویومش اولدقلری ایچون بورافضیلرک مدینتی قبولده کندیلرنجه هیسج بر سبب کورمزلردی . اون سسکزنجی عصر اواخرنده تخت حکومته خاقلرندن بسبتون باشقه درلو تربیه کورمش برچار کجدی . برنجی پترو (پیهر) ، دها چو جق ایکن چار اعلان ایدلمش ، فقط همشیره سی صوفی زمام اداره یی آینه آلوب پتروی بر صیفیه قیاتمشدی . پترونک تحصیلی پک زیاده اهل ایدلمشدی . پترو نه لاینجه ، نه ده املا اوکرنمشدی . حتی تربیه دینه سی ده یوقدی . فقط اجانبک بعضیلرله طانیشمش ، انلرک محله سنه کیدوب کلش ، انبارلردن برنده متروک برحاله

بر اقیلمش اسکی بر کچی بی سراق ایش، و دانما کیجیلک و عسکرلک اوینامقاه وقت کچرمشدی. حتی پترو (آرقانجهل) . کیدرک بوراده کیجیلر و دولکرلر آره سندهده یاشادی . دهها صوکره (۱۶۹۷) قره دکزده بر قوه بحریه احداث ایتمک نیتنده بولوندینی زمان برای تدقیقات اوروپایهده سیاحت ایتدی . تعلیم و تربیه کورمک اوزره کندیسيله برابر ۲۰۰ : ۲۵۰ قدرده روس کنجلیری کوتوردی (۱) .

پترو روسیه به عودتنده روسلرینی آوروپالی یایمه چالیشدی . پتروده روسلرده کی اعتقادات سخینه ، روس عادانه محبت ، روس دینه حرمت هیچ یوقدی . کوکلی غرب مدینته مفتونیتاه . مشجون ایدی . بومدیتی کندی حکومتنه ادخال ایچون هیچ وقت کچیرمک ایسته مزدی . پترو ، بر چارک خاتی کندیسنه اطاعت ایتدیرمک ایچون یالکیز بر امر ویرمسی کافی اولدیغنه آیشمش بولوندینی ایچون تبعه سینه عادتیرینی دیکشدرملرینی امر ایتدی . اطاعت ایتمیلرکده قرباچ جزاسینه ویا جزای نقدیه دوچار اولاجقیرینی آکلادی . صقال اوزادلسنی منع ایتدی . سراینده کی سه نیورلرک صقاللرینی کندی آلبه کسدی .

(۱) بویوک پترونک کنجلیکی حقنده درحال برجوق افسانهلر وجوده کلمشدرکه وولتهر بونلرک کافه سی طوبلامش وهر کسه ده قبول ایتدیرمشدر . حتی روایته کوره پترو (فلمنک) ده (ساردام) بحریه دستکاهلرنده اپنی مدت عمله صفتیله چالیشمشدر . حال بوکه پترو (ساردام) ده انجق سکز کون قدر قالمشدر .

دها سوکرده بر او قاز نشر ایدرک بوتون مأمورینک آوروپا قیافتنی لابس اولمالرینی امر ایتدی. روس کلیساسنک بر «نبات شیطانی» اولق اوزره منع ایلدیکی توتونه مساعده ایتدی. بوکا ایلك اول کندی نمونه امتثال اولدی. قادینلرک مجلسلرده بولونمالرینی و بوکبی مجلسه آوروپا قیافتله و یوزلری آچیق اولارق کلرینی امر ایتدی. دها سوکره (پتربورغ) ده بر سالون حیاتی احداث ایتک ایسته دی. بللی باشلی سه نیورلره توبته جمعیتلر عقد ایتلرینی، یعنی زادکانک زوجه لرله برابر کلوب آوروپا لیلرده اولدینی کبی اکلنملری، دانس ایتلری، چالنی چالمالری، توتون ایچوب مصاحبت ایتلری ایچون مسله مره لر ویرملرینی امر ایتدی. ایچیله جک مشروبانک نوعی ده قانون ایله تعیین ایلدی. بالطبع بو مجبوری جمعیتلرده بدایه فرانسز سالونلرنده اولدینی کبی چوق کشی طوبلانامادی. چونکه روس قادینلری اولرده قاپالی یاشا، نه آیشمش اولدقلری ایچون دائما سسز و غیرمتحرک بر حالده طور یورلر، ارککلرده یالکز ایچوب سرخوش اولیورلردی.

پترو دها بدایتده ملتنگ تعصبه طوقونا جق اصلاحات ایله ایشه باشلامش، هم حس ملی بی، هم ده حس دینی جریحه دار ایتشدی. بونک ایچون هرکسک عداوتی جناب ایتدی. — رهبان صنفی پترونک رافضیلرله دوشوب قالدینی کوردکلرندن پتروی دینی محو ایتک ارزوسنده بولونمقله اتهام ایدیورلردی.

صقال تراش ایندیرمک رافضیلکدن باشقه بر شی دکلدی. حتی
 پطریقردن بری صقالسز بر آدمک انساندن زباده فاره یه
 بکزه دیکنی سویله مشدی . - روس اردوسی (استرالیج) ،
 چارک بوتون امر وقومانداپی اجنبی ضابطلره تودیع ایتسندن
 طولایي ممنون دکلدی . - (موسقووا) اهالیسی ایسه چارک
 اجنبی (صلوبود) ینه مساعده کارانه طاوراندیغنی ودینی آیینلرده
 موقعنی اشغال ایتمکدن امتناع ایندیکنی کورمکه بر درلو تحمل
 ایده میورلردی . - پترونک زوجہ سی اودوقسیا ایله اوغلی
 آلکسی ده غیر ممنونلره یاردم ایدیورلردی . آلکسی هیچ اجنبی
 لسانی اوکرنمک ایسته میور ، پدربینک وفاندن صوکره « هرشی »
 حال اصلیسنه ار جاع ایده جکنی « بیان ایدیوردی .

روسلردن بر چوغنی بر چارک بویله بر طور وحرکتده
 بولونابیلمسنی بر درلو عقللرینه صیغدیرامیورلر ، حتی پترونک
 حقیقی بر چار اولمادیغنی ، بر آلمان زاده یاخود پترونک یرینه
 اوروپادن کله بر اجنبی اولدیغنی سویلیورلردی .

پرویوی التزام ایدنلر یالکنز ارقداشلیری ایله اجنبیلر ایدی .
 فقط کندیبسی چار اولدیغندن وروس خلقی ایسه چاره اطاعته
 آلیشغین بولوندیغندن بر درلو عصیان ایده میورلردی . غیر ممنونلر
 یالکنز کیزلی کیزلی شکایت ایتمکه اکتفا ایدیورلر ، بونلرکده
 آغزینی قاباتمق ایچون کندیلرینی توقیف ایتدیرمک ، بر قاچ
 قونوت ضربه سی ایندیرمک کفایت ایدیوردی .

پترو بوتون مقاومتلری قیرمق ایچون اوتهدنبری قوللانیدینی
 مسدئکی ، یعنی قوت استعمالی التزام ایتدی . - پترونک
 غیبوبتمده استرملیچ عصیان ایتشدی . پترو عودتنده بونلری
 قونوت ضربه لرله مجارات ایتدی . صوکره بر چوق اوزون
 تحته پارچهلری دیکلدی . استرملیچلری بونلرک اوزرینه صره
 ایله یاتیرارق کندی ایله قفالرینی کسدی . - پترو رهبان
 صنفتدن قورتولمق ایچون بطریق قالدیردی ، و بردهاده بطریق
 انتخاب ایتدیرمدی . - عالمه سی میانده کی مخالفینه غلبه ایتک
 ایچون زوجهنی قونوت جراسنه ، اوغانیده اعدامه محکوم
 ایتدی . صوکره اسیره بر پولونیالی ایله ازدواج ایدرک یکی
 برعائله تشکیل ایلدی . - پترو چاریچیه تاج کیدیردی . انکله برلکده
 (پتروسبورغ) ده اوطوردی . ایکی قیزی آوروپالیر طرزنده
 تربیه ایتدیردی . بالاخره پترونک آثارینه ایشته بو قادینلر
 دوام ایتشلردر .

پترو موسقووالیلردن قورتولمق ایچون اجنبی برملکتده ،
 بالطق جوارنده یکی بر پایتخت تاسیس ایتدی . بورایه آلمانجه
 برآد ، (پتروسبورغ) دیدی . (آرقانجهل) اهالیسنک برقسمنی
 زورله کتیره رک بورایی ده اسکان ایتدی . بوتون سه نیورلره
 بوراده او یاپدیرمالرینی امر ایلدی .

پترو ، زمان حکومتنی آوروپاده حیرتله کوردیکی صنایع
 و نظاماتی روسیه یه ادخال ایتکله کچیردی .

پترونک آوروپا مدینتنده اک ای کوردیکی شی اختراعات
 مادیه ایدی . حتی کندیسی دولکرلک ، عسکرلک ، کیمجیلک
 و حکاکلک ایتمشدی . پتروروسییه اجنیلردن صنعتکارلر ویا
 عالمر کتیرتمه مشدی ، عملرلر ومهندسلر کتیرتمشدی . تأسیس
 ایلدینکی مکتبلرده (بحریه آقاده میسی و محاسبات مکتبی کبی)
 عملی مکتبلردی . روسجهیه ترجمه ایتدیردیکي کتابلرده فنونه ،
 علم اقتصاده ، جغرافیایه متعلق اثرلردی . - پترو صنایعک
 تفرعاتیه بالذات مشغول اولوردی . قوندره جیلره ماللرینک
 مصادره اولوناجغنی بیان ایدرک طرز اعمالاتی دیکشدرملرینی
 امر ایدر ، قوندره لرك آلتنه ایری چیوی اورولاسنی ویاخود
 چوق تحتیه صرفنه لزوم کوستردیکي ایچون روس اصولنده
 کیلر انشا ایداسنی منع ایلر ، اوراقلرک و طیربانلرک شکلنی ،
 اودونک نصل کسپله جکنی ، اگینک نصل ییچله جکنی بالذات
 تعیین ایدردی . پترو بر قانونده دییورکه : « بزم ملت هنوز
 اوکر نیکه باشلامش ، الفبا او قومقدن اجتناب ایدن چوجقلره
 بکنزر . او درجه ده که ، معلم اوننی زورلامغه بهمه حال مجبوردر ،
 واقعا بدایشده بو اونلره خوش کورونمزسه دهدها صوکره
 ایتشی اوکر ندکاری وقت معلملرینه فوق العاده منتدار اولورلر ،
 روسی زارطانک دکیشمسی . - پترو ، چارک نفوذ وصلاح
 حیثی کوجولتمه دی ؛ اوزمانه قدر اسکی روسیه جه معلوم اولمیان
 براردو ایله منتظم بر اداره کبی وسائط بخش ایدرک بو نفوذی

تزیید ایتدی . روس قومنك عاداتی هیج نظر دقتہ آلمہرق
 ممالک غربیہ نظاماتی مملکتہ ادخال ایتدی . حتی بو نظاماتك
 اسملرینی بیله دكیشدیرمكه لزوم کورمہدی . - اردوسی فلد
 مارشالری و جنرالریله عادتا آلمان اردوسی کبی تنسیق ایتدی .
 عسکرلر اوروپالی واری اونیفورمه کیپرلر ، اوروپا عسکرلری
 کبی مساح بولونورلر ، پیاده و دراغون صنفلرینه آیریلرلردی .
 (یالکز قازاقلر اسکمی ملی قیافتلری ایله اسکمی اصول حربلرینی
 محافظه ایتشلردی) . - پترو ، دکزدن صوك درجه قورقان
 روسلری بحریه خدمتہ کیرمکه اجبار ایدرک فلنك دوناماسی
 کبی برده دوناما احداث ایتدی . - اسوهج دوائر حکومتك
 عینی اولق اوزره بر اداره ، ۹ اعضالی بر ستاتو ، امور
 حکومت ایچون قوللهزلر ، اداره وضابطه ایچون حاکم
 ووالیر ، خفی برده قانچلاریه احداث ایتدی . بو قوللهزلرده
 رئیس روس ، رئیس وکیللریده اجانبدن ایدی .

بو یوک پترو بو اصول ادارهیی تنسیق ایتک ایچون روس
 زادکانتی آلت اوست ایتدی . (بویار) لق عنوانی لغو ایدرک
 بر (سلسله مراتب) احداث ایتدی . بوتون ملکی مأموریتلر
 اردودمکی رتبه لره (۱) قارشیلق اولارق وضع ایدلدی . بو

(۱) بوندن بر قاج سننه اول سبریاده نفی بر سیاحت اجرا ایدن
 دارالفنون معلملرندن بری کوچوک رتبهلی ضابطلرک اداره سنده بولونان
 پوستلردن کچرکن اکثریا پوسته قوماندانی طبق برمانوقه مراجعت ایدرکبی

صورتله هر بری بر رتبهیه معادل ۱۴ رتبه واردی . امور
ملکیده باش وکالت برنجی رتبه ایدی . بو رتبه اردوده فلد
مارهشاله معادلدی . قوللهژ اوراق مأموریده اک دون رتبه
ایدی . بو رتبه چاوش رتبهسنه معادلدی .

خدمات عسکریده اولدینی کبی خدمات ملکیدهده بر
رتبهدن دیگر بر رتبهیه ترفیع ایدیلیدی . روس هیئت
اجتماعیهسی عادتا بر آلی کیدی . بو آلایده هرکسک رتبهسنه
کوره موقعی واردی . قوللهژدن چیقوب دارالفنونه کیرن
بر طلبه آرتق آلی صرهسنه داخل ایش بولونور، و ۱۴نجی
رتبهیی احراز ایش اولوردی .

اصحاب رتبهک هیئت عمومیهسنه (چین) دیرلر . روسیهده
چینلردن باشقه زادکان طانماز . هر مأمور ، چارک خدمتنده
بولوندینی ایچون اصیلدر . هر اصلکده مطلقا بر مأموریتی حائز
بولونماسی لازمدر . حتی پترو ، ایکی بطن ظرفنده هیچ بر
مأموریت آلماش اولان هر عائلهک زادکانلغی لغو ایدلمسینی
قاعده اولارق تاسیس ایشدی . روسیهده زنکین بر تاجری ،
عالی ، محرری ، طبیعی اعزاز ایچون کندیسنه (نامزدی
تجارت مشاوری کبی) بر مأموریت عنوانی ویریلیر ، بو عنوان
اکا اصحاب رتب آرهسنده بر موقع تامین ایدر ، انی بیکباشی

دائماکوب امر و قوماندایی کندیسنه تودیع ایدرمش . مکر مومی الیه
معلم عنوانی حائز اولدینی ایچون آنلرجه قوماندان عد اولونورمش !

ویا میرآلای درجه‌سنده بولوندریر .

روس اصالتی، کاملاً بر ماموریت اصالتی حاله کلمشدی .
 بو اصالت اوللری اصحاب رتبه کافه درجاتنده چوجقلمده
 انتقال ایدردی . بوکون ایسه دون رتبه لر صرف شخصی اصالتدن
 باشقه بر شی بخش ایتمز .

رشوت . — روس امور اداره‌سنده بولونان مأمورلر
 برچوق زمان آوروپا عنوانلری آلتنده اسکی وحشیانه عادتلرینی
 محافظه ایتمشلردی . وقتیه چار بر کیمسه یه مأموریت ویردیکی
 زمان کندیسنه : « مأموریتکله تعیش ایت ، قارنکی طویور! »
 دیردی . بونک ایچون مأمورلرده اداره ایتدکلی کیمسه لردن
 پاره چکمک ایچون موقعلرینی برواسطه تلتی ایدرلردی . فقط
 بویوک پترو ، مامورینک معاشلرینی کندیلری تدارک ایتملرینه
 راضی اولمادی . بونلرک کندی طرفندن ویریله جک بر اجرته
 قناعت ایتملرینی ارزو ایتدی . بناء علیه مأمورلرک هدیه آلملرینه
 مانع اولدی . ارتکاب ایدن بر قاچ والینک قفالرینی کسیدردی .
 اک برنجی مالیه مأمورینی بر خرسز کبی تأدیب ایتدی . فقط
 مأمورلرینه اصلاح نفس ایتمدیلر . حتی روایتسه کوره برکون
 چار ، ارتشا ایله محکوم اولان هر مأمورک اعدام ایدلسنی
 متضمن مدعی عمومیسنه بر قانون یازدیررکن مدعی
 عمومی شوسوزلری سویلشدی : « دیمک ذات شاهانه لری
 حکومتلری داخلمده یالکز باشنه قالمق ایستورسکز؟ چونکه

بز همز چالارز ، فقط کیمیمز دها زیاده و دها چوق ، کیمیمزده آچوق بر مهارتله . - رشوت بر عادت حکمنده ایدی . اداره مأمورلری ایله اداره آتنده بولونان کیمسه لر بر مأمورک ایفای وظیفه یه مقابل پاره آلماسنی طبیعی کوررلردی . حتی زمانمزده بیله روسیه حکومتی رشوتی کتمه موفق اولمش ، فقط بسبتون قالدیرمغه موفق اولامامشدر .

اوره سکنجی عصرده روسیه ده امره حکومت . - بویوک پترو آروبا نظامات و مدینتی زورله قبول ایتدیرمشدی . عین زمانده روسیه یی عسکری و بحری بویوک بر دولت حاله کتیرمشدی . پترو ، اسوچ قرالنک اردوسنی محو ایتمش ، بالطق ایالتلرینک کافه سنی ضبط ایلشدی . کذا قره دکز ساحلنده کی ایالتلری ده ضبط ایچون سلطان احمد ثالثه قارشنی حربه قیام ایلش (ایدی ایسه ده بالطه جی محمد پاشا قومانده سنده سوق اولونان اردویه (پروت) جوارنده اسیر اولمش وزوجه سی قاتهرینانک فراستی سایه سنده قورتولشدی) . پترو ، پولونیا یه استیلا ایچون اسوچیلرک استیلا سندن استفاده ایتمش ، پولونیا یی مدافعه بهانه سیله پولونیا زادکانی و ساطتیه پولونیا قرالنه بر قانوننامه قبول ایتدیره رک (۱۷۱۷) بو قانوننامه واسطه سیله پولونیا ناک ۱۸۰۰۰ کشیدن فضله اردو بولوندرماسنی منع ایلشدی .

پترو ، وفاتنده (۱۷۲۵) روس قومنی غیرممنون ، یکی یکی

ویرکیلره ازیش ، حربلر و آنفاریه لره محو اولمش بر حالدله براقشدی . فقط اسکی وحشی و یاری آسیالی (موسقوفستان) ی بویوک بر آوروپا حکومتی حالنه قویمغه موفق اولمشدی . تمام بر عصره متوقف اولان بو تبدلات مشکله بی ، پترو بر نسل ظرفنده اجرا ایلمشدی .

فقط عجله ایله یاپیلان بو ایش نیه نا تمام ، و او درجه ده صا غلام دکلدی . روسلرک حسیاتی هیچ دکیشمه مشدی . پترو نک عزم و متاتی ایله احداث ایلدیکی شیلری محو ایتمک ایچون باشقه بر چارک یالکز برارزوسی کافی ایدی . حتی بر زمانلر ، بو چارک ظهور ایتدیکی بیله ظن اولوندی . بویوک پترو نک حقیدی ایکنجی پترو (موسقووا) یه کلدی . اسکی چارلر کبی آوجیلغه و ایچکی به باشلادی . مجلسلر ایش کورمکدن فارغ اولدی . آزقالدی بالطق ایالتلری ده ترک ایدیله جکدی . فقط ایکنجی پترو نک وفاتندن سو کره اداره حکومت بر برینی متعاقب اوچ قادینه انتقال ایتدی . بونلر (پتروسبورغ) ده او طور ارق اداره حکومتی سو کیلر بنک آلرینه براقدیلر . بویوک پترو نک آثارینی (پتروسبورغ) سرای خلقی ایله مونیخ ، بیرون ، اوسته رمان ، له طوق کبی اجنبی مأمورلر خلاص ایتدیلر . بو آثار او چنجی پترویه زوجه اولوق اوزره روسیه یه کلن بر قادین ، قاترینه طرفندن ده بسبتون تحکیم ایدلدی . قاترینه ، قوجه سنی باشندن آتوب کندی سنی چاریجه اولارق تویج ایتدیردی .

اون سکزنجی عصرده روس زادکانی آوروپا عاداتنه آلیشارق بو عادتلی کمال مسرتله قبول ایتدیلر . آرتق بویار اولقدن وازکچوب اوروپالی برزجنتلمن اولدیلر . چوجقلمده فرانسزجه دن باشقه بر شی تحصیل ایتدیلر . حتی بر زمان کلدی که معتبر جمعیتلرده روسجه قونوشمق بيله اونودولدی . روس لسانی خدمتچیلرله عوام لسانی اولدی .

فقط بوتبدلات یالکمز زادکان ایله مأمورین عالمنده وقوعه کلدی . کتله عوام ، کویلولرله تاجرلر ، ینه کندی لسانلرینی ، عادتلرینی و اورتودوقس دیننه مربوطیتلرینی محافظه ایلدیلر . ایشته بو صورتله روس قومی ایکی قسمه آیرلدی : بری آوروپا اصوانده مدنیلشمش واداره حکومتی آینه آلمش بر آریستوقراسی (کبار صنفی) ، دیکریده اداره حکومتیه آ کلامادن و سومیه رکتابع نیم باربار و آسیالی اهالی صنفی ایدی . روسلر بو کون هپ بر یرده طوبلانان بو ایکی قومی پکدیکرینه مزج ایتکه چالیشیورلر .

ایکنجی فصل

اون سکیزنجی عصرده مستملکات ادارهسی

اون آلتنجی و اون یدنجی عصرده

آورویا مستملکهری

انحصار اصرلی . — دها اون آلتنجی عصرده ، بحر محیط کیرده کیلری بولونان آورویا حکومتلرندن بشنکده مستملکهری واردی . فرانسه وانکلتره حکومتلری ایسه متادیامستملکهری صاحبی اولیورلردی .

او زمانلر بوتون حکومتلرده کړک مستملکهرک غایهسی ، کړک انلرک صورت ادارهسی حقنده کی دساتیر بربرینک عینی ایدی . مستملکهره وطن اصلی داخلنده تأمین معیشت ایدهمین اهالی بی قبوله مخصوص بوش اراضی نظریله باقیلیردی . اورویانک نفوسی الآن مکمل دکلدی . بوکونکنندن اوچ مثلی آز ایدی . حتی بر چوق مملکتلرده کنندی طوبراقلرینی سوره جک اهالی بیله یوقدی . بناء علیه بو اراضینک بر قسمی ایشله نهمش بر حالدله قالیردی . هیچ بر مملکت نفوسدن صیقندی چکچک درجهده چوق اهالی به مالک دکلدی . حکومتلر (بر جدید) دن رلر آلدله ایدرک یالکنز بورادن ایده جکلری استفاده بی نظر دفته آلمشردی . اک زیاده آرانیلان مملکتلر ، بهارات ،

شڪر ، پاموق وقهوه ڪبي اڪ قيمتدار ذخيره لڙ وجوده ڪتيرن
منطقه حاره ممالڪي ايدى. آمريڪاي شهاينڪ اڪ صحى مملڪتارى
اون يدنجي عصره ڪلنجيه قدر بوم بوش قالمشدى. هله اوسترايالي
هيچ ڪيمسه آرزو ايتيوردي .

مستملڪار (حڪومت مالڪانهسى) نذن معدوددى. حڪومت
انلري ڪندى منفعتنه ايشله تير، بوتون ڪارلري حڪومت ڪنديسنة
تخصيص ايدردي . بناء عليه مستملڪه سنڪ محصولاتى
آلمق حتى يالڪز ڪنديسنة مخصوص اولماسنى قاعده اساسيه
اتخاذ ايلشدى . (صوندا) آطه لرينه صاحب اولان فلمنڪيلير
اوروپا ليلرك بورايه چيقيمالرينه مانع اولورلردى . بونلر بهاراتى
يالڪز ڪنديلري طوبلامق آرزو ايتدڪلرندن نظارت آلتنده
بولونديرلمارى قولاي اولان برقاج آطه دن ماعدا يرلرده بهارات
ديكلمه سنه مانع اولورلردى . بو آطه لرده قاجاچيلغك
اوكنى آلمق ايچون قلعه لر انشا ايدرلر ، والير ايسه سائر
آطه لرده طبيعى صورتده يتيشن بهارات فدانلرينى سوكمك
ايچون تفتيش اجرا ايلرلردى .

اون سڪزنجي عصرده مستملڪار نفوسلانغه باشلادينى
زمان مهاجرلر ڪندى مزروعاتنڪ محصولاتى اوروپايه
اخراج ايتمڪه وڪنديلري قوللانغق ايچون لزومى اولان
امته يى اوروپادن ڪتيرتمڪه باشلامشدرلر . حڪومت بو تجارتي
يكي بر منبع واردات تلقى ايتمش ، مهاجرلرڪ حبوباتنى صاتين

آلوب انلره مانیفاتوره لی اشیا صاتمق حقنی یالکز کندیسنه تخصیص ایشدر. دهاضوکرده مستملکات تجارتنک اموال حکومتدن معدود اولدیغنی بیان ایشدرکه ایشته (انحصار) قاعده سی بوندن عبارتدر .

تجارت شرکتلری . — حکومت ، انحصارینی بالذات ایشلمزدی ؛ شرکتلر حالنده تشکل ایشم خصوصی کیمسه لره احاله ایدردی . بو باده مودل اتخاذا اولونابیله جک شرکت ، ۱۶۰۲ سنه سنده فلمنکده تاسیس اولونان (هند شرکتی) ایدی . — فلمنکلیر اون آلتنجی عصرده هند ذخیره سی آلمق ایچون (لیزبون) کیدرلردی . فقط یابدقلری عصیان اوزرینه ایکنجی فلیپ فلمنکلیرک پورتکیزلره تجارتده بولو . تالیرینی منع ایشدی . بونک اوزرینه فلمنک کیلری حبوباتی طوغرودن طوغروه هند لیمانلرینه کیدوب آیلرلدی . فقط بو ، تهلکلی بر حرکتدی . پورتکیزلیر بحر محیط هندیده حرکت ایدن اورویا تاجرلرینه قورصان نظریله باقیورلردی . خصوصی برطاقم کیمسه لرایسه غیر معلوم ودشمن بر ملکته بو تجارتی تنظیم ایده جک درجه ده زنکین دکلردی . بونک ایچون ، پورتکیز کیلریله محاربه ایده بیله جک بر حرب دوناماسی ایله تاجرلره معلومات ویره بیله جک ، یرلی پرنس لره مقاوله لر عقد ایلیه جک آریجه بر مأمورین هیئتنه احتیاج واردی . — ایشته فلمنکک بو تشبته پاره لرینی قویمق ایسته بن

زنڪينلری ایلہ شهرلری سرمایہ لری برلشدیردیلر. بو صورتله برچوق (تجارت اوطه لری) تشکیل ایتدیلر. هراوطه کنديسنه تائڊ کيلری صاتين آلوب تجهيز ايدردی. فقط بونلرک عمومی، بر (قومپانيه) حالنده ایدی. بو قومپانيه نك حكومت طرفندن منصوب، مصالح مشترکيه يعنى حرب دونانماسی ایلہ اردونك اعاشه سنه و قومپانيه نامنه پرنسلرله مقاوله عقدينه مأمور ایدی مدیری واردی. حكومت، هندستانله تجارت انحصارینی قومپانيه توديع ایلشدی. قومپانيه، ليما نلرينه کندي کيلرندن ماعداسنی قبول ایتبوردي.

بوتون سرمایہ ۲,۱۵۳,۱۵۳ اسهامه آیرلشدی (اسهامك هربری ۳۰۰۰ فيلورین قیمتندہ ایدی). قومپانيه ايلك او كجهر او قدر بويوك ايشلر ياپامادی. حتی ۱۶۱۰ و ۱۶۳۴ سنه لری بيننده كچن ۲۴ سنه نك اون اوچی ظرفنده اسهام حامللرينه حصه تمتعده ويره مدي. فقط اك صوكنده بهارات آطه لری ایلہ هندستان تجارتي پورتكيزليلرک آلرندن المغه موفق اولدی. ايشته او وقت ایدی والی ایلہ (باتاوايه) بر والی عمومی تعيين ایدلدي. بوموفقيت اوزرينه سائر حكومتلرده مملكتنده حق تصرف ایلہ تجارت انحصارینی ويره رك بويله شركتلر تأسيس ايتك ايسته ديلر. انكلتره قرالی (آمریقای شمالي شركتی) نی تأسيس ایتدی. ۴۱ ایلہ ۴۵ درجه بيننده کی بوتون ساحل بو شركته توديع ایدلدي. كذا (ماصاشوزهت دكزی شركتی)

و (هودسون دکزی شرکتی) ده تشکیل اولوندی . فرانسه ده ایسه حکومت بوتون جهان تجارتی ممتاز شرکتلر بیننده تقسیم ایتدی . بو شرکتلر ده : هند شرقی (۱۶۰۴) . هند غربی ، سن قریستوف دو بارباد آطه لری (۱۶۲۶) ، آمریکا آطه لری ، یشیل برون (۱۶۳۹) ، کینه (۱۶۳۴) ، بیاض برون (۱۶۳۵) ، شرق و مداغسکار (۱۶۴۲) ، شمال (۱۶۶۵) ، شرق (۱۶۷۱) و سه نه فال (۱۶۷۹) شرکتلرندن عبارتدی . بونلرک برچوغی محو اولوب تکرار تشکیل ایدلشدر . ایدیلن حسابه کوره ۱۷۶۹ سنه سنه قدر قسم اعظمی فرانسز اولوق اوزره ۵۵ شرکت محو اولمشدر .

پورتگیز مستملک لری . — پورتگیزلیلر صرف تجارت ایچون مؤسسسه وجوده کتیرمشلر ، یالکز بر قاج لیمان اشغال ایدرک انلری تحکیم ایله اکتفا ایلشدردی . پورتگیزلیلرک سفینه حریبه لری کندیلرینه هم سائر کیلری اوزاقلاشدیرمغه ، هم ده (بهارات ، پاموق بز ، اپیک ، پورسله ن و فیل دیشی کچی) شرق امتعه سنی (لیزبون) . کتیرمه که یاراردی . ارباب تجارت حکومتک مساعدده سی اولمادن هندستانه کیده مزلردی . حکومت آرت تجارت ایدردی . پورتگیزلیلر چوق مال صاعمدن زیاده بهالی صاعفی ترجیح ایدرلردی . یالکز اونچ سنه مدتله نصب اولونان مأمورلر چارچاق کسب ثروت ایتک ایسترنر ، سوء استعمالانده بولونورلر ، عدالتی پاره یه فدا ایدرلر ، ارباب تجارتک تجارتلرینه

مانع اولورلردی . بو اصول آز واردات کتیررو چوق بهالی کلیردی . مناسبات تجاریه تأسیسی مقصدیله هندستانه کوندریلن بر انکلیز ۱۶۱۳ سنه سنده شوپله یازمشدی : « پورتکیزلیلر غایت ظریف اولرده اوطوردقلری حالدده عسکر بسلیه جکزدیه عادتا دیلنجیلک مرتبه سنه اینشلردر » .

آفریقا ساحلنده کی پورتکیزمؤسسهری عادتا برر حبسخانه ، برر اسیر بازاری مثابه سننده ایدی . محکومین بورایه سوق اولونور ، زنجی تجارتی بوراده ایدیلردی . (لوآندا) لیمانی هر سنه ۷۰۰۰۰ اسیر اخراج ایدردی .

دنیا نك الك منبت مملکتلرندن معدود اولان بره زیلیا مستملکه سنه بك چوق زمان رغبت ایدله مشدی؛ چونکه بورایان اول امرده قابل زرع بر حاله کتیرمک لازمدی . بورایه ایلك اول شکر قامشنی ادخال ایدنلر ، منفی محکوملرله یهودیلردر . داخلده کی معدن او جاقلرینی ایشله توب حکومتک هیج مداخله سی اولمادن (سن پول) مستملکه سننی تأسیس ایدنلرده بر طاقم سرسریلردر . (یاٹولستیا) تعمیر اولونان بو سن پول اهاالیسی اون سکزنجی عصرده مستقل بر قوم تشکیل ایدیوردی .

اسپانیول مستملکری . — آمریقانک واسع برلرینی تصرف اتمش اولان اسپانیا حکومتی ، اسپانیوللرله مسکون بکی بر اسپانیا وجوده کتیرمک ایسته میوردی . انک ارزو

ایتدیکی شی قاستیل خاندانك مالكانه سنی چوغالتق و بت -
 پرستره دین حقیقی قبول ایتدرمکدی . مستملکله عاداتا
 بویوک وقابالی بر مالکانه مشابه سنده ایدی . بر اسپانیول آمریقایه
 کیتمک ایچون اولاه حکومتدن مساعده آلمغه مجبور دی . بر کئی
 حرکت ایتدیرلزدن اول داخلنده مساعده لی کیمسه لردن
 باشقه کیمسه بولونمادیغه دائر صاحبنه عین ایتدیریلردی . مساعده
 آلمق ایچون « کافی بر سبب مفارقت » کوسترمک لازمدی .
 کذا قاتولیک بر فاملیایه ده منسوب اولمق ایجاب ایدردی .
 چونکه قاتولیکلردن تمام ایکی نسل مدتجه هیچ بر کیمسه
 (آنکیزیسیون) طرفدن محکوم ایدله مشدی . کذا بو مساعده
 انجق ایکی سنه مدتله اعطا اولونوردی .

مستملکله ره پک آز اسپانیول یرلشدریلردی . ۱۵۵۰
 سنه سنده ۱۵۰۰۰ کشیدن فضله یوقدی . بونک ایچون اسپانیول
 آمریقا سنده یرلرله زنجیلردن باشقه اهالی قالماشدی . حتی
 بوکونده (پاراگوای) ایله (یوقاری پورو) اهالیسنک کافه سی
 یرلردن ، مکسیقالیرک ثلاثانی ده ملزدن مرکبدر . ژه زوویت
 میسیونرلی (کالیفورنیا) ایله (پاراگوای) ده هپ یرلردن
 مرکب قصبه لر تاسیس ایدرلر ، بورایه بیاضلری اصلا
 یا قلاشدریمازلردی .

حکومت ، زراع ویا عمله جلبنه هیچ غیرت ایتزدی .
 کندیسنی بوتون طور اراغک صاحبی اولارق اعلان ایتمش ، بو

طوپراغی جسیم مالکانه لره تقسیم ایدرک قرالک کوزده لرینه توزیع ایلشدی. قونت دو والانسینانانک مالکانه سی ۲۵ میلیون فرانق قیمتند ایدی، کذا برده معدنی واردی که کندیسنه سنوی ۱,۵۰۰,۰۰۰ فرانق کتیردی. بومالکانه ده، یریلر (آندیهن) له زنجیلردن باشقه فرد یوقدی. اون سکزنجی عصر سیاحلردن بری: «زراعتنه نظر حقارتله باقیلیور، هرکس بر موسیو اولق ایشسز کوجسز یاشامق ارزو ایدیور» دیوردی. بوتون شهرلره هپ اسپانیولر بیفیلیوردی. بونلر هپ املاک صاحبلی، مامورلر، آوقاثر، مختکرلر و راهلردن عبارتدی. برچوقلری ده آمریقادا ایشسز کوجسز، اصیلانه بر صورتده یاشامق ایچون آمریقایه کلن زادکان فامیلالره منسوب قاده لردی. قاده لر، اسپانیاده موجود اوچ زادکان صنفدن برینی تشکیل ایدرلردی. «یا دکزی، یا کلیسیایی، یا قرال معینی ایسته!» سوزی مثل سائر حکمنه کیرمشدی. (لیمسا) ده بیاضلرک اوچده بری زنجی اولدینی کبی ۴۵ ده مارکی ویا قونت عائله سی واردی.

بو مستملک لرده هر شی اسپانیاده اولدینی کبی تنسیق ایدلشدی. بوراده ده عنوانله برابر ویریلوب اکبر اولاده انتقال ایدن املاک (ماژورالر)، عشرلر، انکیزیسیونلر و اوراق مطبوعه سانسورلکی واردی (انکیزیسیون قومیسرلی کتب منوعه آرامق ایچون ایستدکلی ساعتده ارزو ایستدکلی اوه

گیره بیلیرلردی) . بو عادتایکی بر مملکتده اسکی بر هیئت اجتماعیه ایدی . حکومت بو طرزلی دکیشدیرمکی عقلنه بیله کتیرمن ، مملکتده اجنبی یاناشدیرمانغه فوق العاده دقت ایدردی . اون یدنجی عصره کلنجیه قدر هر اجنبی کمی به قورصان نظریله باقیلیر ، قرهیه چیقان کمیجیلرک یا قفالری کسلیلیر ، یا معدن او جاقلرینه خدمات شاقه ایچون کوندریلیردی . بو ممانعات اورتادن قالدقدن صوکرده انکیزیسیون بوتون اجنبیلره قاتولیکلکک مخالفی نظریله باقشدی . حکومت ، آمریقاده طوغمش بیاضلره بیله اعتماد ایتمز ، (بونلره) قره نول (قره نول) دیرلردی) . قره نوللرک تعلیم و تربیه لرینه مساعده ایدلمزدی . (لیمیا) مکتبلری شاگردانه ایراد ایلدیکی بر نطقده والی شو سوزلرده بولونمشدی : « سز اوقومه ، یازمه ودعا اوکره نیکیز ؛ ایشته بر آمریقالینک بیلیمی لازم کلن شیلر بوندن عبارتدره . اداره حکومت بونلره تودیغ ایدلمزدی . بوتون مأموریتلر « اسکی اسپانیوللر » ویریلیردی . ۱۶۰ والی ایچنده انجق ۴ دینک قره نول اولدینی حساب ایدلمشدی . ۱۶۷۳ سنه سنه قدر نصب اولونان ۳۶۹ آمریقا بسقپوسنک یالکز ۱۲ سی قره نوللردندی . حکومت قره نوللرک متحداً حرکتلرینه مانع اولوق ایچون « مائی قانلی انسانلر » (بیاضلر) ایله « رنکلی انسانلر » (یریلیر ، زنجیلر و ملزلر) بیننده مساواته هیچ رعایت ایتمزدی .

حڪومت، تجارت انحصاريني ده ڪندينه تخصيص ايدردى. مستملڪات اهالىسى، امتياز صاحبي اولميان تاجر لردن نه معمولات صاتين آلابيلير، نه ده ڪندي ذخيره لريني صاتا بيليردى. آمريقا قطعه سى (قاستيل) قراليجه سى نامنه ڪشف واشغال ايدلديكى ايجون آمريقا تجارتي ده (قاستيل) حڪومتنه عائد بولونور، قاستيل ليمانندن ماعدا يرده تجارت ايديله مزدي. اسپانيا نك اڪ ابي ليمانلرى كاملاً (آراغون) قرالغنه تابعدى. فقط آمريقا به حرڪت ايده جك اولان هر ڪينك بهمه حال (سهويل، اشبيليه) دن ڪچمسى لازمدي. ڪچمز سه يا حجز ويا اعدام جزاسى اجرا ايديليردى. (سهويل) عادى بر ليماندى؛ فقط (قاستيل) حڪومتنك بوندن باشقه ليماني يوقدى (۱). بوراده ده ۱۵۱۳ سنه سنده بر تجارت قلمى تاسيس ايدلمشدى. ڪاتبلىر حرڪت ايده جك اولان ڪمپلرى يوقلارلر، قيد ايدرلر، ڪمپلر به يوجليلق ايجون مساعده يي متضمن برده (پاتنه) ويرلردى. ۱۷۲۰ سنه سنده انحصار (قاديقس) انتقال ايتدى. ڪمپلر (ڪاروان ڪاروان) حرڪت ايدر، هپسى ده عيني ليمانه اخراجات اجرا ايلردى. سنه ده ايكي ڪاروان حرڪت ايدردى. برى ماسيقا تجارتنك مخرجى اولان (وهر اقروز)، ديكرى ده

(۱) ڪندا اسپانيا قرالى پورتيڪيز قرالغى ايتديكى زمانه ده (مولوك) آله لرنده ڪي پورتيڪيز ليلرڪ (فيليپين) آطه لرى ايله تجارتده بولونمارى مجموع ايدى.

(یعنی گالیونلر) (قارطجه) ایله (پورطوربه‌للو) یه کیدردی . بوتون امریقای جنوبی و حتی (بوئه‌نوس - آیره‌س) مستملکه‌سی ذخیره‌ی بی بورادن آیردی . بوتون امته‌نک فیئاتی گالیونلر آمرالی ایله (پاناما) والیسی تمین ایدردی . امتیازلی شرکترلر تشکیل ایدن تاجرلر مستملکات ذخیره‌سینی اشاعی فیئاتله صاتین آلیرلر ، آوروپا معمولات صنایعه‌سینی ، بالخاصه دمیر ایله چلیکی یوزده ۱۰۰ : ۳۰۰ نسبتنده بر کار ایله صاتارلردی . - نه مستملکه‌لره ذخیره یتشدیرمه‌که ، نه‌ده بونلرک ذخیره‌سینی اخراج ایتمه‌که (کاروان) کفایت ایتزدی . بونکه برابر ممالک اجنبیه‌یه برشی صاتمق ویا صاتین آلقده ممنوعدی . قاچاقچیلغه راضیلق نظریله باقیلیر ، انکیزیسیون محکمه‌سی طرفندن تعقیبات اجرا ایدیلردی . فقط قاچاقچیلقدن ده وازچمک ممکن اولمادینی ایچون ینه بویوک مقیاسده اجرا ایدیلیر، اجنبی کیلری امته‌لرینی اخراج ایچون بالخاصه حرب زمانلرندن استفاده ایدرلردی . بونک نتیجه‌ی غریبه‌سی اولوق اوزرده اسپانیول مستملکه‌لرینک تجارتی وقت حربده پک زیاده تزاید ایدردی . ۱۷۱۳ سنه‌سنده دوچار مغلوبیت اولان اسپانیا قرانی انکلتره حکومتی ایله (آسیه‌نطو) معاهده‌سینی امضایه مجبور اولمشدی . بو معاهده‌ده اسپانیول مستملکه‌لرنده اسیرتجارتی باعق حقی یالکز انکلیزلره بخش اولونیور ، بونلرک هر سنه (پورطوربه‌للو) یه انکلیز امته‌سیله طولو ۵۰۰ طونیلاتو جسامتنده برکمی کوندرملرینه

مساعده ایدیلپوردی . بوکمی دها سوکره حقیقی ر آنترپومقامنه قائم اولمشدی . کمی شهرک اوکنه کلوب طورر ، دیگر انکلین کیلری ده (ژامایق) و (سن - دومنیق) آطه سنه کیدوب امتعه آلیرلر، حموه لیرینی ده دائما تجدید ایدرلردی . - غالب و نلر تجارتی وقتیه ۱۵۰۰۰ طونیلانوایکن ۱۷۳۷ سنه سنده ۳۰۰۰ طونیلانوایه ایشدی .

فلمنک مستملڪه لری . - فلمنکلیر رینغا بالنی آولامق ایچون شمال دکزینه کیده رک کیلرینی وجوده کتیره مشلردی . اون یدنجی عصرده اوروپا اقوامنک هپسندن زیاده فلمنکلیرک تجارت کیلری واردی . بو کیلر بر مملکتک ذخیره سنی او بر مملکته نقل ایدرک هپ اجنبی لیمانلره کیدرلردی . بو سبدن کنیدلرینه (دکز آرابه جیلری) نامی ویرلمشدی . فلمنک مستملڪه لری تجارت مستملڪه سی ایدی . بو مستملڪه لر بووک هند شرکته عاؤدی (۱) . شرکت بورالری پورتکیز لیلردن ضبط ایشدی .

قومپانیه ، پورتکیز اصولنک تطبیقی ایله حاصل اولان موفقیتسزلکدن عبرت آلمش اولدینی ایچون هند تجارتی ایچون بسبتون عکسی بر اصول اتخاذا ایشدی . پورتکیز استحکاملرینی

(۱) (کوراضوا) و (سنت اوستاش) آطه لری اسپانیول مستملڪه لریله قاچاقچیاق اجراسته خدمت ایدردی . هندستانه کیدن کیلر ایچون (قاپ) برتوقف محلی ایدی . (سورینام) ، اسپرل طرفندن زرع اولونور بر مزروطات مستملڪه سی ایدی .

یقیمش ، اردوسز واستحکامسز ، آچیق لیمانلره یرلشمشدی . شرکت پولتیقهیه قاریشمایهرق ، تبههیی تبدیل دین ایئدیمرکه چالیشمایهرق ، بولوندینی مملکتک حکمدارلری ایله دائماً مناسبات دوستانهده بولونوردی . یرلی تاجرلرک ذخیرهسنی آلرندن بهالی صاتین آلاق ، کندیلرینه ایسه اوروپا امتعهسنی اوجوز صاتارق انلری هپ کندیسنه جلب ایدردی . قاعده اساسیهسی آز کار ایله قناعت ایتمکدی . بو صورتله ، اشغال مصارفی ایتمدن منافع تجاریه اکتساب ایدردی . مامورلرینک کندی حسابلرینه تجارت ایتملرینه مانع اولور ، فقط انلره طولغون و منتظم برمعاش ویرردی . - قومپانیه بویوک برفوذ کسب ایدنجه اوده یاواش یاواش سائر حکومتلرک اثرینه اقتفا ایئدی . (مولوک) آطهلرندهکی یریلرک هان کافهسنی محو ایلدی . (جاوا) دهکی چین عسکرلرینی قیلجیدن کچیردی (۱۷۴۰) . (ترناطه) قرالی مملکتندهکی قرفیللری زورله سنوکه اجبار ایدرک عصیان ایتمسینه سبب اولدی . هندستاندن فلمنکه کلن کیلر (مانش) دن کچهجک ایکن بونلری (اورقاد) آطهلرینی طولاشمغه ، هندستانه کیدن کیلریده یوقلانمق اوزره کاملاً (باناویا) دن کچمکه مجبور ایئدی . تجار کاتبلری کندی حسابلرینه تجارت ایدرلر ، قومپانیه دن زها زیاده معاملات تجاریهده بولونورلر ، کیلرینی امتعه ایله طولدیرلردی . فقط فلمنک قرالی قومپانیه نک باش مدیری اولدینی زمان (۱۷۴۸)

بوتون اداره ماموریت لری معاملات ایله مشغول اولیان کیمسه لره تودیع ایدلدی . نهایت قومپانیه بویوک بر بورج عقد ایتدی . ۱۷۹۴ سنه سنده قومپانیه نك بورجی ۱۲۷ ، آلاجنی ده ۱۵ میلیون فلورین ایدی .

فرانس مستملڪه لری . — کذا ایالت حالنده برده فرانسز مستملڪه سی تاسیس ایدلمشدی . مستملڪه اهالیسی کنیدیلرینی بالذات اداره حقنه مالك دكلردی . فرانسده اولدینی کبی صلاحیت تامه بی حائز بر (ناظر) اك اوفاق ایشلره بیله نظارت ایدردی . مطبوعات سانسورلکی ایله دینی ظلملر آمریقایه ده نقل ایدلمشدی . مستملڪه لره هیچ پروتستان قبول ایدلمزدی . رهبان ایچون عشرلر ، زادگان ایچون سه نیورلکلر تاسیس ایدلمشدی . کذا قراللقده کی تبعه کبی مستملكات اهالیسی ده حریت سیاسی و مذهبییه مالك دكلردی . — بوندن باشقه ، تجارت انحصاری امتیازلی بر شرکته ویرلمش اولدینی ایچون اهالینك فابریقه تاسیس ایتلمری ده ممنوعدی . بونلر فرانسه فابریقه لرندن کوندریلن اشیایی آلفه مجبورلردی . بو اشیاده غیرمقبول امته دن عبارتدی . کذا قومپانیه مأمورلرندن باشقه کیمسه دن برشی آلوب صاتا مازلردی .

بو اداره ایله ، (آتیل) و بالخاصه (دومنیق) چفتلکلرندن باشقه لرده مترقی مستملكات موجود دکلدی . بوراده قره ٹوللر زنجی اسیرلری چالیشدی رلردی . (قانا دا) آوروپا قدر بویوک

بر اراضی اولدینی خالدہ نفوسی ۱۶۸۲ سنہ سنہ ۱۰۰۰۰ ،
 ۱۷۴۴ سنہ سنہ ۵۴۰۰۰ ، انکلیزلر طرفندن ضبط اولوندینی
 صرمدہ ۷۰۰۰۰ ایدی . بوکون فرانسہ - قانادا اہالیسنک
 مجموعی ایکی میلیونہ بالغ اولور . قانادانک اخراجات سنویہ سی
 ۱،۷۰۰،۰۰۰ فراتقدی ؛ شمدی ایسہ ۲۸۰ میلیون فراتقدر .
 انکلیزر مستملکہ لری . - مستملکات حکومتلری ایچندہ
 اک صوک کلن انکلترہ حکومتنک آمریقای شمالی ساحلندہ
 یالکیز طاغنیق ووافق مستملکہ لری واردی . بو مستملکہ لردن
 قیمتدار ہیج بر ذخیرہ چیقہ ادینی ایچون حکومت بونلرہ
 اوقدر اهمیت ویرمز ، بو مستملکہ لری نہ تنسیق ، نەدہ اداره
 ایتمک زحمتی اختیار ایلزدی . حکومتک بولافیدیمی مستملکہ
 لردہ کی نفوسک راحت راحت چوغلماسنہ سبب اولمشدی . -
 شمالدہ کی مستملکہ اہالیسی ، بالخاصہ برنجی شارل زمانندہ
 سربستجہ عبادت ایدہ بیلمک ایچون آمریقایہ کلن ظلمدیده
 پوریتہ نلردن عبارتدی . پوریتہ نلر بورادہ کندیلرینہ مخصوص
 کلیسالر تأسیس ایتمشلر ، طوپراغی قازمشلر ، آمریقایی
 کندیلرینہ یکی بر وطن اتخاذا ایلمشلردی . بورایہ (یکی
 انکلترہ) نامی وپرلردی . بورالری عادتا دینی مستملکہ لردی .
 بونلر دیورلردی کہ : « ایچمزدن شاید بری دینہ ۱۲ ، دنیاہدہ
 ۱۳ نسبتندہ اهمیت ویرہ جک اولورسہ اندہ حقیقی بر یکی
 انکلترہ لی فکری یوقدر » . - جنوبدہ مملکتی زراع اشغال

ایلمشدی . بونلر زنجی اسپرلر آره سنده کویلی جنتمنلر
طرزنده یاشارلردی .

اون اوچ مستملک واری ؛ هر برینک اداره سی آیری
ایدی . بومستملکلر اوچ نوعه آیرلمشدی . (املاک صاحب لری نه
مخصوص مستملکلر) بر ویا بر قاچ کشی یه عئددی . بو
مستملکلر انلره حکومت طرفندن ویریلردی . حکومت بو
امتیازی بخش ایتمکله مستملکات امورینه مداخله ایتمک حقندن
واز کچردی . مثلاً (قارولین) آطه لرنده کی سگزر مستملک
صاحب لری مأموریتلره آدم تعیین ایتمک ، مستملکات اهالیسنک
موافقتی ایله ویرکی تحصیل ایتمک ، حرب ایتمک ، زادکانلق
احداث ایتمک حقنه مالک ایدیلر . (فرمانلی مستملکلر)
امتیازلی بر قومانیه یه ، (میری مستملکلر) ده حکومت عئددی .
فقط مستملکات اهالیسی هر طرفده انکلیزلره عین حقوقه
مالک بولونورلردی . بونلر کندی کندی لری نی اداره ایدرلر ، ویرکی یه
قرار ویررلر ، دینی ایشلری نی تسویه ایدرلر ، حکم هیئتندن
باشقه کیمسه طرفندن محاکمه ایدلمزلردی . انکلتره حکومتی والی
تعیین ایتمکدن ماعدا هیچ بر شیئله مشغول اولمازدی .

زراعت سربستدی . بوش اراضی کیم زرع ایتمک ایسترسه
اوکا صاتیلیردی . (پهن سیلوانیا) نك مؤسی بولونان (پهن)
عائله سی هر سنه بو کبی اراضیدن ۳۰,۰۰۰ انکلیز لیرالق یر
صاناردی . ایشته بو صورتله اوافق مال صاحبی انکلیزلردن

مرکب بر اهالی وجوده گلشدی .

اون یدنجی عصره کلنجیه قدر مستملکه اهالیسی اجنبیلرله ده تجارت ایتکده سر بست ایدیلر . تجارت بالخاصه فلمنکلیر واسطه سیله اجرا ایدیلردی . فقط بالآخره پارلمنتو انکلیزلری بر قوهٔ بحریه وجوده کتیرمهکه اجبار ایچون ۱۶۵۱ تاریخلی (سیرسفائن مقاولهسی) موجنبجه فیابعد انکلیز کیجیلری طرفندن تجهیز ایدلمش ، انکلیز بر قبودانک قوما - نده سنده ، مرتباتنک لاقول ثلثانی انکلیز اولق اوزره ، انکلیز کیسندن ماعدا هیچ برکینک هر هانکی بر انکلیز لیمانه هیچ بر امتعه کتیرمه مسنه قرار ویرمش و بو صورتله انکلیز مستملکه لرنده تجارت انحصاری انکلیزلره بخش ایلشدر .

فرانسه ایله انگلتره نك مبارزه لری . — اون سکزنجی عصر بدایتنده اوروپانک ایکی بویوک حکومتی، فرانسه وانگلتره ، مبارزه یه کیریشمشلردی . بو مبارزه ده ها صوکره بر عصردن زیاده دوام ایلشدی . ۱۶۸۸ سنه سنده کیلیوم دوراتر انگلتره قرالی اولدینی زمان ، اون دردنجی لوئینک فتوحاتی توقیف ایچون اوروپا حکومتلری طرفندن تشکیل اولونان اتحادک سرکارینه کچمشدی . بو تاریخدن اعتباراً انگلتره حکومتی فرانسه نك باشلیجه دشمنی اولمش ، فرانسه هانکی بر حربه کیریشمش ایسه انگلتره حکومتنه دائماً دشمنلری اره سنده تصادف ایلشدی . فرانسه انقلابنه کلنجیه قدر بو ایکی رقیب

آره سنده بش حرب وقوعه کلشدی . بو حرب لک برنجیسی (آوغسبورغ) اتحادی (۱۶۸۹ - ۹۷) ؛ ایکنجیسی اسپانیا وراثی (۱۷۰۲ - ۱۳) (۱) ؛ اوچنجیسی اوستریا وراثی (۱۷۴۰ - ۴۸) ؛ دردنجیسی یدی سنه حربی (۱۷۵۶ - ۶۳) ؛ بشنجیسی ده آمریکا استقلاللی (۱۷۷۶ - ۸۳) ایدی .

بو حرب لک ایلک دردی بالخاصه بری حرب لک ایدی . بو حرب لره انکلتره حکومتی فرانسه دشمنلرینک متفق صفتیله مداخله ایدیوردی (ایلک اوچنده اوستریانک ، یدی سنه حربنده پروسیانک) . فقط اوزمانلر حرب ، بره خارجنده انتشار ایدیوردی . بو ایکی رقیبک هر ایکسی ده کیملری محوه ، خصمنک مستملکھ سنی ضبطه غیرت ایدیوردی .

دها صوکره بو بحری و مستملکھ حرب لری او زمان هیچ خاطر و خیاله کلک نتیجه لره منجر اولمشدی . مبارزه ایلک اوکجه باشلادینی زمان ، فاقیت فرانسه دن طرفه ایدی . فرانسه قوه بحریه سی ۱۶۷۷ سنه سنده تقریباً ۳۰۰ کیمدن عبارتدی . وقت حربده انکلیز تجارت کیملرینی مصادره وظیفه سنی ایفا ایتمک اوزره (دونکک) و (سن مالو) ده بولونان قورصان کیملری بو میانده داخل دکلدی . (آوغسبورغ اتحادی حربنده

(۱) اون بشنجی لوئی دورینک نصف اولنده نائب حکومتک ودها صوکرده قاردينال فلورینک پولتیقه سی، انکلتره ایله مسالتي محافظه ایلمکدی .

انکلیزر بو صورتله ۴۲۰۰ کی ضایع ایتمش، بحریه سیغورطه شرکته لری ده کاملاً افلاس ایلشردی.

فرانسه، مستملکانده انکلیزره تقدم ایلشدی. اولاً (دردنجی هانری زمانده) قانادا ایله (تیرنوو)، (آقادی) و (هودسون دکزی) کبی جوار منطفه لری ضبط ایتمش، (میسسی سیپی، لوئی زییان) منصبنده کی ملکی آله کچیره رک (قانادا) ایله (لوئی زییان)، یعنی (سن لوران) حوضه سی ایله بوتون آمریقای شمالی بیننده ارتباط حاصل ایتک اوزره (اوخیو) وادیسندن قلعه لر تأسیس ایلشدی. فرانسه حکومتی بو صورتله آمریقای شمالی بی کاملاً آله کچیره مشدی. — فرانسه نك آتیل آطه لرنده مالک اولدینی یرلر یالکز (مارتینیک) و (غو آدلوب) آطه لری دکل، بالآخره کنديسندن استرداد اولونان (سن لوسی)، (دومنیق) و (تاباغو) آطه لری ایدی. فرانسه حکومتی او جسیم (سن دومنیق) آطه سنک غرب قسمی، (هایتی) بی ده آله ایتمش، بوراده جسیم شکر قامشی تارلاری تأسیس ایلشدی. — بوندن ماعدا فرانسز (کویان) ی ایله (سهنه فال) ده فرانسه نك آنده ایدی. — فرانسه حکومتی او قوجه (ماداغسقار) آطه سنه ده حاکم اولمغه چالیشمشدی. قولبه ر طرفدن تشکیل اولونان مؤسسه لر چوق دوام ایتمه مش، فقط اون سکزنجی عصر بدایتنده یکدیگرینه مجاور بولونان [ایکی آطه، (ره ئونیون) و (ایل دو فرانس)، غایت مترقی بر

فرانسه مستملکه سی حاله کله لردی . - آسیاده هند شرقی
شمرکتک بر چوق شهر لرده مؤسسه سی واردی . از جمله
فرانسه نکه ده غایت جسیم اراضی موجوددی . بو اراضی همان
نفوسدن محروم بر حاله ایدی . فقط بالآخره تدریجاً نفوسی
چو غالمش ، بوکون فرانسه نکه واسع بر مستملکات حکومه تی
تشکیل ایلشدر .

ینه او دورده ، انکلتره حکومتنک آمریکای شمالینک
شرق ساحلنده کی مستملکه لرندن باشقه مستملکاتی یوقدی .
بونلرده غرب طرفدن (اوخیو) ده کی فرانسه مستملکه لری
ایله سد ایدلشدی . کذا (آتیل) آطه لرنده (زامایق) ،
هندستانده (بومبای) و (مدراس) تجارتگاه لری واردی .
اوزمانلر انکلتره نکه بالآخره بو یوک بر بحری و مستملکه دولتی
اولاجنی حس ایتدیره جک هیچ بر اماره موجود دکلدی .
انکلتره حکومتی شمعی کوردیکمز کبی تجارت و صنایع
مملکتی دکلدی . هله قوه بحریه سی فرانسه قوه بحریه سنه ده
فائق دکلدی .

فقط اون سکنزنجی عصر حرب لری بو موازنه بی بسبتون آلت
اوست ایدرک بحریه و مستملکات خصوصنده انکلتره یه فائقیت
بخش ایلشدر . فرانسه حکومتی (اوترهخت) مصالحه سی
اثناسنده قره ده کی بوزغونلقلریله کاملاً خراب ، حرب
دوناماسی بولوندرمه غیر مقتدر بر حاله کله رک (آقادی) ایله

(تهرنوو) و (هودسون دکزینی) ترکه مجبور اولمشدی. بونکله برابر مستملکه لرینک اک مکمل قسمی ینه النده قالمشدی. فرانسز شرکتی هندستانی فتحه باشلامشدی. قوه بحریه تکرار تشکیل ایدلمش، حتی حربه تکرار مباشرت اولوندینی زمان (۱۷۵۶) انکلیز قوه بحریه سنه قارشى کمال شرفله مبارزه به باشلامشدی (۱۷۴۰ - ۴۸).

نه فرانسه ده، نه ده انکلتره ده رجال حکومت بر مستملکات حکومتنک نه درجه حائز اهمیت اولاجغنی بر درلو تقدیر ایتمیوردی. او زمانلر بو مستملکه لره قهوه، چیوید و شکر قامشی دیکمکه مخصوص یرلر نظریله باقیدوردی. اک زیاده اهمیت ویریلن یر (آنتیل) آطه لری ایدی. آمریقای شمالینک واسع یرلرینه لزومسز اراضی نظریله باقیدوردی. حکومت، تبعه سنی مستملکه لره مهاجرت ایتدیرمکه هیچ اهمیت ویرمیور، انلری داخل مملکتده بولوندیرمغنی ترجیح ایلوردی. او زمانلر هیچ بر کیمسه بحر محیطک اوته طرفنده میلیونلرجه فرانسز بولوندرمانک نه درجه لرده فائده لی اولاجغنی بر درلو ادراک ایده میوردی. حتی اون بشنجی لوئینک ناظر لرندن دارژانسون کندیسى قرال اولمش اولسه بوتون مستملکه لری بر طوبلی ایکنه به فدا ایده جکنی بیان ایدیور، وولته رده «برقاچ زراع قار» ایچون فرانسزلرله انکلیزلرک حربه کیریشملرینی کولنج بولدیغنی سویلیوردی. وولته ر (اوخیو) حوالیسنه «برقاچ

زراع قاره ديوردی .

او زمانلر انكلتره نك بر ناظری ، ويليام پيت واردی . پيت ، او درجه نظر حقارتله باقيلان بومستملڪلرك اهميتنى تماميله تقدير ايلمشدى . ويليام پيت ، تجارتنك يالكز انكليز كيلرى طرفندن اجرا ايدلسى ايجون انكلتره نك دنيا نك اك برنجى دولتى اولماسنى آرزو ايدىوردى . اوصره ده انكليز صنايعى تأسس ايتمكه باشلامشدى . بونك ايجون مخرجلر لازمى . انكلتره نك بويوك تاجرلرى ويليام پيتى التزام ايتديلر . فرانسه بحريه سنى أزمك وفرانسز مستملڪلرئنى ضبط ايلك ايجون ويليام پيتك لزوم كوردىكى پاره لرك ويرلسى ايجون مجلس مبعوثانه قرار ويرد . يرديلر . فرانسز دونانماسى محو ايدلى . فرانسه بحريه ناظرى فلاكتدن قورتولان كيلرك انكليزلره مقاومت ايدمه جك بر حالده اولدقلىنى بيان ايدرك انلرى ده بعض كيمسه لره صاىدى . انكليز دونانماسى بونك اوزرينه دكزلره حاكم اولارق ، مدافعه سز بر حالده براقيلان (آتيل) آطه لرىنى اشغال ايلدى .

شمالى آمريقادا ، (قانادا) ده كى فرانسز آوجيلرى يرليلرله (اُندييه نلرله) برلشهرك اول امرده كنديلرندن پك چوق مقدارده بولونان انكليز مستملكات اهالىسنى طرد ايتمشلردى . فقط انكليزلر حكومتلرندن بالاخره قوهء معاونه آلمشلر ، فرانسز ناظرى ايسه (قانادا) لبرى يالكز باشلرينه براقدينى

ایچون بونلر عددجه فائقیته قارشی محو اولمشلردی. دوپله قسه کندیسنه بر چوق ایالتلر تخصیص ایتدیرمشدی. شرکت ایسه دوپله قسه بو یرلری ترک ایتدیروب انی فرانسه یه چاغرتدی. دهها موافق بولمشدی. بو شرکت کاردن باشقه برشی دوشونمین بر تجارت شرکتی ایدی. بونک اوزرینه حکومت یالکیز دوپله قسی قباحتلی چیقارمق ایچون ایسه مداخله ایتمشدی (۱۷۵۴). درت سنه سوکره ایسه انکلیز شرکتی (بنکاله) بی ضبطه باشلامش، فرانسز شرکتک مستملکه لرینه تعرضلر اجرا ایلشدی. فرانسه حکومتی بو مستملکه لری مدافعه ایتک ایسته مش ایسه ده بونی غیرکافی قوتلرله اجرا ایلشدی. — ۱۷۶۳ پارس معاهده سنده فرانسه حکومتی (کانادا) ایله آنتیل آطه لرندن بر چوغنی انکلتره یه، (لوئی زینان) نی اسپانیاه ویرمش، وهندستانده آرتق اردو بولوندرمامغه قرار ویرمشدی. فرانسه نک بو حرکتی مستملکات حکومتنه صاحب اولمقدن عادنا فراغت دیمکدی.

اینگلیز مستملکات حکومتی. — انکلتره حکومتی هندستان ایله آمریقادا فرانسه یه خلف اولدی. تا مکسیقایه قدر بوتون شمالی آمریقای ایلده ایتدی. دهها سوکره هندستانی ضبط ایتک دوام ایلدی. فرانسز شرکتک حصه دارلری بو شرکتک یالکیز تجارتله اشتغال ایتسنی ارزو ایتمشلر و شرکتی غایت مصرفلی حربلره صوقدیفندن طولانی شکایت ایدرک دوپله قسی کری

چاغیرتشاردی . انکلیز شرکتی ایسه مامورلرینی هر درلو حرکتده سربست براقدی . قی لیو ، بر میدان محاربهسی نتیجهسندہ بوتون (بنکالہ) بی آلہ کچیردی .

مامورلر بویله ۶۰ میلیون نفوسی حاوی برملکتی بردنبرہ آلہ کچیرنجه انی تیرانلر کبی اداره ایتدیلر . اہالی بی صویارق شایان حیرت درجہده کسب ثروت ایلدیلر . بونلر بالآخرہ انکلترہ یہ کلیرلر ، عادتا برشرق حکمداری کبی زینت و دبدهلر ابراز ایدرلردی . حتی بونلرہ (ناباب) عنوانی ویرلشدی . فقط اویغونسزلقلر او درجہ بی بولدی کہ ۱۷۷۳ سنہسندہ شرکتک یکرمی سنہ مدتلہ اعطا ایدلش اولان امتیازاتی تجدید ایتک لازم کلدیکی زمان انکلترہ حکومتی والیء عمومی بی نصب ایتک حقیق کندیسنہ تخصیص ایلدی . شرکتہ یالکز تجارت انحصارینی براقدی . والیر شرکت نامنہ فتوحاتہ دوام ایتدیلر . بوفتوحات اون طقوزنجی عصرده ختامہ ایرہ رک شرکت بوتون هندستانہ حاکم اولدی .

۲۰۰ میلیون نفوسلی برملکتک اجنبی تاجرلرندن مرکب بر شرکت آلینہ نصل اولوبده دوشدیکنہ وھلہ اولادہ حیرت ایدیلیر . حال بوکہ ہندیلیر حقیقتده بر ملت دکلردی . بونلر بر قسمی اسلام ، بر قسمی براھمان ، دیناً ، عرفاً ، حکومتاً یکدیکرینہ غیرمربوط ، متحداً حرکت ایچون ہیچ بر سببہ مالک اولیان بر طاقم اقوامک ہیئت مجموعہسندن

عبارتندی . کتله ناس دائما اجنبی ظلمی آلتنده یاشامغه آلیشمش سکونت پرور ارباب زراعتدن مرکبیدی . بوراده ملت مفقود ، فقط حکمدارلر موجوددی . هند شرکتی سائر حکمدارلرله مبارزه کیریشمش بر حکومت مشابه سنده ایدی . کندیسنده منتظم بر اردو بولوندینی ایچون بونلره دائما غلبه ایلشدی .

آمریقاده کی انگلیز مستملک لرینک آیاقه نومسی . —
قانادانک ضبطی آمریقاده کی انگلیز مستملک لرندن اون اوچنک ده وضعیتنی دکیشدیردی . بوندن بویله اونلرک فرانسه طرفندن وقوع بولاجق تعرضدن قورقولری قالمامشدی . کندیلرینی مدافعه ایچون انگلتره یه ده احتیاجلری یوقدی . مستملک اهلایسی انگلتره حکومتنک حمایه سنده اصلا احتیاج حس ایتمیور و دوچار ظلم اولدیغندن طولایی شکایته باشلا یوردی . مستملک لرک تجارتی انگلتره پارلمنتوسی تنظیم ایدیور ، هر نوع امتعه ایچون تأدیه ایدیله جک رسوم تعرفه سنی قرارلاشد . یرییور ، ادخال ویا اخراج اولونان بعض امتعه تجارتنه مانع اولیوردی . مستملک اهلایسی پارلمنتونک بو حقوقه اصلا اعتراض ایتمه مش ، انگلتره حکومتی ده مستملک لردن هیچ بر تکالیف طلب ایلمه مشدی .

انگلتره حکومتی حرب اناسنده عقدا یلدیکی آخر بر تعهد آلتنده قالنجه ، انگلتره مصارفک جزئی بر قسمنه معاونت ایتملرینی مستملکات اهلایسندن طلب ایلمکی مشروع عد ایندی .

مستملڪه اھاليسي ڪندي مبعوثلري طرفندن قرار لاشدير لماند قه هيچ بر رسم ويرمڪه مڪلف اولمادقلاينه دائر اسڪي انڪليز تعاملني ايلري يه سورهرڪ اعتراض ايتديلر . حال بوڪه مستملڪلر پارلمنتويه مبعوث ڪوندر مزلردي . فقط پارلمنتو ايشڪ دها ايلريسنه ڪيندي . تمغا طبرزنده اولمق اوزره خفيف بر ويرڪي آلماسنه قرار ويردي (۱۷۶۴) . مستملڪه اھاليسي بو تمغالي ڪاغدلري آلمغه ڪيم جسارت ايدر سه اڪا فنا معاملده بولونارق ، تمغا قوطولريني قيرارق بو ڪاغدلرڪ صاتيلاسنه مانع اولديلر . انڪلتره حڪومتنڪ مستملڪه لرده مامورلري اولماديني ايجون ويرڪي تحصيلدارلريني حيايه ايده . ميوردي . حتى بر آسريقالي بي تحت محاکمه يه آلمق ايستر سه اعضا در حال اڪا برائت قازاندير ميورلردي . نهايت پارلمنتو تمغاني ده لغو ايتدي .

۱۷۶۷ سنه سنده حڪومت يڪيدن ، فقط بو سفر (جام ، ڪوساله ، ڪاغد وچاي ڪبي) آسريقايه ڪيرن بعض امتعه اوزرينه ويريله جڪ ويرڪي شڪلنده اولمق اوزره بر رسم وضع ايتدي . مستملڪه اھاليسي تڪرار شڪايتلرده بولونمغه ، ڪمرڪ مامورلريني تهديد ايتمڪه باشلاديلر . حتى هيچ انڪليز امتعه سي صاتين آلميوب انڪليزلري متضرر ايتمڪ ايجون آرهلنده اتفاق ايتديلر . بونلرڪ اڪ ايلري وارنلري شمال (يڪي انڪلتره) اھاليسي ايدي . بونلر (بوستون) ده آچيقدن آچيغه قاچاقچيلق ايدرلردي .

حتی قاجاق صورتیله ادخال اولونان بریوک (ماده ر) شرابی، مساح
 کیمسه لرك محافظه سنده اولدینی حالد سو ققلردن کچیرلمشدی .
 حکومت آمریقادده آلایلر تمسیدسه نه تثبث ایتمشدی .
 (بوستون) ده عسا کر محافظه کاسیکی خبر آلنیر آلتماز اهالی
 اجتماع ایتشلر ، کدی ارزولری اولمادن مستملکاتده هیج
 بر اردو بولوندرلماسه نه قرار ویرمشلردی . عسا کر محافظه
 یرلرینه یرلشدکن صوکره افراد سو قاعه چیقار چیمماز هب
 سو معامله کوره شلردی .

نهایت حکومت بوندن ده واز کچدی . رسومی قالدیردی .
 فقط قاعده اساسیه سنی محافظه ایتک ایچون چایدن آلمان رسمی
 ابقا ایتدی (۱۷۷۰) . مستملکالر انکلتره ایله مناسباتی تکرار
 تأسیس ایلدیلر . فقط مستملکله اهالیسی آرتق چبروشدت
 استعمالنه آلیشمه شلردی . (رود ایزلاند) ساحلنی ترصدایدن
 برکی قریه او طور دینی زمان سکیز قایغه بینمش برچته طرفندن
 تعرضه اوغرامش ، قپودانی یاره لانتش ، بوفلمک فاعللاری معلوم
 اولدینی حالد هیج بر کیمسه بونلر علیهنده شهادتده بولونمامشدی
 (۱۷۷۲) . برمدت صوکره هند شرکتی ده (بوستون) . چای
 ایله یوکللی اوچ کمی کوندرمشدی . یرلی (یعنی موهاوق) قیافتنه
 کیرمش بر سورو آدم کمی بی ضبط ایتشلر ، ۳۴۲ صندوق چایی
 دکزه دوکشلردی .

انکلیزلر بو حقارتدن طولایی حد تلنه رک بو عاصی مستملکله

قارشی تداییر اتخاذا ایتدیلهر. پارلمنتو (بوستون) لیمانک مسدودیتنی اعلان ایدرک مستملکاتک قانون اساسیسی دیکشیدردی. دیگر مستملک‌لر ایسه (بوستون) ی التزام ایتدیلهر، حتی اعانه دفترلی آچارق بورایه بقدای و برنج کوندردیلهر. ده‌اصوکره مستملکه مجلسلری انکلیز عسکرلرینه مقاومت ایچون عسکر طوبلانماسنی امر ایتدیلهر. نه‌صورتله مقاومت اجرا ایدیله‌جکنی قرار لاشدیرمق اوزره (فیلادلفی) یه مرخص کوندردیلهر. .

مستملک‌لرک استغروی . — آمریکا مستملکات اهالیسی انکلتره حکومتنه قوتله قارشی طورمغه تدریجاً مجبور ایدلمش، (ایلك محاربه ۱۷۷۵ ده وقوعه گلشدی). بونکله برابر وقوعه کلن شیلرینه برعصیان دکلدی. انکلیزلری موافقته مجبور ایتمک ایچون کوزلرینی قورقوتوق ایسته‌نیور، فقط انکلتره‌دن آیرلمق هیچ آرزو ایدلیوردی. تاجرلر ایچون انکلیز صفتنی طاشیمقده فائده‌واردی. چونکه بوصفت انلرک بوتون انکلیز مستملک‌لری ایله معاملاتده بولونمالرینه یاردم ایدیوردی. جنوب مستملکه-سندھ کی زراع ایله مرکز وشمالده کی حال ووقتی یرنده کیمسه‌لر، کذا بوتون زنکین صنفلری قراله مربوط بولونیور، انکلتره‌دن آیرلمای مدھش کورویورلردی. فقط یکی انکلتره‌ده بالخاصه اهالیدن مرکب وارباب قانونک اداره‌سی آلتندھ یکی برفرقه تشکل ایتمشدی. بوفرقة هم حرب، هم‌ده جمهوریت ایستیوردی. فرقة اقلیتدن متشکل ایدی. بونکله برابر غایت جدی صورتده

حرکت ایدیوردی. بوتون مملکتده چته لر طولاشیور، حاکمیری طرف ایدیور، انکلتزه طرفدارلرینه فنا معامله لرده بولونیوردی (انکلتزه طرفدارلرینه قرال فرقه سنه اولدینی کبی (طوری) نامی ویریلیوردی). حتی بونلر بر حاکم ایله برکمرک مامورینی (آمریقا عادتق اوزره) قطرانه وتویه بولامش لردی. بو صورتله مستملکه لرک اکثرنده یکی براداره تاسیس ایتشدی.

(فیلادلنی) ده انعقاد ایدن مرخصلر قونفره سی بر برینه هان هان مساوی ایکی فرقیه آیرلشدی. شمال مرخصلری استقلال اعلان ایتک و انکلتزه دن صورت قطعیه ده آیرلق ایستورلر، آرتق بردها بویله بر فرصت ظهور ایتمز دیورلردی. چونکه اله دها برچوق مستملکه اهالیسی واردی که بونلر (کانادا) ته قارشی حرب ایتشلردی، شمعی ایسه براردو تشکیل ایده بیلیرلردی. جنوب و مرکز مرخصلری ده جمهوریت ایسته میورلردی. نهایت جمهوریت طرفدارلری ده کندی لرینه قارشی طوران مستملکه لرک اصول حکومتی دیکشدرمه که موفق اولدیلر. اوزمان (ژه فرصون) طرفدن یازیلان ۱۷۷۶ بیاننامه سنی قبول ایده جک برا کثرت ده بولونابیلدی. قونفره، حقوق طبیعی اوزرینه مستند بولونان بو قرارنامه سیله انکلتزه قرالک نه کبی قرارنامه لرله آمریقایلرک حقوقنه تجاوز ایتمش اولدینی تعداد ایدیور، نتیجه ده مستملکه لرک «حرو حاکم بر حکومت اولمالری» لازم کله جکنی بیان ایلیردی.

انكلتره ايله مستملکه لار ااره سنده كى حرب پك اوزون و نتیجه سز اولمشدى . پارلمنتو ۵۵۰۰۰ كشيلىك براردو ايجون تخصیصات قبول ایتمشدى . فقط انكلتره نك همان هیچ عسكرى یوقدی . بونك اوزرینه انكلتره كوكولو عسكرك قید ایتمش ، برچوق المان پرنسلرندن عسكرك صاتین آلمش ، ویرلی آمریقالیلرده استخدام ایلمشدى . انكلتره حكومتی حرکات عسكریه اجراسنه حاضر براردو طوبلایایلمك ايجون تمام ایکی سنه اوغراشدی . فقط بویله ایصنر وواسع یرلردن یولسز ، ارزاقسز ، بوتون ارزاقى انكلتره دن كتیره رك نصل كچيله جكدی ؟ انكلیز جزالیری ابي مدت ساحلده كى شهر لری اشغال ايله اکتفا ایلدیله . داخله طوغرو کیرمه كه تشبث ایدن براردو آج و یورغون قاهره اودرجه بیتاب برحاله كلدی كه نهایت تسلیم اولغه مجبور اولدی . قونفره نك تشکیل ایتدیكى حكومت هنوز قوتلی برحاله دکلدی . بو حكومتك هیچ برنفوذ قانونیسی یوقدی . نه عسكرك ، نه ده ویركى طوبلایایلیوردی . هر مستملکه نك مجلسی كندی میلپسنی كندی . طوبلایایوب معاش ویریبور ، اکتزیا بونی قونفره نك امری آلتنه ویرمكدن امتناع ایدیوردی . بناء علیه (طوری) لرك اموالی حجاز ایتمكدن و حكومتك احداث ایتدیكى قائمه لردن باشقه چاره یوقدی . بوقائمه لرك فیثاتی ایسه متادیا تنزل ایدیوردی . ۱۷۷۸ ده قائمه ، قیمت اعتباریسنك ۱۰ سی قدر ایتدیكى حالده ۱۷۸۰ ده انجق ۱۰ سی قدر ایدیوردی . ۱۷۷۷ ده

قونفره اردوسی ۱۵۰۰۰ کشتی به تنزل ایتشدی . سائر افراد
 سلاحلرینی الوب قاجمشلردی . بونک اوزرینه قونفره ۶۵۰۰۰
 کشتی طوبلانماسنی امر ایتمش ، فقط ۱۵۰۰۰ کشیدن فضله
 عسکر طوبلایامامشدی . بونلرکده هرشیئی نقصاندى . برچوقلری
 قوندره سنزلقدن یالین آیاق یورو یورلردی . اردوی تعقیب ایچون
 یالکنزارقه سنده بر اقدینی قان ایزلری کافیدی . ایلولده تمام ایکی
 کونیه جکسر قالمشدی . کانون اولده عسکر ، اوزرینه اورته جک
 برشی بولامادقلری ایچون کیجه یی آتش قارشیسنده کچیرمه
 مجبور اولمشلردی . ضابطان استعفا ایدیور ، مأذون اولانلرده
 غودتدن امتناع ایدیورلردی . باش قوماندان واشینگتون
 قونفره یه شوپله یازیوردی : « وطنپرورلکدن بحث اولونابیلیر ،
 کذا بو حسک تأثیری آلتنده ایفا ایدلمش علوی ایشلره دائرده
 بعض مثاللر بولونابیلیر . فقط اوزون وقانلی بر حرب اجرا
 ایتک ایچون یالکنز بو حسه مستنداً حرکت ایدیلیرسه آلدانلمش
 اولور . . . مبارزه لر ائناسنده وطنپرورلکک جدأ مهم
 اولدیغنی وحتى بک زیاده نفی طوقوندیغنی ده بیامورم ؛ فقط
 شونیه اعترافه جرات ایدیورم که دواملی بر حرب یالکنز
 بو اساس اوزرینه بنا ایدیله مز » .

آمریقایلر منتظم وارزاقی مکمل بر اردویه قارشی مدافعه دن
 عاجز بولونیورلر ، واشینگتون ایله برابر وطنپرورلک بر چوغنی
 . ووقتیدن نومید اولیورلردی . ایشته بونک اوزرینه فرانسه

حکومتی عصیان ایدن اهلینک امدادینه یتشدی . پاره ، سلاح و برده قطعاً عسکریه کوندردی . انلری مقاومته دوام ایدمک بر حاله کتیره رک وطنلرینی مدافعه ایچون کنیدلرینه معاونته بولوندی . فرانسه نك بو حربدن طوغریدن طوغریه بر چیقاری یوقدی . تورغوو مالهرب کبی اک عاقل ناظر لر بو مداخله دن اجتناب ایتمک ارزوایدیورلردی . فقط قونفره پارسه برای مذاکره ماهر بر ذاتی ، سپر صاعقه موجودی فرانقله نی کوندرمش ، فرانقله ن افکار عمومیه بی جلب ایدرک آمریکا جمهوریت پرورلری عادتامودا حکمنه کیرمشدی . اون آلتنجی لوئینک اعتمادینی قازانمش اولان نظاردن و هر ژن انکلز لری دوچار ضعف ایتمک ایچون بو حربی بر چاره عد ایتمش ، فرانسه حکومتی آمریقالیلری التزام ایلمشدی .

ایشته اوزمان انکلتره حکومتی فرانسه و متفقی اسپانیا ایله محاربه یه مجبور اولدی . بونک ایچون ده سلاح آلتنه ۳۰۰۰۰۰۰ کشی طوبلاغه و فرانسزلرک ایرلاندا یه عسکر اخراج ایتملرینه قارشیده تقیداتده بولونمغه مجبور اولدی . فقط پارلمنتونک اکثریتی بو حربدن نفرت ایدرک صلحی قبول ایتمک قوالی مجبور ایتمدی . انکلتره حکومتی حکومات متفقه نك استقلالنی تصدیق ایلدی (۱۷۸۳) . حربک اک بیوک مشکلاتنی اقتحام ایتمش اولان فرانسه حکومتی کنیدیسی ایچون هیچ بر طلبده بولونمادی . فرانسز مرخصلری انکلتره حکومتی مدافعه ایدرک انکلزار دوسنه التجا

ایتمش اولانلرک اموال و حریتلرینک تحت تامینه آلماسنی طلب ایتمشردی . فقط قونفره بونلری یالکز هر مستملکه نك هیئت اداره سنه تودیع ایله اکتفا ایتدی . بونلری حمایه ایچون هیچ برشی یامادی . جمهوریت طرفدارلری ایسه آنلری قبولدن و حجازیدلش اولان ماللرینک اعاده سندن امتناع ایتدیلر . مملکتلرنده قالانلر همقارت ایدرک آنلری ده مهاجرته مجبور ایلدیلر . بو حجزلر و مهاجرتلر نتیجه سی اولارق آمریکا هیئت اجتماعیه سی ده تحویل ایتدی . یکی انکلتره نك زنکین و حال ووقتی یرنده اسکی مائللری کاملاً اورتادن قالدی . یکی اداره یه طرفدار اولان صوکره دن کورمه لر هیئت اجتماعیه نك اوست طبقه سنه چیقیدیلر . حرب بیتنجه هر مستملکه استقلال تام اکتساب ایدرک باشلی باشنه بر حکومت کبی حرکت ایتدی . قونفره نك هیچ بر نفوذی قالمادی . قونفره یالکز بیاننامه لر نشر ایدیور ، فقط بونلر کیمسه اطاعت ایتموردی . حتی برمدت ، بو اتحاد کفائب اولاجنی بیله ظن ایدلدی . مدافعهُ مشترکه ایچون وجوده کتیر یان اتحادی محافظه ارزوسنده بولونان ضابطلر واشینغنتوته دیکتتا . تورلک قبول ایتمسنی تکلیف ایتدیلر . فقط واشینغنتون بونی قبول ایتمدی . اتحاد طرفداری اولانلر ، تجار تیرینی حمایه ایچون مطلقاً اتحاد محتاج اولدق لیرینی مستملکه لره آکلاتمغه موفق اولدیلر . نهایت ۱۷۸۷ ده آمریکا حکومت متفقه سنك اصول اداره سی تأسیس ایدلدی . هر حکومت کندی « حکمرانلغنی ، حریت

واستقلالنی ، اداره‌سنی و محاکم مس‌تنقله‌سنی محافظه ایتدی .
 فقط بوتون حکومتلر « مدافعه‌مشرکه‌لری ایچون » دائمی براتحاد
 مخالصتکارانه‌یه داخل اولدیلر . هر درلو معاملات جبرییه قارشی
 یکدیگرینه معاونت ایلکی درعهده ایتدیلر . حکومتلر طرفندن
 کوندریلن مبعوثلردن تشکل ایدن قونقره‌ده ، اردو و دوننمائی ،
 ممالک اجنبیه ايله مناسباتی ، تجارت و پوسته‌لرک اداره‌سنی‌ده
 درعهده ایتدی .

اوجنچی فصل

اون سکزنجی عصرده

اوروپاده حرکات اصلاحاتکارانه

اون سکزنجی عصرده یکی فکرلر

اوروپا برنجی عصرده صنایع و تجارت . — قرون وسطاده
سه نیور طرفندن مساعده آلان اصناف لونجه لردن برینه انتساب
ایتمدن هیچ برکیمسه چالیشامازدی. کداسه نیور طرفندن قبول
ایدیلن نظامنامه لره موافق حرکت ایتمدجه هیچ برکیمسه برشی
اعمال ایده مزدی . حکومت مطلقه لونجه لره نظامنامه لری ابقا
ایلمشدی . بوتون اوروپاده اعمالاتی حکومتک تنظیم ایتمسی
قبول ایلمشدی . برکیمسه کندی کندی کنینه بر صنعت
احداث ایتمک حقنه مالک دکلدی . برشی اعمال ایتمک ، شهرلرده
اوطوران اصناف اوسته لرینک امتیازی اولارق قالمشدی . برکیمسه
قیرده بر فابریقه تاسیس ایدر ویا شهرده بردستگاه وجوده کتیررسه
حبس جزاسنه اوغراردی . — حتی چالیشمق امتیازینی آلمش
اولانربیله ایستدکلری کبی چالیشامازلردی . بونلر اسکی اصولده
ومعین حدلره کوره اعمالانده بولونمغه مجبورلردی . رجال حکومتک
فکرنجه ارباب صنعت حکومتک ارشاداتنه محتاجدی . فرانسه ده
قولبر نه درلو بررنده قوللانیلاجفنه ، برچوخه نک اکی نه قدر

اولاجفنہ دائر بر نظامنامہ قلمہ آلدیرمشدی . فابریقہ لری ہپ
مفتشر زیارت ایدرلر ، نظامنامہ بہ موافق اولیان کافہ معمولاتی
حجز ایدرلر ، بعضاًدہ آتشیہ یاقارلردی . مملکتہ یکی صنعتلر ادخال
ایلکی حکومت درعہدہ ایدر ، فابریقہ لر تاسیس ایلر ، بونلرک
مدیر و عملہ لری نہ حکومت معاش ویرردی . (مثلاً غوبلہن
فابریقہ لری ایلہ دانسہ لا فابریقہ لری قولہر طرفندن احداث
ایدلمشدی) .

کذا تجارتی دہ حکومتک تنظیم ایتمسی اوروپادہ بر قاعدہ ایدی .
خصوصی تاجرلر حکومتک مساعده سی اولمادجہ و نظامنامہ بہ دہ
موافق بولونمادجہ نہ ذخیرہ لری نی نقل ایتدیرہ بیلیرلر ، نہ دہ برشی
آلوب صاتارلردی . فرانسه حکومتی قراللقدن بغدای چیقارماسنی ،
حتی بونک بر ایالتدن اوبرینہ کچیرلمسنی ویا ارزاق مقامندہ
طوبیلاماسنی دہ منع ایتمشدی . بودہ ، حکومتک قحط و غلابہ میدان
ویرمہ مک احتیاطندہ بولونماسندن ، بغدای فیئاتی یوکسنتمک
ایچون بغدایلری صاقلامقلہ اتہام اولونان بر طاقم محتکرلردن
قورققدہ اولماسندن ایلری کلیردی . فقط بومانعت ، محصول چیقمان
ایالندہ قحط و غلابہ ظہورینہ نتیجہ ویردی . چونکہ بورایہ
بغدای ایستندلیکی کی کتیریلہ مزدی . محصول چیقان ایالتردہ ایسہ
کویلولر بغدایلری نی کیصہ صاتاجقلری نی بیلمدکاری ایچون اللرنندہ
برچوق بغدای قالیردی .

ویرکی خصوصندہ عمومی بر قاعدہ یوقدی . ہر حکومت

مملکتی فقیرلشدیره جکمی فقیرلشدیرمیه جکمی ، بورالینیه هیج دوشونمەدن کندیسنه الکچوق پاره کثیره بیله جک برویرکی تاسیس ایدردی . همان هیج بریرده ویرکیلر مساوی دکلدی . زادکانی قاییرمق حکومتک منافی افتضاسندن اولدینی ایچون زادکان همان همان ویرکیدن استئنا ایدیلیر ، یالکنز کویلولر ازیلیردی .

اصول تجارت . — ممالک اجنبیه ایله تجارت اون یشنجی عصرده وندیك وفلورانسه رجال حکومتی طرفندن تأسیس ایدیلان اساسلره کوره تنظیم ایدلمشدی . — اوزمان دنیلوردی که ، هر حکومت سائر حکومتلره تجارت خصوصنده عاداتا برررقیب کییدر . « برقومک فائده سی اوبرینک ضرری دیمکدر . تجارت برحربدر . » هر حکومت کندی ثروتی سائر حکومتلرک ضررینه تزید ایتکه چالیشمالیدر . بناء علیه ثروت الکزیاده آلتون و کوموشدن عبارتدر . چونکه النده پاره سی اولان هرشیء تدارک ایده بیلیر . بناء علیه قاعده اساسیه ، مملکتیه ممکن اولدینی قدرچوق پاره ادخال ایتک و مملکتندن ده آزاره طیشاری چیقارمقدر . بونک ایچونده چوق امتهه اخراج ایدرک (یعنی ممالک اجنبیه یه صاتارق) بوکامقابل چوق پاره آلمالی ، پاره صرفه مجبور اولمامق ایچونده آزشی ادخال ایتلی (یعنی ممالک اجنبیه دن ازامتهه صاتین آلملی) در . حکومتلرده طبق تجارتخانه لر کییدر . بونلرده آز آلوب چوق صاتارق ز نکیله شیرلر . هر تجارتخانه سنه

نہایتندہ ادخالات ایلہ اخراجاتی موازنہ ایدرکہ ، بوکا (تجارت موازنہسی) دیرلر (هر حکومت عادتاً بریانقہ کبی هر سنہ نہایتندہ واردات ومصارفنی مقایسہ ایدرکہ بوکادہ (موازنہ) دینیر) . بر حکومت ادخالاتدن زیادہ اخراجادہ بولونمش ایسہ ، پارہجہ برتمتعدہ بولونمشدرکہ ، شوخالده تجارت موازنہسی انک کارینہ اولور . شاید چوق ادخالاتدہ بولونمش ایسہ ، چوق پارہ ضایع ایتمش دیمکدرکہ ، اوزمانده تجارت موازنہسی ضررینہ اولور . بناء علیہ ثروتی چوغالثنان اخراجاتی تزید ، ثروتی آزالثنان ادخالاتی واک زیادہ معمولات صنایعہ ادخالاتی تقیص ایتمک ایجاب ایدر . هر حکومت کندی فابریقہ لری معمولاتنک یالکز حکومتی داخلندہ صائنامسنی واجنبی امتعہسی یرینہ مملکتدہ اعمال اولونان اشیانک قولانلاسنی تأمین ایچون تدابیر اتخاذا ایتملیدر . بونک ایچوندہ ایکی اصول واردر . - الک قطعیمی ممالک اجنبیہده اعمال اولونان بعض اشیایی ادخال ایتمکدن تاجرلری منع ایلمکدر . قولبر ، ونیدیک دانته لارینک فرانسهده صائیلماسنہ مانع اولوردی . فرانسرلر ، فرانسه فابریقالرنده اعمال اولونان دانته لالردن باشقہسنی صاتین آلمازلردی . ایشته بو اصولہ (اصول زجری) دیرلر . - اجنبی معمولاتی مملکتمزہ کلدیکی زمان بونلردن بر (کمرک) (۱) آلقہ اکتفا اولونابیلیر . بودہ تاجرلری مذکور امتعہنک

(۱) اجنبی امتعہسندن کمرک آلتی اصولی ، دها اوز ایکنجی عصرده ، شرق لیمانلرنده تماماً موجودی . بو کمرکاری آلفہ مأمور اولان دائرہده

فیثاتی آر تدریغہ مجبور ایدر . کندی مملکت مزده اعمال اولونان
 عین جنس دن امتہ ایچون کمرک رسمی اولمادی فی ایچون بونلر اجنبی
 امتہ سی ایله نافع بر صورتده رقابت ایدہ بیلیر لر . حدودده حکومت
 طرفندن آلنار رسوم هم حکومتہ بر واردات ، همده ارباب صنایع
 ایچون بر (حمایہ) تشکیل ایدر . بوکاده (اصول حمایہ) دیر لر .
 اون یدنجی عصرده اوروپا حکومتلرینک کافه سی بوز جرویا
 حمایہ اصوللر دن برینی قبول ایشلردی . - ۱۶۵۱ (سیر سفائن
 نظامنامه سی) انکلیز بحر یه سنه اصول ممنوعیتک تطبیقندن عبارتدی .
 بونظامنامه ده بر انکلیز کمیجیسنه عائد ، بر انکلیز قپودانک
 قومانداسنده وانکلیز کیملر دن باشقه کیملرله انکلتره ویا انکلیز
 مستملکہ سی ایله تجارت ایتمک منع ایدیلوردی . - قولبرده
 فرانسه ده اصول حمایہ بی قبول ایتشدی . قولبره : « کمرک رسمی
 عادتا قولتوق دکنک لری کییدر . صنایع بو دکنک واسطه سیله
 یورومکی اوکره نیر وقوتتی بولور بولماز آلندن آتار . » دیوردی .
 ایشته بو اصوله (اصول تجارت ، سیستم مہرقا تیل) دیر لر (۱) .
 بو اصول دن مقصد تجارتک تشویق و مملکتہ چوق باره جلب ایلمکدی .

(عربجه برکله دن) دو آن دیر لردی . فقط کمرک رسمی اوزمانلر یالکز
 الهپاره کچیر مک واسطه سن دن باشقه برشی دکلدی . بو اصولی صنایع ایچون
 استعمال ایتمک فکری صوکره دن حاصل اولشدر .
 (۱) دهاطوغریبی بو اصولک نه نظریات ، نه ده عمومی تطبیقاتی واردی .
 یالکز اون آلتنجی و اون یدنجی عصر رجالنک اصول و قواعدینی (مہرقا تیلیزم)
 نامی آلتنده طوبلا مشلردی .

بواصول ، ایتالیا شهر لیرینک چوق ایشنه کلیردی . چونکه بونلر یالکز اعمالانده بولونارق ، اخراجات یابارق ژوتلرینی تامین ایدرلردی . بونک ایچونده تجارتلرینی دشمن شهرلرینه قارشلی مدافعه یه مجبورلردی . اون بشنجی عصرده پاره نادر و مرغوب اولدینی برزمانده بواصول پک موافقدی . فقط یالکز ، بویوک حکومتره و برده آسریقانک کشفی کوموش ایله آلتونی بوللا-شدر دینی برزمانده تطبیق ایدیلوردی .

مقتصدلر . — مملکتلرله حکومتلرک ژوتتی آرتدیرمق وسائطنی نظری اولارق تدقیقه ده اون بدنجی عصرده باشلانمشدی . بو تدقیقاته (علم اقتصاد) (۱) یعنی بر حکومتنک اداره علمی نامی ویرلمشدی . مقتصدلر صنایع و تجارتی ثمره دار برحاله کتیرمک ایچون بونلری ندرلو تنظیم ایتمک لازم کله جگنی وتاجرلری اک آز منضرر ایتمک اوزره حکومته اک چوق کار-کتیرن ویرکی اصولنک نهدن عبارت اولدینی تدقیق ایدیورلردی . مقتصدلر اوج طبقه یه آیرلمشدردر . قسم اعظمی فرانسرلدر .

اولاً — ده اون دردنجی لوتی دورینک اواخرنده (بووا کیلبر) ایکی اثرنده ، (فرانسه نک تفرعانی) (۱۶۹۷) ، (فرانسه نک رده سی) (۱۷۰۷) نده ، ووبان (دیم رووایال) نده فرانسه نک فقیرلشمکده اولدینی بیان ایدیلر . اهلینک تناقص

(۱) بوکله ایلاک اوکجه ۱۶۱۵ سنه سنده (مون قره تن) طرفدن استعمال ایدلشدر .

ایتدیکنی، حکومت تداییرشده اتخاذا ایلدیکی حالده ینه چوق
 برورکی آلامادیفنی ایستاستیققرله کوستردیلر . بونکده سببی
 (جزیه) اصولی ایدی . بو رسم وقتیله والیلر و وکیللر طرفندن
 ایستلدیکی کبی وضع ایدلمشدی . زنکینلر کندی مالکانهلری
 ایله چفتجیلرینک مالکانهسنی بوندن استشنا ایتدیرمه نک یولنی
 بولیورلردی . زادکانک اراضیسی ویرکیدن معفو ایدی . بوتون
 تکالیف یالکز فقیر زراعه تحمیل ایدلمشدی . بونلر اکثریا
 محصوللرینک اوچده برینی ویرکی یه ویررلردی (راهبره ویریلن
 عشر ایله سه نیورلره ویریلن خراجلر بوکا داخل دکلدی) .
 بناء علیه کویلر بوشالیور، غیر مزروع بر حالده قالیوردی . چونکه
 چالیشق کویلولره هیچ فائده تأمین ایتیموردی . ووبان ایله
 بووا کیلبر بلا تفریق بوتون اراضیدن تحصیل ایدلمک اوزره
 عادلانه بر ویرکی تأسیس ایدرک فنالفک اوکنی آلمنی توصیه
 ایدیورلردی . بونلرک اثرلری محکمه طرفندن محکوم ایدیلرک
 احراق ایدلدی (۱۷۰۷) . فقط بو اثرلر هرکه آکلادی که ،
 فرانسه نک ویرکی اصولی اصلاح ایدلمکه محتاجدی .

ثانیاً — اون بشنجی لوئی دورینک اورتهلرینه طوغرو
 قرالک اطباسندن که نهی (تابلو نه قونومیق) نامنده بر اثر نشر
 ایدی . اون بشنجی لوئی بوکا سراق ایدرک روایت کوزره کتابک
 تصحیحلرینه کندی باقدی . علم اقتصاد عاداتا مودا حکمنه
 کیردی . که نه یک تلامیذندن مرکب بر غروپ وجوده کلدی .

بو غروپده میرابو کبی سه نیورلر ، اداره رئیس غورنه کی بو یوک مامورلردن مرکبدی . بونلرک قاعده اساسیه سنه نظر آ جناب حق ثروتک محصولنی تنظیم ایچون قوانین طبیعی بی وضع ایلمشدر . بو قانونلر نقصاندن عاریدر . بوکا دائر انسانلرک یایاچقلمی قانونلر قانون طبیعی درجه سنده مکمل دکلدر . بناء علیه الک مکمل اصول ، هرشیء جریان طبیعیسنه بر اققدر . بونلر شو نظریه لرینه (فیزیوقراسی) یعنی (حاکمیت طبیعت) نامی ویریورلردی . کذا فیزیوقراتلر ثروتک زره دن کلدیکنی ده تدقیق ایتمشدر و بو واسطه ایله برده محصولات نظریه سی تاسیسنه مجبور اولمشلردی (۱) .

بونلرک فکرنجه آلتون وکوموش ثروتدن معدود دکلدر . ثروتک یالکز علامتندن معدوددر . حقیقی ثروتلر ، نافع اشیادر . حتی کهنی ، محصولات ارضیه دن باشقه بر شیء ثروتدن عد ایتمزدی . انک فکرنجه « ارض ثروتلرک یکانه منبعیدر » . دیگر مقتصدلر بوکا محصولات صنایعیه نکه ده کافه سنی علاوه ایتمشلردی . - بونلرک جمله سی ده حکومتک اتخاذ ایلدیکی تدابیری تقییح ایدیورلردی . آنلرک فکرنجه ، موجود نظامنامه لر صنایع و تجارته یاردم ایتمکدن زیاده ارباب صنایعک محصول وجوده کتیرملرینه و تاجرلرک معاملات تجاریه ده (۱) بونظریه بالخاصه دوپون دونه مور ایله مرسیه دولاری و بیهرک اترلرنده ایضاح ایلمشدر .

بولونمارینه مانع اولمقدن باشقه برایشه یاراماز . حکومتک اک مکمل یاباجنی شی ارباب صنایع و تجارتی حمایه و اداره ایتکه اوغراشما یارق انلری کاملاً سربست براققدر . چونکه ممکن اولدینی قدر چوق و اوجوز محصولات وجوده کتیرمکده اک زیاده انلر علاقه دار اولدق لری کبی کندی منفعتلرینک نه جهتمده اولدیغنی ده انلر دهاپی بیلیرلر . قولبر بر کون ارباب صنایعدن برینه مملکتک ثروتی آرتدیرمق ایچون نه یاباییله جکنی سؤال ایتمش ، بوذاتده شو جوانی ویرمشدی : « مون سه نیور ، ایشی سربست ، معامله پی سربست براقیکز » . ایشته غور نه یک کتابنه آلدینی بو جمله مقتصدلره بر دستور اولمشدر . مقتصدلر ارباب صنایع و تجارت ایچون حریت تامه طلب ایدیورلردی . بونلرک فکرنبه صنایعه مانع اولان نظامنامه لرله اصناف لونیجه لرینی قالدیرمق ، هرکسی (اعمالاتده سربست) براقق ، تجارتی خللدار ایدن ممنوعات ایله انحصارلری لغو ایتک ، هرکسی آلم صایمده حر براققدر . بو حریت هر مملکتک ارباب صنایع و تجارتی اره سنده بر (سربستی رقابت) تولید ایدرکه بوده صنایع و تجارتی خدمت ایدر . چونکه او زمان ارباب صنایع اک اپی محصولات وجوده کتیرمکه مجبور اولاجنی کبی تاجرده کندی رقیبلرندن دها اوجوز صامق مجبوریتنده بولونور . بو صورتله هرکس کندی منفعتی داخلمده محصولاتق اصلاح ایتکه و فیاتلری ده مستهلک لرک منافعنه اولارق تنزیل ایلکه

چالیشیرلر . - فیزیوقراتلرک فکرینه کوره حکومت بوتون ویرکیلی کویلولردن تحصیل ایدرک زراعتی محو ایدیوردی .
 بونک ایچون انلر ویرکینک بلاتفریق بوتون املاک صاحبلرندن
 آلماسنی وبالواسطه رسوم ایله کمرک رسمنک لغوینی طلب
 ایدیورلردی . حتی بعضری ارضک یکانه منبع ثروت اولدیغنی
 بیان ایدیور و بوتون املاک صاحبلی طرفندن تأذیه ایدلمک
 اوزره (بر ویرکی) تحصیلنی طلب ایلوردی .

ثالثاً — اون سکزنجی عصر مقتصدلرینک اک مشهورلری
 زماناً اک صوگ کلنلردی . بونلرده بر فرانسهز ، تورغو ایله ،
 بر اسقوجیالی ، آدام سمیت ایدی . بونلر حادثات اقتصادی بی
 سلفلرندن دهامکمل بر صورتده تدقیق ایلدیلر . تورغو ،
 قائمه ایله باره نک نه فرقی اولدیغنی ، (تقسیم عمل) ک ثروتی
 تزبیده نه درلو خدمت ایلدیکنی ، یومیه ایله سرمایه بیننده نصل بر
 مناسبت اولدیغنی کوستردی . آدام سمیت طاغنیق بر حالده بولونان
 بوتون نظریاتی غایت آچیق بر اثر حالنده ، (ثروت ملل)
 نامی آلتنده طوبلادی (۱۷۷۶) . بو اثر شویکی علمک اهمیتنی
 اهلالی یهده آکلادی . ارضک یکانه منبع ثروت اولمادیغنی
 کوستردیکی کبی صنایعک مواد ابتدائیه بی تبدیل ایدرک هر سنه
 ثروتلری نصل وجوده کتیردیکنی ده ایضاح ایتمدی .

بو کون مقتصدلرک تماماً حقلی اولدقلری کسدیر یله مز .
 کندی باشلرینه بر اقبلاجق اولان تاجرلرک کندیلرینه دائماً

یتشمشدی . بونلر کندیلرینه (فیلسوف) نامی ویررلر
 ومسلکلیرنده (فلسفه) دیرلردی . بو محررلر ، اوزمانه قدر
 فیلسوفلری اشغال ایدن بویوک مسئله لر حقنده یکی هیچ برفکر
 اورتایه قویامامشلردی . بونلر اک زیاده عملی مسئله لره اهمیت
 ویررلردی . زمانلرینک اعتقادات ونظاماتی تدقیق ایدرلر ، بونلری
 کندلی اثرلرنده تنقید ایدرک قیمتلرینی دوشورمکه چالیشیرلردی .
 دهاطوغروسی بونلر فیلسوف اولمقدن زیاده برر (پولیسیت)
 ایدی .

اوزمانلر اوروپانک همان بوتون مملکتلرنده هیات اجتماعیه نك
 اساسلری برکبی ایدی . اوده حکومتک نفوذ مطلقندن ،
 کلیسانک نفوذ مطلقندن عبارتدی . اقوام ، حکمدارلرینه اطاعت
 ایتمکه آلیشمشلردی . بونلر : قراله نفوذ و صلاحیتی جناب حق بخش
 ایتمشدر . قرال امر و حکم ایتمک حقنه مالکدر . تبعه سی اکا اطاعت
 وظیفه سیله مکلفدر . قرالک حقوقی غیر محدوددر ؛ نفوذ مطلق
 صاحبیدر . دیورلردی . قرال ایله ناظرلری ایسه اساساً هیچ
 برکیمسه نك کندیلرینه قارشى طور اچق واسطه لری اولمادیغنی
 بیلدکلری ایچون نه تبعه لرینک ارزوسنی ، نه ده مملکتک منافعی
 نظر اعتباره آلمادن اداره حکومت ایدیورلردی . حتی صرف برطمه
 تابع اولارق حرب ایدیورلر ، مدبب برسرای خلی بسله مک
 ایچون مملکتک پاره سنی صرف ایدیورلر ، غایت آغیر قانونلر
 وضع ایدیورلر ، حرکتلرینی کیم مؤاخذه ایدرسه حبسه

طیقدیر بیورلردی . حکومتک مساعده سنی آلمادن کتاب نشر ایتمک ممنوعدی . ناظر لر ایستیر لسه اهالیدن هر کسی توقیف و یا حبس ایستیره بیلیرلردی . نه حکومتک حرکتی قونترول ایدیلمیر ، نه ده حریت شخصییه رعایت اولنوردی . بو طرز اداره یه (استبداد) دیرلردی .

کذا جماعت خرستیانییه ده قاتولیک مملکتلرده اولدینی کبی پروتستان مملکتلرده ده کلیسایه اطاعت ایتمک آلیشمش لردی . رهبان صنفی نه کبی دساتیره اعتقاد ایدیله جکنی ، نه درلو آیینلر اجرا اولوناجفنی قرار لاشدیر مق حقه مالکلردی . جماعتک وظیفه سی یالکز بودساتیر ایله آیینلره اطاعت ایتمکدن عبارتدی . کلیسانک مذهبه رعایت ایتمیلر حقه ده عاصی کبی تعقیبات اجرا ایدیلمیردی . بر مملکتده بر دیندن فضله دین بولونماسنه تحمل ایدلزدی . بونک ایچونده بوتون اهالی حکومتک دینه تابع اولمغه ، بازار دعالریده بولونمغه ، قربان تناول ایتمک ، معین کونلرده پرهیز طوتمايه ، کلیسا واسطه سیله مراسم ازدواجیه و تدفینیه اجرا ایستیرمک ، چو جقلمی کلیساده وافتیز ایستیرمک ، قاتولیک مملکتلرده ایسه کناه چیقارمغه ، ریاضت ایتمک اجبار ایدیلمیردی . بوکا (عدم مسامحه) اداره سی دیرلردی . حکومت ای کلیسا یکدیگرینه متقابلاً یاردم ایدرلردی . حکومت راضیلری تعقیب ایدر ، تبعه یی کلیسایه اطاعت ایستیرمک اجبار ایلردی . رهبان صنفی ده قراله اطاعتی بروظیفه دینه درجه سنه کتیرلردی . بوایکی

نفوذ مطلق عادتاً اجرای حاکمیت ایچون برلشمشردی .
 بواصول اداره انکلترده ده‌ااون یدنجی عصرده صار صیلمشدی .
 حکومت ایله کلیسا یکدیگری ایله حرب ایدرک هر ایکسی ده
 ضعیف دوشمشردی . ۱۶۸۸ انقلابی قرالک استبدادینی محو
 ایتمش ، مساعه دینه تأسیس ایلشدی . اوزمان قرالک نفوذی یاننده
 پارلمنتونک نفوذی میدان چیقمش ، کلیسانک نفوذی یاننده
 مخالف کلیسار تأسیس ایدلمشدی . بناء علیه هیأت اجتماعیه
 خلل کلدن قرالک تبعه سی اوزرینه ، کلیسانک ده جماعتلی
 اوزرینه اولان نفوذینی ضایع ایده بیله جکلی آکلاشلمشدی .
 بوتجربه قرالارک حقوق روحانیه نظریه سی ایله توحید ادیان
 نظریه سنه معنوی برضربه اورمش ، انکلتره حکوه تی (حریت
 سیاسیة) ایله (مساعه دینه) یه نائل اولمشدی . اوصرده
 صورت عملیه ده تأسیس اولونان شیبری نظری اولارق محق
 کوسترمک ایچون انکلز فیلسوفلی ظهور ایتمشدی . بونلرک
 اک مشهورلی (مساعه یه دائر مکتوبلر) مؤلفی لوق ایله
 شفته سبوری و بولینغ بروق ایدی .
 بونلرک فکر نجه خرسیتیان دینی عقل و محاکمه یه موافق اولما
 لیدر . چونکه قوه محاکمه حقیقتی بولمق ایچون بزه جناب
 حق طرفدن بخش ایدلمشدر . مختلف خرسیتیان مذهبلی
 آره سنده منازع فیله اولان مسئله لر اودرجه حائز اهمیت دکلدر .
 اصل مسئله بوتون خرسیتیانلر بیننده مشترک اولان قواعد

اساسیه در . ایشته خرسیتیانلغك شو صورتله خلاصه سی (دین طبیعی) بی تشکیل ایدیور ، و بوضورتله ده اساسلی ایکی فکر آلدیه ایدیورلدی . اوده شونلردی : کائناتی یالکز جناب حق اداره ایدر . روح بشر لایعوتدر .

انکلیز فیلسوفلری انسانك حقایق اساسیه بی کوره جك درجه ده جناب حقدن بر قوه محابه ، و ایلیکی فنالقدن تمیز ایدیه جك درجه ده برقابلیته (حس معنوی به) نائل اولد . یغنه قائل اولیورلدی . بونلرك فكرنجه انسان طبیعه فضیلتلی و محابه قابلیتلیدر . چونکه آثار الهیه ، حاصلی بوتون مخلوقات ربانیه اکلدر .

فقط اوتهدن بری تاسس ایدن عادانه حرمت ایتمکه آلیشقین بولونان انکلیزلر رسمی کلیسانك قالدیرماسنی ارزو ایتمیوردی . حکومت طرفندن معاشلی و حکومتك حمایه سنده ، حائز امتیاز بر کلیسا بولونماسنی انلرده موافق کوریوردی . فقط اعتقادات سائره نك همان کافه سی ایچون مساعه ، یعنی دوچار مظالم اولادن اعتقاداتی اظهار ایتمك حقنی طلب ایدیورلر ، تهلكلی عد ایتمکلی اعتقاداتی بو حقدن محروم ایلدیورلدی . مثلاً ملحدك ایله قاتولیکلک بو قیلدندی . بونكده سببی ، بونلر حقدن کوستریله جك مساعه نك حریت وجدانه رعایت اساسنه استناد ایتمه مسیدی . حاصلی بونلر یالکز بعض اعتقاداتك نشری حقنی طلب ایدیورلدی . کندیلرینك حد ذاتنده پك مساعه کار

اولماریده دینلرینک یک زیاده واسع اولماسندن ایلری کلیوردی . انلرک نظرنده آنفلیقان دینک یرینه دین طبیعی قائم اولیوردی .

بویله بر تبدیل دساتیر ، پولتیقهدهده اجرا ایدلمشدی . ۱۶۸۸ انقلابی انکلتزدهده بر قراللق تأسیس ایلشدی . بو قراله صلاحیتی پارلمنتویله تمثیل اولونان ملت ویریوردی . فیلسوفلر قرال ایله تبعه سی بیننده کی مناسباتی ایضاح ایچون یکی بر نظریه ایجاد ایلشردی . لوق ، (مقوله) نظریه سنی اورتایه قویمشدی . لوق دییوردی که : حکومت ، ملتی تشکیل ایدن اهالی بیننده بر مقوله ایله تأسیس ایتمشدر . بونلر ، منافع مشترک لری ایچون آرهلرنده بر مقوله عقد ایتمشلردر . لوق ، انسانلرک هیئات اجتماعیه آرسنه داخل اولمازدن اول طور و حرکتلرینه رهبر اولاییله جک درجهده بر اخلاقه مالک اولدقلرینی و حقوق طبیعییه ، یعنی حقوق بشریه یه صاحب بولوندقلرینی قبول ایدیوردی . لوقک فکرینجه بو حقوق : حریت شخصیه دن ، عائله پدرینک حقوقندن ، ملک صاحبنک حقوقندن عبارتدی . بوتون بو حقوق ، دین طبیعییه مستند بولوندینی ایچون مقدسدر . انسانلر بو متقابل حقلرینی محافظه ایچون حکومتلری وجوده کتیرمشلردر . حکومت بو حقوق طبیعییه یی محافظه ایتلیدر . حکومته انجق بو شرط داخلنده اطاعت ایدیله بیلیر . شاید حکومت بو حقوقه تجاوز ایده جک اولورسه اوزمان سبب

موجودیتنی غائب ایتمش اولور. کندیسنه صلاحیت بخش ایدن
مقاوله منفسخ اولور، وایشته اوزمان اهلیدن هر فرد حکومته
قارشی طور مق حقی محافظه ایدر. بناء علیه حکومتک نفوذی
(حقوق روحانیه نظریه سنده اولدینی کبی) مطلق دکلدر. اهلینک
(حقوق طبیعی سی) ایله تحدید ایدلشدر. حق تصرف قطعی
اولدینی ایچون حکمدار ویرکی آلمق یعنی اهلینک اموالندن
بر قسمی آلمق حقی حائز دکلدر. حکمدار منافع عمومی
ایچون پاره به احتیاج کوردیکی زمان بونی اهلیدن ویا اهلینک
مبعوثلرندن طلب ایده بیلیر. بناء علیه کندیسنی ترصد آلتنده
بولوندر اراق بر اداره مطلقه اجرا ایتسنه مانع اولان مبعوثان
ملتله بر لکده اداره حکومت ایدر.

بولینغ بروق بو فکری ایضاح ایتدیکی صروده دیورکه :
منفرد بر صلاحیت دائم استبد اولغه میالدر. کذا عمومی اداره لرکده
اهالی به ظلم ایتسنه مانع اولمق ایچون یکانه چاره، بونلرک هر ایکسی
اره سنده موازنه تأسیس ایده جک وجه ایله ایکسینک اورتاسنی
بولقدر.

ایشته انکلتزده (حریت سیاسیة) بو صورتله ظهور ایتشدر.
مساعه دینه کبی حریت سیاسیةده عمومی بر قاعده اوزرینه
تأسس ایتمه مشدر. انکلز فیلسوفلری اهلیدن هر فردک عین
حقوقه مالک اولمالرینی طلب ایتیمور لردی. اجرای حکومت ایده جک
اولان قرال ایله زادکانک حقوق ارضیه سنی قبول ایدیور لردی.

بونلرک ایسته دکلری شی حکومتک حدمعینی تجاوزه ایدرک
(حریت شخصیه) به تجاوز ایتمه سی ایدی .

فرانسز فیلسوفلری . — اون دردنجی و اون بشنجی
لوئی زماننده فرانسه، مسامحه قبول ایتمین بر کلیسایله بر حکومت
مطلقه به تابع قالمشدی. فرانسه ده نه مسامحه دینه، نه ده حریت
سیاسیه معلومدی. فقط بو اداره آرتق اوصانج ویردیک ایچون
اون سکزنجی عصر بدایتندن اعتباراً بالخاصه منورالافکار
صنفلر آره سنده کلیسایله مطلقیت اداره علیه نه مخالف بر فکر
حصوله کلکه باشلامشدی. ده اونا دردنجی لوئی دوری نهایتده
پارسده و سرای قرالیده برچوق متین فکری آدملر واردی.
(اوزمان بونلره بویله دیرلردی) . بونلر دینه آچیقدن آچیفه
تعرض ایتمیه رک دینه قارشی لاقیدی فکری نشر ایدرلردی.
کذا قرالدن و حکومتدن مشتکی، سیاسی غیر ممنونلرده واردی.
اون بشنجی لوئی زماننده غیر ممنونلر انکلترده ظهور
ایدن یکی قاعده لرده وقوف کسب ایتمشلردی. فقط تعقیباته
دوچار اولادن بو فکری آچیقدن آچیفه نشر ایتمک
قابل اولمادینی ایچون فرانسز محررلری بو فکرلرینی رومانلره،
حکایه لره، سیاحتنامه لره صوقوشدیرلر، مفروض اسملر
تحتنده میدانه قویارلردی . صوکره یاواش یاواش نظریه لرینی
ایضاحه، بوندن یکی یکی نتیجه لرده چیقارمغه باشلامشلردی .
نهایت ده عمومی بر طاقم قاعده لر اورتایه قویمشلر، حتی

کندیلرینه تقدم ایدن انکلیز لرك خاطر و خیالنه کلدك اساسلی اصلاحات طلبنده قالدیشمشردی .

ایشته فرانسهده بوصورتله ایکی طبقه فیلوسوف یتشدی . اون سکنزنجی عصرک نصف اولنده کلن برنجی طبقه یی موتسکیو ایله وولتەر . نصف نایسنده کلن ایکنجی طبقه یی ده روصو ، دیده رو و آنسیقلوبه دیستلر وجوده کتیرمشلردر .

موتسکیو ایله وولتەر، هر ایکسی ده صنوف عالییه منسوب رجالدندی . موتسکیو زنکین وزادکاندندی . (بورددو) پارلمنتوسی ریاستنی حائز اولدینی کبی دهاصوکره آقاده می اعضاسی ده اولمشدی . وولتەر پارسلی بر مقاولات محررینک اوغلی ایدی . زه زوویتر آرهنده بویومش ، دها صوکره (فهرنه ی) شاتوسنی صاتین آلاجق درجده کسب ثروت ایلشدی . هر ایکسی ده ایچنده یاشادقلری هیئات اجتماعیه یی آلتاوست ایتمدانی حالیه قبول ایتمک ایستیورلر ، یالکز اصلاحات طلبنده بولونیورلردی . کذاهر ایکسی ده طوغرودن طوغروه انکلیز لرك مسلکنی تعقیب ایدیورلردی . وولتەر ، بویوک بر سه نیورله ایتدیکی مجادله نتیجه سنده فرانسه یی ترکه مجبور اولدینی زمان انکلیترده اوچ سنه قالمش ، (هازییاد) نیی قرالیچه یه اتحاف ایتمش ، (فلسفی مکتوبلر) نده بوتون مشاهداتی نقل ایلشدی (۱۷۳۱) . وولتەر انکلیز قانون اساسیسنه و بالخاصه مسامحه دینه سنه حیران اولمشدی . وولتەر ، اومیدیمسلك تحریری ائناسنده ، بوتون حکایه .

لرنده، اشعارنده، هجولرنده، تاریخلرنده، قاموس فلسفهسنده سیاست ایله دین حقنده بر چوق ملاحظهلرده و تقیدلرده بولومشدی .

وولتهر علی العموم حکومت مسائله اودرجه اهمیت ویرمیوردی . مطلقیت اداره بی حائز حکمدارلرله پک قولای او بوشیوردی . فقط بو حکمدارک، فیلسوفلرک مسلکئی تعقیب ایتمی شرطدی . وولتهر دییوردی که : « آرتق لوتهر زماننده اولدینی کبی انقلاب یایمق ممکن دکلدر . اصل انقلابی اداره حکومت ایده جک کیمسه لرک افکارنده یامالیدر » . وولتهر ، اذا ، ظالمانه جزالر و حجزلرکبی انسه سائته مغایر عادتله هیچ تعرض ایتمیوردی . اونی الک زیاده اشغال ایدن شی ، عدم مساعه دینه یه قارشى مجادله دن عبارتدی .

وولتهر ادیان مثبتنه نک کافه سنه دشمندی . دین طبعیدن (جناب حق ایله ابدیت روحدن) باشقه برشی قبول ایتمیوردی . وولتهر حیاتی هب مظالم ، انکیزسیون و دین محاربه لری کبی عدم مساعه نک بوتون طرز لری علیهنده یازی یازمقله کچیرمشدی . یکانه ارزو ایتدیکی شی ، رهباندن امتیازاتک آلماسی ایدی . فقط وولتهر کیتدی کجه شدتی آرتدیوردی . حیاتنک صوکلرینه طوضرو اک زیاده خرسیتیانلغه دشمن کسلمشدی . خرسیتیانلغی سائر دینلرله مقایسه ایدرک استهزا ایدیوردی . یکانه دستوری شوایدی : « آچانغی ازملی ! » انلر نظرنده بو آچاق خرسیتیانلغدی .

وولتر دینی اور تادن قالدیرمق ایسته مزدی (اهالی پی
قوانینه اطاعت ایندیرمک ایچون دینی لازم عدایدردی) . فقط
دساتیرسز ، اسرارسز ، تمثالسز ، رهبانی یالکز اهالی یه اخلاق
درسی ویرمکه ! کنفایدر بر دین ارزو ایدیوردی .

وولترک شا کردلری ، وولتریه نلر ، هیچ بردساتیر
سیاسیه مالک دکلدردی . بولنر قوه محاکمه وانسانیت نامنه دینه
متادیبا تعرض ایتمشدردر .

موتسکیونک دشمنلری هر نه قدر کندیسنی « دین طبیعی
طرفداری » اولقله اتهام ایتمشدرسه ده موتسکیو بالعکس دین ایله
پک آراشتغال ایتمشدر . موتسکیو یالکز مسامحه طلب ایلمشدر .
کندیسی هرشیدن اول سیاسی بر محرردی . موتسکیو ایلاک
اثرندن ، (ایران مکتوبلری) نندن اول اوروپانک برچوق
مملکتلرنده سیاحت ایتمش ، انکلتزه نظاماتی فوق العاده حیرتخی
جلب ایلمشدی . حتی (روح الشرایع) نده انکلیز مشروطیتخی
ای بر اصول اداره یه نمونه اولمق اوزره تصویر ایلمشدی (۱) .
انک فکر نجه حکومتدن مقصد ، حریتک محافظه سیدر . بونک ایچونده
اکامین چاره اداره حکومتی حکمدار ایله ارثی سه نیورلردن مرکب
بر مجلس و برده اصحاب املاک طرفندن انتخاب اولوناچق

(۱) فقط اون سکیونجی عصرده کی انکلیز مشروطیتی تدفیق
ایدلکدن سوکره موتسکیونک بونی یا کاش بر صورتده تصویر ایتمش اولدینی
آکلاشله مشدر .

مبعوثلردن مرکب بر مجلس بیننده تقسیم ایتمکدن عبارتدی .
 مشهور (تفریق قوا) نظریه سنی ایلك دفعه میدانه قویان، مونتسکیو در .
 مونتسکیونک فکر نیجه منتظم بر حکومت مالک اولق ایچون اکیامین
 واسطه، بر بردن آیری اوچ قوتک بولونماسی ایدی. انلرده : قوه
 تشریعیه، عدلیه و اجرائیه دن عبارتدی . - مونتسکیو
 (حرپارلمنتو مسلکی) نک رئیسیدی .

نه وولتر، نه ده مونتسکیو انقلابچی دکلردی. بونلر یالکنز
 آتیده کی اصلاحاتی طلب ایدیورلردی: دین خصوصنده، کلیسانک
 معارضله دینسزله مظالم اجرا ایتهمسی، ره بانک او قدر ز نکین
 ونفوذلی اولماسی ؛

سیاست خصوصنده، حکمدارک زادکان ایله بر لکده اجرای
 حکومت ایدرک کیفی توقیفات اجرا ایتدیرمه مسی ؛ زادکانک
 ویرکی ویرمه موافقت و حقوق عدلیه و حجزیه سندن فراغت ایلسی ؛
 اذانک، ظالمانه جزالرک، خفی محاکمه لرک قالدیرلامسی ؛ ویرکینک
 عادلانه وضع و جبايت ایدلسی .

ایکنجی طبقه دن کلن فیلسوفلر او قدر معتدل دکلردی .
 روصوایله دیده روعوام صنفندندی. بری جنوره لی بر ساعتجینک،
 او بری ده لانغری بریچاقینک اوغلی ایدی . ایکسی ده پارسده
 کوجلکله یاشایورلر، حیات اجتماعیه تشکیلاتی مکمل بولورلردی.
 بونلر انکلیز نظاماتنه اودرجه اهمیت ویرمورلر ، ده اعمومی
 اساسلر تخیل ایدرک کندی قاعده لرینه کوره بر حیات اجتماعیه

وجوده کتیرمک ارزو ایدیورلردی .

روصو ، زماننک نه حکومتلرینی ، نده دینلرینی قبول ایدیوردی . بونلرک کافه سی فنا ایدی . چونکه انسانلر طرفندن وجوده کتیرلش وطبیعتده مغایردی . روصوده اخلاقک یکانه دستوری شوایدی : انسان طبعاً ایدر ، عدالتی وانتظامی سور . « طبیعت انسانی مسعود وایی اولارق خلق ایتمشدر . هیئات اجتماعیه ایسه انی بوزمش ، سفیل برحاله کتیرمشدر . هیئات اجتماعیه هرکسه عین منافی تأمین ایتدیکی ایچون عادلانه دکلدر . تصرف ، یالکز بشریته مخصوص اولماسی لازم کلن « املاک مشترکه » دن آلدینی ایچون عادلانه دکلدر . هله حکومت ، « بر چوجنک بر اختیاره حکم ایتسنه ، بر بدلانک ارباب عقل و فطاتی اداره ایلسنه » میدان ویردیکی ایچون هیچ عادلانه دکلدر . بناء علیه هیئات اجتماعیه یی ، تصرفی ، حکومتی قالدیروب (طبیعته رجوع) ایتلیدر . ایشته انجق اوزمان انسانلر عمومک مظهر تصویبی اولاجق بر مقاله ، بر (مقاله اجتماعیه) اوزرینه مؤسس بر هیئات اجتماعه تاسیس ایتک ایچون ائتلاف ایده بیلیرلر . اوزمان عمومه عین حقوقی بخش ایده جک و بوتون قوتلری انفاذ ایلیه جک بر حکومت ده تاسیس ایده بیلیرلر . هم او وقت قرالک حق حکمرانیسی یرینه ملنک حاکمیتی قائم اولور . بوتون اهالی مساوی اولور . عموم طرفندن انتخاب اولوناجق حکومت ده اداره مطلقه یی حائر بولونایلیر . ثروتی ، تربیه یی ، حتی دینی ده حکومت تنظیم ایدر . - روصو

خرستیانلغی ردایدیور ، فقط جنابحقه ، خالق امله عبادتی قبول اییدیوردی . - روصونک شاکردلزی، (محب طبیعت) اولانرله مساوات طرفداری اولان (انقلابچیلر) دی .

آنسیقلوهریستلر . - او عصرک اک پارلاق محررلرندن دیده رو یارسده درس ویره رک ، کتابچیلر ایچون چالیشارق کمال مشکلات ایله یاشادقندن صوکره فلسفهیه متعلق اثرلر ایله ده کندینی طانتدیرمغه باشلامش، فقط توقیف ایدیله رک (و نسه ن) ده حبس ایدلشدی . دیده رو بوتون معلومات بشریه نک زبده سنی احتوا ایتک اوزره عمومی برقاموس نشر ایتکی دوشونمشدی . اترک اسمی شو یله ایدی : (علوم و فنون و صنایع آنسیقلو په دیسی و یا قاموسی . بر جمعیت ادبیه طرفندن یازلمش و دیده رو طرفندن ترتیب ایدلشدر . قسم ریاضیسی دالامبر طرفندن یازلمشدر) . همان نه قدر عالم و فیلسوف و ارسه بوکاهپسی اشتراک ایتمشدردی . بوتون مقاله لری دیده رو کوزدن کچیریور ، فلسفه یه ، تاریخه واک زیادده علوم میخانیکیه عائد اولانلرینی کندی یازیوردی . دالامبر ، ریاضیه قسمی درعهده ایتمش ، دیباجه یی (مدخل) ی اولقلمه آلمشدی .

اترک نشری ۲۰ سنه دن زیاده سوردی (۱۷۵۱ - ۷۲) مجموعی بو بوک قطعه ده ۲۸ جلد اولدی (۱۱ جلدی رسمدن عبارتدی) . دیده رو بوایشی صوکنه ایردیرمک ایچون پک زیاده زحمت چکدی . ایلك ایکی جلدی ۱۷۵۲ سنه سنده سانسور

طرفندن مصادرہ ایدلمش، ضابطہ تمام اون سکنز آی مدت صوکرہ کی جلدلرک نشرینہ مانع اولمشدی . نہایت دیدہ رو کتابک نشرینہ مساعده آلمش ، فقط یدنجی جلددن صوکرہ نشریات تکرار منع ایدلمشدی . بو عمانتک اور تادن قالقماسی ایچون شو وازہلک حمایہ سنہ لزوم کورولمشدی .

بو آنسیقلوپہدی بالآخرہ بوتون اوروپاہ انتشار ایتمش ، فرانسه فیلسوفلرینک افکارینی آوروپاہ نشرہ خدمت ایلمشدی . اترک ہیئت تحریرہ سی مختلف فکرلرہ بولونیوردی . فقط بونلرک ایچندہ واک زیادہ صوک جلدلرہ افکاری اک چوق حاکم اولانلر اک شدتلی طاورانانلردی کہ، انلرہ ہلہلہ . تیوس، دولباخ، مابلی ورہ فال ایدی بونلرہ (آنسیقلوپہ دیست) نامی ویرلمشدر . آنسیقلوپہ دیستلر ، رئیسلری دیدہ رو کبی نہدین طبیعی بی ، نده حقوق بشری قبول ایتیمورلردی . بونلرک فکرنجہ انسان ذوق ایچون یارادلمشدر . ویا لکنز کندی منفعتنہ کورہ حرکت ایدر . قوانین وادیان ، انسانک سعادتہ وصولنی منع ایدن موانعدن معدوددر . (طبیعتہ رجوع) ایچون بونلری محو ایتک لازمدر .

بو مکتبہ منسوب فینوسوفلر ہم کلیسایہ ، ہم حکومتہ ، ہم مؤسسات قدیمہ اجتماعیہ ، ہم عائلہ و تصرفہ تجاوز ایدیو-رلر ، وجود ربانی ایلہ ابدیت روحی انکار ایدرک ملحد و مادیوندن اولدققرینی اعلان ایلیمورلردی .

فرانسز افطربنک تأییری . — (فلسفه) نک قوتنی اک
 زیاده آرتدیران شی ، فرانسز فیلسوفلرینک عین زمانده برر
 محرر اولماری ایدی . بونلر دستورلرینی هجویه لرده ، رومانلرده ،
 مکتوبلرده آچیق و روح استیناس بر حالده کوستریورلر ،
 بونلری هوایات ایله اوغراشان و آرتحصیل کورمش اولان کیمسه لر
 جانلری صقیلمادن او قیورلر و قولایلقه آکلایورلردی . فیلسوفلرک
 آتاری آزر برمان صوکره بوکسک طبقه لرده اتشار ایتمشدی .
 پارلمنتو بعضاً بونلرک اثرلرندن برینی محکوم ایدیور ، انی مامورلر
 واسطه سیله یاقدریوردی . فقط بونلرک نسخهلری مأمورین
 حکومت دلالتیله ینه تداول ایدوب طورییوردی . فیلسوفلر
 اک بویوک ذواتک صالونلرینه دعوت اولونیوردی . بونلرک
 هر بری بو مجلسده دین ایله اکلنمک ، فلسفه و علم اقتصاد حقتده
 مباحثاتده بولونمق ایچون اجتماع ایدن اوفاق بر جمعیتک مرکزینی
 تشکیل ایدیوردی . — بو مودا برنسلره بیله سرایت ایلشدی .
 وولتەر ، روسو ، دیده زو ، روسیه چاریچہ سی قاتهرینه ایله مخبارہ
 ایدیورلردی . حتی ایکنجی فرہ دریق وولتہری (پوتسدام) دعوت
 ایلشدی . عین زمانده ، بورژووالرده غزته او قومغه باشلامشله
 دی . بونلر فیلسوفلرک وبالخاصه وولتہرایله روسونک نظریه لرینه
 بایلیورلردی . وولتہر ۱۷۷۸ سنه سنده پارسه عودت ایلدیکی
 زمان خلق اوکا پارلاق بر رسم استقبال اجرا ایلشردی .
 اون سکزنجی عصرده فلسفه بوتون اوروپاده تعمم ایتمشدی .

شو صورتله تعمیم ایدن قاعده لر بر چوق نقطه لرده بر برینک عینی دکلدی. فقط هپسی ده عین قاعده اساسیه ابنا ایدیوردی. او زمانه قدر هر کس عادات وادایانه اطاعت ایتشدی (فیلسوف لر بونلره افکار باطله و اعتقادات سخیفه دیورلردی). بوضورتله تاسس ایدن هیئت اجتماعیه منفور و کولنجدی. « احوال بویله دوام ایده مزدی ». آرتق (وقوف دوری) حلول ایتشدی. انسانلر قوه محاکمه ایله تنویر افکار ایتشلردی. بناء علیه بوندن بویله هیئات اجتماعیه قوه محاکمه اوزرینه تاسس ایتلیدی. — اون سکنزنجی عصرک بو قوه محاکمه سی، فن ایله مشاهده حادثانندن عبارت دکلدی. ذوق سلیم ایله منطقدن عبارتدی. فیلسوف لر، اصلاح ایتک ایسته دکلری هیئات اجتماعیه بی پک آز تدقیق ایتشلردی. بونلر اصل انسانلری طانیورلر، کویلولرله عمله لک احوالی بیلمیورلردی. فیلسوف لر کندی فکر لرینه کوره، دینسز، اعتیادات اجتماعیه دن محروم، سعادتدن باشقه برشی آرامایان، محاکمات جامده بی کندیسنه رهبر ایدنمش خیالی برانسان تصور ایدیورلردی. بوانسانلری حال طبیعیلرینه ارجاع ایچون انلری دوچار ظلم ایدن نظاماتی فسخ ایتمکدن باشقه چاره یوقدی. هیئات اجتماعیه نک اصلاح ایدلسی ایچونده حکومتک بر قرارنامه نشر ایتسی کافیدی.

کذا هیئات اجتماعیه فنا تشکل ایتشدی. بونی دکیشدیرمک لازمدی. بونک ایچونده حکومتک یالکز ارزوسی کافی

ایدی . ایشته (فلسفه) نك خلاصه‌سی بو ایدی . اون سکزنجی عصرده فلسفه ، قاعده سیاستدن معدوددی . حتی ده‌ها صوکره لر رجال حکومت طرفندن تطبیق ایدیلرک بوتون اوروپاده بر حرکت اصلاحاتکارانه وقوعه کتیره‌مکله نتیجه‌لشمش ، فرانسه‌ده ایسه بالذات تبعه طرفندن تطبیق ایدیلرک (انقلاب) له نهایت بولمشدر .

اصولیات پرور پرنس و ناظر لر . — اون سکزنجی عصرک نصف اخیرنده اوروپاده اداره حکومت ایدن رجال دولندن بر چوقلری مقتصدلرله فیلسوفلرک افکارینه حیران اولمشر ، بونلری تطبیقه غیرت ایشلردی . بونلردن بعضلری (آوستریاده ایکنجی ژوزف ، طوسقاناده له‌ئوپولد ، پروسیاده ایکنجی فرهدریق ، روسیه‌ده ایکنجی قاتهرینه ، دولت عثمانیه‌ده سلیم ثالث ؛ باد ، وایمار ، ومایانس پرنسلی کبی) حکمدارلر ؛ بعضلری ده (ناپولیده طانوچی ، پورتکیزده پومبال ، اسپانیاده آراندا وقامپومانز کبی) قراللری نامنه اداره حکومت ایدن ناظرلردی .

بورجال حکومت ، حکمدارک وظیفه‌سنی بستیون یکی بر طرزده تلقی ایدیورلر ، حکومتی پرنسک کیفیه تابع خصوصی بر مالکانه عد اتمبورلردی . قاعده اساسیه‌لری شو ایدی : حکمدار یالکیز حکومتک رئیسیدر . کندی اذواق شخصیه‌سی ایچون ویرکیلردن آلسان پاره‌یی

سرف ایتمک حقنی جائز دکلدرد. بو پاره بی امور ناقعه به تخصیص ایتمکه مجبوردر. کوزده لرینه مأموریتتر ویرمک حقنه ده مالک دکلدرد. بو مأموریتتری کندیلرینی حکومتک خادمی عدایدن تحصیل کورمش و ناموسکار کیمسه لره تودیع ایتملیدر. بونک ایچون ناظرلر سرای مصارفنی آزالتمق، امور اداره بی جاذب ومنتظم بر حاله قویق، تبعه نک ثروتی تزید ایتمک ایچون غیرت ایدیورلردی. فقط بونلرده فیلسوفلر کبی بوتون انسانلرک بر اولامیه جقلرینی، بونلری ایسته دیکی کبی اداره ایتمک حکومتک آنده اولدیفنی دوشونورلردی. اهالی بی کندیلرینه اطاعت ایتدیرمکه آلیشقی بولونقلری جهته هیئات اجتماعی بی تبدیل ایتمک ایچون کندیلرینک بر امری کافیدر ظن ایدیورلردی. بونلر مملکتلرندن «باربارلق آتاری» فی قالدیرمق، بر «علم و فن دوری» یعنی «قوه محاکمه» اوزرینه مستند بر حکومت تأسیس ایتمک ایستورلر، تبعه لرینه صورمادن، انلرک اعتیاداتنی هیچ نظر اعتباره آمدن، حتی بعضاً انلرک ارزولری خلافتنه اولارلق اصلاحات امرلری و پریورلر، اوزمانک تعبیری وجه ایله، علوم و فنونی تعمیم ایچون قوه حکومتی استعمال ایدیورلردی. انلرک بو طرز حکومتلرینه (منور الافکارانه استبداد) نامی ویرلمشدی.

آوستریاده ایکنجی روزه ف. — ایکنجی ژوزه ف منور -
الافکار مستبدلرک تام بر نمونه سی ایدی. ده جالوس ایدراتمز

کاملاً حکمدارلق و ظائفنه حصر وجود ایشدی . ژوزهف صباحلین ساعت بشده قالقار ، علی العجله کینیر ، قاینه سینه کیدر ، بوراده کاتبلرینه امر یازدیرمغه مباشرت ایدردی . قاینه سنده اوکله به قدر چالیشیردی . مستدعیاتده بولونانلری قبول ایتمک ایچون آریجه بر غاله یی آچیلیمشدی . ژوزهف دهها صوکره بورایه کیرر ، بوتون استدعالری قبول ایدردی . ساعت ایکی به طوغرو تفرجنی اجرا ایتدکن صوکره یالکز باشنه چارچابق یمک یردی . صوکره موسیقه چالار ، انی متعاقب ایشه باشلار . ساعت یدی به قدر رسم قبول اجرا ایدردی . ساعت اون بره طوغرو تیاتروییه کیدر ، اکثریا یاناغه یاتمان اول تلغرافلری مطالعه ایدردی . - ژوزهف صودن باشقه برشی ایچمزدی . مائی بر عسکری اونیفورمه ایله جیزمه کیرر ، مصر یپراقریله طولدیرلمش بر شیلته ، مشین بر یوز یاصدینی و برده کیمک دزیسندن عبارت بر یاتاقده یاتاردی . لزوم کورولن محله قوشوب کوتورلمک ایچون دائماً حاضر بولونمق اوزره بارکیری دائماً اکرلی بولونوردی . ژوزهف بوزوق یوللردن پوسته آرابه سنی دائماً درت نعل قوشدیرارق حکومتی داخلنده صیق صیق تفتیشلر اجرا ایدردی . بر شهره کلیر کلز درحال لوقانطه نک برینه یرلشیر ، ایش ماصه سنی اورایه قوردیرر ، یازی یازدیرمغه ، اوقومغه ، امضالامغه باشلار ، دهها صوکره عودت ایدردی . - ژوزهف ویانه سرای قرانیسنده اون

سکزنجی عصر ادارهٔ مطلقه لرندن قائله دبدبه لره ، مراسمه تصادف ایتشدی . آخورلرده ۲,۲۰۰ بارکیه بولونیوردی . سفره طاقی ۲۲۵ کیلوغراملق صوم آلتون ، مصارف سنویه ۳۵ میلیون ایدی . مطبخ اداره سی عادتاً اسراف درجه سنده ایدی (ایمپراطور یجه نك پاناغانرینه مخصوص آتمکلی ایصلا تمق ایچون هر سنه حسابا ایکی فوجی طوقای شرابی کچیریلیردی) . ژوزوف ، مابینجیلر یمنکی کندی اولرنده یه سینلر دیدی ، قوللکسیون تشکیل ایدن مسکو کاتی آریتدی ، ضیافتلردن صرف نظر ایتدی . عین زمانده مراسم ده آلت اوست ایتدی . (پراغ) ده بر زادکان جمعیتنه بورژوواسی به منسوب برقادین کتیردی . زادکانه منسوب قادینلر بونکله هیچ لاف ایتدیلر . فقط ایمپراطور بو قادینه ، یالکز بو قادینه دانس ایتدی .

ژوزوف فیلسوفلرک دساتیر انسانیت پرورانه سنه کوره حرکت ایدرک اسارتی ده قالدیردی . کویلولرک اولنملرینه ، سه نیوردن مساعده آلمادن مملکتلردن چیقما لرینه مساعده ایتدی . اذیتلره اعدام جزاسنی ده قالدیردی . سانسوری لغو ایدرک کندی علیهنده بیله هجو بازلسامسنه مساعده ایتدی . فقط یالکز بر اعلاننامه نشریله اکتفا ایدرک بو اعلاننامه ده کندی حقیقده ویربله جک حکمک دشمنلری طرفندن نشر اولونان هجو یه لره کوره دکل ، افعالنه نظراً ویرلسنی رجا ایتدی . کندان مسامحه دینه ده تأسیس ایدرک پروتستانلره یهودیلرک

علناً عبادت ایتملرینه مساعده ویردی .

ژوزه فده فیلسوفلر کبی عنعناته نظر نفرته باقیور ،
 کچمشلرک عادات و حقوقنه رعایت مجبوریتند بولونمادیغنه قائل
 اولیوردی . ژوزه ف: «تحت اداره مده بولونان بر حکومت کندی
 قواعد اساسیه کوره اداره ایدلملیدر . اعتقادات باطله ، تعصب ،
 فکر التزام ، اسارت فکریه اورتادن قالمالی ، بوتون تبعه
 حقوق طبیعیه لرینه صاحب اولمالیدر لر » دییه یازیوردی -
 آوستریا خاندانه عائد حکومتلر بر عائله حکمداری مالکانه سی
 حالنده راست کله طویلانیمش بر طاقم ملکتلردن مرکبدی . بو
 ملکتلر عراق ، لسانا ، و اخلاقا بیکدیگرندن تخلف ایتمدیکی کبی
 جسم واحد تشکیل ایدمکک بر ماهیتی ده حائر دکلدی . بو حکومت
 آلمان ، مجار ، خروات ، بوهیمیالی ، پولونیالی ، بلجیقالی
 و ایسالیانلردن مرکب مختلف قوملرک هیئت عمومیه سنندن
 عبارتدی . حتی بعضلری ملل قدیمیه منسوب ایدیلر . اوروپاده
 هیچ بر مملکت یوقدی که بوراده اولدینی قدر ایالتلر بیننده
 موجود فرقلری نظر دفته آلمغه لزوم کوسترسین ، وعین طرزده
 اصوللری تطبیق ایتمک لزومسز اولسون . فقط ژوزه ف بوتون
 حکومتنی یکی وبر پلان اوزرینه تنسیق ایتمک ایستیوردی .
 ژوزه ف اوتهدن بری عادت اولدینی اوزره بوهیمیا و مجارستان
 قرالقلرینه کیدوب یمین ایتمکدن امتناع ایتمدی . دها
 صوکره اسکی ایالتلری لغو ایدرک بوتون حکومتی اوچ

ولایتہ آیردی ، بونلری ده آیریجه دائرله تقسیم ایتدی .
 زوزف هر طرفه قانونلری ، ویرکیلری ، حتی اصول اداره یی
 بر یایمق ایستیوردی . کذا مجارستان محاکمنده دعوالرک آلمانجه
 رؤیت ایدلسنه ، آلمانجه بیلمین محکمه اعضاسنک عزل ایدلسنه
 قرار ویردی . مجارستان مجلسلری بوکا اعتراض ایتدیلسه ده
 زوزف بوکاده مانع اولدی .

ایکنجی زوزف ، تبعه سنک دینی اداره ایتک حقیقده
 کندیسنه عائد اولدیغنی ظن ایدیوردی . « دنیانک اک برنجی
 ناجنی طاشیمغه باشلا دیغ زماندن اعتباراً حکومتک واضع
 قانونی فلسفه دن عبارت اولمشدر . » دیوردی .

۱۷۸۰ دهده : « دنیاده کی ایشلری میزی یولنه قویمقده بیک
 درلو مشکلاته دوچار اولدقلری حالده آخرتده کی ایشلری میزی
 حاضر لاق وظیفه سیله مکلف اولان کیمسه لر ، هیچ سومدیکم
 آدماردر . . . » دیور ، و بو سببدن « فضله مناسترلی لغو
 ایتک » ایچون بر قومیسون تشکیل ایلوردی . زوزف
 ۲۶۱۳ مناستردن ۶۲۴ دینی قاپاتمش ، بونلرک اموالی مصادره
 ایتدیبره رک بنالری خسته خانلره ، مکتبلره ، قیشله لره
 وفابریقه لره تحویل ایلشدر . - زوزف آوستریا کلیسالی
 پک مزین بولیوردی . بونک ایچون اعزه هیکلرندن دانته لالره
 مجوه راتی قالدیرتمش ، زیارتلره مخصوص کلیسالرک نذرلری
 لغو ایتدیرمشدر . بوتون خزینهلر ، قابنر و اشیا ی مقدسه

آریدلمک اوزره هپ یهودیلره صاتیلمش ، مینیاتورلره مزین آل یازیلریله مهرلر و بارشومه نر هپ اوقه ایله فروخت اولونمشدر . - ژوزهف « کلیساری تولدیران » محرابری ییقدیریور ، خاچلرله اوفاق هیکللری قالدیریور ، دینی زیارتلره آلایلری منع ایدیوردی . مقدس هفته اتناسنده یاییلاجق مراسم ایله دعارک مقذارینی تعیین ایدیور ، بوتون راهبرک دینی ایمراطورک آکلادینی طرزده اوکرنلرینه مخصوص عمومی مدرسه لر تأسیس ایلوردی . ژوزهف « پروژلم تماماً بیترسه ایشته او زمان ایمراطور لغمده کی اهالی جناب حقه قارشی مکلف اولدقلری وظائفی آکلایاچقلر . » دیوردی . پاپا بو قاریشبقاقلردن طولایی شکایت ایچون بالذات ویانه یه کلش (۱۷۸۲) ؛ فقط ژوزهف مباحثه دن قطعاً اجتناب ایدرک اصلاحاتی حالیه ابقا ایلشدر .

ژوزهف ، خوشنه کیمین دینلری قبول اتمیوردی . بوهمیاده ناموسکار وفعال کویلولردن مرکب بر طریقت تشکل ایتمشدی . بو طریقته منسوب اولانلر الله ایمان ایدیورلر ، کندیلرینه (موحد) دیورلردی . ایمراطور بونلرک تحت محاکمه آلمارینی امر ایتدی . بونلرک افکارینی ترویج ایدنلره یکریمی بش صویا آتیه جقدی . ژوزهفک فکرنبجه بو طیباق « انلرک موحد اولدقلری ایچون دکل ، آکلامادقلری برشیئی اعلان ایتدکلری ایچوندی » . فقط ایمراطور طایاغکده کافی

کلدیکنی آکلاینجہ بونلری توقیف ایتدیرمش ، حتی آری آری بولندیرلملرینی توصیہ ایدرک جملہ سنی تورکیہ حدودینہ نئی ایشدی .

ژوزہ فده ابی اداره حکومت ایتمک ایچون صمیمی بر آرزو واردی . فقط قاعده اساسیہ سی «بویوک ایشلری بردنبرہ یامقدی» . ژوزہ ف ، کندیسنجه عقل و محاکمہ یه موافق کورونمین عادات و اعتقاداندن نفرت ایدردی . فقط ژوزہ فک نفوذی ایشته بو عادات و اعتقاداته قارشى قیرلدى . بلچيقا ایله مجارستان آیاقلاندى . ژوزہ ف وفات ایتمزدن اول مجارستانده او معهود (مشترک قوانینه مخالف عدالولونان امرنامه لرك فسئخى) نى اعلانہ مجبور اولدى . بو امرنامه شویله باشلا یوردی : « بوندن اول صرف عمومک منافعی ایچون اداره حکومتده بعض تعدیلات اجرا ایتمش ، سز لرك ده تجربه ایله تنویر افکار ایدرک بوندن ممنون اولاجفکزی تخمین ایشدک . فقط شمدی قانع اولدق که سزینہ اسکی اصول اداره یی ایستبورسکنز . سزیده انجق بو اصول اداره مسعود ایدم جک کبی کورونیور » . مجارلر بو امرنامه یی کمال مسرتله تلقی ایتمشلر ، قاداستروپلانلرینی ییقمشلر ، اولرک نومرولرینی قازیمشلر ، آلمانجه اوکر نمکدن واز کچمشلردر .

طوسقاناده له نوپولدم . - آوستریالی له نوپولد (طوسقانان) یه کلیرکلز اولا او اوافق حکومتک مصارفنی آزالتمغه چالیشمشدی . له نوپولد قطعات عسکریه یی ترخیص ایتمش ، (پیزه) استحکاماتی

بیقیدیرمش ، سرای خلعنی طاغیتمشدی . حتی یازیخانہ طرزندہ
چامتختہسندن رندہ لشمس عادی برماصہ ، تسکدن برشہمدان ایله
اوطہسندہ چالیشمشدی . - لهئوپولددہ منورالافکار حکمدارلر
کبی اذیتلری ، انکیزیسیونی ، اموال حجزینی قالدیرمش ، خسته-
خانہلر تأسیس ایتمشدی . لهئوپولددہ بوخستهخانہلری صیق صیق
زیارت ایدردی . - (طوسقانان) مناسترلری قرون وسطادنبری
(مصونیت مساکن) حقندہکی اسکی امتیازلرینی محافظہ ایلشلردی .
مأمورین عدلیہ بورالره داخل اولامازلردی . مناسترلرک
کلیسالری برسوری سرسریلره ، قاتلره ، فراریلره ، فراری
کورہک محکوملرینه ملجأ تشکیل ایدردی . بونلر هپ کلیسالرده
یاشارلر ، عباداتہ مانع اولورلر ، یولجیلره حقارت ایدرلردی .
لهئوپولددہ بوامتیازاتی نظر دقتہ آلمہرق بونلرک کافہسنی توقیف
ایتدیرمشدی (۱۷۶۹) .

روسیدہ ایلنجی قاترینه . - قاتهرینه ، قوجهسنی اولدیرتہرک
روسیه چاریچہسی اولمش بر آلمان برنسی ایدی . قاتهرینه ،
فیلسوفلرله مخبراندہ بولنور ، ادیبہ بر قادیندی . حتی
مضحکہ وفاجعهزده یازمشدی . دیدہرو قاتهرینه ایچون :
« اوندہ قلهئوپاطر سیاسی آلتندہ برروتوس روحی وارد . »
دیوردی .

قاتهرینه غایت فعال ، تفاخری سور ، کندیسندن بحث اولوندیغنی
ایشتمکک حریص بر قادیندی . کندینی اوروپادہ منورالافکار

فیلوسوفلرک قواعدا سایه سنه نظر آاداره حکومته مقتدر بر حکمدار کی کو سترمک ایستردی.

بالخاصه موتسکیو بی تقدیر ای دیور ، (روح الشرايع) ک حکمدار لر ایچون بردستور کتابی اولمغه لایق بولوندیغی سویلیور : « پایا اولسه ایدم موتسکیونک کتابی قانون اولارق قبول ایدردم . » دیوردی .

قاهرینه ۱۷۶۷ده بوتون روسیه ده تطبیق ایدلمک اوزره بر مجله ترتیبی ایچون عمومی بر قومیسون تشکیل ایلشدی . بوقومیسونک اداره سنه مخصوص نظامنامه یی کندی قلمه آلمش ، بونظامنامه یه موتسکیودن آلمش بر چوقی رلر صیقیشدیرمشدی . قاهرینه موتسکیونک اثرینی یغما ایتدیکنی ، موتسکیو اوتکی دنیادن شوپادیغی ایشی تعقیب اتمش اولسه ۲۰ میلیون نفوسه نافع بویه بر اتحالی اونکده تقبیح اتمیه جکنی بیان ایدردی . حتی بو نظامنامه نک - نسخه سنی پروسیا قرالنه کوندردیکی زمان شوسوزلری علاوه ایتشدی : « کورم جکسکزکه شوپادیغشی کندی طاووس تویی ایله سوسله ین قارغه حکایه سنک عینیدر . اصل ترتیب بندر . یالکزاوتیه بری یه بر سطر ویا برکله صیقیشدیرلمشدر . » قومیسون هرولایتدن کلن مرخصلردن تشکیل ایدلمشدی . قاهرینه بونلرک کافه سنی دیکله دکن صوکره کندیلرینه یول ویرمش ، نهایت بر (مجله) قلمه آلدیرارق بوتون فیلوسوفلرک قواعدا سایه سنی اعلان ایلشدی . بومجله ده بیان اولوندیغنه

کورہ : « ملت حکمدارہ تابع دکلدر ، حکمدار ملته تابعدر . بر معصومی ضایع ایتمکدنسه اون مہمی وقایہ مرجحد . »
 قاتہرینہ اذیتلری واعدام جزاسنی لغو ایدیوردی . دینہ قطعاً
 لاقیدبولوندینی ایچون قانونیکلرله مخالفلرک سربست بر صورتده
 عبادت ایتملرینہ مساعده ایدیور ، قاتولیک حکومتلردن طرد
 اولونان ژم زوویتلری قبول ایلوردی . فقط قاتہرینہ فلسفہدن
 یالکز ایشنه کلن یرلری قبول ایدیوردی . حتی دیدہ رویہ یازدینی
 بر مکتوبده : « سنک او بوبوک دساتیریکزلہ بر کتاب یاپیلا بیلیر ،
 فقط ای ایشلر یاپیلاماز » دیوردی . قاتہرینہ اعدام جزاسنی
 یرینہ سہریاہ نفی جزاسنی قویور ، (قونوت) جزاسنی
 قالدیرمیور ، حتی پولونیاہ استیلا ایدرک پولونیالیلری قلیجدن
 یکیریوردی .

۱۷۸۱ده ، دور سلطنتده (۱۹ سنہده) یاپیلان ایشلرک
 بر راپورینی تنظیم ایتدیرمش ، فیلسوف غربہ آتیدہ کی لیستہ بی
 کوندرمشدی :

۲۹	یکی طرزده تأسیس ایدیلن ایالتلر .
۱۴۴	تأسیس وینا اولونان شہرلر . . .
۳۰	عقد اولونان مقالہ و معاهدہ لر . . .
۷۸	احراز اولونان مظفریتلر
۸۸	قوانین و تأسیساتہ متعلق مہم امر نامہ لر . . .
۱۲۳	اھالینک رفائنه متعلق امر نامہ لر . . .
۴۹۲	مجموعی

و صوکره « ایشته بوتون بونلر مصالح حکومتدن معدوددر .
بولیسته ده امور خصوصیه به متعلق هیج برشی یوقدر ، « دیمشدی .
هیج شه یوق قاتهرینه پک چوق شیلر یابدیغنی اثبات ایتمک
ایستیوردی . فقط بوقانونلردن بر چوغنک هیج تطبیق ایلمدیکنی
وبر چوق شهرلرک تک بر یافته ایله بر دیر کدن عبارت
بولوندیغنی ، علی العجله یاسیلان بنارکده چوقدن خراب اولدیغنی
هیج ذکر ایتمیوردی .

قاتهرینه ایچون اک زیاده مهم شی ، کندی لیاقت واستعدادی
حقنده مقتدر محرر لرله اهلیده بویوک بر فکر حاصل ایلمکدی .
فی الحقیقه قاتهرینه فیلسوفلره کندیسی ایچون (شمالک سه میرامیسی)
دیدیرتمکه موفق اولمشدر .

پورتکیزده پومبال . — ایالت جنتلمنلرندن پومبال
۱۶۹۹ سنه سنده طوغمش ، اردودن چکلد کدن صوکره تاریخ
قوانین مطالعه ایتمش ، صوکره دیپلوماسی به داخل اولارق اولان
انکلتزده ، دهاصوکره آوستریاده بر قاچ سنه کچیره شدی .
۱۷۵۰ ده قرال بشننجی زوزه پومبالی خارجیه نظارتنه تعیین
ایتمش ، آز زمان صوکره ده بوتون حکومتی یداقتدارینه ویرمشدی .
اوزمان پومبال قرالک وفاتنه قدر پورتکیزده یکانه حاکم اولمشدی
(۱۷۷۷) .

اون یدننجی عصر دن بری انکیزیسیون ایله زه زوویت جمعیتی
پورتکیزده تماماً حاکم بولونیوردی . سرای ایله حکومتی قرالک

وعائله سنک راهبری اداره ایدیوردی . پورتکیز حکومتی انکلتره ایله معاهده لر عقد ایتدیکی زماندن بری اقتصاد نقطه نظرندن انکلتره یه صوگ درجه تابع بولونیوردی، ۱۶۵۶ معاهده نامه سی پورتکیزه قماش ادخال ایلمک حقنی کاملاً انکلیزلره بخش ایدیور، ۱۷۰۳ معاهده سی پورتکیز شرابلرینک فرانسر شرابلرندن اوچده بر نسبتندن دها آزر کرکله انکلتره یه ادخال ایدیله جکی قاعده آلتنه آلیوردی . پورتکیزلیر شرابلرینه وبره زیلیاده کی مستملکلرندن چیقاردقلری آلتونه مقابل انکلتره دن قماش آلمغه آلیشمشردی . پورتکیزلیرک نه صنایعی ، نه ده تجارتی واردی . (لیزبون) . کیرن کیملر هپ انکلیز کمیسی ایدی . انکلیزلر یاواش یاواش تجارتیه حاکم اولمشلر ، ارزو ایتدکلری شرائطی پورتکیزلیره قبول ایتدیرمک ایچون بوندن استفاده ایلمشردی . انکلیزلر آرتق پورتکیز شرابی غایت آشاغی فیئاده اولمادقجه صاتین آلیورلردی . بو حال شراب تجارتی نمالاندرمغه اصلا کیفیت ایتیموردی . بوندن مایوس و خراب اولان باغچیلر اراضی بی هیچ سورمه کی ترجیح ایدیورلردی . حتی ۱۷۵۹ سنه سنده یومبال انکلتره حکومتنه : « اقتصاد عالنده مثل کوروله مش برحماقله سزدن البسه آلمغه وزینت اشیاسی تدارک ایلمکه موافقت ایدیوروز . بوصورتله قرال ژوزرک تبعه سندن اللی بیک صنعتکاره نفقه تدارک ایلوروز . بونلر انکلتره نیک پایتختنده بزم حسابمزه کچینیورلر . » دییه یازمشدی .

پومبال پور تکیز حکومتی ژه زوویتلرک حاکمیتندن و پور تکیز ملتینی ده انکلتره تابعیتندن قور تارمغه چالیشدی .

انکلیزلره قارشلی (یوقاری دورو باغلری زراعت شرکت عمومیه سی) نی تأسیس ایتدی . شرابلری معین برفیئات و یرمک شرطیله یالکیز بو شرکت صاتین آلدی . کذا برده (تجارت جمعیتی) تأسیس ایلدی .

پراکنده مال صاتا نلره دکان آچق مساعدده سنی یالکیز بو جمعیت ویره چکدی . ایشته بو صورتله حکومت شراب تجارتی ایله اوفاقی تجارتی کندی تبعه سنه حصر ایتدی یرمک ایچون ایشه مداخله ایتمش اولیوردی . - پومبال پور تکیز لیلری صنایع تأسیسنه تشویق ایچون تجارتده اصول حایه تأسیس ایتدی . یوکلرک ودها سائر مواد ابتدائیه نك اخراج ایدلمسنه مانع اولدی . (ایک و شکر کبی) معمولانک بلارسم اخراج اولونماسنه مساعدده ایتدی .

پومبال ، رهبانک حاکمیتنه قارشلی ده غایت شدتلی واسطه لر استعمال ایلدی . ژه زوویتلر پومبالی دویرمک ایستورلردی . فقط پومبال بونلره آچیقدن آچیغه محاربه ایتدی . ۱۷۵۷ ده عالیه قرالینک هب ژه زوویتلردن مرکب اولان راهبلینی دفع ایتدی . ژه زوویتلرک بلامساعده سراهه کیرملرینه مانع اولدی . پاییه یونلرک تجارتله مشغول اولدقلرینی خبر ویره رک جمعیتلرینک اصلاحنی طلب ایتدی . ژه زوویت جمعیتی تدقیق و اصلاح ایچون

پاڻا طرفندن ڪونڊريلن ڦارڊينال، ژه زوويٽلر طرفندن اجرا
ايدلين تجارٽڪ قوانين الٰهيه وانسانيه به مغير اولديغني بيان
ايدرك بونلري ڪناه چيقارمق ووعظايمڪ حقندن محروم ايتدي.
پومبال ، ۳ ايلول ۱۷۵۸ ڪيجهسي قراله ڦارشى وقوع
بولان سوڦصدن بالاستفاده تعقيات اجراسنه باشلاڊى .
ژه زوويٽلرڪ بوجنايتده مدخدار اولدقبرينه دائر هيچ براماره
الده ايديلهمدى. فقط حڪومت بونلرڪ بوتون اموالنى مصادره
ايدرك جهلهسنى قراللقدن ومستملكهڊن قوغمغه قرارويردى .
بوتون ژه زوويٽلر ڪميرم بينديرلهرك (چيويتاوه ڪيا) به ،
پاپانڪ حڪومتى داخلنه اخراج ايدلدى .

پورتڪيزمڪتبلرينڪ ڪافهسي ژه زوويٽلر آئنده ايدى . پومبال
ژه زوويٽلرى دفع ايتدڪدن صوڪرم بومڪتبلرى رهبانڪ غيرى
معلملره يڪيدن تنسيق ايمڪ ايسٽدى. لاتينجه، يونانجه، علمبيان
ومنطق معلملرى تعيين ايتدي . بونلر مجانا درس اوڦوتورلر
وحڪومتدن معاش آلرلردى . پومبال معلملره اصالت امتيازى
اعطا ايتدي . (قوامبر) دارالفنوننده علوم طبيعيه ورياضيه
فا ڪولتهسى ناميله ايڪي فا ڪولته ايله طبابت وڪيميا موزهسى وبزده
رصدخانه احداث ايتدي . پومبال اڪ زياده تدريسات فنيه ايله
پورتڪيزلساننڪ تدريسى يوڪسليمڪ ايسٽيور ، حتى : « اقوام
تممدهنڪ افڪارنى تربييه ايجون اڪ نفوذلى واسطهلردن
برىده لسان مادرزادڪ اوڪرم تلسيدر » دييوردى .

پومبال (قوامبر) دارالفنوننک انضباطنی ده اصلاحه چالیشدی . ۱۷۶۶ ده اسمی دفترده مقید ۶۰۰۰ شا کردبولدی . ساخته اسملر طی ایدیلنجه بونلرک مقداری ۷۰۰۰ ایندی . ۱۷۷۲ ده ۸۸۷ معلم ویا مربی تعیین ایتدی (بونک ۴۷۹ ی قرائت و یازی ، ۲۳۶ سی لاتینجه ، ۸۸ ی ده یونانجه ایچوندی) . پومبال پورتکیزلیلری سائر اوروپا اقوامنک سویه سنه کتیرمک ایچون انلره تحصیل ایتدیرمک ایتیبوردی . فقط بو اصلاحات چوق دوام ایتمه مشدر . قرال وفات ایدنجه پومبال کوزدن دوشمش ، حکومتده اعتیادات سابقه سنه دوام ایشدر .

اسپانیاده ارمیجی شارلک ناظرلری . — اسپانیاده همان پورتکیزک عینی حالده بولونیوردی . اوراسی ده تجارت وصنا . یعدن محروم ، انکیزیسیون ایله زه زوویتلرک تحکمی آلتنده ایدی .

۱۷۵۹ ده اسپانیا قرالی اولمق ایچون ناپولی قرالغندن مفارقت ایدن اوچنجه شارل ، یکی قرالغنی جانلاندرمغه و قورتارمغه چالیشدی . کندیسنه اولا ایتالیا دن کتیردیکی ناظرلردن سکی لاص ایله غریمالدی ، دهاصوکرده اسپانیوللردن آراندا ، قامپومانه ز وفلوریدا بلاتقا یاردم ایتدیلر .

اسپانیاده صنایعی احداث ایچون تجارتده اصول حمایه استعمال ایدلدی . ممالک اجنبیه دن ادخال اولونان اتمه یه کمرک

رسمی وضع اولوندی. بعض امتعه نك دخولی ایسه منع ایدلدی. تجارتنی ترقی ایتدیرمك ایچون ده بالعمکس سربستی مبادله اصولی استعمال ایدلدی. حبوبات تجارتنی کاملاً سربست بر ایلدی (۱۷۶۵). نهایت ، او زمانه قدر هپ (سهویل) ، دهاصوکره (قادیقس) ناجرلرینك انحصارنده قالان مستملکات تجارتنی ایچون بوتون اسپانیوللره مساعده ایدلدی. بوندن غایت پارلاق نتیجه لر حاصل اولدی . ۱۷۸۸ ده مستملکات تجارتنی سکز الی طقوز مثلی تزايد ایتمشدی .

علم اقتصاده دائر یکی فکر لر (اقتصاد جمعیتلری) واسطه سیله اسپانیاده تعمم ایدیوردی . بو شرکتلرک برنجیسی باسقلر طرفندن تأسیس ایدلمشدی . دیگر اللی درت شهرده ینه بویله جمعیتلر تأسیسی ایچون مساعده ایسته دیلر . مادرید جمعیتی قیزلره طوقوما وایبلاک بوکمه اوکرتمك ایچون مجاناً وطنپرورانه مکتبلر احداث ایتدی .

ناظرلر انکیزیسیوننی قالدیرمهه جساتر ایده ندیلر . (آراندا) بر امرنامه چیقارتمش ، بو امرنامه ده انکیزیسیونك دعاوی ملکیه یی رؤیت ایتسی منع ایدلمشدی (۱۷۷۰) . فقط فرانسنز آنسیقلوپه دیسیتلری آراندایه خوش کورونمك ایچون موسمی الیهی مدح یوللو بر مقاله نشر ایتمك کبی یولسنز بر فکرده بولونارق آراندنك انکیزیسیوننی محوایده جکنی خبرویردیلر . آراندا دهشت ایچنده قالدی . دینه دشمن اولانلرک بر آلتی صفتیه کورونمکدن

تو حش ایئدی. بونک اوزرینه انکیزیسیون ابقا ایدلدی. ۱۷۷۸ده حکومت مأمور لرندن بری، اولاویدا، ممنوع کتابلری مطالعه وقوپر نیق مسلکینی قبول ایتمدیکندن طولایی حجزه ومناسترده سکز سنه مدتله حبسه محکوم اولمشدی. فقط اعدامه محکومیتلر نادر اولمغه باشلادی. بیکرمی طقوز سنهده آنجق درت کشتی احراق ایدلدی.

حکومت ژه زوویتلرک یرینه قائم اولق اوزره تدریس آتی نسیمقه تشبث ایئدی. (سالاماتق) دارالفنوننی کندی تدریساتنی اصلاحدن امتناع ایدلدی. نوتون وده قارت اصوللرینک حقیقت منکشفه ه هیچ توافق ایتمدیکنی بیان ایدرک آرسطو فلسفه سنه مستند اولق اوزره ترتیب ایلدیکی تدریسات پروغرامنی کوندردی. بونک اوزرینه دارالفنونلر خارچنده چالیشمغه لزوم کورولدی. برقاچ نباتات باغچه سی ایله بر تاریخ طبیعی قاینه سی تأسیس ایدلدی. اوزمان، پور تکیزده اولدینی کبی اسپانیاده برقاچ عالم ومتبخر ظهور ایئدی. بو حرکت نابواتونه قارشی اجرا ایدیلن حربیه قدر دوام ایددی.

فرانسهده اصومعات تشبثلری. — اون بشنجی لونی دوری دوام ایئدیکی مدتجه (۱۷۷۴ سنه سنه قدر) فرانسهده حکومت انجق اوافق تفک اصلاحات یابایلمشدی (۱). اون

(۱) پارلمنتولری محو ایدرک انلرک یرینه بیکي محکمه لر تأسیس ایدن باش وکیل موپه نونک هیئت عدلیه بی اصلاح ایتمسی، اصلاحدن زیاده مجادله ایچون

آلتنجی لوئی پک کینج یاشده مقام حکومتہ کچنجه اہالیسنہ ایملک ایتمک ایستہدی . عفت واستقامتی ، منافع عامہ بہ محبتی ایلمہ معروف ایکی کشتی ، بری حاکم ، مالہرب ، بری دہ مقتصد ، تورغو کندیسنہ توصیه ایلدی . اون آلتنجی لوئی بونلری ناظر تعین ایندی . حکومتک ادارہ عمومیہ سی استکی برندیتمک ، مورہ بانک الندہ قالدی . فقط قرال اصلاحات اجرائی فکرندہ بولوندیغنی بیان ایندی . تورغودن وصایا طلب ایلدی . تورغودہ کندی تصور لرینی قرالہ یازدیغنی بر مکتوبدہ بیان ایندی (۲۴ آغستوس ۱۷۷۴) .

تورغو (مفتش عمومی) ایدی . وظیفہ سی دہ امور مالیہ بی ادارہ ایلمکدی .

تورغو ، پلانٹی شو صورتلہ خلاصہ ای دیوردی : « افلاس ، استقراض ، تزید تکالیف اصلا اولاماز » . تورغو ہر سنہ یکرمی میلیون قدر بر بارہ تصرف ایدرک آچینی قاپاتمق ویواش یواش بورجی اودہ مک ایستیوردی . فی الحقیقہ ایکی سنہ ظرفندہ ۴۰ میلیونن زیادہ بر پارہ تادیہ ایتمک و آچینی ۲۲ میلیونن ۱۵ میلیونہ قدر ایندیرمکہ موفق اولمشدی .

تورغو تشکیلات اقتصادیہ بی کاملاً اصلاح ایتمک ایستیوردی :

برنوع تدبیر ایدی . اون آلتنجی لوئی تختہ جلوس ای دنجہ پارلنتوری ۱۷۷۰ سنہ سندہ نصل ای دیسہ بنہ اووجہ ایلمہ تأسیس ایلمشدی .

اولاً : بغدادی آلوب صائمغه مانع اولان نظامنامه‌لری
 قالدیروب حبوبات تاجرلرینی کاملاً سربست بر اقق ؛
 ثانیاً : امتیازلی اصناف هیئتلرینی قالدیرارق بوتون
 اهالی‌یه باجمله صنایعی اجرا ایتمکده سربستی ویرمک ؛
 ثالثاً : ویرکی خصوصنده کی امتیازاتی قالدیرارق اصحاب
 املاک کافه‌سندن ویرکی تحصیل ایتمک .

تورغو دییوردی که : « حکومت عمومک منافی نامنه
 مصارفده بولوندیغی ایچون بو مصارفه هرکس اشتراک ایتملیدر .
 هیئات اجتماعیه ارمسند نه درجه استفاده کورولیورسه بوکاده
 او نسبتده فضله اشتراک ایتمکله مفتخر اولمق لازمدر » ؛

رابعاً : قرالک مأمورلرینه اداره حکومتده یاردم ایتمک
 ایچون محلات ایله ایالتلرده اصحاب املاکدن متشکل مجلسلر
 تشکیل ایتمک . تورغو قراله شوایله یازیوردی : « ملنکزک
 قانون اساسییی یوقدر . فرانسز ملتی یکدیگرینه حسن صورتله
 مربوط اولمان مختلف صنفلردن ، اعضای روابط اجتماعیه
 ایله غیرمربوط و بناء علیه هر بری صرف منافع شخصییه سیله
 مشغول بر قومدن عبارتدر . او صورتله که ذات شاهانه‌لری
 هر شیئی بالذات ویا مامورلریکز واسطه سیله قرارلاشدیرمق
 مجبوریتمده سکز . . . بو فکر اختلافی اورتادن قالدیرمق
 ایچون قرالنگک بوتون اقسامنی یکدیگرینه باغلا یا جق بر پلان
 لازمدر » .

تورغو غایت مشکل بر وضعیتده بولونیوردی. پروژہ لری سرای ارکانی ایله قرالیچہ نك هیچ خوشنه کیتمیوردی . قرالیچہ، سرای مصارفنده اقتصادایدلمسنى ارزو ایتمیوردی . - کدازادکان ایله پارلمتو نك ده خوشنه کیتمیوردی . بونلر ویرکی تحصیلنده مساواتی ارزو ایتمیورلردی . - اصناف اوسته لری نك خوشنه کیتمیوردی . چونکه بونلر سربستیء صناعی ایسته میورلردی. بناء علیه تورغو به طرفدار، نفوذی آز بعض محررلردن باشقه کیمسه یوقدی.

تورغو بوتون اصلاحاتی بردنبره قراله قبول ایتدیره جکنی هیچ عقلنه کتیر میوردی. بونك ایچون برر بر عرض ایتمشدی . اون آلتنجی لوئی اولابو اصلاحاتی تصویب ایتدی. حتی : «بوتون افکار یکزه اشتراک ایدہ جکمه واتخاذا ایدہ جکگز هر دلو تدایر جراتکارانده سزی دائما التزام ایلیه جکمه دائر شمیدین ناموسم اوزرینه سوزویریورم. » دیمشدی، تورغو شو صورتله انجق بعض اصلاحات اجرا ایدہ بیلیمشدی که اندرده شوندن عبارتدی :
اولا : حبوبات تجارتی حقفنده سربستی تأسیس ایتدی .

۱۷۷۴ده برعربده وقوعه کلدیکی خالدہ بونیینه ابقا ایلدی ؛

ثانیاً : اوسته باشیلقرله اصناف کتخدالقرلرینی یعنی امتیازلی اصناف هیئتلرینك تشکیلاتنی قالدیرارق سعی وعملده سربستیء نام تأسیس ایلدی (۱۷۷۶) ؛

ثالثاً : عمومک ویرکی اعطاسنده مساوی اولدینی قاعده سنی

وضع ایستی . فقط بو ، درجه نانیسه حائز اهمیت بر مسئله ایدی . تورغو کنیدیسی ده « جزیه اعطاسی اوتهدن بری سرعی افکاره کوره ذاتی ایمایدیکی ایچون زادکان ایله رهبانه جزیه ویردیرمک لزوم سزاولاجغنی » سویلردی . تورغو اک اوافق ویرکی پی اله آلمشدی ؛ اوده (قرال آنغاریه سی) ایدی . بومکلفیت صرف اهالی به عائددی . ارباب امتیاز بوندن معفوایدی . تورغو بوویرکی پی قالدیرمش ، انک رینه نقدی برویرکی وضع ایلمشدی . بوویرکی اصحاب املاک کافه سندن آله جقدی (۱۷۷۶) .

تورغو دهاصوکره ایالت مجلسلری تشکیل ایدیله رک اصول اداره نک اصلاح ایلمسی ایچون اون آلتنجی لوئی به برپلان تقدیم ایستی . فقط اون آلتنجی لوئی اصلاحاتدن طولایی ظهورایدن مخالفتلردن آرتق اوصامشدی . یارلمنتو ۱۷۷۶ امر نامه لرینی قیدایتمکدن امتناع ایلمشدی . سرای ، قرالیچه ، هرکس تورغودن شکایت ایدیوردی . هرکس تورغونک بر نظریاتیجی اولدیغنی ، قرالنی آلت اوست ایده جکنی سویلیوردی . بونک اوزرینه قرال تورغویی عزل ایتمش (۱۷۷۶) . تورغونک قالدیردینی شیریه ده خلفلری یکیدن تأسیس ایلمشردی .

تورغونک ایالت مجلسلری حقه ده کی پروژه سنی نه فکدر غایت محترزانه قبول ایستی (۱۷۷۸ - ۷۷) . (بهرری) ایله (یوقاری کیهن) ده زادکان مبعوثلری ایله رهبان و کوی زنکینلرندن مرکب بر مجلس تشکیل ایلدی . مجلسده بولوناچق

مبعوثلرک بر قسمنی حکومت نصب ای دیوردی . مجلسک وظیفه سی ویرکینک توزیع و تحصیلی ، یوللر ، تجارت و زراعتله مشغول اولمقدن عبارتدی . کذاوالینک اداره امور ایتمسنه ده یاردم ایده جکدی . نه فکر دیوردی که : « بو اداره لرک ذات شاهانه نک اعتمادینه لیاقت ابراز ایلمکه محتاج بولوندقلرینی وانجق بو شرط داخلنده محافظه قوت ایده بیله جکلرینی کندیلرینه احساس ایچون نه کبی تدابیر لازمه جمله سی اتخاذ ایدلدی . . . بونلر قرالک اعتمادینی حائز اولقله ممتاز عادی اداره مأمورلرندن ، قرالک افکار خیرخواهانه سی مشترکاً تعمیم ایچون حکمدار طرفندن مساعده آلمش قومیسرلردن باشقه بر شی دکلردی . »

۱۷۸۷ ده (اساساً مجلسلری بولونان ایالتلر مستثنی اولوق اوزره) حکومت بوتون ایالتلرده ولایت مجلسلری تشکیلنه قرار ویردی . فقط ایش ایشدن کچمشدی . عدم ممنونیت پک زیاده ایدی . بو مجلسلر والیرله مبارزه باشلا یارق بالعکس اصول اداره نک چیغرنندن چیقماسنه سبب اولمشلردی .

ماله رب ، ضابطه ایله عدلیه بی اصلاحه ایتمک ایستوردی . فقط یالکنز حبسخانه لری بر آز اصلاحه و جنایت دعوالرنده معلومات آلمق ایچون قوللانیلان اذیتلری لغو ایتدیرمکه موفق اولدی ایسه ده قاپالی مکتوبلری لغو ایتدیرمکهینه موفق اولامادی . تورغویه کیملر خصم اولدی لرسه بوکاده اونلر دشمن اولدی لری . بونک اوزرینه اوده عزل ایدلدی .

اون آلتنجی لوئینک ایلمک سنه لرنده باشلایان اصلاحات
 تشبثی احساب امتیازاتک ممانعتی یوزندن عقیم قالمشدی .
 ۱۷۸۱ ده حرابه ناظری زادکاندن غیر یسنک ضابط اولامیه جفنه
 قرار ویردی . پستیپوسلق ، یاباسلق و باش راهبلك کبی ره بان
 صنفنه تائد منافع هپ زادکانه تخصیص ایدلدی . کویلرده کی
 سه نیورلر ، کویلولرینک ویرمکدن امتناع ایتدکلری بوتون
 ویرکیلری تکرار تاسیس ایتک ایچون ارباب قانونه تدقیقات
 اجرا ایتدیردی لر . فقط بوانشاده آچیق کوندن کونه تزا ایدیدیوردی .
 بو اصول اداره نهایت انقلابه منجر اولمشدر .

دردنجی فصل

فرانسه انقلابی

اون سکزنجی عصر نهایتنده

حکومت مطلقه و هیئت اجتماعی

اداره مابقه . — اون سکزنجی عصر نهایتنده هیئات اجتماعی ایله حکومت، الان قرون وسطا دن بری تدریجی بر صورتده وجوده کلن اسکی عادتله کوره تشکیل ایدلمشدی. فرانسه لر اون سکزنجی عصرده مسائل سیاسییه حقننده دوشونمکه باشلا دقلری زمان، ایچنده یاشادقلری نظامات انلره عقل و منطق وانسانینه مغایر سؤاستعمالات کبی کورونمشدی. ایشته انقلابک محو ایتدیکی بونظامات (اداره سابقه) نام عمومیسی ایله معروفدر .

اداره سابقه اوچ صورتله مناقشه ایدیلیوردی . قوتتولسز و غیر محدود بر صلاحیت مطلقه ایفا ایلدیکی ایچون اداره مطلقه دن؛ امتیازات اوزرینه مؤسس بولوندیغی ایچون هیئات اجتماعی دن؛ قاریشیق و غیر منتظم بر عاده تابع اولدیغی ایچون ده حکومتدن شکایت اولونیوردی .

حکومت رسمیت مطلقه . — حکومت ، بوتون نفوذ کندی آلرنده بولوناچق وجه ایله قرال لر طرفندن تدریجی بر صورتده وجوده کتیرلمشدی. فرانسه قرالی بوتون صلاحیتی نفسنده جمع ایلشمشدی . (قوه اجرائیه) ، بوتون مامورینی

وحتی رهبان اعضاءنی نصب ایتمک ، حرب و صلحه و اتفاقره قرار ویرمک ، عسکر و میلبیس طوبلامق ، بوتون امور اداره یی تدویر ایتمک حتی یالکز اونک آنده ایدی .

کذا (قوه تشریعیه) بی ده حائزدی . قواعد حکومت ویا عدلیه یی دکیشدیرمک ایچون قرالک بر امرنامه سی کافیدی . چونکه امرنامه ، قانون قوتنی حائزدی . فرانسه ده عادات قدیمه ایله قرالک امرنامه لرندن باشقه قانون یوقدی .

(قوه عدلیه) بی اساساً حائزدی . بوتون حکمر قرال نامه ویریلیدی . حاکمر قرالک مأموری عد اولونوردی . قرال ایسترسه بونلری عزل ایدر ، (۱) و یاخود خصوصی قومیسونلر معرفتیه رؤیت ایتمک ایچون هر هانکی بر دعوا یه اعتراض ایده بیلیدی .

قوه مالیه ده قرالک آنده ایدی . ویریه جک ویرکیلرله مصارفی بالذات تعیین ایدر ، ایستدیکی بر طرزده ویرکی تحصیل ایلردی .

قرال بوتون بو قوتلری استعمال ایتمک ایچون مأمورله محتاجدی . سرکرده ، مجلس قرالی بی تشکیل ایدن ناظرلر

(۱) حاکمک (اون آلتنجی و اون یدنجی عصرلده) پاره ایله آلتیر مأموریتلردن اولدینی ایچون قرال بومأموریتی انجق صاتین آلا نه ویردیکی پاره بی اعاده ایدرک کری آله بیلیدی . فقط دائماً پاره سزاق ایچنده بولونان قرالر بو حقلرینی هیچ استعمال ایتمزردی . بوسورتله حاکمقر قانون آدکسه ده طبیعتیه لایننزل کبی ایدیلر .

بولونوردی (بونلر عدلیه ده (شانسولیه) ، مالیه ده (قوتتورلور ژمنه رال) ، خدمات سائرده ده (سه قره تهرده تا) عنوانلری محافظه ایلمشردی) . هر ایالتک بر والیسی (آنتاندان) ایله مادون مرخصلری واردی. فقط بوتون بومامورلر حدذاتنده هیج بر حقوقه مالک دکلردی . بونلری قرال نصب ایدر ، ارزو ایدنجه عزل ایلردی .

قرال ایله مأمورلری (صلاحیت مطلقه) بی حائر ایدیلر. اوزمانلر بوسلاحیتک کیفی اولمایه جفی ، قرالک بعض تعاملاته، (قراللتک قوانین اساسیه سی) تعبیر اولونان قانونلره نظراً اداره حکومت ایتسی (لازمکه جکی) بیان اولونوردی . فقط بو قوانین اساسیه کاغداوزرنده دکلدی. حتی بونلرک نهدن عبارت اولدیفنی کیمسه بیلمزدی .

۱۷۸۷ ده پارلمنتو قرالک مجالس عمومیه یه طانیشمانن یکی برویرکی وضع ایدمه یه چکنه قرارویرمشدی. (بونظریه بسبتون یکی ایدی . اون دردنجی لوئی ایله اون بشنجی لوئی بر چوق ویرکیلر احداث ایتشلر ، حال بوکه مجالس ۱۶۵ سنه دن بری هیج انعقاد ایتمه مشدی) . ۱۹ تشرین ثانیسه وقوع بولان انعقادده «حکومت مطلقه قواعد اساسیه» سنی قرال نامنه بیان ایتک ایچون باش وکیل قرال ایله برلکده مجلسه کلشدی . «بوتون ملت طرفندن قبول اولونان بو قواعد اساسیه یه نظراً قرالنی داخلسنه بوتون قوه حاکیتی انجق قرال حائرر .

قرال ایفا ایلدیکی حاکمیت مطلقه دن طولایی انجیق جناب حقه مسئولدر. کذا (قوة تشریعیه) ده مستقلاً و بلا انقسام حکمدارک شخصنه عائددر... ایشته بودساتیر قدیمه ملیه دن آکلاشلیپورکه قرال کندی قرالغنی اداره ایتمک ایچون خارق العاده هیچ بر قوته محتاج دکلدر. بر فرانسه قرالی حکومتک صنوف نلنه سنه منسوب مرخصلره انجیق دهاشموللی بر هیئت مشاوره وجوده کتیره بیلیر... فقط انلرک مدعیات و یا شکایاتنه قرار ویره جک یالکز کندیسیدر. « پارلمنتو بوکا قارشى احترامکارانه اعتراف. ضاتده بولونمش، فقط قرال پارلمنتویه استقراض حقیقده کی امرنامه یی قید ایتمسنى امر ایلمشدى. دوق دورله آن، مذکور امر نامه نك « قرالک غایت قطعی بر امری اوزرینه » یازلمش بولوندیغنه دائر بر قید قونولماسنى، و چونکه بوتدیرک غیر مشروع اولدیغنی سوبله مشدی. بونک اوزرینه اون آلتنجی لوتی یاواش بر سسله: « بنجه بو مساویدر. « دیمش، دها صوکره شو سوزلری علاوه ایتمشدى: « مادامکه بن ارزو ایدیپورم، مشروع دیمکدر! »

فی الحقیقه قرالک ارزوسندن باشقه هیچ بر قاعده حکومت موجود دکلدى. قرال بوتون قوتنى بالذات تطبیق ایده مدیکی ایچون قرالغنی حقیقته ناظرلره والیر، همده غایت مستبدانه اداره ایدرلردی. چونکه بونلر هیچ بر معین قاعدهیه تابع اولمادقلری کی صلاحیتلرینه ده هیچ بر کیمسه نك اشتراکی یوقدی.

اسکی قوتلردن یالکیز ایکی انقراض قالمشدی . اونلرده پارلمنتورل ایله برقاچ ولایتده موجود ایالت مجلسلردن عبارتدی . فقط پارلمنتورلک اشخاص بیننده احقاق حقندن باشقه وظیفه لری قالمشدی (حکومتک درعهده ایندیکی دعوالر خصوصی محکمه لر ویا شورای دولتجه رؤیت ایدیلردی) . بناء علیه بونلر حکومتک سؤ استعمالاتنه قارشی مانع اولامازلردی . ایالت مجلسلری ده (بره تانیا ، بورغونیا ، پرووانس ، لانکه دوق و پیره نه مملکتلری کبی) برقاچ ولایتده واردی . بونلرده یالکیز برقاچ کون اجتماع ایدرلر ، و بو اجتماعلرده املاک ویرکیسی ایله بو ویرکینک ولایته تقسیمنه قرار ویرمکدن باشقه بر وظیفه ایفا ایتمزلردی .

بناء علیه بوتون ایشلره حاکمانه بر صورتده قرار ویرمک قرال مامورلرینک آئنده ایدی . بلدیلهر حکومتدن مساعدنه آلمسزین هیچ بر ایش ، حتی نه بر کوپری ، نه ده بر کلیسا یا پامازلردی . ایالتلرک برچوغنده بلدیلهر فوقنده هیچ بر مجلس ، حتی بر مجلس مشاوره بیله یوقدی . اهالیک طلبلرینی ویا شکایتلرینی حکومته بیان ایتمک ایچون آللرنده هیچ بر واسطه موجود دکلدی .

ایشته بو صورتله مامورلر بوتون صلاحیتلرینی یالکیز بلا انقسام دکل ، کذا هیچ بر نظارت آئنده بولونمقسزین استعمال ایدیورلردی . بونلرک افعالی هیچ بر کیمسه قوتتول

ایده‌مزدی. انلری طانیق ایچون هیج بر واسطه یوقدی . بر ولایتک طرز اداره‌سنی ویا قرالنگ اداره‌عمومیه‌سنی تدقیقه مامور هیج بر مجلس (یعنی مجلس عمومیه ویا مجلس مبعوثانه بکزر بر شی) یوقدی . هیج برغزته، مامورلرک مقرراتی مناقشه ایتمک صلاحیتینی حائز دکلدی . چونکه بوکا سانسور مانع اولوردی . حتی اکثریا بو مقرراتدن کیمسه‌نک خبری اولماددی؛ چونکه مقررات کیزی اتخاذ اولونوردی. ناظرلرله مامورلری، یابدقلمی ایشلردن اهلینک هیج خبری اولمادن، خفی بر صورتده اداره‌امور ایدرلردی . نه‌قکدر: « فرانسه، قلم اوطله‌لرندن اداره ایدلشدر » دییوردی . واردات و مصارفک مقدارندن کیمسه‌نک خبری یوقدی . نه‌قکدرک ، طوغرو اولماقله برابر مصارفاته دائر بر (خلاصه) یازماسی بویوک بر جرأتدی . ایشته بو صورتله صلاحیتلرک سؤ استعمالنی طوردیراجق ویا میدانه چیقارم‌جق نه نشریات ، نه‌ده مستقل بر قوت واردی. هیج بر شی ، حتی کلیاً مستقل و غیرمسئول اولان مامورلرک کیفلی ایستدیکی کبی استعمال نفوذ ایتملرینه و دوستلرینه التماس ویا شخصی دشمنلرینه مظالم ایلملرینه مانع اولق ایچون افکار عمومیه قورقوسی بیله یوقدی.

قرال، واردات حکومته واردات شخصیه‌سی نظریله باقیور، صندقلردن پاره آلدینی زمان گویا کندی مالی خرج ایدیوردی . سرانی اداره ایچون لزومی اولان پاره‌دن باشقه

هر سنه سرای آدملرینه (احسان) اولمق اوزره قرق میلیونلق
هدیه طاغیتوردی (یالکز پولینیان عائله سی ۷۰۰۰۰۰ لیرالق
هدیه آلمشدی). خزیننه نك بتون پاره سی قرالک آئنده ایدی .
قرال یالکز بر مقبوض یازار ، مقبوضی حامل اولان کیمسه
درحال صندوقدن پاره یی آیردی . بو عادت، منتظم بر بودجه
تنظیمی امکان خارجنده بر ایدردی .

مصارفات ، واردات ایله توازن ایده جك وجه ایله تنظیم
ایدلمزدی . همان دائما مصارفات وارداتدن دون بولونور ،
آچیقلا استقراض ایله قاپادیلیردی .

کذا ویرکی ده حکومتک اداره کیفیته سنه تابعدی . هر ایالتک
نه قدر ویرکی ویره جکنی هر سنه (شورا) تعیین ایدردی . یالکز
مجالسه مالک بولونان مملکتلر ، مکلفینک مقدارینی کندیلیری تعیین
ایده بیلیردی . ویرکی بی اهالی به ثروتلری نسبتنده تقسیم ایچون
یالکز بونلرک بر نوع تشکیلاتی واردی . فرانسه نك سائر
یرلرنده بوتون معاملات مامورلر طرفندن ایضا اولونوردی .

جزیه مقدارینی محلاته والیرله اعیان تقسیم ایدردی . اکثریا
دوستلرینک املاکی بولونان محلاتی بونلرک ویرکیدن استئنا
ایتدکلرندن طولایی شکایتلر واقع اولوردی . بر محله اهالیسی
آرسنده جزیه نه هرکسک املاکنه، نه ده معین قاعده لره نظر آ
تقسیم اولونور ، بالعکس (تعامل قدیم اوزره) هرکسک قدرته
کوره تقسیم ایدیلیردی . بو قدرتی تقدیر ایتمک، اهالیدن هر برینک

نقدر ویره بیله جکئی قرارلاشدیرمق، مستقلاً ویرکی طوبولایا- نرک الندءایدی. بونر ارزو ایتدکترینک ویرکیلرینی آزالنیرلر ویا چوغالتیرلردی. کوبیلر مکلفیتلری چوغالتلماسین دیسه قفیرکورونمکچالیشیرلر، سفیلانه اولرده اوطورلرلر، ارزاقلرینی صاقلارلردی.

اعانهلر (مشروبات ویرکیلری) ایله طوز ویرکیلری کبی حکومتک التزام ایله شرکتلره ویردیکی ویرکیلر، حکومت مامورلری کبی صلاحیتی حائز شرکت مامورلری طرفندن جبات ایدیلردی. بونر قاچاق صورتیه صاتین آلمش طوز بولونوب بولونمادیغنی آرامق ایچون اولره کیرلردی. قاچاقچیلر (ساخته طوزجیلر) قیرباج ویا کورهک جزاسنه محکوم اولورلر- دی. هرسنه بونلردن ایکی اوچ بیک کشی توقیف ایدیلردی. بمض ولایتلرده هیئت اداره، نهایت هر عائلهک نه قدر طوز صرف ایده بیله جکئی ده تعیین ایلشدی. بوکا (سهل دودووار) دیرلردی. بو طوز یالکزیمک ایچون قولانیلردی. مثلاً طوموز طوزلامق ایچون بو طوزی قولانمق ممنوعدی. بوسبیدن طوزویرکیسی بوتون اهالی ایچون پک منفور اولمشدی. اون سکزنجی عصرده فرانسزلر بوکونکینک همان بش مثل آز ویرکی ویرلر، و بوویرکی بی ده کمال مشکلات ایله تادیه ایدرلردی. چونکه ویرکی مکلفینک ثروتی نظر اعتباره آلتمایارق توزیع ایدیلر، کینی و ظالمانه بر طرزده تحصیل اولونوردی.

میلیس ده بویله ایدی . اون دردیجی لوئی زماننده میلیس تشکیل اولوندیغندن بری بونلر کاملاً والیرک آئنده قالمشاردی . والیرلر زنکین کویلوچو جقلریخی قرعه چکمکدن استئنا ایدرلردی . اون دردیجی لوئی زماننده احداث اولونان ضابطه ، وسائط اجرائیه نك همان کافه سندن زیاده تبمه ایچون مدهش بر حالده ایدی . بوتون یازیلر نشر اولونمازدن اول بر (سانسور) قومیسونی طرفندن تدقیق اولونوردی . بر سانسور ، جانی ایسترسه بر کتابک نشرینه مانع اولوردی . سانسورک مساعده سی اولمادن کتابک نشر ایتمکی کوزه آلدیران مطبعه جیلر حبس و حتی کوره ک جزاسنه محکوم اولورلردی . بلا مساعده نشر اولونان کتابلر حقنده عساکمه تعقیبات اجرا اولونور ، بونلرک محوینه ویا مامورین واسطه سیله احراقه قرار ویریلیردی . وولتیرک (فلسفی مکتوبلری ، دیده رونک (اعمالر حقنده مکتوبلری) ، روصونک (أمیل)ی هپ بویله اولمشدی . اکثریا مؤلف توقیف ایدیلیر ، بلا محاکمه (باستیل) . کوندریلیردی . وولتیر ایکی دفعه (باستیل) . حبس ایدلشدی . نهایت امین بر حالده یازی یازمق ایچون فرانسه خار چنده (لوندرده ، پروسیاده ، فرنه یه ده) یاشامغه قرار ویرمشدی . فرره ، فرانق قرالیری حقنده مناقشات تاریخیه ده بولوندیغی و حکومت مطلقه نك مبدائی حقنده موجود بعض روایاتک اساسنزلغنی اثبات ایلدیکی ایچون (باستیل) . کوندرلشدی .

سربستیء مطبوعات اصلا یوقدی . سانسور یومی غزتهلر
 نشرینه بیله مانع اولوردی . بر مقاله تاممیله تدقیق اولونماقجه
 نشر ایدلمزدی . سانسورک مساعده ایتدیکی غزتهلرده ده سیاست
 حقنده یکانه معلومات ، حکومتک نشر ایتدیردیکی تبلیغات
 رسمیه دن عبارتدی .

حریت وجدان هله هیچ یوقدی . قاتولیک مذهبی مجبوری
 ایدی . اون آلتنجی لوئی رسم تقدیس ائساننده «تحت حاکمیتنده
 بولونان بوتون مالکده کلیسا طرفندن اتهام اولونان رافضیلری
 محو ایچون بوتون قوتیه و کمال صمیمیتله چالیشاجفنه»
 یمین ایلشدی . نه پروتستانلر، نه ده یهودیلر حکومت مأموریتنه
 قبول ایدلمزدی . ۱۶۸۵ دن بری پروتستان مذهبی قراللقده
 منع ایدلمشدی . پروتستانلر (ایصسز یرلرده) یعنی هجرا محللرده
 هپ خفی صورتده اجتماع ایدرلردی . بو اجتماعلردن بری
 آنسزین باصیلدینی زمان راهب اعدامه ، جماعتده کوره ک
 جزاسنه محکوم ایدیلیردی .

کذا قاتولیکلرده سربست دکلردی . لوقانطه جیلرک جمعه
 و پرهیز کونلری آتیمکی ویرملری، عمله نک بازار ویا یورطی
 کونلری چالیشمالری ممنوعدی .

افرادک حریت شخصیه لری تحت امنیتده دکلدی . ضابطه
 ایستدیکنی توقیف ایدر، هیچ بریره خبر ویرمدن ایستدیکی
 مدت تحت توقیفده بولوندیرددی . بونک ایچونده قاپلی بر

مکتوبه قرال نامه توقیف امری و یرمک کفایت ایدردی .
 قاپالی مکتوبه توقیف اولونان کیمسه حبسخانه لردن برنده
 توقیف اولونوردی . بو حبسخانه لره عدلیه نظارت ایتزدی .
 (بونرک اک مشهوری پارسده باستیل حبسخانه سی ایدی) .
 حبسخانه مدیری ، محبوسک صالیو یرلمسی ایچون امر آلنجیه قدر
 محبوس بوراده قالیردی . بعضاً سنه لره اونودولدینی اولوردی .
 لاتود ، مادام دوپومپادوره حقارت ایتدیکی ایچون (باستیل)
 کوندرلمش ، بوراده تمام ۳۵ سنه قالمشدی . بو قاپالی مکتوبلر
 ناظرلره کاتیرینک نده ایدی . انلر بو مکتوبلری یالکز
 حکومتک دشمنلرینه قارشى دکل ، کندی دشمنلرینه قارشى ده
 استعمال ایدرلردی . حتی ایش اوراده یه گلشدی که ناظرلر
 بو مکتوبلری بوش اولارق ساتارلر ، صوکره ساتین آلان
 کیمسه لر کیمی توقیف ایتدیرمک ایستلرسه اوزرینه اونک اسمنی
 یازارلردی .

برچوق پدرلر ، کندیلرینه اطاعت ایتمین چوجقلرینی
 باشلرندن آتمق ایچون ده بوچاره یه توسل ایدرلردی . ۱۷۷۰ ده
 ماله رب اون بشنچی لوئی یه شوسوزلری سویله مشدی : « قرالنگیز -
 ده هیچ بر فرد حریتنک بر انتقامه قربان اولیه جغندن امین
 دکلدر . چونکه هیچ بر کیمسه ، نه بر ناظرک عداوتندن مصون
 اولاییله جک درجده بویوک ، نده بر چفتلک کاتینک عداوته
 لایق اولاجق درجده کوچو کدره » .

کاملاً قرالک شخصه‌نده تمرکز ایدن ، صرف قرالک خدمتکارلری واسطه‌سیله اداره اولونان اسکی حکومت مطلقه اداره‌سی شوصورتله مستبدانه وکیفی براداره تاسیس ایلشدی . بو اداره‌نی تحدید ایده‌جک هیچ بر نفوذ ، حداعتداله ارجاع ایده‌جک هیچ بر تفتیش ، سؤ استعمالاندن امین هیچ بر حق موجود دکلدی .

هیئات اجتماعییه و امتیازات . — قرون وسطاده هیأت اجتماعیه ، حقوقه بر برینه غیر مساوی بر قاج (صنف) دن تشکل ایتشدی . قرالکر نفوذلرینی بوتون تبعه‌لرینه تشمیل ایچون بوعدم مساواتی قالدیرمغه لزوم کورمه‌مشلر ، بناء علیه یوقاری صنفلره منسوب کیمسه‌لر حقوق شخصیه‌لرینی (امتیازلرینی) محافظه ایتشلردی .

ملت رسماً (اوج قسم) ه ، یعنی اوج صنفه آیریلشدی . هر برینکده مجالس حکومتده آیری آیری مبعوثلری واردی . صنوف سائره‌یه تقدم ایدن (رهبان) ، غایت جسم مالکانه‌لر (قرالغک تقریباً درتده بری نسبتنده اراضی) ایله (سنوی ۱۲۵ میلیونه بالغ اولان) برنوع محصولات ویرکیسنی (عشر) محافظه ایدیوردی . رهبان اراضیمی هیچ بر ویرکی‌یه تابع دکلدی . رهبان هریش سنه‌ده بر رهبان مجلسی طرفندن تصدیق اولونان اون میلیون قدر بر مبلغدن باشقه هیچ ویرکی ویرمیوردی . ابتدائی مکتبلره ، خسته‌خانه‌لره و مؤسسات خیره‌یه نظارت ایتک

رهبانك وظيفه‌سی ایدی . وافتیز ، ازدواج ، تدفین کبی
 معاملات ملکیه به تعلق ایدن قیدلری طوتمق رهبانه عانددی .
 رهبانك کلیسا محکمه لری ده واردی . بو محکمه لر مغل انضباط حرکته
 بولونمقله . مظنون راهب لری محاکمه ایدر و ازدواج دعوا لرینی
 رؤیت ایلردی .

وقتیله همان بوتون اراضی ، بوتون حکومت ماموریتلری
 (زادگان) ك ائنده ایدی . فقط زادگانك ائنده شمعی بونك
 یالکزر اتقاضی قالمشدی .

کویولر زرع ایتدکلری اراضینك یاواش یاواش صاحبی
 اولمشلردی . اراضینك تقریباً اوچده بری کویولر ك ائنده ایدی .
 فقط بونلر اسکی ملك صاحبنه (سه نیوره) قارشى قرون وسطادان
 بری تأسیس اولونان واون اوچنجه عصرده (دره بکلك حقوقی)
 تعبیر ایدیلن مکلفیتلره تابع قالمشلردی . بومکلفیتلر ك برچونگی
 اوافق تفك ویرکیلردن (۱) عبارتدی . فقط بر قاق دانه سی ، وبالخاصه
 دکر منده چالیشمق ایله (آو حقی) . محصول لرینی هپ اولره ییدریدیکی
 و آوجیلر ك آیاقلری آئنده چیکنه تدیکی ایچون جانلرینی بک زیاده
 صیقور ، انلری حد تلندیر ییوردی .

نفوذ و صلاحیت مأمورلره بکمشدی . فقط زادگان ینه

(۱) سه نیور ك حقوق عدلیه سی کند یسنه حقیق اولار ق هیچ بر نفوذ
 بخش ایتیموردی . چونکه بو حقوق اجرا ایتسی ایچون همه حال بر حاکم
 طوتما سی لازمدی .

قولایچه ماموریتلره کچه بیلیمک فوایدینی حائز بولونیوردی. سرای ماموریتلری هپ زادکانه مخصوصدی. سرایه قبول ایدیله بیلیمک ایچون زادکاندن اولمق لازمدی. اردوده بیوک رتبه لره، حتی ۱۷۸۱ دن بری ضابطلکه انجق اونلر نائل اولابیلیردی. (سنت اسپری ، سن - لوتی و لیاقت نشانی کبی) بعض نشانلر زادکاندن باشقه سنه ویرلمزدی. زادکان اسکی ویرکیلردن ، جزیه دن ، وعسکر لری اسکاننده عفو ایدلمشیردی .

بوقانونی امتیاز لردن ماعدا زادکانه دواژده ، محاکمه (۱)، عمومی محللرده (کوی کلیسا سنده سه نیورک کندیسنه مخصوص برصندالیه سی واردی) دائما حرمت ایدیلیردی . اساساً الکهم ماموریتلر بالترجیح زادکانه ویریلیردی . مجلسلرده زادکان ، جنتمنن اولمیانلرک مافوقی صفتیه حرکت ایدرلردی . - وولنر ، دوق دوره هانله غوغا ایتمشدی. برکون وولنر ، اؤک برنده میمک بیرکن برینی کوندروب وولنهری مستعجل برایش ایچون چاغیرمشلر ، وولنر اودن چیقارچیقماز دوقک اوشاقلری وولنهری طوتوب باستونله برتمیز طیاق آتمشلردر . وولنر دوقی محکوم ایتدیرمک شویله طورسون ، حتی برازفضله کورولتی

(۱) روایت کوره اداره سابقه ده زادکانک باشی کسلیر، زادکان اولمیانلرده اعدام ایدیلیردی . فقط بوسوز کاملاً طوغرو دکلدر . اوزمانلر جزا جریمک نوعنه تابعدی . بیوک برخرسز ، حتی جنتمنن بیله اواسه ینه تیه - لیردی . بونک امثالی پک چوق واقع اولمشدر .

ایتمک ایستدیکی ایچون حکومت طرفندن (باستیل) کوندرلمش، چیقارکن ده کندیسنی اونوتدیرمق ایچون ممالک اجنبیه یه صااوشماسی توصیه ایدیلهرک صالیورلمشدی .

رهبان ایله زادکاندن سوکرده (تیه رس نه تا) یعنی اهالی کلیردی (صره ترتیبه اهالی اوچنجی کلدیکی ایچون اهالی یه اوچنجی دیرلردی) . اصل معناسیله تیه رس اتا ، بوتون ملت دیمکدی . فقط بوده درجانه آیرلمشدی . بودرجاتدن برچو غنک امتیازلری واردی . قرالار عدلیه و مالیه ماموربتلرینی صاته صاته اجرای حکم ایتمک، قرال نامنه ویرکی جبات ایتمک حقوقنی حاز ارباب حقوقدن مرکب برصنف میدانه چیقارمشدی . بوارثی مامورلرک اک ایلری کلنری زادکان صنفنه داخل اولمشلردی (پارلمنتو مشاورلری اوچ بطن سوکره زادکان عد اولونورلردی) . فقط بونلرک غیری ، حاکم ، مالیه مامورلری ، ضبط کاتبلری ، مقاولات محررلری ومدعی عمومیلر زادکان اولامازلر، بونلکه برابر کندی وظیفه لرینه متعلق صلاحیتدن ماعدا ، طبق جنتلمنلرکی انلرده جزیه دن وعسکر اسکان ایتمکدن معفوظ وتولق امتیازینه مظهر اولورلردی .

جزیه یه تابع عمله آره سنده بیله امتیازلیر واردی . برصنعت ایشله مک ویاردکان آچق حقی، قرون وسطا ده اولدینی کبی، امتیازدن معدوددی . عین صنعتنه منسوب کیمسه لرله اوسته باشیلر مسدود برهیئت تشکیل ایدرلردی . بو هیئته برقاچ سنه چراقلق ایتدکدن

صوکره و برده معین بر مبلغ ویره رک داخل اولونوردی . اعضا موقعری محدود اولدینی ایچون بر صنعت ایشله مک امتیازی ده نهایت اوسته زاده لره منحصر قالمشدی . اصناف هیئتنه قبول اولونمادن برشی یاپان ویا صاتان کیمسه حبس ویا حجز جزاسنه گرفتار اولوردی . بناء علیه هیئات اجتماعیه مساواتسزلق اساسنه مستنددی . بومساواتسزلق الک زیاده بورژوالری غلیانه کتیریوردی . بونلر بر انسانک صرف نسبدن طولاینی فائق اولماسنی قبول ایتیمورلر ، بر بورژووانک بر اسیله مرجح اولدیغنی سویلیورلر وکندیلری ده مناصبه کچمک ایتیمورلردی .

انتظامسزلی و کوره نك . — اداره سابقه نك دشمنلری حکومتک قاریشیق ووحشیانه تشکیلاتنی ده مؤأخذه ایدیورلردی . حکومتک (ولایت) ، (پسقیوسلق) ، و (جنرالقلره) تقسیمی (۱) سرورزمان ایله بر طاقم بویولتمه نر و متوالی کوچولتمه لرله ، عمومی بر پلانه رعایت ایدلمدن وجوده کلشدی . تقسیمات غیرمنتظم و بربری ایچنده ایدی . بعضلری شمدیکی فرانسه ایالتلرینک درت بش مثلی بویوککلکنده ، بعضلری یالکزبری قدردی . (آغد) پسقیوسلغنک یکرمی ، (روآن) کیدی یوز محله سی واردی . بوتقسیمات داخلمده وظائف ده بر برینک عینی دکلدی . پسقیوسلق ، محاکم ، انتخابات ، اداره عسکریه ، حاصلی بالجمله تقسیمات ، تقسیمات

(۱) فرانسه نك اداره سابقه زماننده کی تقسیمات جغرافیه سنده قوللانیلان (ایالت ، پروونس) نامی رسمی براسم دکلدی .

سائره نظر اعتباره آلمانن یاپیلمشدی. بونلرهب ایشی قار-
یشدیراجق وجه ایله بربرینه تجاوز ایدیور، عرب صاچی کبی
اولیوردی.

هرایالتک عاداتی، طول، ثقلت، وحجم اولچوسی آیری آیری
ایدی. هیچ برقاعده، مشترک هیچ برحق عمومی یوقدی.
بو حال ولایتلر آرمسندله ایشلری و تجارتی مشکل برحانه ستیریوردی.
حدود منطقه لری فضله اوله رق قراللاک اقسام متبایقه سنندن
اسکی کمرکلره آیرلش، الحاقدن صوکره بو کمرکلرینه ابقا
ایدلشدی.

ایشته بو قاریشیمقلق واختلاف، امور اداره بی غایت مشکل،
مواصلاتی معطل برحاله کتیریوردی. منورالافکار کیمسه لر
بوندن متاثر اولورلر، یکنسق و اصوله موافق بر اصول تقسیم
ایله تعاملک، طاریلرک و اولچولرک بر اولماسنی آرزو ایدیورلردی.
امور اداره نک مختلف شعبه لرنده مامورلر وحشیانه وغیر
محق کورونن اسکی اصوللره نظراً حرکت ایدوب طور ییور-
لردی. امور مالیه ده ویرکیلر اک زیاده فقرایی آزمجک وجه ایله
تقسیم ایدلشدی. جزیه، اون بشنجی عصرده کی قواعد اوزرینه
مؤسسدی. حتی (شخصی ویرکی) ایله (یکرمیده بر) کبی اون
دردنجی لویی زماننده احداث اولونان ویرکیلرده نهایت غیر
مساوی بر صورتده تقسیم ایدلشدی. امتیاز صاحب لری، سائرلرک
ضررینه اولمق اوزره بونلر دنده کندی لرینی قورتار ایدیوردی.

ویرکی زوربالقه جبات ایدیلردی . مکلفیندن بری ویرکی
ویرمزه اوینه (غارنیزه) قونور بونلر، انک حسابنه یاشار-
لردی . جزیه (تحصیلدارلر) ی معاشلی مامور دکلردی .
کوی اهالیسندن ایدی . کندیلرینه بو ایش مجاناً و زورله
کوردیریلردی . تحصیل ایدمه دکلری پاره لردن بونلر مسئولدی .
بالواسطه ویرکی التزامه ویرلشدی . یالکز محصولانک بر قسمی
حکومت صندوقلرینه داخل اولور ، متباقیسنی التزامی شرکت
آلیقور ، حتی مکلفیندن بورجلی اولدقلری مقداردن فضلہ برشی
قوبارتمق ایچون حکومتک کندیسنه بخش ایتدیکی قوتی سوء
استعمال ایدردی . شرکتله اهالی بیننده ظهور ایدمه جک
دعوالری خصوصی مالیه محکمه لری رؤیت ایلردی . شرکت
اهنده حکم ویرمک بو محکمه لریک منافعی اقتضاساندی .

اردوده اخذ عسکر مامورلری کوکلورلی آنسزین قید
ایدلردی . انضباط ظالمانه ایدی . عسکر الآن صوپا جزاسنه
تابعدی .

عدلیه حالا اون آلتنجی عصرده اولدیفی کبی تشکیل
ایدلشدی . حاکمک پاره ایله آلتیردی . حاکمک صاتین آلان
ویا ارنماً بووظیفه ایله مکلف اولان کیمسه ماموریتنه یرلشمزدن
اول برامتحان کچیرردی . فقط بوامتحانده ، حتی لیاقتسز لکنندن
طولاییده رد ایدلزدی . سه نیور محکمه لری قصبه لرده الان

باقی ایدی. بومحکمہ لر هیچ برخدمت ایتہمکله برابر (۱) محاکمہ اولانلرہ ظلم ایدہ جک درجہ ده الان بر قوتی حائز بولونور لردی. بعضاً بر برینه تابع درت محکمہ بولوندیغی واقع اولوردی. او صورتله که بردعوی بونلرک هر هانکی برنده استیناف ایتدیر یله. بیلیردی. دعواالرسنه لرجه سورردی. مدعیء عمومیلر، مقاولات بحررلری و دعوی وکیللری بویوزدن کچیندکلری ایچون دعوالری سوروندیرمکه غیرت ایدر لردی. دعوالرک بویله سورونجه مہ به اوغراماسندن حاکم لرک ده استفاده سی اولوردی. بونلر دعوی نه قدر چوق سوررسه مدعیدن او قدر چوق پاره (نہ بیس) آلیر لردی. اکثریا محکمہ مصرفنک منازع فیہ اولان اشیا قیمتی تجاوز ایلدیکی واقع اولوردی. محاکم جزائیہ اسکی اصولده محاکمہ ایدر دی. متهم آرتق حاکم نه قدر ارزو ایدر سه او قدر مدت حبسده براقیلیر، اذیت کورر، کندیسینی بروکیله مدافعہ ایتدیرہ میهرک صورت خفیہ ده محاکمہ ایدیلیر، هر مظلونی دائماً اتهام ایتکه میال، حاکم لکی صنعت ایدینمش کیمسه لر طرہ فندن محکوم ایدیلیردی. قیزغین دمیرله داغلامق، دیرک، قامچی، داراغاچی و تکرلک جزالری کبی اسکیدن قوللانیلان جزالره الان دوام ایدیلیردی.

(۱) فزانسه ده اداره سابقه دن الآز، بعض شیلر قالمشدر. انقلاب قسماً ارباب حقوق طرفندن پایلمشدی. بونلر اصول عدلیہ یی کاملاً اصلاحه جرأت ایدہ مہ مشلردی. فقط ارباب حقوقک مقداری آزماش دعواالرده دها قیصه و محاکم مجانی اولمشدر.

ایشته (اداره سابقه) نامی آئنده طو پلانان عادتو بونلردی .
 (۱) اون سکزنجی عصرده بو عادتو یالکزانلردن جفا کوره نلر
 دکل ، زادکان ، رهسان و زنکین بورژووالر کبی بونلردن
 استفاده ایدنلرده سو استعمالات نظریله باقارلردی .

انقلاب

انقلابك باشم نفعی . — اداره سابقهك خصم لری
 اصلاحاتی حكومت كندی كندینه یبار دییه امید ایتشلردی .
 فقط تورغو امتیاز صاحبی اولانلر ك اولیله بلامقاومت امتیاز لری
 ترك ایتیه جكلرینی انلره اثبات ایتدیکی ایچون بونلر سو استعمالاتی
 اورتادن قالدیرمق و قرالنی (جانلاندیرمق) ایچون بر (انقلاب)
 لازمدر دیمکه باشلامشلردی .

اول امرده بو انقلابك نه درلو بر واسطه ایله یاییلاجنی
 معلوم دکلدی . بوکا مانع اولمقده برچوق کیمسه لرك ، از جمله
 اداره مطلقه یی ادامه ایچون قرال و مأمور لرینك ، مساواتسزلنی
 كندی منفعتلرینه اولارق محافظه ایچون امتیاز صاحبلرینك علاقہ سی

(۱) اداره سابقه عادتندن یالکز بر قاج دانه سی دره بلك زمانندن
 قاله ایدی . قسم اعظمی اون آلتنجی عصر دن بری ، اداره مطلقه زماننده
 تأسس ایتشدی . فقط اون سکزنجی عصر ك منورالافکار انسانلری
 قرون وسطادن نفرت ایتدکری ایچون کندیلرینی متأثر ایدن هر نه وارسه
 بونلری هپ قرون وسطایه اسناد ایتشلردی . از جمله هر نه اولورسه
 اولسون بوتون سوء استعمالاتی هب «دره بلك نتیجه سی» عاید لرلردی .

واردی. ذاتاً بوتون قوتلر، حتی غیر ممنونلره سوز سویلمتمه مک قوتی ده حکومت ایله امتیازلی کیمسه لرك أئنده ایدی. انکلیزلردن آرتور یونگ نامنده بری ۱۷۸۷ ده فرانسه یی طولاشدینی صروده فرانسه ده فلمنکده کندن دها آز امور مملکتدن بحث ایدلیدیکنی ایشتمشدی. ایکی سنه سوکرده انقلاب وقوعه کلشدی. فقط بو حرکت پک سرعتلی اولمشدی. بونک ده سببی حکومت ایله امتیاز صاحب لرینک غیر ممنونلره قارشی طور مق ایچون برزینه یاردم ایده جک پرده یکدیگریله چارپیشه رق متقابلا دوچار ضعف اولماریدی.

بو مبارزه بر مالیه مسئله سندن ظهور ایشمیشدی. یارم عصر دن بری حکومت، وارداتندن ده اچوق مصرف ایدیوردی. آجیق، براعتیاد صر سه نه کچمشدی. بقایا دائما ترا کم ایدیوردی. یارم میلیاره یاقین بر پاره یه او طوران آمریقا حربی بودجه ده کی موازنه یی ده بوزمشدی. نهایت استقر اضار له بوندن قور تولوندی. نه قکدر بش سنه ایچنده. (۴۰ میلیونلق آوانس ایله ۴۵ میلیونلق انتقال داخل اولمادینی حالده) ۴۵۰ میلیونلق بر استقر اض عقد ایتدی. خلفی قالون ده ۶۵۰ میلیون استقر اض یاپدی. بو استقر اضک فائضی ۱۷۸۳ ده آجینی ۸۰ میلیونه، ۱۷۸۷ ده اک آشاعی ۱۱۲ میلیونه چیقاردی. بو اداره انجق نه قکدر کچی پاره تحصیل ایتمک چاره لرینی بیلن بر بانکرک اداره سی آئنده دوام ایده بیلردی.

نه فکر ۱۷۸۱ حساباتی نشر ایدرک سرمایه دارلره اعتماد بخش ایده بیلمشدی . بوحسابات ، مصارفدن فضله واردات حاصل اولدیغنی کوستریوردی (۱) . فقط بر زمان اولدی که باره صاحبی اولان کیمسه لرده افلاسدن قورقارق باره اقراضندن اجتناب ایتدیلر . بناء علیه لزومی اولان منابعی الده ایتک ایچون تورغونک اصولنه رجعت ایتک لازمدی . اوده ، فضله معاشرله مأموریتلری قالدیروب مصارفی آزالتمق ، فقیرلر و زنکینلر ایچون مساوی بر ویرکی تاسیس ایدرک وارداتی چوغالتمقدی . اینشته قالون بونی تکلیف ایتدی . اصلاحاتک لزومی تشریح ایتک ایچون بر مجلسه احتیاج کوردی . حکومت طرفندن منتخب واعیاندن مرکب بر مجلس عقد ایتدی . قالون ، بومجلس کندی پروژه سنی تصویب ایده جک ظن ایدیوردی . بوکا اهالی ده اعتماد ایدیور ، هرکس (اعیان) ایله استهزا ایلپور ، حتی « دانه سی درت اونلغه اعیان » صاتیلوردی (بونلر باشی ایله اوت ؛ یاپان متحرک قوقله لردی) . فقط بو ایشده حکومت ایله امتیاز صاحب لرینک منافی یکدیگرینه ضد بولونیوردی . - حکومت ویرکی حاصلاتی چوغالتیق ایچون مالی امتیازلری قالدیرمغه لزوم کورمشدی . امتیاز لیلر ایه ویرکی ویرمه مکده دوام

(۱) بوفضله ده فرضی برشیدی . چونکه بوحسابات اهالی بی قاندرمق ایچون بر چاره ، ده ا طوغروسی شمیدیکی تمبیریمز وجه ایله بر ره قلامدی . میرابو ، بونی ده او زمانلر آکلاتمشدی .

ایدیوردی. چونکه بوحال کندیله رینه هم مناسبتسز، هم ده مغل
 حیثیت کورونیوردی. — حکومت، مطلق و قوتورلسز بر صورتده
 حاکمیتی محافظه ایدیور، اتخاذ ابتدیی تدابیری یالکز تصویب
 ای تدریمک ایچون امتیاز لیلرله مشاوره ایلیوردی. امتیاز لیلر ایسه
 حکومتک افغانی قوتورول ایتمک، سیاستنی مناقشه ایلمک و کند
 یلرینک اشتراکنی حکومتده قبول ای تدریمک ایچون حکومتک
 بولوندیغی مشکلاتدن استفاده یه غیرت ایدیور لر دی. — حکومت
 (هیچ اولمازسه ویرکی خصوصنده) مساواتی تاسیس ایدرک
 صلاحیت مطلقه سنی محافظه ایلمک ایستیوردی. امتیاز لیلر
 حریت سیاسیله ایله مساواتسزلغک ابقاسنی طلب ایدیوردی.
 ایشته بوصولته اداره سابقه یی قور تارمق خصوصنده علاقه دار
 اولان ایکی قوت، اداره سابقه یی مدافعه ایچون برلشه جکلری
 یرده هر ایکسی ده بو اداره نک بر قسمنی محو ایتمک ایچون
 یکدیگر یله مبارزه ایدیوردی.

حکومت بر برینی متعاقب اوج مقاومتده معروض قالدی :
 اولاً : قانون طرفندن طوبلانان اعیان، قانونک پروژه سنی
 تصویب ایتمدیلر. قانون عزل ایدیلرک یرینه بر پیه مونلی، لومه نی
 کجدی. لومه نی یکی برویرکی تاسیس ویکی استقر اضلر عقد ایتمک
 ایستدی. فقط پاره اقراض ایدنلره اعتماد ویرمک ایچون استقر اض امر
 نامه سنی پارس پارلمنتوسنه قید ای تدریمک ایجاب ایستدی.
 ثانیاً : پارس پارلمنتوسی کندیسنه ویرکی واستقر اضک

قطعیاً الزام اولدینی اثبات ایدلمدکجه بواصراً نامہ بی قید ایتمکدن امتناع ایتدی . (پارلمنتونک صلاحیتی قرالہ قارشى شکایاتده بولونمقدن عبارت اولوب امرنامہ لرینی مناقشه ایتمکک حقی اولدینی ایچون پارلمنتو شوصورتله صلاحیتی خارجنده حرکت ایدیوردی) .

دهاصوکره یارس خلقی طرفندن حمایه اولوندیغنی حس ایدرک « مجالس عمومیہ ایله تمثیل اولونان ملندن باشقه هیچ کیمسه نیک قرالہ ویرکی ویرہک صلاحیتی حائز اولمادیغنی » بیان ایتدی .

« قرالغندہ مجالس عمومیہ طوبیلاماسنی » قرالدن رجایلدی . (انکلتزہ دن اقتباس اولونان بونظریہ ایکی عصر دن بری فرانسه ده تطبیق ایدلمہ مشدی) . حکومت نہ درلو حرکت ایدم جکئی بیله مدی .

حقی مجالس عمومیہ عقد ایتدیرم جکئی وعدہ و بعض اصلاحات ده اجرا ایدرک غیر ممنونلری تسکینه چالیشدی . کذا پروتستانلره حقوق مدنیہ بخش ایدرک والیلره یاردم ایتمک وانلری ترصد آلتندہ بولوندرمق ایچون ایالت مجلسلری احداث ایتدی) . پارلمنتوی (طرووا) یه یوللایارق ، مجلسده قرالہ مخصوص بر تخت بولوندیرارق و مجلسک امرنامہ لری قید ایتمک حقی رفع ایدرک مجلسی واز کچیرمکک چالیشدی .

ثالثاً : ایالت مجلسلری ایله ایالت اجتماعلری پارلمنتولر جهتی التزام ایدرک ناظر لریک استبدادینہ قارشى پروتستو ایتدیلر . حتی (برہ - تانیا) ، (یرووانس) و (دوفینہ) ده باطیردی بیله وقوعه کلدی . بواستیا زلرینی ابقا ایتدیرمک ایچون قارشى طوران زادکان ایدی .

(فقط دوفینه ده زادگان بورژوازله برلشهرک اون یدنجه عصرده لغوایدیلن مجلسلرک اسکی طرزینی قبول ایتدیلر . (ویزیل) مجلسلری دوفینه دن ماعدا بوتون فرانسه ایچون حریت سیاسییه طلب ایدیلر . انک ایچون بونلرک حرکاتی انقلابک ایلک حرکتی اولوق اوزره تلقی ایدیله بیلردی .)

بو مقاومتلر اداره سابقه یی تمامیه صارصمشدی . بوتون اجتماعلرده هپ نظاماتدن بحث ایدیلوردی . کتاب سانسورلکی یاواش یاواش ایش کورمه مکک باشلادی . ۱۷۸۷ و ۱۷۸۸ ده اداره مطلقه ایله امتیازات علمنده بیکلرجه رساله لر نشر اولوندی . کذا کیتدجه حائز اقدار بر افکار عمومیه وجوده کلدی . یونع ، ۱۷۸۸ ده فرانسه یه عودت ایتدیکی زمان بوتون مملکتی هیجان ایچنده کورمش ، هرکسک بر انقلاب فرداسنده یزیدیکنی ایشتمشدی . فقط انقلاب فکری و انقلاب کلهسی ۱۷۸۹ دنده مؤخر ایدی . حکومت ، اکمبرم احتیاجی ایچون بیله یاره بولامادی . صندوقده یارم میلیون ده قالمدی . حکومت ، ۱۷۹۲ ده مجالس عمومیه طوبلا یا جفتی وعدا ایشمدی . فقط مجالس عمومیه یی ۵ مایس ۱۷۸۹ ده دعوت ایتدی ، بوائنده تأدیه دینی ده تأخیر ایلدی .

مجالس عمومیه . — حکومت یاره تدارک ایتک ایچون ملنک اشتراکنه و ملت مرخصلرینی طوبلامغه راضی اولیوردی . فقط بونک ایچون ایکی مهم مسئله نک حلای ایجاب ایدیلوردی :
اولا : دعوت ایدیله جک مبعوثلر عجبا هیئت اجتماعیه

(صنفلر) نی می ، یوقسه ملتك هیئت عمومی سنی می تمثیل ایده جکلردی؟ مجالس عمومی اسکیدن بری اولدینی کبی (رهبان ، زادکان و بورزووا کبی) اوچ صنف اهالی بی می تمثیل ایده جک و هر صنف آری آری مذاکره ایدوبده می قرار ویره جکلدی؟ شو حالده بو مجالس دن امتیازلی اولان ایکی مجلس (یعنی رهبان وزادکان مجلسلری) اهالی مجلسنه قارشی اکثریتی قازانا جکلدی . یوقسه اهالی صنفنه اهمیتیه متناسب بر قوت بخش ایتک ایچون بیکی بر اصولی قبول ایدیله جکلدی؟ اهالی صنفی طرفدارلری کندیلیری یالککز باشلرینه ملتك یوزده طقسان طقوزینی تشکیل ایتدکلرینی ، بناء علیه کندیلرینه ده هیچ اولمازسه دیگر ایکی صنفه ویریلن صلاحیت قدر بز صلاحیت ویرمک ده اعا دالانه اولاجنی سویلیورلردی . بو اصول قبول اولوندینی تقدیرده دیگر ایکی صنفک نه قدر مبعوثی وارسه اهالی صنفنک ده او قدر مبعوثی اوابق (بوکا اهالی صنفنک تضعیفی نامی ویریلیوردی) و هر اوچ صنفه ، نسوب مبعوثلرک امتیاز لیلرک حائز اولدکلری رأی ایله توازن ایده جک درجه ده رأیه صاحب اولاجق وجه ایله رأی ویرمک ایجاب ایدیوردی . (بو ، رأسا رأی ویرمکلدی) .

ثانیاً : مجالس عمومی نه کبی موضوعلری مذاکره ایده جکلدی؟ یالککز مالیه مسائلنی می؟ یوقسه بوتون امور اداره می؟ یالککز ویرکی بی اصلاح ایله می اکتفا ایده جکلردی؟ یوقسه بوتون نظاماتی باشدن آشانی می اصلاح ایله جکلردی؟

بو ایکی مسئله یکدیگرینه مربوطدی . امتیازلی صنفلر ویرکینک اصلاحنی ارزو ایدیورلر ، فقط کندیلرینک سائر امتیازلرینده محافظه ایتمک ایستیورلردی . مجلسده شاید صنف صنف رأی ویریله جک اولورسه اکثریتی بونلر قازاناچقلر ، امور مالیه اصلاحاتی تحدید ایله جکلردی . تیه رس آنا (اهالی صنفی) اصلاحات عمومیه طلب ایدیوردی . راساً رأی ویریله جک اولورسه اداره بی اهالی صنفی آله آلاجق وبر انقلاب میدانه چیقاراجقدی .

ایشته بونک اوزرینه امتیازلیلرله اهالی صنفی اره سنده بر مناقشه میدان آلدی (۱۷۸۸) . اداره مطلقه یه قارشی مجادله ایدن پارلمنتولر ایله اعیان ، مساواتسزلی ابقا ایچون مجادله یه باشلادیلر . بونلر مجلسلرک اسکی طرزده طوبالانلرینی (یعنی صنف صنف رأی ویرملرینی) طلب ایتدیلر . بونک اوزرینه اهالی عنندنه نفوذلرینی غائب ایلدیلر .

مجلسلرک نه طرزده مذاکره ایده جکلرینه قرار ویرمک حکومتک وظیفه سی ایدی . ایلك ایکی صنفی التزام ایدرهک اصلاحاتی تحدید ایتمک و یاخود اهالی صنفی طوتارق بر انقلاب وجوده کتیرمک ده حکومتک آئنده ایدی . امتیازلیلرله ملنک اقسام متباقیه سی اره سنده حکم وظیفه سی ده حکومته قالمشدی . فقط حکومت ، بردرلوبرشینه قرار ویرمدی . اهالینک نه یولده مبعوث کوندره جکلرینی تعیینه لزوم کورولدیکی زمان نه قککر هر ایکی

فرق ازمسندہ بیطرف قلمغہ چالیشدی . راسا رای ویرمک مسئله سنی قرار لاشدیرمیهرق اهالی صنفنک ایکی رای صاحبی اولمالرینه مساعده ایتدی . کذا مجلسک نه کبی حقوقی حائز اولاجغنیده تمامیلہ کسدیروب آتامادی .

اوج صنفک هر بری هر ولایتده آیری آیری مبعوئلر انتخاب ایتدی . زادکان ایله رهبان ، مبعوئلرینی طوغرودن طوغروهه انتخاب ایدیورلردی (۱) . اهالی صنفی ایسه انتخاباتی ایکی درجه یاییوردی . اولاهر محله اهالیسی مبعوئلر انتخاب ایدیور ، بونلر سوکره ولایتک مرکز اداره سنه کیدرک ولایتدن چیقاجق مبعوئلری انتخاب ایلوردی . هر ایکی جمعیت ، اسکی بر عاده تبعاً ، اصلاحات حقننده طلب وشکایتی حاوی بر (دفتر) تنظیم ایتملرودی . قرالفک اداره عمومیه سی حقننده کی مطالبه لری همان بر برینک عینی ایدی (او درجده که ولایت جمعیتلری بر چوق دفتر نمونه لری آلمشر ، بر قسمی کندیلری تولدیرمشرودی) . هر اوج صنفد، مجالس عمومیه یی ملتی تمثیله مأمور بر مجلس کبی تلقی ایتمکده اتفاق ایدیور ، هپسیده مالیه نک اصلاحی ایله ملنک حقوقنی تأمین وحکومتک صلاحیتنی تحدید ایچون بر (قانون اساسی) طلب ایلوردی . اهالی ، بوندن فضلہ اولارق ، امتیازلرک لغوینی واوج صنفک بر صنف حالنده مزج ایدیلوب رأساً رای ویرلمسنی ارزوایدیوردی .

(۱) پستقوسلر ایله بعض سه نیورلر حقوق اعضاسندن ایدیلر .

حکومت بوجلسك جريان وصلاحيتنى تنظيم ايچون هيچ بر تدبير اتخاذا اتمدى . ۵ مایس ۱۷۸۹ ده ، نه هانكى ماده حقنده ، نه ده هانكى صورتله مذاکره ايده جکلرني تعيين ایتدن (وهرسای) ده مجلسرى طوبلادی .

مجلسى ملی . — هرايكي فرقه ارسنده شكله متعلق بر مسئله دن طولايى مبارزه باشلادی . حکومت ، اسکیدن عادت اولدينى اوزره ، هراوچ صنفى آیری آیری اجتماع ایتدردی . اهالی صنفى بو آیريلغه مساعده ایتک ارزو ایتدوردی . چونکه صنفلر بر کره آیری آیری تشکل ایتدی ، مجلس ده صنف صنف رأى ویره جکدی . بونک ايچون اهالی صنفى رأى مسئله سى حل ایدلدکجه مذاکره کیره شمکدن امتناع ایتدی . رهبان ایله زادکان ده اهالی مبعوثلریله برلشمکه راضی اولمادی : حکومت کتدکجه بونلری التزام ایدیورکچی کوروندی . بو عطالت دورى تمام آلتی هفته دوام ایتدی . نهایت اهالی فرقه سى اساس اعتباریله ايکی شینه قرار ویره رک بوکاده نهایت ویردی :

اهالی فرقه سى ملتى تمثيل ایلدیکی ايچون ، ۱۷ حزرانده ، سائر صنفلره منسوب مبعوثلر اولماسده اولور دیدی . کندی مجلسنه (مجلس ملی ، آسامبله ناسیونال) نامنى ویردی . بو ، عادتافرانسز ملتى نامنه مذاکره ایتک حقی یالکزم ملت مبعوثلرینه عائد دیمکدی . مجلس ملی دیگر ايکی صنف مبعوثلری مساوی بر حق رأى ایله (مجلس ملی) یه دعوت ایدیوردی .

۲۰. حزیرانده حکومت اھالی مجلسنك طوبلانديني سالونى قاپاندينى زمان مرخصلر (ژودوپوم) . كيدرك « قرالئنگ قانون اساسىيى تأسيس ايدوبده بوقانون غايت متين اساسلراوزرنده قوت بولمادجھ آيرلامغه » يمين ايتديلر . بو ، عادتا مجلسك قرال طرفندن طاغيديلاميه جفنى بيان ايلكدى . شو حالده اھالى مجلسى حاكم ومستقل بر قوت حالنه كليوردى .

اوزمان حكومت بر مذاكره پروغرامى اورتابه قويمغه قرار وىردى . بو قرار ، ۲۳ حزيرانده قرالده حاضر بولوندينى حالده وقوع بولان اجتماعده اتخاذايدلدى . قرال ويركينك اصلاحنى وامتيازلرك محافظه سنى تكليف ايدىوردى . «قرالك ارزوسى ، حكومتده اسكيدن برى موجود اوچ صنفى قرالئنگ قانون اساسيسنه صورت قطعده مربوط اولق اوزره هيئت عموميه سيله محافظه ايلكدر » دىيوردى . اھالى صنفى بو پروغرامى غيركافى عد ايتدى . بياننامه اوقوندقدن صوكره سالوندى چيقيمه جفنى بيان ايدرك قراله قارشى عصيان ايلدى .

اوزمان ايكنى قوت ، يعنى امتيازليلرى التزامه قرار وىرن حكومت ايله مجلس ملي اره سنده بر مبارزه وقوعه كلدى . حكومتك ائندهكى واسطه لر عنعنات ايله قوه ماديه ايدى . فقط تشكىلاتى بوزولمش ، افكار عموميه يي عليه نه چويرمشدى . بوتون پارس مجلس ملي يي التزام ايدىيوردى . امتيازليلرك اتحادلرى ايسه يولنده دكلدى . راهبرله اوافق زادكان اھالى طرفنى

التزام ايدرك انلرله برابر طويلانمشلردى . حتى قرالده واز كچمش ، امتيازلى صنفلردن باقى قالانلركده مجلس ملي به كللرني امر ايلمشدى .

باشليك ضبطى . — قوت الان حكومتك ائنده ايدى . حكومت مجلسى طاغيتمق ايجون اردويى استعمال ايدى بيليردى . قرال طرفدارلرى اون آلتنجى لوتى به هب بونى توصيه ايدى بولر ، انقلاب طرفدارلرى ايسه بو توصيه به رعايت اولوناچغندن قورقورلردى . فى الحقيقه حكومت (وه رساى) ه عسكر كيتيرتمش ، يارسده قاريشيقلق چوق اولدينى ايجوندها صوكره بو عسكرى يارسه صوقق ايستمشدى .

۱۷۸۸ محصولاتى غايت فنا ايدى . پارس ، جواردن كله آج فقيرلر ، و اشقيا چته لريله طولمشدى . (سنت آنطوان) و (سن - مارصو) واروشلرنده كى عمله لر حكومت عليه نه قالقمشلردى . پارس خلقي قوه جبريه استعمالندن قورقدقلى ايجون قرال عسكرلرينك كيرمه سنه مانع اولديلر . صوكره كنديلرني مدافعه ايجون ترتيباتده بولونديلر . قرالك يارسده (سنت آنطوان) واروشى مدخلنده بر قلعه سى ، (باستيل) واردى . بوراسى حكومت حبسخانه سى مقامنده قوللانيليردى . قاپالى مکتوبلرله توقيف اولونانلر هب بورايه طيقيليردى . بر چوق محررلر بورايه حبس ايدلشلردى . اون آلتنجى لوتى دورينك اوزماننده (باستيل) ده پك آز محبوس واردى . قوه محافظه سى ده

آنوالیدلر (عملمانده عسکرلر) له بر قاج سو ویسدن عبارتدی. فقط باستیلک کورمش اولدینی وظیفه، بورایی عادتاً قوه کیفیه و مستبدنهک بر تمثالی کبی منفور کوسترمشدی.

پارسلیلر سلا حلا نیر سلا حلا نماز طوغرو (باستیل) ه قوشدیلر. بوتون پارس اردوسی ایکی آلایدن ترکیب ایدیوردی. بونلردن بری، (غارد فرانسهز) اوتهدن بری پارسلیلر ایچنده بولوندینی ایچون بونلره قارشى محاربه ایده جک یرده اوده اهالی به قاریشدی. ایشته بو صورتله پارس خلقی قرالک استحکامنی محاصره آلتنه آلابیلدی. تعرضی اداره ایدنده قرالک غارد فرانسهز آلاینه منسوب بر کو چوک ضابطدی.

باستیل قوماندانی تسلیم اولدی. باستیل ضبط ایدیلیر ایدلمز بیقلدی. یرنده بوتون اهالی دانس ایتمک باشلادی.

باستیلک ضبطی حد ذاتنده هیچ بر اهمیتی حائر دکلدی. فقط انقلاب طرفدارلری بونی بویوک بر مظفریت کبی آلتیشلا- دیلر. چونکه بو مظفریت پارس خلقنک حکومت قرالی پی جبراً مغلوب ایتدیکنی کوستریوردی. فی الحقیقه بو مغلوبیتی قرالده حس ایتدی. ۱۴ تموزده مجلسله برابر (وه رسای) ده بولو- نیوردی. ایرتسی کون بالذات مجلسه کلرک: «تبعه مک صداقتنه اعتماد اولدینی ایچون قطعاتک پارسدن و وه رسایدن اوزا قلا- شمارینی امر ایتدم. بو تدابیری پایتخته خبر ویرمکزه مساعده ایدیور، وحتی سزه بونی تکلیفده ایدیورم.» دیدی. صوکره

چکلوب کتدی. مجلس طاعیلدی. اعضا، اهلینک آقیش صداری آره سنده قرالی شاتویه قدر تعقیب ایتدی. موزیقه ده: «انسان عائله قوجاغندن دها ای نزهده مسعود اولور؟» هواسنی چالغه باشلادی.

قرال پارسه و مجلسه قارشی اردوسنی استعمالدن واز کچمشدی. عین زمانده پارسلیرده سلاحلارنوب مجلس طرفدار- لردن لافایه تک قومانداسی آلتنده بر (غاردانسیونال) تشکیل ایتدیلر. آرتق قوت قرالدن مجلسه انتقال ایلشدی.

مجلس، پارسلیلرک هایه سیله، یکانه بر حکمدار حقیقی حالنه کلمشدی. بونک ایچون باستیلک ضبطی رسماً انقلابک باشلانج تاریخخی عد ایدیلهرک حریتک ایلک سنه سی ۱۴ تموز ۱۷۸۹ تاریخندن اعتباراً بدأ ایتدیرلدی.

۴ آغستوس کی می سی. — باستیلک ضبظدن صوکره حکومت قرالی تشکیلاتی بوتون فرانسه ده بوزولدی. آرتق انضباطی ادامه ایچون هیچ ضابطه قالمامشدی. بوتون مملکتی چته لر طولاشوب صویوردی. شهرلیر کندیلرینی مدافعه ایچون غاردانسیونالر تشکیل ایتشلردی. کویلرده، بالخاصه شرق طرفلرده، کویلولر مجلس ملینک حریت اعلان ایلدیکنی طویار طویماز بو حریتی کندی آکلایشرینه کوره تاسیسه باشلامشلردی. کویلولره اکز یاده آغمرکن تکالیف، سه نیورلره ویریلن ویرکیلره (دره بکلک حقوقی تعیر اولونان) آغساریه-

لردی . بو سببدن کویلولر شاتولره هجوم ایتدیلر ، (ویرکی دقتلری) ایله سجلاقی ضبط ایدرک آتسه یاقدیلر . بر چوق یرلرده شاتولری یغما ایدرک سه نیوری تهیدید ویا تحقیر ایتدیلر .

مجلس ملی بوقاریشیققلری خبر آلیر آلامز قرالغک محافظه امنیتی ایچون بر قومته تشکیل ایتدی . بوقومته بی بر قانون لایحه سی قلمه آلفه مامور ایلدی . بولایحه ، ۴ آغستوس بعدالظهر ساعت ۸ ده باشلایان بر اجتماعده مناقشه ایدلدی . یاییلاجق شی « ایالتلرک هیجانی تسکین ، حریت سیاسی بی تأمین واملاک صاحبیرینک حقوق اصلیه لری تی تأیید » ایتکدن عبارتدی . سه نیورلردن بعضلری ده دزه بککک حقوقنک بلدیله لر طرفندن (اشترا) و آنفاریه لرله شخصی خدمتکارلقلرک بلا تاضمینات لغوا لولوناجنی ده بیان ایدلسنی تکلیف ایلدیلر . حتی بره تانیالی بر مبعوث اهالینک دره بککک عنوانی محو ایچون شاتولری یاقدیغنی و بناء علیه « جهل وظلمت دورنده اکتساب اولونان بو حقوقک عادلانه اولمادیغنی » آرتق تصدیق ایتک لازم کله جکنی در میان ایتدی . بونطق بوتون مجلسی هیجانه کتیردی . امتیازلی صنفلره منسوب اعضادن بر چوغنی بر برینی متعاقب اور تابه چیقه رق هپسی ده کندی امتیازلردن واز کچدکلرینی بیان ایلدیلر .

مجلس بو تکلیقلری کمال صمیمیتله قبول ایتدی . ذاتاً اهالی ایله ولایتلریننده موجود بوتون مساواتسزقلری برر بر لغوه

قرار ویرمندی . ایشته بوصورتله ماموریته متعلق امتیازلر ، سه نیور محکمه لری ، آو وکوکر جینک حقوقی ، حجزلر ، عشرلر ، مجالسه مالک مملکتلرله شهرلرک وقصبه لرک امتیازاتی ، مأموریت فروختی و اصناف جمعیتلری هپ لغو ایدلدی .

«بوتون صنفلرک اتحاد صمیانه سی ، بوتون امتیازاتک ترکی ، بوتون افرادک سعادت و سلامت عمومیه نامنه ابراز ایلدکلری صمیمی فدا کارلقلرک خاطر سنی تأیید ایچون» برمدالیه ضرب ایدلدی . صنفلری یکدیگر ندن آیران بوتون نظامات (۱.۴ آغستوس کیجه سی) برضربه ده محو ایدلدی . اوکیجه ، مساوات قاعده اساسیه سی اوزرینه مستند یکی برهینت اجتماعیه تأسیس اولوندی . ینه اوکیجه ، اتخاذ اولونان قواعد اساسیه مقرراتی بر امرنامه صورتنده قلمه آندی . امرنامه شویله باشلیوردی : «مجلس ملی ، دره بکلک اداره سنی کلیاً محو ایلشدره .

اداره سابقه نکل ضتامی . — اداره سابقه نکل طبایع ممیزه سنی اوچ مهم نقطه تشکیل ایدیوردی :

اولا : قرالک تام وقونترولسز بر صلاحیتی واردی . قرال حکمدار مطلقدی ؛

ثانیاً : قرالغک اهالیسی غیر مساوی حقوقه مالک اوچ اصنفه تقسیم ایدلشدی ؛

ثالثاً : اداره حکومت اسکیدن قاله ، قاریشیق ، مغلق و وحشیانه اصوللرله دوام ایدیوردی . مجلس ، قرالک صلاحیتی

الذدن آلاق و امتیازاتك لغوینه قرار ویره رك قرالك حاكیت مطلقه سی ایله اهالی بیننده کی مساواتمنزلگی محو ایتدی . دهـا صوكره ادارهٔ حكومتی ساده و یككنسق بر بلان اوزرینه تاسیسه تشبث ایلدی .

مجلس، قرالنی (احیا) ایتمکی درعهده ایلشدی . بونك ایچون اسکی فرانسه یی محو ایدرك ایشه باشلادی . تاسیساته باشلامازدن اول زمینی سیلوب سوپورمك، و نظامات قدیمه یی اصلاح ایتمكدنسه بسبتون قالدیرمق ایستیوردی . حكومت دقتلرنده مضبوط اولوب سوء استعمالات عد اولونان نه قدر عادتلر وارسه جمله سی لغو ایلدی . یكی قانون اساسینك باش طرفنده شو قطعی بیانات موجوددی :

«مجلس ملی، فرانسز قانون اساسیسنی كندی تصدیق ایلدیكی قواعد اساسیه اوزرینه تاسیس ایتمك ارزو ایلدیكی جهتله حریت و مساوات حقوقه مغایر نظاماتی صورت قطعیه ده لغو ایتمشدر . «بوندن بویله نه اصالت، نه بلكك، نه ارثی تمایز، نه صنف فرقی، نه دره بلكك اداره سی، نه سه نیور محكمه لری، نه ده بوندن ظهور ایدن عنوانلر، لقبلر، امتیازلر، نه شوالیه صنفی.... نه ده وظیفه لرینی ایفا ایدن رسمی مأمورلردن غیرینك فائقیقی، کلیاً موجود دكلدر .

بوندن بویله عمومی مأموریتلر ایچون نه پاره ایله آلمق،

نه ده وراثت یوقدر .

«بوندن بویله ملتک هیج بر فرقه‌سی و هیج بر شخص
ایچون هیج بر امتیاز، بوتون فرانسزله شمولی اولان حقوق
مشترکه دن هیج بر استثنا موجود دکدر .

«بوندن بویله نه اصناف کتخدالتی ، نه ده اصناف ، صنایع
و ایش جمعیتلری یوقدر .

«حقوق طبیعییه ویا قانون اساسییه مغایر دینی نذرلر ویا
تعهدات قانوناً مقبول دکدر» .

۱۷۹۰ دن اعتباراً قرال مجلسی ، شورای دولت ، والیر ،
پارلمنتولر ، محکمه‌لر ، ویرکی التزاملری ، حاصلی بوتون نظامات
قدیمه معطل قالمش ، رهبرته هاند مالکانه‌لر (اموال ملت) دن
معدود اولمشدی . آرتق ادارهٔ سابقه دن هیج بر اثر قالماشدی .

بشنجی فصل

انقلابك آثاری

مفروضہ بشر بیاننامہ سی . - قونستی تو آنت ، « اکتساب حیات ایدن » فرانسه یی تنسیق ایچون قوانین تنظیم ایتمزدن اول ، لافایه نك طلبی اوزرینه ، یکی هیئت اجتماعی بی نه کبی دساتیر اوزرینه تاسیس ایتمک ایستیورسه اونلری نشره قرار ویردی . بو دساتیر اوزون اوزادی مناقشاتدن صوکره ۱۷۸۹ سنه سی تشرین اولنده نشر اولونان (حقوق بشر بیاننامہ سی) ایدی . بو بیاننامہ نك باشلیجه ماده لری بروجہ آتی ایدی :

« انسانلر حقوق اعتباریلہ مساوی اولارق طوغارلر .

« حقوق مذکورہ ایسه حریت ، تصرف ، مصونیت ، ظلم واعتسافہ قارشئ مقابله ومقاومتدن عبارتدر . حریت ، باشقه سنه ضرری اولیان هر شئی یا بایلمک صلاحیتدر .

« حاکمیتک اصل واساسی ملته در .

« قانون ، مرام عمومینک افاده سندن عبارتدر . بوتون اهل وطن ، یا بالذات ویار وکیل مرخص واسطه سیله مرام مذکورک حصولنه اشتراک ایتمک حقنی حائزدر . قانون هرکس ایچون سیان اولوق لازمدر .

« بوتون اهل وطن قانون نظرندہ مساوی اولدیفندن هربری مناصب و خدمات عمومیه یه لیاقتہ کوره داخل اولابیلر .

« قانونك تعیین ایندیكى اصول و شرائط خارجنده هیج برکیمسه اتهام ، توقیف و یا حبس ایدیله من .

« هیج برکیمسه اظهار و اعلانی قانوناً مؤسس اولان انتظام و انضباط عمومی نخل اولمادجیه ، حتی دینی اولان افکار و ملاحظاتندن طولایی ، موأخذه اولوناماز . هرکس سویله مک ، یازمق و طبع ایتمک خصوصاً صرندده حررد .

« تکالیف ، افراددن هر برینک استطاعنه کوره مساواتاً توزیع ایدلملیدر .

« حق تصرف مقدس و قطعی برحق اولدیغندن قانوناً تعیین ایدن احتیاجات عمومییه صراحة استملا کفی ایجاب ایتدجیه و اولجه معقول بر تضمینات اعطا اولونمادجیه ، هیج برکیمسه نک مالی آلدن آلهماز . »

انقلابك قاعده اساسیه سی شوایدی : حاکمیت ملئده در .
ملتك بوتون افرادی حقوقیه مساویدر . هرکسك شخصی و اموالی ، حتی حکومته قارشی مصوندر . دستوری ده شوندن عبارتدی : حریت ، مساوات ، اخوت .

بکی هیئت اجتماعیه دساتیری . — آرتق بوتون مساوا .
تسرقلر اورتادن قالمشدی . فرانسزلر آره سنده قانوناً هیج فرق یوقدی . نه ویرکی امتیازی ، نه حق اکبریت ، نه ده بر ملک صاحبك دیگرى اوزرینه حقوقی ، قانوناً معتبر دکلدی . آرتق اصالتده قانوناً طانمبوردی . بوتون مأموریتلر بلاتفریق نسب

هرکسه کشاده ایدی . ماموریتلرک قسم اعظمی بورژووالره ویرلمشدی . فی الحقیقه اون طقوزنجی عصرده فرانسه یی اداره ایدن ذواتک قسم اعظمی زادکاندن اولمادقلمری کبی بورژووالرک یوقاری صنفنه بیله منسوب دکلردی .

کویلولرک برلری ، سه نیورلرک حقوقی ایله جزیه دن قور - تولدینی ایچون بونلرک قیمتلری ده آرتدی . ۸۹ ده ملته ترک اولونان ره بان اراضیسی ایله مهاجرلردن حجازیدیلن مالکانلردن ترکب ایدن اموال میریه کاملاً صاتیلدی . فرانسه اراضیسنگ اوچده بری کوچوک املاک صاحب لرینگ آله کچدی (۱) . - صنایع کاملاً سربست اولدی . هرکس ارزو ایتدیکی شیئی ایسته دیکی کبی اعمال ایده بیله جکدی . - تجارت سربستدی . آرتق صاتیش ایچون نه مانعات ، نه انحصار ، برشی قالمشدی . - ویرکی اهالی به ثروتلری نسبتنده توزیع ایدلدی . قونستی توانت ، اصحابی قطعاً تفریق اولونماق سزین بوتون اراضی و مساکنه وضع ایدلمک اوزره جزیه رینه (املاک ویرکیسی) ، قایتاسیون رینه ده (شخصی ویرکی) ایله (املاک منقوله ویرکیسی) وضع ایتدی . مشروباتدن آلنان بالواسطه رسملری (اغانه لری) لغو ایتدی . ناپولئون بو رسملری تکرار (رسوم موحده) نامیله تأسیس ایتدی . فقط حکومت آرتق بو ویرکیلری ملتزم لره

(۱) فرانسه ده بوکون ده همان ۱۷۸۹ دن اولکی قدر املاک جسیمه وار کبدر . چونکه ۱۸۰۰ دن سوکوره بوکی املاک یکیدن تأسیس ایدلمشدر .

ویرمیور ، مأمورلری واسطه سیله جبات ایتدیر بیوردی . -
 بودجه هر سنه واردات ایله مصارفات توازن ایدمك وجه ایله
 اوکجه دن تنظیم ایدلدی . منتظم بر (حواله) ویرلمدکجه خزینه دن
 برپاره تادیه ایدلمیه جکدی . - حکومتک داینلرینه ، پاره لرینک
 منتظم آفائضلرینی آلاچق لرینه دائر تامینات ویرلدی . حکومتک
 بوتون بورج لری (دیون عمومیه دفتر کبیری) نه قید ایدلدی .
 (دوراستبداد) بورج لری جمهوریتک عقد ایلدیکی دیونان دن
 تفریق اولونماسین دییه بودفتز ۱۷۹۳ ده احداث اولوندی .

انقلاب ، یالکز ملتك حاکم اولدیغنی اساس وضع ایلشدی .
 فقط ملت کندی کندی اداره ایدمه جکی ایچون ملت حاکمه
 امور حکومتی بر پارلمنتونک مظاهرته مالک بر قراله ، یالکز
 بر مجلسه ویا بر ایمراطوره تودیع ایلدیکنه نظراً ، بو اساسدن
 غایت مختلف اصول اداره لر میدانه چیقدی (فرانسه یه کلن
 حکمدارک الک مطلقیت اداره یی ، حائز اولانلرندن برنجی ناپولئون
 اهالیذن ایمراطورلق عنواتی طلب ایچون ملتیه مراجعت
 ایتدکن صوکره بو عنواتی آلمشدی . بو طرزده حکومت
 انقلاب قواعدینه مغایر دکلدی) .

انقلاب ، صلاحیتلرک تفریقینه تأسیس ایلشدی . عین
 مأمور ویا عین هیئت (قانون تنظیم ایتمک ، حکم ایتمک و امر
 ویرمک کبی) اوچ صلاحیتک یالکز برینی حائز بولوناجقدی .
 انقلاب ، ماکنه کبی منتظم بر اداره ده احداث ایتدی .

خدمات دولتک هر بری برر (نظارت) . آیرلدی . هر درلو
 مخبرات نظارتله وقوع بولور ، امرلری نظارت ویرردی .
 نظارتلرک عددی مختلفدی . چونکه بعض خدمات گاه آیری
 بولونور ، گاه یالکنز بر ناظرک ادارهسی آلتنه طوبلانیر ، فقط
 خدمات هیچ دیکشمزدی . بونظارتلرده : اموراداره ، عدلیه ،
 مالیه ، امور خارجیه ، حربیه ، بحریه ، مذاهب ، معارف ،
 صنایع نفیسه ، نافعہ ، تجارت و زراعت نظارتلری ایدی .
 فرانسهده هر کیم بر ماموریتده بولونورسه مأموریتنک عائد
 بولوندیغی نظارته منسوب اولوردی . - صلاحیتلری ده
 منتظم بر صورتده تقسیم ایچون بوتون خدماته قابل تطبیق
 اولمق اوزره عین سییاقده دوائر اصولی احداث ایدلدی .
 بوتون فرانسه ایالتلره (ده پارتمان) ، ایالتلر متصرفلقلره
 (دیستریق) ، متصرفلقلر قضالره (قانون) ، قضالرده
 ناحیهلره (قومون) تقسیم ایدلدی . هر مأمور بو تقسیمات
 دائره سنده صلاحیتنی اجرا ایده جکدی . هر ایالتک والیسی ،
 دفترداری ، جنایات محکمهسی ؛ هر متصرفلقلر بر متصرف
 وکیلی ، بر تحصیلداری ، برده محکمهسی واردی . - بوتون
 خدمات مرکزی برشکله کتیرلمش وکاملآ عین پروغرامه کوره
 تنظیم ایدلمشدی . مأمورلرک صلاحیت و وظیفه لری بوتون
 فرانسهده بربرینک عینی ایدی . مملکتک بر اوچندن او بر
 اوچنه ایستیلین مأمورلر کوندریله بیلیردی . بونلرک کافه سنه

(تعميم) شككنده عين امر لر كوندر ييلردى. بناء عليه فرانسه نك مختلف مملكتلى اړه سنده اصول اداره جه هيج فرق يوقدى. اك اوافق تفرعات پارسده كى نظارت طرفندن عين طرزده تسويه ايديله بيلردى. قرالار طرفندن تاسيس اولونان (مرکزيت) ايسته شو صورتله تكمل ايتمشدى. هيج بر مملكت بومسلكده فرانسه قدر ايلرى به واراماشدى.

قونستق تو آنت (مجلس مؤسسان) امور اداره يى منتخب (شورا) لره توديع ايلمشدى. هر ناحيه نك بر (بلديه دائره سى)، هر متصرفلغك و ولايتك بر (ديره كتوار) ي و اردى .

عدليه ده اصلاح ايدلمشدى. اسكى اصولدن يالکز بر هيئت طرفندن محاكمه ايدلك اصولى ابقا ايدلمشدى (هر محكمه لا اقل اوچ حاكمدن متشكلدى). فقط حاكمر مأموريتلرينك صاحبي دكلبردى. يالکز مأموردن معدود ايدى. مجلس مؤسسان بونلرى اهالى طرفندن بر قاچ سنه ايجون انتخاب ايتديرردى. - اوافق سه نيور محكمه لر ينك يرينه هر قضاده بر (صلح محكمه سى) احداث ايدلمشدى. بو محكمه نك وظيفه سى طرفينى (تأليف ايتك) وشايد نمكنسه انلرى اقامه دعواندن واز كچيرمكدى. - دعاوى جنائيه يى حكم ايتك صلاحيتى محكمه لردن قالديرلدى. هر ولايته، انكليزلرك حكم اصولى (زورى) نمونه اتخاذا ايديله رك تاسيس اولونان (جنائيت محكمه سى) نه توديع اولوندى. بو محكمه لرده ايالت اهالى سى

میانندن انتخاب اولونان ۱۲ اعضا (ژوره) مظنونک متهم اولوب اولمادیغنه قرار ویرردی . مباحثاتی بر حاکم اداره ایدر ، جزایی ده او تعیین ایلردی . - قرون وسطاده اولدینی کبی علنی وشفاهی اصول محاکمهده تأسیس ایدلدی . مظنونه بر وکیل واسطه سیله حقوقنی مدافعه حق بخش اولوندی . - مجلس مؤسسان ، ولایتلرک کندیلرینه مخصوص عادتلرینی کاملاً لغو ایتدی . بوتون محاکمه دعوالر عین قواعد نظرآ رویت ایدیله جکدی . - محاکم مجانی اولدی . یعنی بوندن مقصد دعوالر پاره سز دیمک دکلدی ، یالکیز (حاکم) مدعیلردن پاره آلمازلردی .

انقلاب ، کلیسا ایله حکومتک مناسباتی ده دیکشیدردی . مجلس مؤسسان (رهبانک تشکیلات ملکیه سی) نی اعلان ایتمش وپسقیوسلقلری لغو ایدرک پسقیوسلرک انتخابله اولمالرینی قاعده اتخاذ ایلشدی . (قونوانسیون) ایسه خرسیتیان کلیساسنی بسبتون قالدیرارق یالکیز (خالق اعظم) . عبادتی تأسیس ایتمک ایسته . مشدی . ده ا صوکرده حریت مذاهب ایله کلیسانک حکومتدن کاملاً آیرلماسی قاعده سنی وضع ایلشدی . چونکه « هرکس قوانینه توفیقاً حرکت ایتمک اوزره ایستدیکی مذهبی انتخاب ایده بیلیر . هیچ بر کیمسه باشقه بر مذهبک مصارفنه زورله اشتراک ایتدیر یله مز . جمهوریت هیچ کیمسه بی بونکله مکلف قیلاماز . »

قانونه اساسیلر . - انقلاب طرفدارلرینک اداره سابقه دن

ك زياده شكایت ایتدكاری شی کیفی حرکتهردی. بونك ایچون فیابعد حکومتہ عائد صلاحیتلرك افراد بیننده کی مناسباتی تنظیم ایدن قانونلركی بر قانون شکلنده یازماسنی ارزو ایتدیلر. ذاتاً مجالس عمومیہ طرفندن ویریلن دفترلده تخریری بر قانون اساسی طلب ایدیلیوردی. بو قانون اساسی یی یازمفی مبعوللر درعهده ایتدیلر. بونك اوزرینه مجلسه (قونستی توانت) نامی ویرلدی.

بو صرمده فرانسهده سیاحت ایدن انکلیز یونغ بر قانون اساسی (وجوده کتیرمك) فکرینی پك کولنج کوریوردی. حتی: «فرانسزلر عادتاً صوجوق بائق ایچون اولدیغی کبی قانون اساسی وجوده کتیرمك ایچونده بر رچته وار ظن ایدیورلر» دییوردی. یونغ انکلترده سیاسی قانون اساسینكده قوانین ملکیه کبی بوتون انکلیزلرك رعایت ایتدکلی عادات قدیمیه مستند اولدیغی کورمهک آیشمشدی. حال بوکه فرانسهده کولکشمش عنعنعات یوقدی. حکومتك حرکات کیفیهسنه انجق قلمه آلهجق بر نظامنامه مانع اولابیلردی.

فرانسه حکومتی ایلک قانون اساسیدن صوکره (۱۷۹۱) شکل حکومتی اکثریا دیکشدرمش، فقط هیچ بر وقت قانون اساسیسز قالمامشدر. دهاصوکره (انکلتره مستثنی اولق اوزره) اقوام متمدنهك کافهسیده برر قانون اساسی یازمق عادتتی قبول ایتشلردر.

۱۷۹۱ قانون اساسی . — مجلس ملی بر (قانون اساسی)
وجوده کتیرمدجبه طاغیلمامغه یمین ایتمشدی . بونک ایچون
تمام ایکی سنه چالیشمش وبو قانونی ۱۷۹۱ ده اعلان ایتمشدر .
قرالده بو قانون اساسی به رعایت ایده جکنه یمین ایلشدر .

۱۷۹۱ قانون اساسیسی انقلابی یابان فرقه وجوده
کتیرمشدی . قانون اساسی بی تنظیم ایدنلر قراللیی قالدیرمق
ایسته میورلر ، یالکز اوزمانه قدر هیئات اجتماعیه ایله حکومت
اوزرینه اجرای حاکمیت ایدن قوتلره اعتماد ایتیمورلردی .
کذا (آریستوقراتلر) یعنی ارثی هیئتلرایله (استبداد) دن یعنی
قرالک نفوذدن قورقیورلر ، بوندن باشقه مونتسکیونک مودا
حکمنه قویدینی (تفریق قوا) نظریه سنی ده قاعده اولارق
قبول ایدیورلردی (۱) .

ایشته بونک اوزرینه « حاکمیتک ملنه عائد اولدینی »
قاعده سی اساس اتخاذا ایدلدی (اسکی طرز حکومتده یکانه
حاکمیت قرالده ایدی . شمدی بو ، اسکی طرز حکومتک اساسی
محو ایلکدی) . فقط « ملت بر وکیل مرخص واسطه سیله

(۱) بو نظریه انکلیز مشروطیتی ناعمام بر صورتده آکلاشیلارق
وجوده کتیرلشدر . مونتسکیو بو نظریه سنده انکلیز ارباب حقوقک
فکریخی تعقیب ایدرک انکلیزده حاکمیتک حقیقه قرال ایله پارلنتو
اره سنده تقسیم اولوندینی وقرالک قوه (اجرائیه) بی ، پارلنتونک ده
قوه (تشریمیه) بی حائزبولوندینی ظن ایتمش ، صوکره بو قوتلره برده
فرانسز پارلنتولرندن آلدینی فکره کوره قوه (عدلیه) بی علاوه ایلشدی .

مرام مذکورك حصوله اشتراك حقیقی حائز دی .
 بناء علیه حاکمیت کاملاً مرخصلر طرفندن اجر ایدیله جگدی .
 یالکز قرالک ، حقوقندن طولایی ملتی تمثیل ایلسی و برده ناظرلری
 انتخاب حقنه مالک اولماسی قبول ایدلمشدی . سائر مأمورلر انتخاب
 ایله اولاجقدی . فقط رأی و یرمک حق بوتون اهالی به تشمیل
 ایدلمه مشدی . منتخب اولوق ایچون اوچ ایش کونده لکنه معادل
 برپاره و یرمک لازمدی . بوصوله اهالی ایکی صنفه آیرلمشدی .
 (اهالی متعديه) یعنی منتخبلر ، (اهالی غیر متعديه) یعنی حق
 انتخابدن محروم اولانلر .

کدامو تسکیونک نظریه سنه کوره اوچ قوت احداث ایدلدی :
 تشریعیه ، اجرائیه ، عدلیه . قوه عدلیه اهالی طرفندن (معین
 مدتله انتخاب اولونان حاکمیره تودیع ایدلدی . قوه اجرائیه ایسه
 « ناظرلرله برابر اجرای صلاحیت ایتک ایچون ذاتاً قراله و یرلمش » ،
 قوه نشریعیه ده منتخب مرخصلردن مرکب (بر مجلسه) تودیع
 اولومشدی .

فقط ایکی مسئله کمال شدتله منافسه ایدلدی . برنجیسی :
 قوه نشریعیه یی انکلترده اولدینی کبی ایکی مجلسه می ، یوقسه بر
 مجلسه می تودیع ایتلی ؟ ایکنجیسی : ناظرلری انکلترده اولدینی
 کبی مجلسدنمی انتخاب ایتلی ، یوقسه مجلس خارچندنمی ؟

برعصردنبری تجربه اثبات ایتدی که تک بر مجلس ، هیجائلی
 برزمانده اوله تداییر اتخاذه معروض قالر که بوتداییری اتخاذه

ایلیکنه بالآخره نادم اولور . ایشته بونک ایچون بوتون حکومات متمدنه نهایت ایکی مجلسله اصول اداره نی قبول ایتمشدر . فقط اون سکرنجی عصر او اخرنده هنوز بونقطه تجربه ایدللمشدی . ایکی باشلی بر قوت وجوده کتیرمک اوزمان پک غریب کورونیوردی . حتی اکز یاده تقدیر اولونان آمریقا رجال حکومتمندن فرانقلهن بو اصول ایله استهزا ایدیور : « ایکی باشلی بریلان وارمش . بو بیلان صوایچمک ایچون کیتمک ایسترمش . فقط ایکی طرفده صو وارمش . باشلردن بری صاغه ، بری ده صوله کیتمک ارزو ایدرمش . نهایت بیلان یرندن قلدایاماش ، و صوسزلقدن تلف اولمشدر » دیوردی . بوندن باشقه ایکی مجلس ارزو ایدنر ، بونی انکلترنک (لوردلر قامارسی) کبی ارنی بر آریستوقرات هیئتیشکلنده ارزو ایدیورلردی .

مجلس مؤسسان ایسه بر آریستوقراسی نی محو ایدوبده یرینه دیگر بر آریستوقراسی چیقارمق ایسته میوردی . ایشته بونک اوزرینه یالکز بر مجلس قبول ایئدی .

بوندن باشقه تجربه ایله آکلاشیلدی که ، مجلس خارچندن انتخاب اولونان بر قاینه نک اداره حکومت ایده بیله چک درجه ده مجلس اوزرینه بر تاثیر اولامیور ، حکومت ایله مجلس اراسنده دائما نتیجه سز اختلافلر میدانه چیقیمیوردی . حال بوکه ناظرلر مجلسک اکثریتندن انتخاب اولونورسه طبیعی مجلسک اعتماد و مظاهرتنه مالک اولاجقدی . فقط ۱۷۸۹ ده تفریق قوا

نظریه‌سی ادارهٔ حکومتك ملت وکیلارینه تودیع ایدلسنه مانع اولیوردی. بو صورتله حرکت ایتك قوهٔ اجرائیه ایله تشریحیه‌یی بر آله طویلامق دیمکدی. بو اصول انکلتزده تجربه ایدلمشدی. بناء علیه اصوله مغایر اولدینی آکلاشلمشدی. اوزمانلر انکلیزلك بر چوغنی مملکتلرنده حکم فرما اولان پارلمنتو بوزوقلقرینی هب بواصوله عطف ایدیورلردی. ناظرلر اکثریتك معاوتنه نائل اولمق ایچون مبعوثلره التماس ایدرك پاره یدیر - سیورلردی. کذا قرالده فرق مخالفه رؤسائنه ناظرلق وعد ایدرك انلری کندیسنه جلب ایده بیلیردی. میرابو، ناظرلری مجلسدن انتخاب ایتك حققی قرالدن آدیرمایق ایچون بیهوده یره یالواردی. حتی بو یوزدن ناظرلك مبعوثلردن انتخاب اولونماسنه قرار ویرلدی. چونکه میرابونك ناظر اولاجغندن قورقولیور، کندیسنك قرال ایله اولان مناسباتندن شبهه ایدلمکه باشلانیوردی. قوتلرك تفریقنی اکیال ایچون کذلك ناظرلك کندی نظارتلرینه متعلق مسائلدن ماعداهیچ برشی حقنده مجلسده سوز سویله مک حمنه مالک اولاملرینه ده قرار ویرلدی.

قوهٔ تشریحیه‌یه قرالك نه درجه‌یه قدر اش-تراك ایده جکی مسئله‌سی ده اوزون اوزادی‌یه مناقشه ایدلدی. قرال مجلس طرفندن قبول اولونان بر قانونی رد ایتك صلاحیتنی حائز اولمالیمیدی؟ قرال طرفدارلری قرالك قطعی بر (وه طو)، یعنی

بر قانونی لغو ایتمک حقنه مالک اولماسنی ارزو ایدیورلر، قرللق علیهنده بولوناندرده قراله هیج بر قوه تشریعیه بخش ایتمک ایستیورلردی. نهایت ایکسینک آره سی بولوندی. قانون اساسی موجبنجه قراله بر (حق تأخیر) یعنی بر قانونی ایکی اجتماع مدتیجه توقیف ایتمک حتی ویرلدی .

اداره حکومت بو صورتله اوج قوته تودیع ایدلمش و بو قوتلرک هر بری یکدیگرندن مستقل اولاجق وجه ایله تشکیل اولونمشدی. مجلس مؤسسان قوتلرک تفریقی نظریه سنه رعایت ایتمک ایستیور، قوه اجرائیه نك یعنی استبداده آلیشغین بولونان قرالک تجاوزاتندن قورقیور، انی دوچار ضعف ایتمک، غایت معین حدلر داخلنده طومتغه غیرت ایدیورلردی. نهایت قاینه نك بوتون نفوذی آلمش، یکانه قوه حقیقیه اولارق مجلس قالمشدی.

مجلس مؤسسان امور اداره خصوصنده هر دائره نك منتخبلرینه کندی اداره مأمورلرینی انتخاب صلاحیتنی بخش ایتدی. فقط (والیر و مادون مرخصلر کبی) غایت نافذ مأمورلردن اوصانلدینی ایچون مستقل مأموریتلر احداث ایتمک ایسته مدی. هر تقسیماتده اداره امور بر هیئته تودیع ایدلدی. ناحیه لرده (دوائر بلدییه) یه، متصرفلقلرله ولایتلرده ده (دیره کتوارلر) ویرلدی. قوه اجرائیه ایله موظف اولان بو هیئتلرله برابر برده هیئت مشاوره یعنی (مجلسلر) احداث ایتدی. بو محلی مأمورینه کندی دائره لری امورینی تسویه صلاحیتندن ماعدا ، ویرکی

وضع و جبات ایتک، (فاردناسیونال) طوبلامق حقنی ده بخش ایلدی. بو صورتله فرانسه ناحیه لرینک کافه سنی همان کاملاً مستقل برر اوافق جمهوریت حالنه قویدی.

مجلس مؤسسائی اک زیاده اندیشه ناک ایدن شی، قرال ایله ناظرلر طرفندن تضیقات وقوعه گلسی قورقوسی ایدی. بونک ایچون اداره حکومتی مجلسک قوه اجرائیه اوزرینه فائقیتنی دائماً تأمین ایدمک و ایالتلری همان همان مرکزدن مستقل بولوندیراجق بر طرزده تنسیق ایتدی. ۱۷۹۱ قانون اساسیسی بو صورتله هیچ بر قوتی حائز اولامیه جق درجه ده ضعیف بر حکومت مرکزیه ایله عادتاً فترت وقوعه کتیره جک درجه ده قوی محلی اداره لر احداث ایلدی. بوندن باشقه مجلس مؤسسان، اعضاسندن هیچ برینک مجلسه انتخاب اولونماسنه قرار ویره رک منبخلری دائماً تجربه سز مبعوثلر کوندرمکه مجبور ایتدی.

۱۷۹۳ قانونه اساسیسی . — ۱۷۹۱ قانون اساسیسی قرال ای ناظرلرینی ابقا ایلشدی. قانون اساسی بونلری اودرجه دوچار ضف ایتدیکی حالده ناظرلرینه بوتون قوتی حائز اولمق ارزوسنده بونان قوه تشریعییه قارشى پروتستو ایتمکه چالیشمشردی. مسئله، راهبرله مهاجرت ایدنلردن ایلری کلیوردی. مجلس بوری دشمن تلقی ایدیور، انلر حقنده وضع ایلدیکی قانونلری اید، قرال تصدیق ایتدیوردی. ایشته بو مناقشه ائناسنده آز قوتده بر جمهوریت فرقه سی وجوده کلدی. فقط بو فرقه (پارس)

واروشلرینک معاوتی سایه سنده (تویلووری) پی ضبط ایتدی .
 قرالی عزل ایتدیرمکه و (قونوانسیون) نامیه یکی بر مجلس
 آچدیرمغه مجلسی اجبار ایلدی (۱۰ آغستوس ۱۷۹۲) .
 اداره حکومتی قونوانسیون در عهده ایتدی . اعضای میاننده
 انتخاب اولونان قومیتلر واسطه سیله اداره حکومت ایلدی .
 کذاقرالقسز برده قانون اساسی تنظیم ایتدی . بوده ۱۷۹۳ قانون
 اساسی ایدی . بو قانون اساسی ، بر قومیسون طرفندن
 علی العجله یازلمش و اوزون اوزادی مناقشه ایدلمدن قونوانسیونجه
 قبول ایدلمشدی .

بو قانون اساسی نی یازانلر روصونک تلامبندی ایدی . بونلر
 حاکمیتک یالکز ملتده اولدینی وملتک طوغرودن طوغرویه
 حاکمیتنی اجرا ایتسی لازمکه جکی قاعده سنی اساس اتخاذا ایلشردی .
 اهالی یکریمی بر یاشنده کی کیمسه لردن عبارتدی (متعدی اهالی
 ایله غیر متعدی اهالی کبی فرقلردها ۱۷۹۲ ده قالدیرلمشدی) .
 منتخبلر هم مبعوثلرینی انتخاب ایتک ، همده قانونلری مذاکره
 ایتک ایچون (ایلک مجلسلر) طرزنده طویلانجه قلدردی .
 مجلس ملینک یرینه یالکز بر سنه مدتله انتخاب اولونمش بر هیئت
 تشریحیه قائم ایدلمشدی . بو هیئتک وظیفه سی قانون تنظیم ایتک
 اولیوب یالکز بو قانونلری (تکلیف ایتک) ایدی . قانونلری
 (قبول ایتک) ایلک مجلسلرک وظیفه سی ایدی . (بردن فضله
 ولایتلرک نصفنده مجلسلردن اونده بری شکایت ایتزسه بو قانونلر

قبول ایدلمش عداولونوردی). قایینه رینه، ایلك مجلسلر طرفدن ترتیب اولونان لیسته دن هیئت تشریمیه معرفتیه نصب اولونان یکر می درت اعضادن مرکب برده (اجرا آت مجلسی) احداث ایدلمشدی. بوقانون اساسی هم حکومتی هم ده مجلسی لغو ایدیور، بوتون اهالی بی مشروع مأمورلره قارشى طور مغه تشویق ایلوردی. «حکومت اهالینک حقوقنه تجاوز ایده جک اولورسه، کرک اهالی و کرک اهالینک هر فرقه سی ایچون حقوقک اک مقدسی و وظائفک الیزوملیسی عصیان ایتمکدر» دینوردی.

بوانساده فرانسه به بوتون اورویا اردولری استیلا ایتمش و فرانسه بی مدافعه ایچون قوتلی بر حکومته احتیاج کورلمش اولدیغندن بوقانون اساسینک حربدن صوکره تطبیقی مناسب کورولدی. فقط ده صوکره، تطبیقنه ده میدان قالمادی. چونکه بوقانون اساسی بی تنظیم ایدن فرقه دوشورولدیکی زمان حرب آلآن دوام ایدیوردی.

اورمیسی سنه فانوره اساسیسی — قونوانسیون طاغیلمازدن اولیکی بر قانون اساسی تنظیم ایتدی. فقط بوسفر ۱۷۹۱ قانون اساسیسنده کی خطالردن اجتنابه واك زیاده فرال فرقه سنک رأس کاره کچه سنه مانع اولغه غیرت ایلدی.

بوقانون اساسی ایلك مجلسک بوتون صلاحیتنی لغو ایتدی. بونلره یالکمز مبعوثلری انتخاب ایدن منتخبلری کوسترمک حق

بر اقلدی . هرمنتخبك تقريباً ۲۰۰ فرائق وارداتلی برملکی بولوناچقدی .

کذا تک مجلسله اداره اصولنی قالدیرارق ایکی مجلس وجه ده کتیردی . بونلردن بری (سهنک سان ، بش یوزلر مجلسی) که قانونلری بوتکلیف ایده جک ، دیکری ده (۲۵۰ اعضادن مرکب) (اختیارلر مجلسی) که اوده بوقانونلری تصدیق ایلیه جکدی . بومجلسلرک ایکیسی ده انتخابله ایدی . فقط بردنبره تبدلاته میدان ویرمه مک ایچون هر سنه بومجلسلرک اعضاسندن یالکزا اوچده بری تبدیل ایدیلیوردی . کذا جمهوریت فرقه سنی رأس کارده بولوندرمق ایچون ایلک انعقادده سابق قونوانسیون اعضاسنک لا اقل اوچده ایکیسنک بولونماسنه قرار ویرلدی :

قوة اجرائیه ، (بش یوزلر) طرفندن تقدیم اولونان ۱۰ نامزد آره سندن اختیارلر معرفتیه انتخاب ایدلین ۵ اعضادن مرکب (دیره کتووار) . تودیع ایلدی . ناظرلری ، جنراللری ، سفیرلری هپ دیره کتووار نصب ایدیور ، استدعالری قبول ایچون رسمی قیافتله اجتماعلر عقد ایلیوردی . فقط تفریق قوادن آیرلامق ایچون قوه اجرائیه بینه مجلسلردن آیری بولوندیریلوردی . ناظرلر مبعوثان میانندن انتخاب ایلیور ، (دیره کتووار) قوانین تکلیف ایتمک خقنه مالک بولونیوردی .

بوایکی قوتک بربری اوزرینه اجرای تاثیر ایتملری ایچون هیچ برواسطه موجود دکلدی . حتی آره لرنده اختلاف وقوعه کلدیکی

زمان ایکسی ده (ضرر به حکومت، قوده تا) استعمالندن باشقه چاره
بولامامشردی . دیرکتووار ایکی دفعه مجلسلره انتخاباتی فسخ
ایتمش ، نهایت قانون اساسی یه ده هیچ برفرقه رعایت ایتمه مشدر .

آلتنجى فصل

انقلابك اوروپا ايله مبارزه سى

انقلاب ايله اوروپا حكومتلى بىننمه اختموف . —
۱۷۸۹ ده فرانسه اوروپانك بوتون حكومتلىله صلح و مسالمتده
ايدى . اوزمانلر بش بيوك دولت واردى . ايكيلى غرېده ،
فرانسه و انكلتره ، — ايكيلى مركزده ، آوستريا و پروسيا ،
— برى شرقده ، روسيه ايدى . بو بويوك حكومتلر اوراق
حكومتلرله بربرندن آيرلمش بولوندىلرلى ايجون اوراق
حكومتلى ياكندىلرلى آلمق ويا انلر حاكم اولمق ايستلردى .
آوستريا حكومتى ، بلجىقايه مقابل باويه راى آلمق ، پروسياده
بوكا مانع اولمق ايستوردى .

روسيه حكومتى پولونيايه حاكم اولمق ايستور ، آوستريا
ايله پروسيا ايسه بورايى پايلاشمق ارزو ايدىوردى .
كندا آوستريا ايله روسيه ، حكومت عثمانيه نى آره لرنده پايلاشمق
ايجون اوزلاشيور ، فقط پروسيا حكومتى آوستريانك بويومسنة
هيچ ميدان و يرملك ايسته ميوردى .

دكزده انكلتره حاكم اولمق ايستور ، وقت حريده
بيطرف ملتله منسوب كىلرلى دكزده توقيف ايتك و درونلرنده
دشمن ملتله منسوب امتعه صاقل اولوب اولمادىغنى آلامق ايجون
بونلرلى معايه ايتك حقنه مالك اولدىغنى ادا ايدىوردى . بو

ادعا، انكلتره ایله شمالده کی بحری حکومتلر، یعنی دانمارقه، اسوچه و روسیه حکومتلری اړه سنده اختلاف حصوله کتیریور ، بو حکومتلر فرانسه و اسپانیا ایله برابر دکزک سربست اولماسنی طلب ایدیوردی .

ایشته بوصورتله بوتون بویوک حکومتلر اړه سنده اسباب اختلاف موجود بولونیوردی . بونلرک کافه سی ده اون سکنزنجی عصرده یکدیگرینه قارشی حرب ایتمشلردی . منافع جهتیله یکدیگرندن آیریلان بو حکومتلر بیننده ارتباطی تأسیس ایده جک هیچ بر قاعده مشترکه یوقدی . هر حکومت کندی منافع حاضره سنه کوره متفقلر انتخاب ایدیوردی . - یدی سنه حربی اسکی اتفاق سیستمنی کاملاً آلت اوست ایتمشدی . بو حربده فرانسه حکومتی اسکی متفق بولونان پروسیاقرانه قارشی اسکی دشمنی اولان آوستریا به یاردم ایتمشدی . آرتق اوندن صوکره هیچ بر اتفاق تأسیس ایده مه مشدی . حکومتلر بر برینه اعتماد ایده . میورلر ، مشترکاً حرکت ایچون یکدیگریله برلشه میورلردی . فرانسه غایت نافع بر وضعیتده بولونیوردی . فرانسه بللی باشلی اختلافلرک هیچ برینه اشتراک ایتمه مشدی . اراضیسی اولدجه واسع و یکدیگرینه مکمل بر صورتده مربوط ایدی . تکمیل حدودی اوزرنده (بلجیقا ، آلمان الکتورلکلری ، ساردنیا و اسپانیا قرالقلرنی کی) اوافق ویا ضعیف حکومتلر واردی . بونلر کندیسیله حرب ایده مدکلری کی بویوک حکو-

متلرك فرانسه‌یه وقوع بولاجق صدمه‌لرینه قارشى ده بر تامبون
وظیفه‌سى كورويورلردى . بناء عليه فرانسه ايجون صلح
و مسالمتى محافظه ايتك غایت قولایدی . بو سیاست ، اون آلتنجی
لوتینك خارجیه ناظرى وهرژه‌نك سیاستی ایدی . ده‌ها صوكره
میرابو ایله طاله‌یران‌ده بو سیاستی تعقیب ایتدیله . قونستی
توآنت‌ده پارلاق بر مناقشه‌دن صوكره بوسیاستى قبول ایتدی .
۱۲ مایس ۱۷۹۰ ده آتیده‌کی بیاناتده بولوندی :

«فرانسز ملتى استیلا مقصدیله هیچ بر حربه تشبث ایتیه‌جك
و قوتلرنی هیچ بر حكومتك حریتنه قارشى استعمال ایلیه‌جكدره .
بو بیانات ۱۷۹۱ قانون اساسی‌سنه‌ده درج ایدلدى .

فقط اوروپا حكومتلریله ائتلافی محافظه وظیفه‌سى مجلسه
عائد دكلدی . انقلاب حد ذاتنده مطلقیت اداره‌یى حائز
حكومتلرك كافه‌سنه قارشى بر خصومت دیمكدی . مجلس
مؤسسناك اعلان ایلدیكى (حقوق بشر) یالكز فرانسزلرك
دكل ، بوتون انسانلرك حقوقی ایدی . فرانسه حكومتی كندی
وطنداشلرینك بو حقوقنى طانیقله نمونه امتثال اولیور ، سائر
اقوامكده بو صورتله حرکت ایتلرینه انتظار ایدیوردی .
فرانسه هیچ بر قومك حریتنه (قارشى) قوت استعمال ایتك
ایسته‌میوردی . فقط حریتی تأسیس ايجون اقوام سائریه
قارشى معاوتنی‌ده دریغ ایده‌میوردی . مجاور مملكتلرده ،
حكومتلرندن ممنون اولیان تبعه‌لر كندیلرینك خلاصنى امید

ایدیورلر ، حتی فرانسزلردن بر چوغی‌ده حریتك فرانسه حدودی خارچنده حکمران اولماسنك اسبابی بیلمدن بونلری تشجیع ایلیورلردی .

ایلك اختلاف (آوینیون) اهالیسی یوزندن پایا ايله وقوعه کلدی . آوینیونلیر عصیان ایدرك مملکتلرینی فرانسه‌یه الحاق ایتدرمك ایستیورلردی . دیگر بر اختلاف‌ده سه نیورلك حقوقنك لغوئندن طولایی شکایتده بولونان آژاسده کی سه نیورلك صاحبی آلمان پرنسلیری یوزندن ایمراطوره ظهور ایتمشدی . مجلس مؤسسان (آوینیون) مسئله‌سنه راضی اولدی . فقط آژاس تبعه‌سنك سه نیورلردن قورنولمق حقنه مالک اولدقلرینی تصدیق ایتدی . مجلسه تودیغ اولونان راپورده : « آژاس کندی ارزوسيله فرانسز قومنه التحاق ایشدر . بناء علیه بوالتحاقه شکل قانونی ویرن نقطه (مونسټر) معاهده‌سی دکل ، ملتک ارزوسی ذاتیسیدر» دنیلورلردی . شو حال حقوق عمومی‌یه یکی بر قاعده‌یه ، ملت حاکمه‌نك ارزوسنه استناد ایتدیرمکدی . دیگر حکومتلر ایسه تبعه‌لرینك ارزوسنی قطعیا نظر اعتباره آ! ایه‌رق قراللر بینه‌نده کی مقاوله‌لرله وراثتدن باشقه برشی طانیمیورلردی .

یکدیگرینه مخالف اولان بوقاعده‌اساسیه‌یه تالیف ایتمک امکان خارچنده ایدی . فقط ایشی حریره منجر ایتمک ایچون دها طوغروئدن طوغروه سبیلر لازمدی . فرانسز ملتک اکثریتی

حربی ارزو ایتمیوردی . انقلاب بچیلره قارشی مشترکا حرکت ایتمدن اول حکومتلرک آره لرنده ائتلاف ایتملری لازمدی . تام ۱۷۹۰ده پروسیا قرالی آوستریایه تعرض ایچون (سیلیزیا)ده بر اردو طوبیلامشدی .

مرب . — انقلاب ایله اوروبا ارسنده ایشی حربه منجر ایتمک ایچون تمام ایکی سنه کچمشدر . بو حربی ، هر ایکسیده فرانسز اولق اوزره ایکی فرقه تولید ایلمشدر . فرانسز زادکانندن بر قسمی انقلابدن ممنون اولمایه رق آلمانیا یه مهاجرت ایتمشدر و فرانسز قومی ایله مجلسک آنده اسیر بولونان اون آلتنجی لوئی بی خلاص مقصدیله فرانسه یه اردولر سوق ایتملری ایچون حکومتلری تشویق ایتمک باشلامشدردی . جمهوریت طرفدا . لرلی ایسه اون آلتنجی لوئی بی اجنبی حکمدارلرینک کیزلی بر متفقی ظن ایتمک لری جهتله لوئینک وضعینی فنالاشدیرمق ایچون حربی تشویق ایتمشدردی .

مهاجرلرک ایلك اول تشویق ایتمک چالیشدقلری ایمراطور له ئوبولد ، حربی ارزو ایتمیوردی . فقط عین زمانده فرانسز مهاجرلریله آچیقدن آچیغه قطع رابطه ده ایتمک ایسته میوردی . چونکه بونلرک باشلرنده اون آلتنجی لوئینک قارده شی قونت دارطووا بولونیوردی . له ئوبولد ، پروسیا قرالی وساقسونیا آلتوریلره برابر (ساقسونیا) ده (پیل نیچ) شاتوسنده بولوندینی صرده ایدی که قونت دارطووا کندیسندن معاونت طلب ایتمش

و فرانسه یه قارشى بر سفر پلانی تقدیم ایلشدی . حکمدار لر بو ایشه کیریشمه مکه قرار ویرمشلر ، فقط مهاجر لر ی ممنون ایتک ایچون فرانسه ده حکمدار لنگ و نظام و انتظامک اعاده سی ضمننده بر بیان نامه نشرینه قرار ویرمشلردی (۲۷ آغستوس ۱۷۹۱) . بو بیان نامه ده مواد مذکور ننگ تأسیسی ایچون سائر اوروپا دولتلر ننگ دریغ معاونت ایتیه جکلرینی ایمر اطور ایله برابر پروسیا قرالنک امید ایلدکلری ذکر ایدیلور ، و : « اوزمان وشو تقدیرده ایمر اطور ایله پروسیا قرالی مشترکاً تصمیم اولونان مقصدی آلد ایتک ایچون لزومی اولان قوتلرله بر ائتلاف متقابل عقد ایدرک سریعاً حرکت ایتکه قرار ویرمشلردر » دیه علاوه اولونیوردی . - هر ایکی حکمدار پک ایی قانع اولمشلردی که دیکر دولتلر مداخله دن اجتناب ایدم جکلر ، و کندیلری ایسه دول سائرده مشترکاً حرکت ایتدکلری تقدیرده مداخله وعدنده بولوندکلری ایچون انلر مداخله ایتمز لرسه کندیلری ده هر درلو تمهدادن قور تولمش اولاجقلردی . له نوبولد : « بنم ایچون بو (اوزمان وشو تقدیرده) کله لر ی بر نوع قانون و کشف استقبال مثابه سنده در » دیه یازمشدی . - بناء علیه شو (بیلنج) بیان نامه سی ماله دوپانک تعبیری وجه ایله « بر مضحکه حکمداران » ایدی . فقط مهاجر لر بونی عمومه قطعی بر وعد شکلنده کوستر مکه اهمیت ویرمشلردی . حتی پرنس لرک آغزندن بر مکتوب نشر ایدلش ، و بومکتوبده : « مهاجر لرک کندیلرندن

معاونت طلب ایڈکلری حکومتلر بو خصوصده بوتون قوتلرینی استعماله قرار ویرمشلر ، ایمپراطور ایله پروسیاقرالیده تمهدات متقابله عقد ایلمشردر « دییه یازلمشدی .

انقلاب طرفدارلری مهاجرلرک بیاناتنه حرفیاً ایناعمشلر ، اداره سابقهیی تأسیسه فرانسهیی مجبور ایتمک ایچون اورویا حکمدارلرینک بر اتحاد عقد ایتمکلینه ایناعمه باشلامشردی . مجلس ۱۷۸۹ دن بری طویلائیمان اردویی تقویه به ۱۷۹۱ دن اعتباراً مباشرت ایلمشدی . بیاض اونیفورمه لرینی محافظه ایدن اسکی عسکرلرک یانزده برده مائی البسه لی (کوکلولور) احداث ایلمشدی .

قسماً کنج مپوئلردن ترکب ایدن (مجلس تشریحی ، لهژیسلاتیو) آز بر زمان ایچننده (زیرونده نلر ایله پارس قوردولیه لر قلوبنن ترکب ایدن) جمهوریت فرقه سنک حاکمیتی آلتنه کیرمشدی . بونلر قراللیی دوشورمک ایستیورلردی . (برصو) : « اون سنه اسارت آلتنده قالدقن صوکره حریتی آله ایدن بر ملت ، حریتی تقویه ایتمک ، استبداد اخلاقسزله رندن تمیزلنمک ، کندی محوینه بادی اولاییله جک کیمسه لری ایچندن آتمق ایچون حربه محتاجدر « دییوردی . او زمان مهاجرلر (رن) نهرینک صول ساحلنه ، قولونیا الکتورینک حکومتی داخلنه یرلشمشدر ، بوراده اوافق بر اردو تشکیل ایلمشردی . اردونک قرارگاه عمومی

(قبوله نچ) ده ایدی. لهژیستلایو اون آلتنجی لوئیدن مهاجرلری دفع ایتدیرمسنی طلب ایلشدی. فی الحقیقه اون آلتنجی لوی ايله ناظرلری او صرمده بو کوچوک اردوینی تقویه دن استفاده ایدجك اولان قولونیا-آلکتورینه قارشی اوافق بر حرب اجراسندن قورقورلردی. فقط مهاجرلری طرد ایتلمیسه رهبان منتخبلرینه تکلیف ایتسنی طلب ایچون ایمپراطوره مراجعت ایدلمش، ایمپراطور بوتکلیفی رد ایدنجه لهژیستلایو ایمپراطوره اعلان حرب ایتشدی.

ایشته، حقیقت حالده طوغرودن طوغروهیج بر استیلا ايله تهدید ایدلمدن اوروپا حکمدارلرینه قارشی حربی فرانسه اعلان ایتشدی. فقط شوراسی ده محققدرکه حکمدارلرده بو انقلاب فرانسه سنی اوروپا ایچون بر تهلكه عد ایدیورلر، فرانسه ده اداره سابقه یی تاسیس ایتك ارزو ایلورلردی. ده ۷ شباط ۱۷۹۲ ده ایمپراطور ايله پروسیا قرالی بر « مخالفت و اتفاق تدافی » معاهده سی عقد ایتشلردی. ۱۷ شباط ده فرانسه قرالنه : « بوتون قوانین روحانیه و انسانیه قارشی وقوع بولان تجاوزلر كرك سلامت عمومیه یی و كرك تحت سلطنتك امنیت و شرفنی محافظه ایچون دول معظمه برائتلاف مجبوریتی حاصل ایتسه ایدی اوروپا (فرانسه ده) اصلاحاتك سکونتله اجراسنه مساعده ایده بیلیردی » دینه یازیورلردی.

۱۷۹۲ ده وقوعه كلن بوايلك حربده فرانسه نك قارشیسندن

یالکوز ایمپراطور ایله پروسیا قرالی ، آلمان پرنسلی ، ساردنیا قرالی و برده انقلابی بوتون حکمدارلر ایچون بر حقاتر عد ایدن اسوه ج قرالی اوچنچی . کوستاو بولونیوردی .

حرکات عسکریه هر ایکی طرفندن ده غایت سه فیلانہ اجرا ایدلمشدی . تشکیلاتی ، قوه معنویه سی ، امر و قومانده سی بوزوق بر حالده بولونان فرانسز اردوسی ایلك مصادمه ده رجعتہ باشلایارق حدودی بوم بوش براقشدی .

پروسیا اردوسی (شامپانیا) یه قدر ایلریلیه بیللمشدی . فقط او درجه تدیرلی بر صورتده حرکت ایتشدی که ، (پارس) اوزرینه یورومک ایچون بر درلو جسارت ایدمه مش ، دوموریه نیک پروسیا اردوسنک کریلرینه طوغرو سوق ایلدیکی فرانسز اردوسنه قارشی حرکت ایلشدی . دهها صوکرده هیج محاربه ایتدن کری چکلمشدی . او زمان فرانسز لر تعرضه کچرک بلچیکا ایله رهن نهرینک صول ساحلنی و صاووا ایله (نیس) قونتلغنی ضبط ایتملردی .

فقط اون آلتنجی لوئینک اعدامی حربی عمومی بر حاله کتیردی . ۱۷۹۳ده فرانسه جمهوریت حالنه کلنجه ، اولجه ۱۷۹۲ ده اتحاد ایدنلردن ماعدا انکلتره ، فلمنک ، اسپانیا ، پورتیکز و ایتالیا حکومتلری ، یعنی اسویچره ، دانیمارقه و ونڈیکدن ماعدا بوتون اوروپا فرانسه علیهنده بولوندی . (روسیه ایمپراطور یچه سی قاتهریناده انقلابک علیهنده بولوندیغنی اعلان ایتمش ، فقط عسکر کوندرمکن

امتناع ایلشدی. قاتهرینا کندی عسکرلرینی «بولونیا زاقوبه نلری» ایله محاربه ایتمک ایچون صاقلادینغی سویلیوردی . اسوه جده اتحاددن بساتون چکلمه شدی .

بوعادتا قراللق ایله کلیسیایه دشمن اولان فرانسه جمهوریت پرورلرینه قارشى برصلیب محاربه سی ، قرالک و کلیسانک نفوذینی تأسیس ایچون بر محاربه صلیبیه ایدی . فقط متفقلر فرانسه نك ضررینه توسیع ممالک ایتمک و آوستریالی ایکنجی فرانسوانک دیدیکی کبی « ادعایه حقلی بولونقلری بوتون ضرروزیانی تضمین ایتدیرمک » ایچون فرصتدن استفاده ارزو ایدیوردی . هرکس بریالت ضبط ایدوب اورایه یرلشمک ایستیوردی . ایشته اتحادی موفقیتمز براقان بونقطه ایدی . — هرایی طرفک قوتلری آره سنده پک زیاده فرق موجوددی . فرانسز اردوسنک تشکیلاتی بوزولشدی . اسکی ضابطلرک اکثریمی مهاجرت ایتمشدی . یکی ضابط یتیشدیرمکه ایسه وقت یوقدی . کولکلور هنوز ایی برعسکر اولامامشاردی . ۱۷۹۲ سنه سنک ایلمک سکز اون آبی ظرفنده فرانسزلر دائما مغلوب اوله رق بوتون حدود اوزرندن کری چکلدیلر . فقط متفقین اردولری ده پبرلکده ویا آیری آیری (پارس) اوزرینه یورویه جکلری یرده اجنبی حکمدارلرک کندیلرینه مال ایتمک تصورنده بولونقلری ولایتلری تحت انقیاده آلمغله وقت کچیر- دیلر . جنرالر قاعده یه نظراً حرکته آلیشمش بولندقلری

ایچون بوتون سوق الجیش نقطه لرینی الده ایتمدکجه ایلریله مک
ایسنه میورلر ، هرقله یی ضابطایتمک ایچون طوروب محاصره
ایدیورلردی .

ایشته بوصورتله فرانسز اردولرینک تشکیلاتنی پتیره سنه
فرصت بر اقلمشدی . ۱۷۹۳ سنه سی نهایتنده فرانسز اردولری
آرتق تعرضه کچمشدی .

۱۷۹۴ سنه سی قطعی بر نتیجه ویردی . آوستریا اردوسی
باچیقادن پوسکورتولدی . پروسیا اردوسی حربدن چکلدی .
۱۷۹۵ ده پروسیا ایله ، ۱۷۹۷ ده آوستریا ایله مصالحه
عقدایدلدی .

فرانسز اردولری . — انقلاب فرانسز اردولرینک
تشکیلاتنی بوزمشدی . ضابطانک قسم اعظمی زادکاندن اولدقلری
ایچون مهاجرت ایتمشلردی . فرانسه دول متحده یه قارشی
حرب ایتمک مجبوریتنده بولوندیفی زمان حکومت اولا وطنپرورلره
مراجعت ایدرک ۱۷۹۱ ده اولدیفی کبی اردویی طوبلامق ایچون
کوکلو قیدایتمک ایسته دی . له ژیسلا تیو : « وطن تهلکده ! »
دییه اعلان ایتمدی . کوکلو قید ایتمک ایچون قلملر
آچلدی . پارسده عمومی میدانلرده بویله سکر قلم آچلدی .
بوقلملرده ، برحاکم بویننده اوچرنکلی بر اصق اولدیفی حالده
یوکسک بریره اوطورر ، اسملری قید ایدردی . ضابطانی
کوکلولر کندیلری انتخاب ایدرلردی . ایشته بوصورتله حربی

برصنعت دئییه اجرا ایدن کؤکللو عسکرلرک یرینه محاربه بی بروظیفه دئییه ایفایده جک و طنداش عسکرلر طوبلامق امیدایدیلیوردی . فقط (۱۷۹۲ کؤکللوری) اردونک احتیاجنه کفایت ایده جک قوتی بولامادی . ۱۷۹۲ سفری اسکی عسکرلرک و ۱۷۹۱ کؤکللوری طرفندن اجرا ایدلدی .

۱۷۹۳ ده قونوانسیون مکلفیت عسکریه اصولنی قبول ایتدی . « دشمنلر جمهوریت طوبراغندن طرد ایدیلنجه یه قدر بوتون فرانسزلر اردوسنک احتیاجی ایچون (دائمی تکالیف حربیه) یه تابع بولوندیلر » . قونوانسیون اولاقادرولری طولدیرمق ایچون نه قدر لازمسه او قدر ، یعنی ۳۰۰۰۰۰ کشی عسکر آلدی . دیره کتووار هر سنه بونک ۱۰۰۰۰۰ ننی سوق ایتدی . - ۱۷۹۳ ده تکالیف حربیه ايله طوبلانان عسکرلر ۱۷۹۱ و ۱۷۹۲ نک اسکی عسکرلریله کؤکللورینه قارنو ايله دو بووا - قرانسه ده اسکی آلایلری قالدیرارق هپسنی بربرینه قاریشیدیردیلر . بوتون عسکر برقطعه حاله کتیرلدی . هپسی ده مائی اونیفورمه کیدی . قطعات بربرینه مساوی (نصف لوا) لره آیریلدی . هربرینه برصره نومروسی ویرلدی . اوزمانلر ۱۹۸ صف طابوزی ايله ۷۹۵ کؤکللو طابوری واردی . بونلردن ۱۹۸ نصف لوا ايله ۱۵ خفیف پیاده لواسی تشکیل ایدلدی . ناپولئون ینه (آلائی) عنواننی قبول ایتدی . فقط آلآن فرانسه ده جاری اولان اصولنی محافظه ایدلدی . ۱۷۹۳ اردولرینه اسکی مادون

ضابطہ جنرال تعین ایدلدی . ترفیعلر او قدر سریع اولدی که ،
 هوش چاوشلقدن باشلایارق برسفر ائناسنده جنرال اولدی .
 ایشته بوصورتله فرانسه بوانقلاب حربلری ائناسنده آز
 بر مصرفله جسم اردولر وجوده کتیر مک فائده سنی آلدہ ایتدی .
 بواردولر هپ ترفیع رتبه ایچون محاربه لردہ تمیز ایتمکه چالیشان
 عسکرلردن مرکبیدی .

فقط بو بردنبره تشکیل ایدیلن عسکرلر اسکی عسکرلر کی
 کمال صحتله مانوره اجرا ایدہ مدکلری ایچون سوق طبیعی ایله یکی
 بر تعبیه اتخاذایتدی لر . بونلر گاه آوه چیقارق ، گاه «سونکوطاق»
 دیبه باغیروب دشمن اوزرینه آتیلق ایچون طوبلو بر نظام آلہرق
 معین بر نظامه تابع اولمادن محاربه ایدیورلردی . جنراللر قلعه لری
 ضبط ایتمک ایچون محاصره ایله وقت کچیر میورلر ، بر استیلا حربی
 اجرا ایدیورلردی .

حکومت اردولر نہ پاره ، نہ ارزاق ، نہ دہ البسه کوندریوردی .
 ایلک سفرلر ائناسنده عسکرک هیچ بر شیئی یوقدی . تام قیش
 اور تاسنده فلمنکه استیلا ایدنلرک آیاقلرنده کوندرہ بیله یوقدی .
 برچوقلری تحتہ آیاق قابریله یوریوردی . جنراللر اردوی
 اعاشه ایچون زمانک عاداتنه تابع اولارق ، استیلا ایتدکلری مملکت
 اھالیسندن تکالیف حربیہ آلیورلردی . ایتالیا جنراللری
 تکالیف حربیہ بی منتظم بریغما حالنه کتیر مشلردی . بونا پارت
 او معھود ۱۷۹۲ بیاننامہ سنده ؛ « عسکرلر ! سز چیلاق

برحاله سکنز. اعاشه کزبک فنادر. حکومت سزه چوق شی یامغه بورجلودر. فقط هیج برشی یایاماز. سزی دنیانک الک محصولدار صحرالرینه کوتوره جکم. واسع ولایتلر، بویوک شهرلر هپ الکزه کچه جک. بورالرده شان وشرف و ثروت اکتساب ایده جکسکنز؛ دیوردی. - جنراللرهانکی شهره کلیرلرسه بورایه تکالیف حربیه وضع ایدیورلردی. کلیسارک خزینه لرینی، حکمدارلرک آثار صنعتی ايله قابری ضبط ایدیورلر، حتی تابلولرک بيله کندیلرینه تسلیمنی بیان ایلیورلردی. ناپولئون ایشته بو صورتله پارس موزه لرینی اجنبی مملکتلرندن آلدینی تابلولرله طولدیرمشدی. ۱۷۹۵ دن ۱۷۹۸. قدر مجموعی ۲ میلیارلق تکالیف حربیه تحصیل ایلمشدی.

انفجوب فکرلرینک نثری. - فرانسه انقلابی انکلتزه انقلابی کبی ملی بر انقلاب دکلدی. بو انقلاب عمومی قاعده لره نظراً اجرا ایلمش، بوسبیدن دینی بر شکل آلمشدی. قونستی تو آنتک اعلان ایلدیکی (حقوق بشر) یالکیز فرانسزلرک حقوقی دکلدی؛ بوتون انسانلرک حقوقی ایدی. انقلابیچیلر فرانسه یی ۱۷۸۹ دساتیرینه کوره تنسیق ایتمکه اکتفا ایتیمورلردی. اوروپایی انقلاب ایچنده براقق، سؤاستعمالاتی محو وهر طرفده بردور عدالت و مساوات تأسیس ایتک ارزو ایدیورلردی. اولا بوتون فرانسز قومنک اقوام سائره یی ده کندینه اتباع ایتدیره جکنه ذاهب اولیورلردی. فی الحقیقه « افکار

منوره اصحابی « اره‌سنده وبالخاصه آلمانیاده انقلابی پک چوق تقدیرایدنلرده واردی، حرب باشلادیغی زمان حکومت بو حربی انجق «تیرانلره» قارشی ایستدیکنی، یوقسه اقوامه قارشی ایتمدیکنی بیان ایلمشدی (۱). فرانسز اردولری دشمن اراضیسنه داخل اولدقلری زمان جنراللر اهالی بی تیرانلرندن قورتارمغه کلدکلرینی سویلینورلردی. بونلر زهیه داخل اولورلرسه اوراده انقلاب وقوعه کتیریورلردی. دره بکک حقوقی ایله امتیازاتی لغو ایدیورلر، بوتون مأمورینی عزل ایدیورلر، مامورین بلدییه ایله حاکمترینی انتخاب ایچون اهالی بی طوبلایورلر، فرانسه حکومتنک تقلیدی اولق اوزره بر اداره تشکیل ایلیورلردی. اهالی به دوست؛ زادکان، رهبان و بورزووالر کبی اصحاب امتیازده دشمن معامله سی ایدیورلر، زاقوبه نلر بونلره «آریستو-قرات» دییورلردی. حتی قارنو: «تکالیفی اک زیاده زنکینلره تحمیل ایتملیدرکه، اهالی بزم کندیلرینک خلاصکاری اولدیقمیزی آکلاسنلر!» دییه یازیورلردی.

بال وقامپورر - فورمی بومعاهده لری. - حرب، فرانسه جمهوریتنی انقیاد آلتنه آلمق ایچون اجر ایلمشدی. فقط دهه ۱۷۹۴ده

(۱) حتی «مارسیه زهک شو: «عسکرلر، مرملرکزی عالیجناب جنکاورلر کبی آتوب آتاممه دقت ایدیکز. سزه قارشی ایسته میهرک سلاخلانان بو زواللی قربانلری کوزه دیکز.» قطعه سی بو حسک تأثیریه وجوده کتیرلمشدی.

بو مقصدك حاصل اولمادینی آكلاشدی . متفق دولتلردن بعضری بو بهوده تشبشدن اوصانوب صلح طلب ایتدیلر . ایلک تکلیفی پروسیا درمیان ایتدی . پروسیانك حربدن هیچ فائدهسی یوقدی . بونی یالسکز قرال ارزو ایتشدنی . نهایت پروسیا رجال حکومتی ده بویوك فراه دریقك سیاستنی طومق ایچون قراله بونی قرار ویردیرمشلردی . بو سیاست ده ، صلحی وقایه ایدرك پروسیانك شمالی آلمانیا حكومتلری اوزرنده کی نفوذینی محافظه ایچوندی .

فرانسه جمهوریتك مناسبات سیاسییه ده بولوندینی یكانه حكومت ، اسویچره ایدی . بونك ایچون فرانسه نك اسویچره ده کی مأموری بارتلمی پروسیا مأمورلری ايله مذاکراته باشلامش ، اصل معاهده ده اسویچره ده ، (بال) شهرنده امضالانمشدر (۱۷۹۵) . بو معاهده ده و جبنجه پروسیا قرالی (رهن) نهرینك صول ساحلنده کی برلرینی ترك ایتدی . فرانسه ده بوگاه قابل پروسیانك صاغ ساحلده تلافی مافات ایدجکنی وعد ایلدی . فقط معاهده ده بونك نه صورتله اولاجنی تصریح ایدلمدی . بونقده مخصوص صراحة ایضاح ایدلمشدی . فقط هر ایکی طرف ده تضمیناتک راهب برنسلرك ضررینه اولاجنی بیلوردی . پروسیا بو صورتله ایمپراطورلنك اسکی تشکیلاتی محو ایتک ، آلمانیا نك بر قسمی فرانسه یه ترك ایلک خصوصنده نمونه امتثال اولیوردی .

معاهده ده بوندن باشقه برده خط حدود تعیین ایدلمش ،

بو خط حدودك شمالنده بولونان بوتون آلمان حكومتلری فرانسه ایله عقد ایدیلن صلحه داخل عد اولونمشدی .
 (بال) معاهدهسی آلمانیایی شوصورتله ایکیه آریبوردی :
 جنوبی آلمانیا آوستریا ایله برلشهرک فرانسه ایله حرب حالنده
 قالیور ، شمالی آلمانیا ایسه پروسیانک حمایهسی آلتنده بیطرف
 بولونیوردی .

(بال) مصالحهسنی اسپانیاده امضالادی .

فرانسه ، شمالده و اسپانیاده حرب ایتمکدن قورتولنججه
 بوتون قوتنی آوستریایه قارشى سوق ایتدی . جنوبی آلمانیا ایله
 ایٹالیایده عین زمانده تعرض ایلدی (۱۷۹۶) . آلمانیا قارشى
 وقوع بولان تعرض کرییه پوسکورتولدی . ایٹالیایه ایدیلن
 تعرض موفقیتله نتیجهلندی . بوناپارت آوستریا اردولرینی
 پوسکورتدی . بوتون شمالی ایٹالیایی اشغال ایتدی . آوستریایه
 آلپ طاغلرندن استیلا ایدرک (ویانه) اوزرینه یورودی .
 آوستریا حكومتی مصالحهیه مجبور اولدی . بوناپارت دیره کتوارک
 اشرلرینی نظراعتباره آلمهرق بو مصالحهیی امضالادی . ایشته
 بو ، (قامپو - فورمی بو) مصالحهسی ایدی (۱۷۹۷) .

ایمپراطور بلجیقا ایله میلاندن واز کچدی . ناپولئونده بوکا
 مقابل ونديك جمهوریتنک اراضیسنی ایمپراطوره ویردی .
 فرانسز اردوسی بورایی ونديك سناتوسنک اعتراضاتنه رغماً
 اشغال ایتمشدی .

ایمپراطور ، آلمان ایمپراطور لگنک حکمداری صفتیہ
 « فرانسه جمهوریتی قوانینی موجبہ تصدیق اولونان فرانسه
 حدودینی ، یعنی رهن نہری صول ساحلنک فرانسیہ الحاقنی
 تصدیق ایتدی . بو یکی حدودی تصدیق ایتدیرمک وصاغ
 ساحلہ آنہ جق تضمیناتی قرار لاشدیرمق اوزرہ آلمان حکو-
 متلرندن مرکب بر قونفرہ تشکیل ایدہ جکنی دہ وعد ایلدی .
 بناء علیہ ایمپراطور ، ایمپراطور لگنک تشکیلاتنی محو ایلکی تعہد
 ایدیوردی .

بو معاہدہ نتیجہ سی اولارق «ایمپراطور لگنک صلح قونفرہ سی»
 ایچون آلمان ایمپراطور لگنہ منسوب حکومتلرک کافہ سی (راشتاد) ہ
 دعوت اولندی . قونفرہ انعقاد ایتدی . فرانسیہ مذاکرات
 صلحیہ بولونمق اوزرہ مرخصلر کوندردی . فقط مذاکرات
 دہا ختامہ ایرمہ دن آوسہ تریا اعلان حرب ایتمش ، انکلترہ دہ
 یکی روسیہ جاری ایلہ براتحاد عقد ایلشدی (۱۷۹۸) .

فرانسیہ سردربنک تاریخی . — لورہن دو قہ لگنک الحاقیہ
 ا کال اولونان فرانسیہ اراضیسی ۱۷۸۹ دہ همان همان (۱۸۶۰ و
 ۱۸۷۱ تبدلاتنہ قدر) اون طقوزنجی عصر دہ کنک عینی ایدی .
 (۱) فرانسیہ رجال حکومتی ، اوزمانلر حدودی اولدقہ واسع

(۱) ۱۷۸۹ دہ (شمالہ نلیپہ ویل ومارینبورغ ، شرقہ لاندائو و سارلوتی
 کبی) بعض مفرزقلعہ لہب فرانسیہ نک آئندہ ایدی . بونلر ۱۸۱۵ دہ
 فرانسیہ دن کاملاً آئمشدی .

عدایدیورلر ودها زیاده توسیع حدودایتمک ارزوایتمیورلردی .
 بونلر : فرانسه نك وظيفه سی اوفاق حکومتلری بویوک حکومتلر قارشی
 وقایه ایدرک اور وپاده صلح و مسالمتی محافظه ایتمکدن عبارت اولمالیدر ،
 دیبه دوشونیورلردی . اوزمانلر فرانسه حدودی (آوستریا فلمنکی ،
 رهن نهرینک صول ساحلنده اوچ راهب الکتوراشی ، پالاتینا ،
 باد دوقه لئی ، اسویچره و ساردنیا قرالئی کبی) اوفاق حکومتلرله
 چویرلشدی . بو حکومتلر بر نوع نامپون وجوده کتیریور ،
 و فرانسه بی بویوک حکومتلرک مصادمانه قارشی وقایه ایدیورلردی .
 فقط انقلاب حر بلری بومسالت پرورانه سیاستده نهایت
 ویردی . ۱۷۹۲ دن اعتباراً فرانسر اردولری صاواو ایله
 نیس قونتلئی ، رهن نهرینک صول ساحلئی ، بلجیقایی ، رهن
 و آلپ طاغلرینه قدر بوتون قومشو مملکتلری ضبط ایتمشلر ،
 بونلری ده همان هیچ مقاومت کورمدن اشغال ایلمش لردی .
 تشکیلاتی اساساً بوزوق اولان حکومتلر بویورلری ضبط ایده جک
 قدر بر قوت کوسترمه مشلر ، اهالی ایسه سؤاستعمالاتی قالدیر مق
 ایچون کلدکلرینی بیان ایدرک کندیلرینی خلاصکار صفتیه
 کوسترن فرانسلری کمال ممنونیتله قبول ایلمش لردی .
 فقط یالکز بر مسئله واردی . فرانسه ، اردولرینک اشغال
 ایلدیکی بومملکتلری نه یابا جقدی ؟ قونوانسیونک فکر نجه کندی
 آتیسنی تنظیم ایتمک حق اهالی یه عائد اولدینی ایچون یونی اهالی دن
 صورغه قرار ویردی . بومسئله اهالی طرفندن رایه وضع ایلدی .

اداره سابقه ائسانسندە ماموریت باشندە بولونانلر دہ آریستو - قرات فکەرلری واردر دییه بونلر رایه قاریشدیرلمادی . فرانسز مأمورلری واسطه سیله کندیلرینه استیضاحاتده بولونیلان اهالی ایسه هپ مملکتلرینک فرانسه یه الحاقنی ارزو ایلدیلر . بونک اوزرینه (رهن) و آلپ طاغلرینه وارنجیه قدر بوتون مملکتلر فرانسه جمهوریتنه الحاق ایدلدی (۱۷۹۲) .

متفقر بوصوکره دن آلتان یرلری فرانسه دن پک چاپق استرداد ایتدیلر . فقط ۱۷۹۴ ده فرانسز اردولری بورالری تکرار اشغال ایدنجه بومسئله یکدن موضوع بحث اولدی . ایشته اوزمان فرانسه حکومتمنده ایکی فرقه تشکیل ایتدی . برنجی فرقه اون آلتنجی لوئی سیاستنه رجوع ایدرک فرانسه نك ذاتاً بویوک اولدیغنی بیان ایدیور ، و بلچیکا ایله رهن نهری صول ساحلندن واز کچرک در حال صلح و مسالمت تأسیسنی ارزو ایلیوردی . بونلر « اسکی حدود » طرفداری ایدی . بونلرک فکر نجه : حرب فرانسه نی بترمش ، خراب ایتشدی . فرانسزلر صلح ارزو ایدیورلردی . ممالک مفتوحه اهالیسنه کلنجه ، انلرده عسکرلر و مأمورلر طرفندن ظلم کوروب خراب اولغه باشلا یالیدن بری الحاقی هیچ ارزو ایتیمورلردی . دیگر فرقه ده ریشلیو ایله اون دردنچی لوئینک استیلا سیاستنه رجوع ایدیورلر ، فرانسه نك (رهن) ، (آلپ) و (پیره نه) طاغلری کبی (طبیعی حدودلر) ینه قدر توسع ایتسی لازم کله جکنی و بو حدودلری آلدہ ایتدکجه

حربدن فارغ اولامیه جغنی بیان ایلبورلردی .

بوایکی فرقه دن ، طبیعی حدود لرله حرب طرفداری اولان فرقه غلبه ایتدی . فقط فرانسه حکومتک حربه دوام ایده جک یاره سی اولمادی بی ایچون بو حربی اشغال اولونان مملکتلر ضررینه اجرا ایتدی . حکومت (رهن) اردوسی قوماندانه شو یله یازمشدی : « اردولرک دشمن ضررینه اعاشه اولونماری حربده قاعده عمومیه در . بناء علیه اردونک اعاشه سی ایچون هر نه لازمه بو واسطه ایله آله ایتمک ایچون مالک اولدیغکز بالجمله وسائطدن استفاده ایتملیسکز » . بو اصول ، اشغال آلتنده بولونان مملکتلر اهالیسنی فرانسه دن صوغوتدی . حکومت ، ذاتاً الحاق ایدلش اولان مملکتلر اهالیسنه مملکتلرینی یکیدن الحاق ایتمک ایچون طانیس مایه لزوم کورمدی . بو مملکتلرک قاقبتنی انجق حرب تعیین ایتدی .

بناء علیه فرانسه (رهن) و (آلب) حدود لرنده نرمه وارسه بونلری کاملاً الحاق ایتدی . آستریادن بلجیقای ، — فلمنکندن ده فلمنکلیرک اون یدنجی عصر دن بری اشغال ایلدکلری رهن نهرینک جنوبنده کی مملکتلری ، — آلمان پرنس لرندن رهن نهرینک صول ساحلندکی بوتون مالکانه لرینی ، — اسویچرهدن (جنوره) پی ، — ساردنیا قرالندن صاوو ایله نیس قونتلغنی آلدی . بوتون بو مملکتلر هپ قانوناً الحاق ایلدی (۱) . صوکرده

(۱) جنوره نک الحاق ایدلسنی جنوره حکومتی ارزو ایتمش ، فقط

معاهده لرله تصدیق اولوندی .

آرتق فرانسه قراللینك ضبط ایتدکلری یرلرله وجوده کلن قاریشیق و صنعی حدودك یرینه شمدی (پیره نه) ، (آلپ) و (ژورا) طاغلیله (رهن) نه ری کبی طبیعی حدود لر قائم اولمشدی .

الحاق مذاکراتی اطرافی فرانسه عسکر لرندن مرکب بر مفرزه ايله محاصره اولوندیغی حالده اجرا ایلمشدی .

پدنجی فصل

قونسولوسلق و ایمپراطورلق

سکزیجی سنه قانونه اساسی . — قونوانسیون طرفندن تأسیس اولونان اوچنجی سنه قانون اساسی درت بحق سنه دن فضله دوام ایتمه مشدی (۱۷۹۵ - ۱۷۹۹). بو قانون اساسی امور اداره بی اسکی قونوانسیون اعضاسنه براقه رق جمهوریتی دوام ایتمیره جک بر صورتده حساب ایلمشدی . فقط هر یکی انتخابده ، ایکی مجلسدن چیقان جمهوریت پرورلرک یرینه قرال طرفداری ویا هیچ اولمازسه حکومته خصم مبعوثلر کتیریلیور . دی . ایشته دیره کتووار اکثریتک کندی علیهنه دوندیکنی حس ایدر ایتمز ، ایستالیا اردوسندن کوندریلن بر مفرزه واسطه سیله (فروقتیدور) آینده یاییلان ضربه حکومت واسطه سیله مخاصم مبعوثلردن کندینی قورتاردی . آرتق اوندن صوکره قانون اساسی به هیچ رعایت ایلمدی . هر ایکی طرفده انتخاباتی غیر مشروع بر صورتده فسخ ایدرک امور اداره بی یا محافظه ایتمک ویا آله کچیرمک ایچون چالیشدی .

اهالی ، بردرلو بیتمک توکنمک بیلمین حربدن ، جیدودلرله طولو یوللرک فناغندن ، افلاسدن ، راهبره قارشى یاییلان مظالمدن ممنون دکلردی . آرتق جمهوریتده اهمیت ویرمیورلر ، فقط اداره سابقه بی تأسیس ایده جکلری طبیعی اولان بوربونلرکده

عودتندن قورقیورلردی . یالکز جمهوریتیه عسکرلر صادق قالیورلر و جمهوریت ایچون محاربه ایدیورلردی . فقط بونلر کندی جنراللرینه حکومت ملکیه دن دهاز یاده برمنونیتله اطاعت ایدیورلردی . فرانسه رجال حکومتی دیره کتووارک بقا پذیر اولامیه جفنی حس ایندکلی ایچون رأس اداره یه کچیریله جک برجنرال آریورلردی . ایشته بوسره دهه ، ایٹالیا و مصر سفرلریله کسب شهرت ایدن بوناپارت پارسه کلدی . دیره کتووارک اکثریتی و اختیارله اویوشدی . بش بوزلر مجلسنی عسکرلری واسطه سیله طاغیتدی . ایشته بو ، ۱۸ برومه ر (۱۷۹۹) وقعه سی ایدی .

اوچنجی سنه قانون اساسیسی آرتق محوایدلشدی . بناء علیه یکی برقانون اساسی قلمه آلق ایچون بر قومیسون مأمورایدلدی . بوقانون اساسی ده سکرنجی سنه قانون اساسیسی ایدی . بوقانون اساسی بوناپارتک ارزوسنه پک موافقدی . فرانسه نک یالکز آدی جمهوریتدی . قوه اجرائیه اون سنه مدتله انتخاب ایدیلن برنجی قونسولوسک آنده ایدی . بوتون مأموریتلری او ویره جک ، بوتون اردولره او قوماندا ایده جک ، صلح و اتفاق معاهده لرینی او عقد ایلمه جکدی . کندیسنه یاردم ایتمک اوزره بوکا ایکی قونسولوس دها ترفیق ایدلشدی . فقط بونلرک هیچ صلاحیتی یوقدی . حقیقت حالده برنجی قونسولوس حکمدار مطلق مثابه سند ایدی .

قوه تشریحیه ۱۷۸۹ ده وضع اولونان دساتیره نظراً آیری

ایدی . قاریشیق ایشلردن پک حظایدن سی بهز ، قوانین وضع ایتمک وظیفه سنی درت هیئته تقسیم ایتمشدی . (شورای دولت) قانون لایحه لرینی حاضر لایه جق ، (تریبونا) مذاکره ایده جک ؛ (هیئت تشریعیه) بو مذاکره بی کمال سکوت ایله دیکله دکدن صوکره تصدیق ایلیه جک ؛ (اعیان، سناتو) ده قونترول ایده جک ، شاید قانون اساسی به موافق بولمازسه رد ایلیه جکدی . شورای دولته سناتو قونسولوسلر طرفندن نصب ایدیله جک ، تریبونا ایله هیئت تشریعیه ، بربرینی متعاقب اجرا ایدیله جک بر صره انتخابات واسطه سیمله منتخبلر طرفندن ارائه اولوناجق اعیان اسامیسی میانندن انتخاب اولونان اعضادن متشکل بولوناجقدی .

یک نظرده قوه حکومت پک زیاده انقسام ایتمش کیدی . قوه اجرائیه برنجی قونسولوس ایله ایکی رفیقی ، قوه تشریعیه ده قونسولوسلرله دیگر درت هیئت تشریعیه آره سننده تقسیم ایلمشدی . فقط دیگر ایکی قونسولوس اسمی وار جسمی یوق قییلنددی . شورای دولت اعضاسی ایله سناتورلر (اعیان) ایسه طوغرودن طوغروه برنجی قونسولوس طرفندن انتخاب اولونیورلردی . شو حالده بودجه ایله عجمی افراد طوبلانماسنه سناتو قرار ویریور ، قانون اساسینک مفسری صقیله ده ، فضله اولارق ، (سناتوس - قونسولت) لر اصدار ایدیور ، بونلر قانون مقامنه قائم اولیوردی . حتی انتخاب ایله طوبلانورظن ایکیلن تریبونا ایله هیئت تشریعیه ده حکومتک انتخابنه تابع

بولونیوردی. ایشته بوقارمه قاریشیق تشکیلات برنجی قونسولو-
سک اداره مطلقه سنی سترایتمکدن باشقه برشینه خدمت ایتیموردی.
بناء علیه فرانسز قومنک تمثالی صفتیله اورتاده یالکز بوناپارت
بولونیوردی. بوناپارت یالکز ملنک حاکم اولدیغنی بیان ایدیور،
قانون اساسی بی نه زمان تعدیل ایتسه بو تعدیلاتی منتخبلرک
تصدیقنه اقتران ایتدیریوردی. فقط ملته شو صورتله وقوع
بولان مراجعت، رسمیتدن باشقه برشی دکلدی. بوناپارت
۱۸۰۰ دن اعتباراً فرانسه نك حکمدار مطلق کسيلمشدی.
سکزنجی سنه قانون اساسیسنک معناسی ده ذاتاً بو ایدی.

ایمپراطورلوق. — قونسولوسلق اداره سی درت سنه
سوردی. ۱۸۰۲ دن اعتباراً بوناپارت کندیسنی قیدحیات
شرطیله قونسولوس نصب ایتدیرمشدی. فقط قیدحیات شرطیله
رأس کارده بولونمق و قونسولوس عنوانی حائز اولمق اوکاینه
کفایت ایتیموردی. ناپولئون فرانسزلرک اشکال جمهوریته رعایت
ایندکلرینه ذاهب اولدیغنی ایچون بدایتده بونلری قالدیرمغه جسارت
ایده مەمشدی. بویوک مأمورلرندن قسم اعظمی سابق قونوانسیون
اعضاسندن ایدی. بونک ایچون ناپولئون جمهوریت تقویمی ایله
(وطنداش) عنوانی بیله قالدیرامامشدی.

فقط ۱۸۰۳ ده دوق دانکیه نك اعدامندن سوکره ناپولئون
بو یله قتل تشهیرینه بردها جسارت ویرمه مک و کندیسنی اورویا
حکمدارلری سویه سنه کتیره جک بر عنوان صاحبی اولمق ایچون

مأموریتنی ارثی بر حاله کتیرمک ارزوایتدی. سناتو، کندیسنه ایمرایا-
 طورلق عنوانی تکلیف ایستدی. بو عنوان ناپولئون عائله سی ایچون
 ارثی اولدی. ایشته بوده ۱۸۰۴ قانون اساسیسی اییدی. فرانسه
 جمهوریتی نامی ۱۸۰۸ . قدر محافظه ایلدی. دها صوکره ایسه
 بونک یرینه ایمراتورلق عنوانی قائم اولدی .

سکزنجی سنه تشکیلاتی یاواش یاواش ساده لشدیرلدی .
 دها ۱۸۰۲ده ناپولئون تریبونو اعضا سنندن بعضلرینی پک سربست
 بولدینی ایچون بونلری (تریبونو) دن چیقارتمشدی . دها
 صوکره ده (تریبونو) یی هیئت عدلیه ایله برلشدیره رک بسبتون
 اورتادن قالدیردی (۱۸۰۷) . سناتو کتدکجه حقیقی بر قوه
 تشریعیه وجوده کتیرمکه باشلادی. ایمراتورک عادی بر امرنامه
 ایله اتخا زینه جسارت ایده مدیکی تدابیر (سناتوس - قونسولت) لرله
 اعلان ایلدی .

ناپولئون بویکی حکومت مطلقه سنه اسکی حکومتلره
 بکزه بهجک بر رونق خارجه ده ویرمک ایستدی . جمهوریت
 طرز لرینی براقه رق آوروپا قرالقلرینک عاداتنه امتثال ایستدی.
 کندیسنه بر سرای خلقی وجوده کتیردی. زوجه سنک اطرافنی
 دام دونور لرله تولدیردی . بویوک بویوک شنلکلر ویره رک
 اسکی فرانسه سرای قرالینک مراسمنی بیله تأسیس ایتمک
 ایستدی. ماری آنطوانه ته خدمت ایدن مادام قانیانی کتیرتدی.
 اون آلتنجی لوپنک سرای عاداتنه دائر ویره جکی معلوماتک

نوبت ایدلمسنى امرایتدی. آلمانیاده، مراسمدن برنده بولوندیغی زمان سرای ارکاننک باویه را قرالی اوکندن ره ووره رانس یابارق کچدکاریغی کورمشدی. ناپوئون کندی سراینده ده ره ووره رانس یایلماسنى ارزوایتدی. سرای ارکاننک (فونتن بلو) ده او طور دینی زمانره مخصوص بر نظامنامه تنظیم ایتمشدی. پرنسارله مراتب عالیه اصحابی نوبتله بر رسم قبول اجرا ایده جکلردی. بورسم قبولک طرزى ده صورت قطعیه ده تعیین ایدلمشدی. معین کونلرده آوه کیديله جک، بو آوه قادینلرده معین البسه لرله اشتراك ایده جکلردی. بو سرای خلقی، جنرالر و زوجهری ایله شویله جه ترتیب ایدلمشدی. بونلرک کافه سی ده اهالی صنفنه منسوب اولدقلى ایچون بو دبدبه و مراسم ایچنده کندیلرینی پک یابانجی عد ایدیورلردی. حتی (ایمپراطور یچهنک دام دونورلرندن) مادام دوره موزا: «اوزمانلر هر شیئی حقیقه» یکیدن وجوده کتیرمک لازمدی. انفلابک حریتلری کبار طالمرندن آداب نزاکتی کاملاً قالدیرمشدی. برینه تقرب ایدلیکی زمان نصل سلاملا ناجنی بیله اونودولمشدی. بز، سرایده بولونان بوتون قادینلر، تحصیل و تربیه مزده ره ووره رانسدن باشقه دهاپک چوق شیلرک نقصان اولدیغی آ کلامشوق. اوزمانلر دانس معلملکی ایدن ده پهروی همز طومش، کندیسندن درس آلوردق. «دیور» .

اک زیاده تجربه دیده سرای ارکانی، مهاجرتدن عودت

ایدو بوده سرای ایمپراطوریده بولونمغه موافقت ایدن اسکی سرای قرالی سه نیورلری ایدی. ناپولئون مابینجیملریله دام دونورلرینی هپ بونلردن انتخاب ایدیور: «ایش کورمسنی بونلردن باشقه کیمسه بیلیمور» دیوردی.

بر از صوکره ناپولئون اصلتسز حکمدارلق اولامیه جفنی آکلادی. بر اصلت ایمپراطوریه تأسیس ایتدی (۱۸۰۶). پرنس، دوق، قونت و بارون کبی اسکی عنوانلری قبول ایتدی. مولیه رک مسخره بر حاله کتیردیکی (مارکی) عنوانی براقدی (۱). کذا (مازورا) لری یعنی بویوک اولاددن بویوک اولاده انتقال ایدن آخره غیر قابل انتقال مالکانه لری ده قبول ایتدی. جنراللره، بویوک مأمورلره، انجمن اعضاسنه عنوانلر اعطا ایتدی. دوقلره فضلّه اولارق هپ ایتالیا شهرلری حسابنه اولق اوزره اراضیلر بخش ایتدی. بونلر (مثلا دوق دوریغو، ترهویز، فهلتر الخ کبی) هپ او شهرلرک نافعی آلدیلر. بو عنوانلر ارثی ایدی. ناپولئون بو حرکتی ایله عوامی احیا ایدر بر ایش یاییورم ظنن ایدیور: «وراثت احداث ایدرک بر حکمدارلق وجوده کتیریورم. فقط اصلتم قطعی اولمادیغی ایچون ینه انقلابه صادق قالیورم. عنوانلرم بر نوع اکلیل

(۱) روستوراسیون زماننده اصلت ایمپراطوریه بی حائز بر چوق عائله لر اصللرینی بللی ایتمه مک ایچون (مارکی) عنوانی الملق واسکی زادکان اره سنه قاریشمق ایسته مشلردی.

همیتدن عبارتدر. انسان بونلره کوره چکی ایش درجه سنده نائل اولابیلیر « دیوردی .

ناپولئونك امراتئی واداره داهلییه . — ناپولئون امور اداره بی آینه آلدیغی زمان : « انقلاب، کندیسنی اجراییه سوق ایدن دساتیرایله تثبیت اولونمش، شمدی ایسه کاملاً ختام بولمشدر. »
 « آرتق انقلاب ماصالترینی بيتدك . شمدی بونك تاریخنه باشلامالی، قواعد اساسیه سنك تطبیقنده ایسه حقیقی و ممکن اولانلرینی آکلامالیدر» دیوردی . ناپولئون او زمانلر کندیسنه انقلابی تمادی ایتدیریور سوسی ویریوردی . و دائمده بو سوسی ویرمشدر . فقط انقلاب انتظامندن چیقمشدی؛ ناپولئون کندنجه بو انتظامی اعاده ایتك ایستوردی .

ناپولئون اولا سریع بر تعمیر تدابیریه ایشه باشلادی . دیره کتووار حکومتی فرانسه بی حرب داخلی و خارجی یوزندن حصوله کان قاریشیققلر ایچنده بولمش . بو قاریشیققلری پردرلو تسکین ایدمه مشدی . اولا بودجه بی آچیق ، مملکتی ده قائمه ایچنده بوغولمش بر حالد بولمشدی . ویرکیلر یا قائمه ایله تأدییه ایدیلیور ویا هیچ تأدییه ایدیلیوردی . مصارفی قایتمق ایچون قائمه بی کندکجه ده چوق اقسامه آیرمه لغه لزوم حاصل اولمشدی . بو صورتله ۴۰ میلیاردلق قائمه حاصل اولمشدی . ۳۳۸ فراتلق قائمه، نقد اولارلق برفرانق ایدیوردی . دیره کتووارك قائملر یرینه وضع ایتدیکی (اراضی حواله لری) ده سوکنده

قیمتدن دوشمشدی. دیونانک فائضنی اوده مک ایچون آله پاره اولمادینی جهته اوچده ایکی افلاس ایدلمش ، حکومت داینلری اوچده بره تزیل ایدلمشدی. فقط بو اوچده برده تأدییه ایدلمبور، فرانسهنک اعتباری محو اولبوردی . اهالی ممالک مفتوحه دن آنان تکالیف حرییه ایله یاشایوردی. ثانیاً : ضابطه نك تشکیلاتی بوزوقدی. دیره کتووار پارسده قرالغه منسوب سوءظن اربانه قارشی برترصد وظیفه سی تأسیس ایلشدی. فقط یوللرده هیج ضابطه یوقدی . فراریلره خرسزلر چته لر تشکیل ایدیورلر ، دیلیژانسلری طور دیریبورلردی . ثالثاً : رهبان ایله زادکان مظالمه کرفتار اولشلردی . دیره کتووار قاتولیک مذهبنی منع ایتمه مکه برابر راهبرلی نفی ایتمش ، عودت ایدن مهاجرلری ده قورشونه دیزدیرمشدی .

بوناپارت اولاخزینیه یی تأسیس ایدرک مالیه یی انتظامنه قویدی . خزینسه مأمورلری هب پاره ویره بیلیر وایجابنده قاپاداجقلری پاره یی اوکجه دن ویرمکه مجبور کیمسه لردن انتخاب اولوندی . بوضورتله حکومتک آینه اچجه پاره کچدی . بوپاره ایله بورجک فائضنی اوده یهرک قائمه اصولنه نهایت ویردی . - یوللرده امنیت یی تأمین ایچون عسکر سوق ایدوب بر قاچ حیدودی قورشونه دیزدیرمک کفایت ایتدی . دها صوکرده یوللر تعمیر ایدلدی . - بوناپارت قاتولیکلرک حدتنی تسکین ایچون راهبردن عودت ایتمک ایسته ینلره اجرای آینی سربست

براقدی . مهاجرلره قارشى اجرا ایدیلن مظالمده برآز خفیفلشدی . فقط کاملاً ختام بولمادی . ۱۸۰۷ ده مهاجرلرک تکرار بر اسامیمی ده ترتیب اولوندی .

ایشته بوتلافی مافات ایشلرینه ده ایلک سنه دن اعتباراً مباشرت ایدلدی . بوناپارت عین زمانده تأسیساتده مباشرت ایتدی . تأسیسات ایشلری ده ۱۸۱۱ م قدر دوام ایددی . فرانسه نظاماتنک کافه سنی یکی باشدن یاپدی . بو ایشلری یا شورای دولت و یا خود خصوصی قومیسونلر احضار ایدیوردی . فقط بوناپارتک کیمسه یه اعتمادی یوقدی . بوتون پروژه لری کتیرتیر ، بوتون اصلاحات حقننده بالذات قرار ویرردی . مملکتک بوتون تشکیلاتی ناپولئونک افکارینه موافق بر پلان اوزرینه اصلاح ایدلدی . ناپولئون انقلاب مجلسلرینک احداتاتی ایله اداره سابقه نك بعض عنعناتی وبالذات تصور ایتدیکی بعض نظاماتی ده بو پلانه ادخال ایلشدی .

اداره حکومت هپ (پارس) ده تمرکز ایتدی . ۱۷۸۹ دن اول اولدینی کبی هر نظارته بر ناظر تعیین ایدلدی (برده ضبطه ناظرلنی احداث اولوندی) . شورای دولت اسکی نفوذینی اکتساب ایتدی . ۱۷۸۹ دن اول اولدینی کبی حکومت نظامناه لر حاضر لاق واهالینک حکومت و مأمورین علیهنده کی دعوالرینی رؤیت ایتک وظیفه سنی حائر اولدی .

ناپولئون ولایتده ده مجلس مؤسسان طرفندن احداث

اولونان ایالت ، متصرفلق ، قضا و ناحیه تقسیماتی قبول آیتدی . فقط اموراداره‌یی (انقلاب زماننده قاعده‌دن اولدینی اوزره) انتخابله طوبلانان مجلسره براقق ایسته‌مدی . ناپولئون : «اجرای نفوذ ایتک انحق برکشینک کاری اولابیلیر» دیردی . بناء علیه اداره سابقه‌نک (آنسانانلر) اصوله رجوع آیتدی . تقسیمات ملکیه‌دن هر برینه کندی طرفندن نصب آیدیلوب ارزو آیدلیکی زمان عزل اولونابیلیر برحکومت مأموری تعیین آیتدی : ولایته والی (پره‌فه) ، متصرفلغه (والی معاونی) ، ناحیه‌ی‌ده (بلدیہ مدیری) . والی معیتنده کی (مجلس عمومی) ایله متصرف معیتنده کی (متصرفلق مجلسی) نی ابقا آیتدی . فقط بو مجلسلر آرتق انتخابله اولمایه جقلری کبی هیچ بر صلاحیتی ده حائر بولونمایا جقلردی . یالکز بلدیہ مدیرینک معیتنده کی (بلدیہ مجلسی) انتخابله طوبلاناجقدی .

ناپولئون دوائر عمومیبه ایله برابر دوائر خصوصیه‌یی‌ده یکیدن تشکیل آیدرک ابقا آیتدی .

عدلیه‌ده صلح محکمه‌لری ، متصرفلق محکمه‌لری ، محاکم جنائیه ، ولایتده کی جنایت حکم هیئتی ، محکمه تمیز کبی مجلس مؤسسانک احداثاتی هب ابقا آیتدی . فقط بدایت محکمه‌سی طرفندن ویریلن محکمه‌لری تدقیقه مأمور اولمق اوزره اداره سابقه‌ده تشکیل اولونان استیناف محکمه‌لرینی تکرار قبول آیلدی . منتخب حاکم ارزو ایتدیکی ایچون ۱۷۸۹ دن اول اولدینی

کبی لاینغول حا کملر اضولنه رجوع ایتدی. (اسکی پروکورور و سوبستی توکبی اسملریله) نظارت عمومیه ، دعوی وکیلاری صنفی ، وکیلر ، ضبط کاتبری و مقاولات محررلری کبی انقلابک قالدیردینی بوتون هیئت عدلیه یی تکرار یرلرینه کتیردی . بو صورتله ارباب حقوقه هیچ مثللی کورولمک بر نفوذ بخش ایتدی . اداره سابقه نك صنوف سائره سی او ائنده موجود اولمادینی ایچون بوکا قارشلی طور ایله جک هیچ بر صنف قالمادی .

یالکوز اصول محاکم انقلاب زمانده اولدینی کبی قالدی . محاکم مجانی ، محاکمه علنی ایدی . ناپولئون حکم هیئتلی قالدیرمغه جسارت ایدمه مشدی .

ناپولئون شورای دولت ایله دیوان محاسباتک اداره عدلیه سنی ده تأسیس ایتدی . مامورین انجق شورای دولنده محاکمه اولو ناجقدی . هر ولایتده برر (ولایت مجلسی) تأسیس ایدلدی .

مالیه جهتنده ، ناحیه تحصیلدارلرینک فوقنده اولمق اوزره هر ایالتده برر سر تحصیلدارلق احداث اولوندی . ویرکیلر انقلاب زمانده اولدینی کبی مجلسلر طرفندن توزیع ایدتیوب حکومت مامورلری طرفندن توزیع ایدلدی .

ناپولئون (بلا واسطه ویرکیلری) نصل بولدیسه (یعنی اراضی ، املاک ویرکیلری ایله شخصی ویرکی ، مجلس مؤسساک پانتتالری ، دیره کتووارک قابولر و پنجره لرندن عبارت اولمق اوزره) ینه

اوصورتله محافظه ایتدی . یالکز ویرکیلری طوبلامق ایچون (تحصیلدارتقار) احداث ایلدی . اراضی ویرکیسی ایچون (قداستورلر) تنظیمی امرایلدی . کذا حدودده تأسیس اولونان کمرکلری ده ابقا ایتدی . فقط بو واردات کیفیت ایتدیکی ایچون اداره سابقه نك بالواسطه رسومی قبول ایلدی . اول (حقوق موحد) نامیله مشروبات رسمی ، دهاصو کرده طوز رسمی ، اک صوکندهده (۱۸۱۰) توتون انحصاری وضع ایلدی .

فرانسه نك انقلاب ائناسنده محو اولان اعتباری یوکسلدی . قونوانسیون طرفندن احداث اولونان (دیون عمومی دفتر کیری) ابقا ایلدی . فقط انقلاب کیمتدن دوشن قائمه لری اورتادن قالدیرلدی . ناپولئون صاعلام بر قائمه احداث ایتک ایچون ده احکومت مطلقه زماننده تجربی ایدلمش بر اصول تعقیب ایتدی . (فرانسه بانقه سنی) نی احداث ایلدی . (بانق قائمه لری) نی بوبانقه اخراج ایدمک ، فقط بر شرطه که بوقائمه لره قارشیلق اولق اوزره قاصه سننده بر مبلغ بولوندیراجقادی . بانقه ، حکومت مؤسسسه سی ایدی .

تشکیلات عسکریه انقلاب اداره لرندن اول نه حالده ایدیسهینه او یله قالدی . یعنی قطعات نصف لوالره آیرلمشدی (یالکز بونلره اسکی اسم ، یعنی آلائی نامی ویرلمشدی) ترفیع ، اصالت نظر اعتباره آئماندن ، اهلیته وقدمه کوره ایدی . ناپولئون یالکز ممتاز برقطه ، خاصه قطعه سی احداث ایتدی (بو ، اولاده غاردقونسوله ره

ایکن بالاخره «غاردایمپریال» اولدی . حتی خدمات داخلیه ایچون (غارداناسیونال) ده ابقا ایدلدی . - اخذ عسکر اصولی قونوانسیونک وضع ایلدیکی مکلفیت عسکریه اساسنه مستنددی . ناپولئون ، قونوانسیون طرفندن تشکیل اولونان (اخذعسکر منطقه لری) نی ده ابقا ایتدی . فقط اسکی میلیسارده اولدینی کچی (قرعه) ایله (بدل شخصی) پی قبول ایتدی .

ناپولئون ضابطه خصوصنده هپ اداره سابقه به مراجعت ایلدی . پارسده (ضبطیه نظارتی) ایله غزته سانسورلکنی ، حکومت حبسخانه لرینی تکرار تاسیس ایلدی .

قونوانسیونک احداث ایلدیکی اصول اعشاری ایله اداره سابقه تقویمینی قبول ایلدی . کذا برده شوالیه صنفی احداث ایتمک ارزوسنده بولوندی . فقط بوصف بلا تفریق نسب هرکسه آچیق بولوناجقدی . کذا اسکی برنام تحننده اولارق برده (لژیون دونور) نشانی احداث اولوندی . بونشان کرک حریده ، کرک علوم و فنون ویا صنایعده تمیز ایدنلره ویریه جکدی . بونشان برقچ رتبه به آیراشدی . انلرده شوالیه ، اوفیسیه ، قوماندور الح رتبه لری ایدی . دهاصوکره برده اصالت ایمپراطوریه احداث اولوندی (۱۸۰۶) .

ناپولئون کلیسائی ، تدریساتی و مطبوعاتی ده تنسیق ایدرک نفوذی آلتنه آلمق ایسته دی .

انقلاب اناسنده کلیسا حکومتک معاونتدن محروم قالمشدی .

ناپولئون پاپایله بر (قونقوردا) عتمدايدرك کلیسایي اسکی اساسلر
 اوزرینه تنسیق ایتدی. (۱۸۰۰) ده بو (قونقوردا) یی بعض
 اساسی ماده لره اکیلا ایلدی. بونلر هپ فرانسه حکومتک صلاحیت
 ذاتیه سی ایله اتخا دایدرك فرانسه رهبانسه جبراً تکلیف ایلدیکی تدابیردن
 عبارتدی. قونستی توآنت ایله اداره سابقه کلیسا سنک تأسیس
 ایتک ایستدکاری ائتلافی (قونقوردا) تأسیس ایلدی. ۱۷۸۹
 دن اول اولدینی کبی کلیساینه فرانسه قانوننه تابع اولمایوب فرانسه
 ایله پاپاییننده عقداولونان بر معاهدهیه (قونقوردایه) تابع اولدی.
 ۱۷۸۹ دن اول اولدینی کبی حکومتینه بستقوسلری نصب ایتک،
 پاپاده بونلری تصدیق ایتک حقنه مالک اولدی. کلیسا، اموال
 میریه صر مسنه کچن مالکانه لرندن واز کچدی. ۱۷۹۱ قانون
 اساسیسنده اولدینی کبی حکومت رهبانسه معاش ویرمکی درعهده
 ایتدی. رهبان صنفی تحلیف ایدلمکه مجبور دی. بستقوسلقرده
 ولایتلره عین حدوددا خلنده تنسیق اولوندی. قاتولیکلک آرتق
 ۱۷۸۹ دن اول اولدینی کبی حکومتک مذهب رسمیهی دکلدی،
 یالکز «فرانسزلردن اکثریتک دینی» دبییه ذکر ایدیلدیوردی.
 بوائتلاف فرانسز رهبانئی ناپولئونک الی آلتنه کچیریوردی.
 پاپایی بونی قبوله مجبور ایتک ایچون فرانسه ده قاتولیکلکدن نه
 قالمشسه اوده تخریب ایدیله جک دبییه قورقوتقی ایجاب ایتدی.
 ناپولئون رهبانئی دائماً مامورین حکومتدن عد ایتدی. مثلاً
 «والبرم» دیدیکی کبی «راهبرم» ده دییوردی. ایلک سنه لر

بونلری وقایه ده ایتدی . حتی ۱۸۰۴ ده شورای دولت اعضاسندن برینه : « کندمه جلب ایدمه بیلدیکم راهبر واسطه سیله نه لره موفق اولدیغی بیلیمز سکز . فرانسه ده اولدقجه دیندار تمام اوتوز ایالت واردر . بونک ایچون بوولایتلرده پاییه قارشی مبارزه یه مجبور اولما قلمغ غیر قابلدر » دیمشدی . فقط ۱۸۰۸ دن اعتبار آ پاییه ایله آچیقندن آچینه مبارزه یه باشلانجه ، کندی طرفنی التزام ایچون بسقپوسلری بر مجلس روحانی عقیدینه مجبور ایتمه چالیشدی . کندیسنه قارشی قویانلری عزل و توقیف ایتدیردی . بوک قارشی پروتستوایدن بوتون مدرسه شاگردلرینی عسکره آلیوردی .

تدریسات مسئله سی قونوانسیونی فوق العاده اشغال ایلشدی . قونوانسیون تدریساتک اوچدرجه اولماسنی قاعده اتخاذ ایتشدی . انلرده : ابتدائی ، تالی و عالی ایدی . فقط انجق بر قاق (خصوصی مکاتب) عالیله تدریسات تالییه مخصوص (مرکز مکتبلری) ، و برده (أنستی تو) تأسیسه وقت بولا بیلیمشدی (بوانستی تو ، هم بر نوع علمایه یئتندن مرکب اولاجق ، همده تدریسات علمیه یه مخصوص بره مؤسسه تشکیل ایلیه جکدی) . ناپولئون تدریساتک بوتون درجائی برلشدیردی . (اسکی بر اسمک معناسنی دکیشدیره رک بوکا) اونیه ورسیمته ، دارالفنون (ذیدی . راس اداره سنه بویوک بر معلم تعیین ایتدی . فرانسه یی بر طاقم منطقه لره آیردی . هر برینه (آقاده می) نامی ویردی . هر آقاده می یی بوتون هیئت

اوزرینه صاحب نفوذ بر (ره کتور) ك اداره سنه تودیع ایلدی .
 اداره سابقه دن ده تدریسات علمیه (فاکولته) لرینی آلدی .
 بورژووازی صنفنك طلبی اوزرینه تدریسات تالیه (قولله ژ) لرینی
 تأسیس ایتدی . (باشلیجه شهر لرده کی قولله ژ لرده (لیسه) نامی
 ویرلدی) . کذا مکتبلره اونیفورمه ایله انضباط عسکری . ده
 صوقارق لیلی مکتبلر اصولنی قبول ایتدی . اسکی ره بان قولله ژ لرنده
 اولدینی کبی ناپولئون ده معلملرک بیکار و (پروویزور) ایله
 (سانسور) ك (بواسملر زه زوویت قولله ژ لرندن آلمه ایدی)
 نفوذینه تابع اولمالرینی ارزوایدیوردی . ده اطوغروسوی بو ، مناستر
 ایله قیشله ارمه سنده مختلط بر اصول اولدی . تدریسات ابتدائیه
 ایچون هیج برشی یاممادی . قادیئر ایچون مکتبلر آچمقدن
 امتناع ایتدی . چونکه : « تربیه عمومیه قادیئرله مناسب اولاماز .
 اونلر عموم آرمه سنده یاشامقله مکلف دکلردر . انلرک
 بوتون غایه لری ازدواجدر » دییوردی .

مطبوعات ناپولئونه تهلمکلی بر قوت سمن کوروندی . بونک ایچون
 مطبوعاتی ده اداره ایتمک ایستدی . اولاون اوچ غزته دن ماعدا
 بوتون غزته لری لغو ایتدی . ضبطیه نظارتنده غزته لره نظارت
 ایتمکله مأمور بر مطبوعات قلمی احداث ایلدی . صاحب امتیاز ،
 دائما غزته سی لغو ایدلمکله تهدید ایدیلهرک حکومت طرفندن
 تصویب اولونان مقاله لردن غیر یسنی نشر ایتمکله مجبور ایلدی .
 ناپولئون ده صوکره غزته مدیر لرینی کندی نصب ایتمکله قدر

ایشی ایلری واردیددی. بونلری عادتاً مأمورین دولت صرہ سنه کچیردی. ۱۸۰۴ ده شوپله یازیوردی: « غزتہ لک خاندان حکمرانی یہ تمامیلہ صادق بولونمالرینی و بور بونلرک لہندہ خاطرات تولیدینہ ساعی اولاجق ہر درلو موادہ قارشی مبارزہ ایتملرینی ایستہ مک پک حققیدر. . . حکومتک خوشنہ کیتمیہ جک بر حوادث کلدیکی زمان بوحوادث نشر ایلململی. و اودر جہ تاخیر ایلملیدر کہ نہایت حقیقتدن قطعاً امین اولونجہ بوحوادثی ہر کسجہ معلوم دیہرک نشر دن صرف نظر ایدیلمہ بیلسین». ۱۸۰۵ دە، حرب زمانی دە ضبطیہ ناظرینہ شوپله یازیوردی: « غزتہ لری براز دہا صقیشدیریکز. بونلرہ اپی مقالہ لر یازدیریکز. (دہ با) غزتہ سی ایلہ (بوبلیسیست) غزتہ لری محررینہ آ کلاسیکز کہ چوق کچمز صوکرہ کندیلرندن استفادہ ایتمدیکی کورونجہ سائر غزتہ لرلہ برابر اونلری دە لغو ایدر، یالکز تک بر غزتہ براقیرم. . . آرتق انقلاب دورلری کچدی. بوکون فرانسدہ یالکز بر فرقہ واردر. غزتہ لریمک منافعمہ مغایر یازی یازمالرینہ و حرکت ایتملرینہ ہیج تحمل ایدمم. »

۱۸۰۷ دە آنغلیقان کلیساسی علیہندہ (مہرکور) غزتہ سنہ یازی یازدینی ایچون کہ رارک توقیفی امر ایتمش: «کلیدسالرلہ دعالردن باشقہ یرلردہ مشغول اولوناماز» دیمشدی. (بوبلیسیست) غزتہ سی قونت دولیل دن (اون سکزنجی لوئیدن) بحث ایتمش، بونک اوزرینہ ناپولتون: «بوحریفدن بر دہا بحث ایدمہ جک

اولورسه ، غزته مدیر لکنی در حال آ لندن آلیرم» دیمشدی .
 قانونر رضعی . — قونستی توآنت ، بوتون فرانسه نك
 عین قانونرله اداره اولونماسنی قاعده اساسیه اولارق قبول
 ایلشدی . قانون اساسیده : «عموم قراللق ایچون مشترک قوانین
 ملکیه دن مرکب بر (مجموعه قوانین) ترتیب ایدیله جکدر» دییه مصر حدی .
 فقط بو قاعده اساسیه تطبیق ایدیله مدی . چونکه جنوب
 مرخصلری روما حقوقدن محروم ایدیلهرک حقوق تعاملیه به
 تابع اولاجق لرندن قورقش لردی .

قونوانسیون د، بو قاعده بی اساس طوتدی . « مجله
 احکام عدلیه و جنائیه بوتون جمهوریت ایچون بر در » دیدی .
 ۱۲ اغستوس ۱۷۹۹ ده بو مجموعه قوانینی مذاکره به باشلادی .
 (قامباسرس مجموعه قوانینی) نامیله مشهور بر پروژه تصدیق
 ایدلدی . صوکره بو، بر قومیسونه تودیع اولوندی . اوچ دفعه
 مذاکره ایدیلن بو پروژه ده قانون حالنه وضع ایدلمدن
 بوناپارت رأس کاره کچدی .

۱۸۰۰ دن اعتباراً شورای دولت (قودسیویل) ی حاضر-
 لانه مامور اولدی . ناپوئون ارباب حقوقدن مرکب بر
 قومیسون تشکیل ایتدی . مجله بی بو قومیسون تدقیق ایتدی .
 بمضامناقشاده برنجی قونسولوس ده حاضر بولونیور ، اوده کندی
 رأینی بیان ایدیوردی . قومیسون اساساً قونوانسیونک
 یابدق ریله زمینی حاضر لائمش بویوردی . بونک ایچون آرزمان

ایچنده بر (قودسیویل) وجوده کتیردی . بو مجله مجلس مبعوثان طرفندن بالتصدیق اعلان ایدلدی . (قودسیویل) ، آرامنی و ازبرله مکی قولایلاشدیرمق ایچون صره نومروسيله ، ماده ماده یازلمشدی . بونده بوتون فرانسه ایچون ۱۷۹۹ دن اول مملکتی اداره ایدن اسکی اداره دن آلمنه یکنسق قواعد حقوقیه تأسیس ایدیلیوردی . تصرف ایله مقاله لر روماحقوقی اساسنه نظر آیدی . حقوق شخصییه ایله وراثت ایچون پارس تعاملی قبول ایدلمشدی . ازدواج ایچون ده هم حقوق تعاملیه دن آلمان اصول اشتراك ، همده روماحقوقندن آلمان اصول جهاز محافظه ایدلمشدی . (قودسیویل) . او قدر چابوق آیشلمشدی که فرانسه یه الحاق اولونان مملکتلر ۱۸۱۴ ده فرانسه دن آیرلقدن صوکراده بونی محافظه ایتمک ایسته مشلردی . بو سببدن ، او زمانک تعبیری وجه ایله (قود ناپولئون) بلجیقاده و (رهن) نهرینک صول ساحلی ایله ایتالیاده ده مرعی الاجرا اولمشدی . دهاصوکره آغر آغر دیگر مجله لرده قلمه آلدی . بو ایش انجق ۱۸۱۱ ده ختام بولدی . اوزمان فرانسه مکمل بر مجموعه قوانینه مالک اولدی . بو بش مجموعه قوانین : احکام عدلیه ، تجارت ، محاکمات حقوقیه ، قانون جزا و محاکمات جزائییه مجله لری ایدی .

- بو قانونلر هیئت عمومی ایله فرانسه یی انقلاب قواعد اساسیه سنه نظر آ تنسیق ایدیوردی . اولاً : بوتون مملکت عین

قواعدہ تابعدی . کذاحقوقچہدہ مساوی ایدی کہ، قرالدر بونی ہپ
 آرزو ایتشلر ، فقط تأسیسه موفق اولاماشلردی . ثانیاً :
 قانون نظرندہ ہرکس مساوی ایدی . قانوناً ہیج بر امتیاز
 معتبر دکلدی . بو ، قانون نظرندہ مساوات دیمکدی . —
 وطنداشلرینندہ مساوات . ہرکس عین مأموریتلرہ کچہبیلہ جک ،
 عین تکالیفہ تابع اولاجق ، عین قواعد نظرأ محاکمہ اولونا .
 جقدی ؛ — وراثندہ چوجقذرینندہ مساوات . ہر چوجق
 سن وجندی نظر اعتبارہ آلمیہرق میراندن مساواتاً حصہ مند
 اولاجقدی ؛ — اجنبیلرینندہ مساوات . ہر اجنبی فرانسدہ
 فرانسزلر کبی تجارت و وراثت حقنہ مالک اولاجقدی ؛ —
 عباداتدہ مساوات ؛ — املاکدہ مساوات . آرتق اہالی
 شخصی خدمتکارلقذر آئندہ زبون اولمایہ جقدردی . ثالثاً :
 قانون افرادک حریتی محافظہ ایدیور ، مہمہ وطنداشلری
 واسطہ سبلہ علماً محاکمہ ایدمک وکندینی بر آووقات واسطہ سبلہ
 مدافعہ ایتدیرمک حقنی بخش ایدیوردی . چوجفہ سن رشده
 واصل اولدقدن سوکرہ حریت ، زوج و زوجہ یہدہ حق طلاق
 بخش ایدیوردی . ہرکی ایستہ دیکی دینی انتخابدہ ، چایشمقده ،
 زراعتدہ ، اعمالاندہ ، نقلیاتدہ ، فائضہ پارہ ویرمکدہ حر
 براقیوردی . آرتق بو ، (حریت شخصیہ) نک تأسی دیمکدی .
 فرانسه ، اتحاد ، مساوات وحریتدن پک چوق قازانمشدر .
 امرہ نافعہ . — رومالیلر کبی نابولٹون دہ غایت جسمیم

امور نافعه دن حظ ایدر ، زمان اداره سنی شرفلی و نامدار قیلمق ایچون بونی برواسطه تلتی ایلردی. ناپولئون ده رومالیبر کبی اردولرینی سوق ایتمک ، ایمپراطورلنک اقسام مختلفه سنی یکدیگرینه ربط ایتمک ایچون یوللر ، شان و شرفنی اخلافه انتقال ایتدیرمک ایچون ده آبدلر انشا ایتدیرمشدر .

باشلیجه یوللر : (پرووانس) ایله ایتالیایی بربرینه ربط ایتمک ایچون (طولون) ایله (نیس) ارمسندنه بحر سفید ساحلی بویجه قایالرا ایچندن آچیلان (قورنیش یولی) ؛ (رهن) نهرینک وادیء علیاسنه چیقهرق (واله طرفلری) (سه مپلون) کچیدندن ایتالیایه و (تهسن) نهرینک وادیء علیاسنه اینن (سه مپلون یولی) ایدی .

اک مشهور آبدلر ده پارسده رکز ایدلمشدی : رومانک ترازان ستوننه تقلیداً یاپیلان (واندوم ستونی) ۱۸۰۵ سفرنده دشمندن آنان طوبلرک طونجی دوکیلوب یاپیلشدی. بو ستون اوزرنده ۱۸۰۵ حربنک منظره لرینی کویسترر قابتمه لرواردی. - (تویلوری) میداننه انشا اولونان (قاروسهل طاق ظفری) ده ازمئه قدیمه تقلیدی ایدی . بو طاق ظفر تیتوس طاقنک عینی اولوب اوزرنده ناپولئونک وندیک میداننده ، (سن مارق) دن کتیردیکی ایکی طونج بارکیر واردی . بو بارکیرلر ۱۸۱۵ ده استرداد ایدلمشدر . - پارسه غرب طرفدن حاکم بر تپه اوزرینه انشا اولونان (نه توال طاق ظفری) ده ناپولئون

حربلرینک خاطر اتی محافظه ایچون یابیلمش بر اثر موجودانه ایدی . بورایه ناپولئون جنراللرینک اسملری یازلمشدی . — ناپولئون برده (معبد شان) نامیله بر آبدہ پروژہ سی موقع مسابقہ یه وضع ایلشدی . بو معبدده بوتون جنراللرینک رسمی بولونادہ جقدی . بنا ، یونان معبدی طرز زنده انشا ایدلمش ، و ۱۸۱۴ده همان همان بیتمشدی . فقط صکره بو ، (مادله ن کلیداسی) نه تحویل ایدلمشدر . کذا کمرلی جبهہ سی ایله (ریوولی سوقاغی) ، (فونتن دهزه) ، (قور له ژیسلاتیو) ، (بورسه) ، (برسی شراب آنترپوسی) هپ بو زماندن قلله در .

علوم ، ادبیات ، صنایع . — ناپولئون ، دور حکومتنک فتوحات و احداثات ایله مشهور اولدینی کبی آثار جسیمه علمیه و صنعتکارانه ایله ده شهرت بولماسنی ارزو ایدردی . علمایی ، محررلری و صنعتکارلری مکافاتلر و رتبه لرله تشویقه غیرت ایلر ، حتی «قورنهی زمانده یاشامش اولسه ایدی ، اونی برپرنس یاپاردم» دیردی . غرو ، کهرار کبی رساملره ، لاغر اثر ، لاپلاس ، مونتر و سائره کبی عالمره بارونلق و پرر ، عسکرلر و مامورلر ایچون اولدینی کبی لژیون دونور نشاننک عالمره و صنعتکارلر ده ویرلمسندقت ایدردی . حتی بونلره معاشلر و یرمش ، اون سنه ده بر ۱۰۰۰۰۰ فرانقلق مکافاتلر تاسیس ایلشدی . فقط ناپولئون حرب و سیاستی نصل اداره ایدرسه علوم و صنایعی ده اویله اداره ایتک ایستر ، علوم و صنایعی هر کسک کندی

کبی آ کلاماسنی ارزو ایدردی . - شاطو بر بیان ایله مادام
دوستانهل، خوشنه کیمین فکر لر بیان ایتدکاری ایچون زماننک
بو ایکی بویوک محررینه اذیتلر ایتمش ، اثرلرینی مصادره
ایتدیرمشدی . - کذا حادثات جو یه علمی ایله مشغول اولدینی
ایچون طبیعوندن لامارقی علناً تشهیر ایتدیرمشدی . - موزیقینی
غایت کورولتیلی بولدینی ایچون شهروینی بی حمایه دن واز کچمشدی ،
ناپولئون تیاتروی حاکم مطلق کبی اداره ایدردی . زادکانک
له ویا عامهنده نمایشر اجراسنه وسیله اولابیلیر دیهرک دووالک
ایکی پیه سنک اویناماسنی منع ایتمشدی . اسپانیوللر عصیان
ایدردیه اسپانیولجه بر موضوع اوزرینه یازیلان (دون سانش)
نامنده بر پیه سی منع ایتمش ، بونک اوزرینه مؤلف ، وقعه یی
(آتوریه) یه تحویل ایدرک آدینی (نینوس) قویغه مجبور اولمشدی .
ژ . شه نیه ایله ن . لومه رسیه نک پیه سلری هیچ اوینا نامزدی .
سبی ده ناپولئونک بو مؤلفلردن حظ ایتمه سی ایدی .
ناپولئون ، زماننک علوم و صنایعی اوزرینه اجرا ایتک
تصورنده بولوندینی نفوذی یه اجرا ایدمه مشدر .
علوم ، فوق العاده ترقی ایتمشدی . فقط انکلتزده اولدینی
کبی فرانسه ده ناپولئوندن اول هانکی طریقی طوتمشسه
او طریقه انکشافه دوام ایلشدی .
علوم ریاضیه خصوصاً لافرانز ، لابلاس ، موئزو ،
هیئت شناس لالاند دوری ایدی . فقط بونلرک کافه سی اوعصرک

اواخرندن اول یتشمشردی . حتی لاپلاسک (مسلك عالمك
ایضاحی) (۱۷۸۶) و (میخانیک هوائی) (۱۷۸۸) نامیله علم
هیئت بسبتون یکیشدیرن ایکی بویوک اثری دیره کتو واردورنده
انتشار ایلشدی .

حکمتده کهی - لوساق و آراغو ؛ کیمیاده کویطون
دومورو، بهرطوله، فورقرووا، ووقلهن، تهناز؛ علوم طبیعیده
لامارق، کووییه، ژه فرووا سنت هیلهر، نباتات متخصی
لوران دوزوسیو، علم منافع الاعضا متخصصلرندن یشایله قابانه،
هپ اون سکزنجی عصرک رجالندن ایدی . بونلر ناپولئون
دورنده، ذاتاً اولجه باشلادقلری شیلره دوام ایتمشردی .

ناپولئونک تأیری اک زیاده ادبیات اوزرنده کورولدی .
حکومتک تشویقاتی، اهالینک آرتق رغبت ایتمهکه باشلادینی
اون سکزنجی عصرطرز ادبیاتندن بعضیلرینک دوامنه بادی اولدی .
انلرده (ره نوار، ژووی، لوس دولانسی وال طرفندن) وولنر
طرزنده یازیلان فاجعه لر؛ (قامیه نون، قونتان، برینو، دوریون
وسائرئنگ) قصیده لری؛ دهلیل، سن لامبر، لوغووه
وشه نودولله نك) توصیفی شعرلری؛ (پیندار) لقبی حائز اولان
لوبرونک لیریک شعرلری ایدی . بو طرز ادبیاتده هیچ برهم
اتر وجوده کتیرلمدی . فقط تاریخی درام، شرقی و رومان کبی
یکبیر طرز ادبیات وجوده کلدی . مشهور ایکی محرر، (مارتیر)
(۱۷۰۹) و (ژه فی دوقریستیانیم) (۱۸۰۲) سی ایله

شاطوبرریان ، (آلمانیا) (۱۸۱۰) سی ایله مادام دوستانهل فرانسهده روماتیک طرزینه باشلادیلر (۱) . هر ایکسیده ناپولئون ایله اوغراشدقلری ایچون فرانسه خارجنده یاشامغه مجبور اولدیلر . حتی ایمپراطور ، لندن برشی کلدیکنی حس ایدر کبی اولمش ، فوتانه : « ادبیات عادیه لهمده ، ادبیات عالیده علمده دره دیمشدی .

ناپولئون صنعتکارلرله پک خوش کچیندی . ذوقی زماننک ذوقنده لویغون دوشدی . صنایعی طبیعی صورتده داخل اولاجنی طریق داخلنده تشویق ایتدی .

اون یدنجی عصردن بری معماریده ، اون سکزنجی عصردن بری ده هیکلتراشلقده پک زیاده اجرای تأثیر ایدن ازمنه قدیمه مقلدلی یاغلی بویا رسمه قدر انتشار ایدی . اوزمانک الکبویوک رسامی ، داوید (۱۷۴۸ - ۱۸۲۵) ایدی . داوید (ساینلر) و (ترموییلده لئونیداس) کبی هب اسسکی موضوعلر وجوده کتیردی . انقلاب وایمپراطورلق دورنده ، رسمده هب داوید مسلکی حاکم اولدی . بومسلکک باشلیجه سالکلری ژرار ، زیرووه و محاربه رسامی ضر وایدی . پرودون (۱۷۵۸ - ۱۸۲۳) بومسلکک داخل اولامشدی . ژریقو و انفر کبی کنچ رساملرده چیقمنه باشلایورلردی .

(۱) بودورک دیکراکی محرری ، ژوزف و قیساویه دومه ستر ، ساردنیا قرالنک تبمه سی اولوب صاواوا جنتلمنلرندن ایدی .

هیکل تراشلقده پک آز بویوک اثر میدانه کلدی . قارته لیه ،
 نه باریسی یو ، زیرو کبی فرانسز هیکل تراشلری معاصرلرندن
 دانیمارقه لی طوروالدزمن ایله ایتالیالی قانووادن پک کری
 قالمشردی .

ناپولئونک آبدولرینی انشایه مامورایتدیکی په رسیه ، فونتهن ،
 شال غره ن و برونیا رکبی معمارلر هپ اشکال عتیقه یه تقلیده دوام
 ایلدیلر . بوسبیدن موجدانه هیج برطرز تشکل ایده مدی .
 موسیقیده ایسه مه هول ، لوزو تور ، وشه روینی کبی انقلاب
 دورینک بویوک بسته کارلرندن باشقه کیمسه ظهور ایتدی .
 ناپولئونده پای زییه للو ، پائه و صپون تینی کبی ایتالیان موسیقی
 شناسلرینی تشویق ایتدی .

سکرنجی فصل

ناپولئونک اوروپا ایلہ مبارزہ سی

اوروپا دہ صلح و مسالمت . -- جمہوریت پرور فرانسه ایلہ مطلقیت ادارہ یی حائز اوروپا ارہ سندنہ حرب ۱۸۰۱ . قدر دوام ایتدی . ناپولئون فرانسه یی ۱۷۹۸ دہ تشکل ایدن بیکی براتحادہ قارشی محاربه ایلہ مشغول بولشدی . بو اتحاد ، (انگلترہ ، آوسٹریا و روسیہ کبی) درت دولت معظمہ دن اوچی ایلہ ایتالیا پر نسلرندن متشکلدی . متفقہ ایتالیائی استرداد ایتشلر ، فرانسه یی دہ استیلا یہ تشبث ایلہ مشلردی . فقط فرانسه حدودینہ کلزدن اول دہا اسویچرہ ایلہ فلمنکدہ (۱۷۹۹) ایکن کری یہ پوسکور تولشلردی . ناپولئون دہا صوکرہ روسیہ چارنخ دہ حرب دن چکلہ مکہ راضی ایتمش ، آوسٹریا ایلری ایتالیا ایلہ جنوبی آلمانیا دن طرد ایتمش ، انگلنزلرہ رغماً مصری آلدہ ایتمکن صرف نظر ایلشدی . ایشتہ اوزمان بوتون اقوام طرفندن ارزو ایدیلن صلح و مسالمت عموم آوروپا دہ تأسس ایلشدی . فرانسه بوتون آوروپا یہ قارشی قبول ایلدیکی نظامات جدیدہ یی ، الحاق ایلدیکی ممالکی ، کنڈیسنہ جلب ایدوب نفوذی آلتنہ آلدینی (فلمنک ، اسویچرہ ، ایتالیا مملکتلری واسپانیا کبی) متفقہ لری ینہ محافظہ ایدیور دی . انگلترہ ، ضبط ایتمش اولدینی مستملکہ لری فرانسه ایلہ متفقہ لری ینہ اعادہ ایدیور ، فقط ینہ اک بویوک

بحری و مستملکه صاحبی حکومت اولمق اوزره قالیوردی. آوستریا پروسیا و روسیه کبی غربدن فرانسه طرفندن پوسکورتولن شرقت اوج بویوک دولتی ده پولونیایی آرم لرنده تقسیم ایدرک تلافیء مافات ایتمشلردی (۱۷۹۳ و ۱۷۹۵). آوستریا حکومتی ایسه، فضله اولارق، وندیکنک تصرفنده بولونان برلری ده الحاق ایدرک آدریاتیق دکزبنه قدر توسیع ممالک ایلشدی.

رول معظمه ایدر اهنه وفات. — صلح انجیق ایکی سنه دوام ایده بیلدی. یالکز ایکی مسئله موضوع بحث اولیوردی که، انقلاب بونلری حل ایدمه مشدی. اولاً: اوروپای وسطاده کی اوافق حکومتلری (آلمانیا و ایتالیایی) کیم سوق و اداره ایدمک؟ ثانیاً: دکزلره و مستملکه لره کیم حاکم اولاجق؟ ایشته بویاکی مسئله حقننده ناپولئونک سیاستی دیکردول معظمه سیاستیه بردرلو اوپوشمادی

اولاً: ناپولئون اوروپای وسطاده کندی حاکم اولمق و اوافق حکومتلرک حدود و اداره داخلیه سنی یالکز باشنه تنظیم ایتمک ایستیوردی. باتاویا، هولوه تیا، لیکوریه و سیزالپین جمهوریتنک قانون اساسیسی کندی صلاحیت مطلقه سی ایله تبدیل ایدیور، بوتون قوم مشورلرینی فرانسه ایله تدافعی و تعرضی براتفاق عقدینه مجبور ایدیور، اجرا ایدمک لری حر بلرده اناری دونمالرینی، اردولرینی و پارولرینی تسلیمه اجبار ایلدیوردی. ده اطوف و غروسی بو، فلمنک، اسویچره، ایتالیا و اسپانیایی فرانسه یه خراجگذار

مملکتلر صرہ سنہ ایندیر مکدی . ناپولئون اراضی بی کندی فکرینه کوره دوزہ لئیور ، طوسقانا دو قلعنی (آتوری قرالغنی) یاپوردی . دھا ۱۸۰۲ دە (بیہ مونت) ی فرانسیہ الحاق ایتمش ، شو صورتله آلپ طاغلیرنیک حدود طبیعیسنی تجاوز ایتشدی . کذا آلمانیا دهرن نهرینیک صول ساحلندہ کی یرلرینی آلرندن چبقارمش اولان رهبانک غیری پرنسلرہ وعد اولونان تضمیناتی دە یولنہ قویمق ایجاب ایتشدی . بومعاملہ (دیہت) مجلسی ویآ بر آلمان قونفرہ سی طرفدن یاپیلما لیدی . فقط دیہت مجلسندہ قاتولیک فرقه سی ایله آوستریا طرفدارانہ اکثریت قازاندر مقده اولان حکومت رهبانیہ بی محودن وقایہ ایچون ایمبراطورک اولدقچہ قوتلی اولماسی لازمدی . بونک ایچون ناپولئون رهبانک غیری اولان آلمان پرنسلر یله طوغرودن طوغرویہ او یوشمای بی ترجیح ایتدی . بو پرنسلرک ہربری ، فرانسیہ ایله کندی ناملرینہ مذا کرانده بولونمق اوزرہ بر مرضخص کوندر دیلر (ایلک دفعہ پروسیا قرالی ایله باویہ را دو قی نمونہ امتثال اولدی) . ناپولئون آلمان مملکتلرینی کویا کندی مالی کی ادارہ ایتدی . (رهبان حکومتلری ، سربست شہرلر ، قونتلقلر وسہ نیورلکلر کی) اوافق حکومتلرک کافہ سنی محوایلدی . بونلرک یرلرینی آلمانیا دہ کی رهبانک غیری پرنسلرہ ویردی . بونلر اولجہ قرارلاشدیرلیدیگی کی یالکیز تضمینات آلقلہ قالدیلر ، یرلرینی دە بویولندیلر (۱۸۰۳) . ایمبراطور دھا او صرہ دە فرانسیہ تابع بولونان

(ا کس لاشاپل) . کلدیکی زمان ، کندیسنه کویا بر آلمان
 ایمر اطورینه ایدیلن حرمت درجه سنده احترام ایتدیردی .
 اوستریا حکومتی ایتالیا ایله آلمانیا ناپولئون بر اقق ایسته میوردی .
 چونکه بورالده ایمر اطورک تمام بر عصر دن بری هر کسجه معلوم
 بر نفوذی واردی .

ثانیاً : ناپولئون دکزده و مستملکاتده یالکیز باشنه حاکم
 اولق ایسته میور ، بو حاکمیتی انکلتره ایله پایلاشوق ارزو
 ایدیوردی . ناپولئونک معینده یالکیز فرانسهز دونمسی
 بولونمیور ، فلمنک و اسپانیول دوناملاری ده بولونیوردی .
 ناپولئون فرانسهیی مستملکات حکومتی حالنه کتیرمک
 ایستیوردی . ذاتاً (لوتی زیبان) ی یعنی (میسسی سیپی نک غریبنده کی
 شمالی آمریکا قسمی) اسپانیادن آلمش ، عصیان آیدن زنجیلردن ده
 ۱۷۹۳ دن بری (هایتی) بویوک آطه سنی آله کچیرمشدی .
 ناپولئون یالکیز فرانسهز مستملکاتلرینی دکل ، اسپانیا و فلمنک
 مستملکاتلرینی ده فرانسه تجارتنه آچیق بولوندیرمق ایستیور-
 دی . - انکلیزلر حرب اتناسنده فرانسه و متفقلرینک
 مستملکاتلرینی اشغال ایتمشلر ، حرب کیلرینی محو و تجارتی
 توقیف ایلشلردی . دکزله انجق کندیلری حاکم اولدولرندن تجارت
 کیلرینی ده کندیلرندن باشقه کیمسه کوندره مزاولمشدی . انکلیزلر
 اوروپا ، آمریکا و هند تجارتی صرف کندیلرینه حصر
 ایتمشلردی . بناء علیه حرب ، انکلیز کیجیلری ایله انکلیز ارباب

صنایعی بک زیاده زنگینلشدیرمشدی . فقط صلح بونلرک تجارت انحصارینی آلرندن آلارق کارلرینی ده تنقیص ایتدی . فرانسزلر آرتق انکلیرلره بوتون بیاسه لرده رقابت ایچون سربست قالمشلردی . حتی فرانسزلرک کندی متفقلمی طرفندن سهولت کورمک کبی فائده لری ده واردی . (آمین) معاهده سی انکلیرامته سنک امتیازات سابقه سنی بیله تأسیس ایده مه شدی . فرانسه ايله متفقلمی یوکسک تعرفه لر وضع ایدرک بوکا مانع اولابیلیر - لردی . بوسیدن انکلیرتاجرلری ايله رجال حکومتی ، صلحک انکلتره ایچون فنا بر معامله اولدیغنی آ کلامشدر و حربه تکرار باشلامق ایچون ایلک فرصتدن استفاده ایتمشلدر . بونک اوزرینه ۱۸۰۳ ده تکرار حربه مباشرت ایدلشدر .

ناپولئون قارشى اتحادلار . — ناپولئون سیاست تجاریه سی ايله انکلتره نك ، اوروپا سیاستی ايله ده آوستریانك و متفقلمی بولونان حکومتلرک دشمنی ایدی . فقط ناپولئون قارشى حرب ایتمک ایچون انکلتره نك اردوسی ، آوستریا ايله روسیه نك ده یاره سی یوقدی . بو حکومتلر ناپولئون قارشى انجق بریره کله رک حرکت ایده بیلیرلردی . بناء علیه منافع مشترکه انلری برلشدر - یرمش ، تمام اون سنه دول معظمه اره سنده بربرینی متعاقب فرانسه حکومتنه قارشى اتحادلر تشکیل ایدلشدی . انکلتره دکزده محاربه ایدیور ، قرده محاربه ایتمک ایچون ده دول سائریه یاره تدارک ایلیردی . ایشته بوضورتله هر ایکی زمین

اختلاف اوزرنده قارشیلقلی ایکی مبارزه وقوعه کلیوردی. فقط بو حرب اساساً انکلتره ایله ناپولئون ارمه سنده بر دونللودن عبارت بولونیوردی .

حربه ایلك اوکجه انکلتره بحری بر حربله باشلادی . ناپولئون کندی دونانماسنک اسپانیا و فلمنک دونانماریله ده برلشدیکی تقدیرده انکلیزدونانماسنه فائق اولامیه جغنی آکلادی . بونک اوزرینه حربی بر حرب بری به تحویل ایتک ایسته دی . اول امرده ایکی دفعه ، آغستوس و تشرین اول ۱۸۰۴ ده ایرلاندايه عسکر چیقارمغه تشبث ایتدی . صو کرا اردوسنی (بولونیا) ده طوپلادی . دونانماسی طوپلانوبده انکلیز کیملرینی قانالان اوزاقلاشدیرر اوزاقلاشدیرماز اردویی انکلتره به نقل ایتکک حاضرلاندی . بونک ایچون ایکی کون کافی ایدی . فقط ناپولئون دونانماسی انکلیز کیملرندن قورتولامادی . انکلیز کیملرینک تعقیباتنه اوغرایارق نهایت (طرافالغار) ده محو اولدی (۱۸۰۵) . بونک اوزرینه ناپولئون انکلتره به قارشى تعرضه کچمکدن صرف نظر ایتکک مجبور اولدینی کبی فرانسه تجارت بحریه سنی ده مدافعه دن واز کچمکک مجبوریت کوردی . انکلیزلرده دکزله حاکم قالدیلر .

ناپولئون دکز جهتمدن امیدى بوشه چیقنجه قره به طوغرو آتیلدی . ذاتاً فرانسه خاندان قرالیسنه منسوب بر پرئسی ، دوق دانکیه نی بیطرف براراضیده توقیف ایتدیروب قورشونه

دیزدیردیکی ایچون اوروپا حکمدارلرینک فوق العاده حدتی جلب ایلشدی. آوستریا ایمراطوری فرانسوا ایله روسیه چاری برنجی آلکساندر و پروسیله قرالی اوچنچی فره دریق کیلیوم یکدیگرینه بسبتون تقرب ایتدیلر. یالکیز باشه سائر حکومتلرک کافه سندن دهه زیاده حائر اقتدار اولمق کبی برتهلکه حاصل ایدن ناپولئونی آرتق طور دیرمغه چالیشدیلر.

ایمراطورله چار براتفاق عقد ایتدیلر. فقط صرف تدافی اولان بو اتفاهه پروسیا قرالی داخل اولمادی (۱۸۰۴). چار ایسه متفقنه هیچ خبر ویرمدن طوغرودن طوغروه انکلتزه ایله بر معاهده عقد ایتدی (نیسان ۱۸۰۵). بونک اوزرینه آوستریا حکومتی دهه حاضر لائماندن حر به کیریشمکه مجبور اولدی. ایشته انکلتزه ایله شرق دولتلری ارمه سنده ناپولئونه قارشی ایلك اتحاد بو صورته تشکیل ایدلدی. فقط بو اتحاد مکمل دکلدی، چونکه پروسیا قرالی داخل اولمامشدی. پروسیا قرالی آلمانیا جهتنده ناپولئون طرفندن تهدید ایدلمکدن زیاده پولونیا جهتنده آلکساندر طرفندن تهدیده معروض اولدیغنی حس ایدیوردی. فقط آوستریا لیلرک (اولم) وطونه اوزرنده کی ایلك مغلوبیتلرندن صوکره اتحاده قرار ویرمش ایدیه ده اوزمان ده ایش ایشن کچمشدی. ناپولئون آوستریا و روسیه اردولرینی (آوستریلیج) ده محو ایتمش (۲ کانون اول ۱۸۰۵)، ایمراطوری صلح طلبنه مجبور ایلشدی.

ناپولئون آوستریادن قورتولنججه آوستریا ایله کندی
 بیننده منازع فیه اولان بوتون مملکتلر اوزرینه حاکمیت کامله
 تاسیس ایتدی . ایتالیا ده ناپولی قرالغنی بوربونلردن آلوب
 قاردشی ژوزف ویردی . فلمنک جمهوریتنی برقراللق یپارق اونو ده
 قاردشی لوئی به تودیع ایلدی . آلمانیا ده اسکی جرمن حکومتنی
 کاملاً اورتادن قالدیردی . ۱۸۰۳ ده اولدینی کبی آلمانیاک
 ره بان اولمان پرنسلیله طوغرودن طوغروهه معاهداته
 کیریشدی . بونلرک اراضیسی سربست شهرلره کلیسا مالیکانه -
 لرندن قالان اراضی ایله توسیع ایتدی . ایلری کلنلرینه یکی
 یکی عنوانلر ویردی (ایکی قراللق ایله ایکی بویوک دوقلق احداث
 ایتدی) . ده صوکره آلمان پرنسلرندن اون آلتیسی ایمپرا -
 طورلقدن آیرلقلرینی بیان ایدرک (ره هیئت متحده سی) نه
 داخل اولدیلر . بونلر ناپولئون بر (حامی) صفتیله طانیورلر ،
 حرب وقوعنده کندیسنه ۶۳۰۰۰ کشی تدارک ایلمکی درعهده
 ایدیورلردی . فرانسوا آلمانیا ایمپراطوری عنوانندن واز کچرک
 او تاریخدن اعتباراً آوستریا ایمپراطوری لقبنی حائز اولدی
 . (۱۸۰۶)

ناپولئون ایشته بو صورتله جنوبی و غربی آلمانیا به حاکم
 اولدقدن صوکره شمالی آلمانیا ده حاکم اولغه چالیشدی . انکلتره
 ایله باشلادینی حربک دهها بدایتنده ، ۱۸۰۳ ده ، (انکلتره
 عائله قرالیسی مالیکانه سندن بولونان) (هانوورا) بی اشغال

ایتدیرمشدی . ناپولئون بوراسنی (قله و) دو قه لخنه مقابل
 آلمنه پروسیا قرالی مجبور ایتدی . بو صورتله پروسیا
 حکومتی ارزوسی خلافنه اولارق انکلتره ایله حربه سوقدی .
 (کانون اول ۱۸۰۵) . دهاصوکره انکلتره حکومتی ایله مذاکراته
 کیریشه رک (هانوورا) بی اعاده ایده جکنی وعد ایتدی (۱۸۰۶) .
 ایسته بو صورتله پروسیا قرالی اوافق بر آلمان پرنسی معامله سی
 کورمش اولیوردی . آرتق قرالنی دول معظمه اره سنندن ده
 چیقهمشدی . پروسیا ایکنجی فرهدریق دورندن بری شمالی
 آلمانیا اوزرنده موجود نفوذینی ده غائب ایده جکدی . فقط پروسیا
 قراللق مرتبه سنی محافظه ایچون حربی کوزه آلدیردی . اوصره ده
 ناپولئون اردوسی ده آلمانیا ده ایدی . پروسیا ، اتحاد تشکیکنه ده
 وقت بولامادی . بوتون حربی یالکز باشنه اوزرینه آلدی .
 اردوسی محو اولدی . بوتون قرالنی فرانسزلر طرفندن اشغال
 ایدلی (۱۸۰۶) .

۱۸۰۶ سپنسی ناپولئونک احوالنده بر تبدل حصوله
 کتیردی . اولاً: انکلتره ایله مذاکرات منقطع اولدی . ناپولئون
 آرتق انکلتره ایله مصالحه ایتمکی هیچ عقلنه کتیرمیه رک انکلتره بی
 محو ایتمکدن باشقه برشی دوشونمادی . ثانیاً: ناپولئون اوزمانه
 قدر یالکز اورویای وسطایه حاکمیتله اکتفا ایتمش ایکن بوسفر
 اورویای شرقی ایشلرینه ده قاریشارق شمالی آلمانیا ایله پروسیا
 و پولونیایی ده آلی آلتنده بولوندرمق ایسته دی .

بری آبلوقه . — ناپولئون ، دونانامی اولمادینی ایچون انکلتره یه طوغرودن طوغرویه تعرض ایدهمیه جکنی آکلاینجه انکلتره تجارتی محو ایتمک ایچون قره لرده حائز اولدینی حاکمیتدن استفاده ایدرک بو مقصده بالواسطه نائل اولوق ایسته دی . دها پروسیا ایله حربی بتیرمدن (برلین بیاننامه سی) نی نشر ایدرک (کانون اول ۱۸۰۶) (بری آبلوقه) نی تأسیس ایتدی .

بوتون آوروپا اقوامی طرفندن قبول ایدیلن قاعدۀ عمومییه نظرآ ، حرب حالنده بولونان بر مملکتک لیمانی دشمن بر دولتک دونانامسیله آبلوقه ایدیله جک اولورسه هیچ برکمی ، بیطرف بر ملت کیسی بیله بولیمانه کیره مزدی . حتی انکلتره حکومتی ، لیمانی حقیقۀ آبلوقه ایتمکده لزوم کورمیوب یالکز لیمانک (آبلوقه حالنده) بولوندیغنی اعلان ایدنجه بورایه بیطرف کیملرک کیره میه جکنی ادعا ایدردی . ناپولئون بو ادعایه بوتون قره لره تشمیل ایتدی . اوروپاده هیچ بر فردک انکلتره ایله تجارت ایتمه سنی اعلان ایلدی . آراتق قره لیمانلرندن هیچ برینه انکلز کیسی قبول ایدلمه جک ، هیچ بر آوروپا کیسی انکلتره نك ویا مستملکاتنک لیمانلرینه اوغرامیه جقدی . بوممانت انکلز امتعه سنه ده تشمیل ایدلمشدی . فرانسه تبعه سی ایله بوتون حکومت برینه نك انکلز امتعه سی نقل ایتملری منع ایدلمشدی . عکس تقدیرده کیملر مصادره ایدیله جک ، امتعه ده حکومت حسابنه صائیلاجقدی .

ناپولئون، فابریقه لرینک، معدن او جاقلرینک و مستملکده-
لرینک محصولاتی اخراج ایتمکدن و دائماً محتاج اولدقلری بغدادی
و اودونی تدارک ایلمکدن انکلیزلرنی محروم ایدرک انلری محو
ایدرم امیدنده بولونیوردی .

انکلتزه حکومتی ده ناپولئونک بیاننامه سنه (مشاوره نتیجه سی
اولارق ویریلن اسرلر) له مقابله ایتدی . بواسرلرده هانکی ملته
منسوب اولورسه اولسون هر هانکی برکمی برانکلیز لیماننه اوغرا مادن
برئی لیمانلره اوغرایاجق اولورسه او کینک حجز ایديله جکی بیان
اولونیوردی . یعنی بوندن بویله بوتون تجارت انکلتزه ایله
یاپیلاجق دیمکدی . - بونک اوزرینه ناپولئون هانکی کمی
انکلتزه دن کچه جک اولورسه او کینک (ترک ملیت ایتمش) یعنی
انکلیز عد اولوناجغنی ، و مصادره ایديله جکنی بیان ایتدی .
بو تدبیر بوتون اوروپا اعتیاداتی آلت اوست ایتدی .
انقلاب حر بلرندن بری عموم اوروپا اقوامی قشاش ، دمیر ،
مستملکات ذخیره سی ، قهوه ، جای وشکری (اوزمانلریالکنز
قامش شکری معلومدی) هپ انکلتزه دن آلمغه آلیشمش لردی .
شمدی ، محتاج اولدقلری شیلردن بردنبره محروم اولیورلردی .
انکلتزه تجارتی ایله یاشایان تاجرلر و بالخاصه فلمنک ، (برهه ،
لوبه ق کچی) هانزه آتیک شهرلر محوه محکوم بولونیورلردی .
بناء علیه بیاننامه یی تماميله تطبیق ایتمک ممکن اولامیه جقدی .
طوغرودن طوغرویه فرانسزه ماملرری طرفندن اداره اولونان

مملکت کرده انکلیز امتعه سی قاچاق صورتیه کیزی کیزی داخل اولیوردی . تاجر لر کندی لر نی تر صده مامور کیمسه لری یا آلداتیور لر یارشوت . ویریور لر ، ویاخود ممنوعانک شکنی شو صورتله تبدیل ایدیور لر دی : مثلا فرانسیز لیمان لر ندن برینه انکلیز امتعه سندن مرکب بزحوله کوندریلیور ، مامورین محلیه بونی مصادر ایدوب موقع مزایده یه وضع ایدیور ، صوکره بو حوله هانکی تاجر لره کوندرلمشسه اونلر بونی صاتین آلیور لر دی . دها صوکرده سربست سربست صاتا بیلیور لر دی . بو حیله یه میدان ویرمه مک ایچون انکلیز امتعه سنک یا قلمسی ایچون امر ویرمه کوزوم حاصل اولمشدی . اهالی ، محروم اولق مجبوریتنده بولونقلری اشیانک کندی کوزلری اوکنده یاقیدیفنی کوریور ، فرانسیه عانداولیمان مملکت کرده قاچاقچیلق دها قولای یاپیلیوردی . اورالرده وطنداش لرینک منافع وسعداتی ناپولئونک سیاستنه فدا ایتمه ک مجبوریت کورمین . مامور لر واسطه سیله وقوعه کلیوردی . نهایت ناپولئون بو ممنوعاتی ده کیوشلتمه ک مجبور اولدی . بعض امتعه واردی که بویالکز انکلترده چیقار وفرانسه ده بوندن صرف نظر ایده مزدی . ناپولئون مذکور امتعه نک انکلتره دن صاتین آلمسی ایچون فرانسیز واجنبی تاجر لره مساعده ایتدی . حکومت بونلره بر (لیسانس) ، یعنی خصوصی برخصتنامه ویرر ، بوکا مقابلده انلری انکلتره دن صاتین لاجقلری اشیاقیمتنده اولق اوزره انکلتره ده فرانسیز امتعه سی

صائمقله مکلف قیلاردی . ناجرلر بومکلفیتی ایستدکلری برطرزده ایفایدلرلردی . مثلاً هیچ ایشه یارامیان فرانسز اتمعه سندن مرکب برحواله آلوب کوندرلر ، انکلیز لیمانلرندن برینه کلنجه بوحواله یی دکزه دوکرلر ، صوکره انکلیز اتمعه سی آلوب کری دوزلردی . حتی بوایشده قوللائق اوزره فرانسه ده قماش و خردوات اعمال اولونوردی .

بری آبلوقنک نتایج اقتصادیه و سیامیه سی . — آبلوقه اولو تجارتی بر بحرانه سببیت ویردی . ممنوعات و مصادرات یوزندن بوتون ایشلر طورمشدی . بوندن هرملکت متضرر اولدی . انکلترده ارباب صنایع آرتق اتمعه سنی صاتامیه رق عمله لرینه اذن ویرمهک و یا خود کندیلرینه هیچ فائده سی اولمیان اتمعه یی مغازه لرینه بیغمه یه مجبور اولدیلر . سفالت فوق العاده آرتدی . مملکتده کومه کومه ایشسز عمله لر طوشیورلر ، کندیلرینی اتمک یاره سندن محروم براقان طوقوما ما کنه لرینی قیریورلردی . مع مافیله انکلتره اولدقجه زنکین اولدینی ایچون بو بحرانی آتلاتوب هیچ بر فلاکته دوچار اولمادن آبلوقه نک نهایتنه قدر صبر ایده بیلمشدر .

ممالک بریه ده ده انکلیز اتمعه سندن واک زیاده مستملکات زخائرندن محرومیت یوزندن صقینتی چکلدی . قهوه و شکر فیثاتی اودرجه یوکسلدی که اساساً اوزون حربلردن طولایی فقیر دوشن بورژووازی یه منسوب عائله لر آرتق بونی قوللاناماقه

مجبور اولدیله . فقط الك زیاده و بلا تلافی متضرر اولانلر آلمانلرله فلمنكلیلردی . حتی آبلوقه ختام بولدیغی زمان بونلر انكلتره ایله تکرار مناسبتلرینی تاسیس ایتمشلر ، فقط اسکینسندن پك فقیر دو شمشلردی . اوزمانه قدر انكلتره دن آلمان امتعه نك فرانسه ده بهالاشماسی اوزرینه ارباب صنایع فرانسه مستهلکله صاتمق اوزره بوا متعه دن اعمال ایتمه که مجبور اولدیله . یوک و پاموق ایلك و طوقوما فابریقه لری ، دمیر و چلیک ایچون ده دمیرخانه لره احداث ایدلدی . قامش شکرینک یرینه پانجار شکر ایجاد ایدلدی . انقلاب حربلری ائناسنده محو اولان فرانسه صنایعی شو صورتله جانلانمغه باشلادی . آبلوقه اجنبی امتعه سنی منع ایتدیکی ایچون فرانسه محصولانته قارشى برحمایه اصولی یرینه قائم اولیوردی . فقط ممنوعات طولایسه ایله احداث اولونان طوقوما و دمیر صنایعی سربستی رقابته بردلر اولیشامادی . حتی ناپولئونك سقوطندن سوکر دمیر خانه مدیرلری ایله ایلك فابریقه طورلری تکرار بومنوعاتی طلب ایدیلر . مجلس مبعوثان اوزرنده بویوک برنفوذلری اولدیغی ایچون ممنوعاتی ده اوزون مدت ابقا ایتدیردیله .

آبلوقه نك كذا نتایج سیاسیه سی ده اولدی . - (فلمنك ایله بویوک آلمان لیمانلری کبی) شمال دکزنده کی مملکتلر محو اولمغی کوزه آلمه رق انكلتره ایله تجارته دوام ایدیلر . ذاتاً مأمورین محلیه قاچاقچیلغه مساعده ایدیوردی . حتی فلمنك قرالی ، ناپولئونك قاردهشی لوئی ده اهالیسنی التزام ایتدی . ناپولئون ، آبلوقه یه

رعایت ایتدیرمک ایچون بومملکتلری ده فرانسز اداره سی آلتنه آلمخی التزام ایلدی . بناء علیه بوتون فلمنک ایله دانیمارقه به قدر تکمیل آلمانیا ساحلی فرانسیه الحاق ایتدی . ایٹالیا جهتنده یابدینی کبی بورادهده حدود طبیعیه بی تجاوز ایلدی .

ایشته آبلوقه داخلنده بولونان اراضی بی توسیع ایتمک ارزوسی ناپولئونک سیاست خارجه سی اوزرینه ده عین وجه ایله اجرای تاثیر ایتدی . ناپولئون لیمانلرینی انکلیرله قاپا تدرمق ایچون پورتکیزلره حربه کیریشدی . عین احوالی متفق بولونان چاره ده زورله قبول ایتدیرمک ایسته دی . روسیه ایله قطع مناسبتک باشلیجه سببی ده بو اولدی .

ناپولئونک آرزویاده ما کینی . — ناپولئون ۱۸۰۶ دن اعتباراً اورویانک حاکم مطلق کبی حرکت ایتدی . قرالغنک منتهای شرقینده مغلوب ایدیلن ، آزیلن پروسیا قرالی چاری امدادینه چاغیردی . روسیه ایله پروسیا و انکلتره ارمسندده یکی بر اتحاد تشکیل ایدلدی . فقط بو اتحادده تام اولامادی ؛ چونکه آوستریا اتحادده داخل اولامیه جق درجه ده ضعیف دو شمشدی . حرب فرانسز اردولرینی روسیه حدودینه ، (تیلست) قدر کتیردی (۱۸۰۷) . چار بوراده در حال تبدیل سیاست ایتدی . پروسیادن آریلوب ناپولئونک اتفاقه داخل اولدی . ایکی متفق ، اورویایی ارم لرنده تقسیم ایتدیلر . ناپولئون شرقه حاکمیتی آلکساندره بر اقدی . اسوم جدن فنلاندیایی ،

دولت عثمانیہ دن رومانیایی آلمسنہ مساعده ایتدی . پولونیا
 قرالغنی تأسیس ایتیه جگنی وعد ایلدی . آلكساندرده
 اورویانك سائر قاسمی اوزرنده کی حاکمیتی کاملاً ناپولئون بر اقدی .
 ناپولئون اولاً پروسیایی درجهٔ ثانیہ ده حکومتر صرہ سنہ
 ایندیر مکہ ایشہ باشلادی . (آلب) نہرینك صول طرفندہ کی اسکی
 و یکی ایالتلرینی پروسیادن آلدی . شرقدہ پولونیاسدہ کی
 ایالتلرینی ضبط ایتدی . پروسیایہ درت ولایتدن باشقہ
 برشی بر اقدی (۱) . ناپولئون بو قراللق پارچہ سنی ده (رہن ہیئت
 متحدہ سی) نہ ادخال ایتمک ایستیوردی . فقط پروسیا قرالی
 قارشی طور دی . نہ ناپولئونک متفق اولق ، نہ دہ اردوسندن
 واز کچمک ایستہ دی . ناپولئون پروسیا قرالی تحت انقیادہ
 آلامانجہ ، محوہ چالیشدی . اردوسنی استحکاملردہ و پروسیادہ
 عساکر محافظہ صفتیلہ بر اقدی . اہالی ، تکالیف حربیہ
 و اعانہ لرلہ ازدی (بو واسطہ ایلہ آلدینی پارہ لر بر میلیار قدر
 تخمین اولونیور) . پروسیانک ۴۲،۰۰۰ کشیدن فضلہ قوتدہ اردو
 بولوندیر مسنہ مانع اولدی .

غربدہ و (ہس)دہ برنسک آلدن آلدینی پروسیا ایالتلرینی
 (وہستفالیہ) قرالغنی ایلہ (بہرغ) بویوک دوقلغنی حالہ قویدی .
 برینی قاردشنہ ، اوبرینی دہ انشتہ سنہ ویردی . بونلری دہ (رہن
 ہیئت متحدہ سی) نہ داخل ایتدی . آرتق اوزمان (آلب) نہرینہ

(۱) براندبورغ ، سلیزیا ، پومرانیا ، پروسیا

وارنجیه قدر تکمیل آلمانیا به حاکم اولدی .

فرانسه به عودتنده اسپانیا شبه جزیره سنی آلدیه ایتمه کله اوغراشدی . اول امرده اسپانیا حکومتی ، پورتگیزی آره لرنده تقسیم ایتمه کله مجبور ایتدی . فرانسز اردوسی اسپانیا به کیردیکی زمان ناپولئون اسپانیا به حاکم اولمق ایچون بوفرصتدن استفاده ایلدی . اسپانیا حکومتی دائما منقاد بر متفق صفتیله حرکت ایتشدی . فقط آلدن برشی کلدیکی ایچون اردوسی و دونمسانی محو ایتدیریوردی . ناپولئون اسپانیا به فرانسز اردوسی کیره جک اولورسه اسپانیا منابعندن پک مکمل استفاده اولونا جفنی امید ایدیوردی . بناء علیه قرال شارل ايله اوغلی فردینانداره سنده کی مجادلاندن استفاده ایدرک بونلرک هرایکسی ده حکومتدن فراغت ایتدیردی . اسپانیا تاجنی قاردرشی ژوزفه ویردی . فقط اسپانیول بر قرالک فنا اداره سنه بلاعصیان اطاعت ایدن اسپانیولار ، اجنبی بر قرال کله جکئی ، خاطر لرینه بیله کتیرمه کله تحمل ایده مدیلر . بر قاج کون ایچنده بوتون شهر لر آیافلانار ق یدنجی فردینانندی قرال اعلان ایلدیلر . ایشته ناپولئونه قارشی ایلک ملی عصیان بو اولدی . فقط عاصیلر ای اداره ایدلمدکلری واردولری ده منتظم اولمادیفی ایچون فرانسز اردوسنک اسپانیا ايله پورتگیزی انقیاد آلتنه آلماسنه مانع اولامادیلر . مع مافیله چته محاربه سی (که ریللا) اجراسنه دوام ایلدیلر . بو محاربه فرانسه نك قوتنی قسماً اشغال ایتدی . بوندن باشقه انکلتزه

ایله ده اتفاق ایدرک بر انکلیز اردوسنک قره یه چیقماسنه مساعده ایلدیلر . بو اردو پورتکیزده استحقاملر کریسنه یرلشدکلری ایچون فرانسزلر اونلری بورادن چیقارامادیلر .

بو مثال آلمانلرکده وطنپرورلکلرینی تحریک ایتدی . انلرده فرانسزلرک تحکمه قارشى سویلنمکه باشلادیلر . بالخاصه پروسیاده آرتق خلاص حاضرلقرینه چالیشدی . برلینده معلم بولونان فیلسوف فیخته « آلمان ملتته نطق » نی اوزمان ایراد ایتدی . شارنهورست اردویی اوزمان تنسیقه باشلادی . آوستریاده تیرول کویولری مملکتلرینی ناپولئوندن آلمش اولان باویه را قرالنه قارشى عصیان ایتدیلر . بوده ایکنجی برهلی عصیان اولدی (۱۸۰۹) .

بو عصیان پک جابق باصدیرلدی . آوستریا حکومتی آرتق مبارزه یه باشلامانک وقتی کلدیکنه ذاهب اولدی . بو سفر وطنپرورلکدن استفاده یه چالیشارق « آلمان ملتتی » دعوت ایتدی . فقط بو دعوت انجق بر قاج کواکلو ایله بر هوسار طابورینی جلب ایده بیلدی . بو طابورده ناپولئونه قارشى حرب ایتک ایچون بیکباشی شیل ایله برابر فرار ایتشدی . آوستریا ، انکلتره ایله اتفاق ایتدی . فقط اتحادده کندیلرندن باشقه کیسه بولونمادی . چار ناپولئونک متفق اولارق قالدی . پروسیا قرالی فرانسز قطعاتنک ۱۶۰۰۰۰ کشى ایله حرکتنه ممانعت ایلدیکلرینی کور نجه حربه کیریشمکدن امتناع ایتدی . آوستریا مغلوب

اولدی. ۱۸۰۵ دە اولدینی کبی ۱۸۰۹ دەده استیلا یه اوغرادی. بونک اوزرینه آدریاتیق ایالتلرینی ترکه مجبور اولدی. آرتق ناپولئونک حاکمیتی حدکاه واصل اولمشدی. حکومات بریه نک اوچندن ایکسینی، پروسیا ایلہ آوستریایی آزمش، اوچنجیسینی یعنی (روسیه بی) ده دائرهٔ اتفاقنه آلمشدی. ایشته اوزمان ناپولئون اوروپا عائلهٔ حکمداریسی ارکانندن اولق ایچون آوستریا ایمپراطورندن ده قیزی زورله آلدی.

ناپولئون آوروپای وسطاده یکی برتبدلدها وقوعه کتیردی. ایٹالیاده کنديسنه اطاعتدن امتناع ایدن بابا ایلہ قطع مناسبت ایتدی. پایایی اورادن قالدیروب فرانسه یه کتیردی. ممالکنی فرانسه ایمپراطورلغه الحاق ایتدی. کذا (طوسقانا) بی ده آلدی. — آلمانیدن فلمنک ایلہ شہاک دکزی ساحلنی الحاق ایتدی. طوغرودن طوغروه ناپولئونک اداره سی آلتنده بولونان فرانسه ایمپراطورلنی ایشته اوزمان ۱۳۰ ایالتدن مرکب اولدی. حدودی (آلب) و (تیر) نهرلرینه قدر توسع ایتدی (۱).

بوتون آوروپای وسطی ایلہ اسپانیا درجهٔ ثانیه ده حکومتده آیراشدی. ناپولئون بونلره طوغرودن طوغروه حاکم بولونیوردی. بو حکومتلرک اک مهملرندن اسپانیا، ایٹالیا،

(۱) ناپولئون، بوندن باشقه، ۱۸۰۹ دە آوستریا دلد آلدینی شہالی آدریاتیقده کی آپ مملکتلرینی ده محافظه ایتش، بونلری (بالریا ایالتلری) حالته قویارق طوغرودن طوغروه فرانسه جنراللرینک اداره سنه و برمشدی.

ناپولی و ووستفالیه قراللری هپ ناپولئونک اقرباسندن ایدی . ناپولئون بو قراللقلری کندی سیاستنه تعلق ایتمین داخلی اداره لری ایچون طرز اداره ده سر بست بر اقیوردی . فقط هپسی ده ناپولئونه خدمت ایتمک اوزره بر اردو بولوندرمغه ، بوتون حربلر نده ناپولئونه یاردم ایتمک ، بری آبلوقه بی کندی مملکتلر نده تطبیق ایتمک مجبور دیلر . بوندن باشقه فرانسز پرنسلیری کندیلری ایله برابر آیریجه فرانسز مأمورلر ده کتیر مشلردی . بونلر مملکتی هپ فرانسز اصولده اداره ایدیورلردی .

اون سکزنجی عصرده فرانسه ایله برابر اوروپای وسطاده اجرای نفوذ ایدن ایکی بویوک حکومت ، آوستریا ایله پروسیا ، هنوز اسماً مستقل بر حالده ایدیلر . فقط هر ایکسی ده انقسامه اوغرامش ، خراب ، درجه ثانیه ده حلومتلر اعدادینه تنزل ایتمش ، پروسیاده فرانسز غاریزونلری بولوندران و آوستریا ایمپراطورینه قیزی ویردیرتن ناپولئونک امرلرینه قارشی طوراً . میه جق بر حالده بولونیورلردی .

ناپولئون اوروپایه آرتق حاکم اولدیغنی حس ایدیور ، کندینی یالکز فرانسه ایمپراطوری اولارق دکل ، بوتون ضرب ایمپراطوری اولارق کوستریورلدی . پایادن حکومتلرینی آلق ایچون نشر ایتمیکی بیاننامه ده «سلفی» شارلمانک پاییه ویرمش اولدیغنی اراضی بی استرداد ایده جکنی بیان ایدیوردی . ناپولئونک فکر نجه اوروپاده یالکز بر بویوک حکومت ، اوده فرانسه

ایمپراطورانی بولونمق لازمدی. قصوری اوفاق اوفاق حکومتله آیرمالی، بونلرک پرنس لرندن هر برینک یارسده برسرای بولونمالیدی. اوروبانک بوتون خزینئه اوراقی یارسده طاشدن و دمیردن انشا ایدلمش تک بر سرایده حفظ اولونمالیدی. مع مافیة اوروبانک هر ایکی منتهاسیینه ناپولئونه قارشی طور-بیوردی. غمبده انکلیزله آطه لرنده تعرض ایتمک غیر قابلدی. پورتگیزیلرله اسپانیولار اسپانیانک بر اوجنه، (قادیس) • النجا ایدرک کندیلرینی انکلیز اردولری واسطه سیله مدافعه ایدیورلردی. شرقده اسوہ ج ايله روسیه، استقلاللرینی محافظه ایدیورلر، لیمانلرینی انکلیز کیلرینه دائما آچیق بولوندیر بیورلردی. ناپولئون، انکلیز امتعه سی کتیرن آمریقا کیلرینه روسیه لیمانلرینی مسدود بولوندیر ارق چاری ده کندی سیستمه زورله داخل ایتمک ایسته دی. فقط آلكساندر قبول ایتمدی. ناپولئون ده بونک اوزرینه آلكساندری تورکیه و بولونیا ده ایستدیکی کبی حرکت ایتمدی. ۱۸۰۷ اتفاق منفسخ اولدی. ناپولئون روسیه یه اعلان حرب ایتمدی.

ناپولئون بوتون اوروپا حکومتلرینی، حتی بالکنز متفقلری بولونان آلمانیا، ایتالیا و اسپانیان باشقه اشغال آلتنده بولوندیردینی پروسیایی ده پیشنده سور و کله دی (امضا ایدیله جک معاهده یی کندی حاضر لایوب کوندردی). کذا بسبتون افلاس ایدرک ناپولئونه قارشی حرب ایتمکی کوزه آلدیرامیان آوستریایی ده سور و کله دی.

روسیه استیلا ایدن اردو عادتاً براوروا اردوسی ایدی .
 اردویی تشکیل ایدن ۱۲ قول اردودن ۶ سی اجنبی ، ۶ سی ده
 فرانسز لرله اجنبیلردن مرکبدی . بو اردوده ۸۰۰۰۰ ایتالیان ،
 ۱۴۷۰۰۰ آلمان ، ۶۰۰۰۰ پولونیالی (وارشووا بویوک
 دو قه لغندن) ، ۳۰۰۰۰ آوستریالی و ۲۰۰۰۰ پروسیالی
 واردی .

۱۷۹۳ ده بوتون اوروا اتحاد ایدرک فرانسه یه استیلا
 ایلشدی . ۱۸۱۲ ده ایسه فرانسه بوتون اوروا ایله اتحاد
 ایدرک روسیه یه استیلا ایدیوردی . فقط ۱۷۹۳ ده فرانسه
 بر حرب ملی اجرا ایدیور ، ۱۸۱۲ ده ایسه حرب ملی پی
 فرانسه ایپراطورلغنک دشمنلرنی اجرا ایدیورلردی .

آوروپاده رهستوراسیون

نایولتوره اصرلنك فالبرطاسی . — انكلتره ايله اسپانیاه قارشى حرب دوام ایتدیكى ائشاده ناپولئون ۶۰۰۰۰۰ كشیلك بر اردو ايله روسیهیه استیلا ایتدی . عادتی اوزره طوس طوغرو پایختی اوزرینه یورودی . چونكه بوراسنی اشغال ایتدكن صوكره دشمنك تكلیفات صلحیهده بولوناجغنی حساب ایدیوردی . فی الحقیقه ناپولئون (موسقووا) یه کیرمکه موفق اولدی (ایلول ۱۸۱۲) . فقط استدلال ایده مدیكى بر طاقم احوال تأثیر یله حسابی كاملا بوشه چیقدی . (موسقووا) روسیه نك یالکز بر پایخت دینی وملیسی ایدی . اصل مرکز حکومت (پتربورغ) ایدی . (موسقووا) نك آلدن چیقماسی روسیه حكومتك قوتنی كسر ایده مزدی . بوسبیدن آلكساندر صالح طلبنده بولونمادی . مقدمات صلحیهده ناپولئون باشلادی . روسیه به تكلیفات صلحیهده بولوندی . بونك اوزرینه آلكساندر دشمن روس طوبراغندن چیقما دجه مصالحه ایده میه جگنی بیان ایتدی . نهایت بگه مکه لزوم حاصل اولدی . فقط ناپولئون ایچون بو نمکن دكلدی . دها بدایتده انضباطسز بر حالد بولونان ، هر مملكتدن كله عسکر لردن تشكیل ایدن اردوسی ، بو منابعدن محروم وواسع اووالردن كچرکن بستیون آزمیشدی . اماشه سی یولنده اولیان عسکر لر

بوراده یغماجیلق ایتمک ایچون اوتیه بری به طاغیلمقدن باشقه بر صورتله یاشایامامشردی . موسقووا میدان محاربه سندن اول آلدی . انجق ۱۵۵۰۰۰ محارب قالمشدی . بونلرده غنائمه طولو آرا به لر ارسنده ، طبق باربار چته لری کبی آخرا آخرا ایلی یلیورلردی . اردو (موسقووا) دده تشکیلاتی دوزمه لتهمدی . اهالی بو رافضی استیلاکارلردن دوچار خشیت اولارق شهرلردن چیقوب کیتمشلردی . شهرلرده اجنبی تاجرلردن باشقه کیمسه قالمامشدی . فزانمز اردوسی کیردیکی آقشام ایسه شهر بریانغینله خراب ایدلدی . قیشی بوراده کچیرمک قابل دکلدی . بناء علیه آوروپایه دونمک ایجاب ایدیوردی . ناپولئون بوکا انجق ۱۸ تشرین اولدن صوکره قرار ویردی . او سنه قیش غایت ایرکن وشدتلی اولدی . برودت تحت الصفر ۳۰ درجه یی بولدی . اردو ، اولجه تخریب ایتمش اولدینی بر مملکتدن کچمکه مجبور اولدینی ایچون صوغوقدن و آجلقدن تلف اولدی . دونه بیلنلرده بوزوق و سلاحسز عسکرلردی . روسیه قورتولمش ، ناپولئونده اردوسنی ضایع ایتمشدی . ناپولئون روسیه دن مقاومت کورمش اولدینی کبی متفقلریخده بربرر آلدن قاچیرمشدی . حتی پروسیا قول اردوسی روس اردوسی ایله مذاکرآده بولوندی . بیطرف قاله جغنی وعدایتدی . دهاصوکره پروسیاقرالی روسلره قارشى استحضارات حربیهده بولونمق بهانه سیله برلندن ، فرانسیز قوه محافظه سنک نظارتندن ده قورتولدی . (سیلزیایه چکپله رک

روسیه وانکلتره ایله اتفاق ایتدی (کانون ثانی - شباط ۱۸۱۳).
 پروسیا قرامی اهالی دعوت ایتدی. بوتون خلق عسکر
 طوبلامق، کوکلو یازلق صورتیله اجابته بولوندی. اردو ایله
 برابر برده ردیف (لاندور) تشکیل ایدلدی. بو عسکر لر هپ
 ایالتلرک حسابنه تجهیز و تسلیح اولوندی. پروسیا و روسیه اردولری
 بر آرایه کلهرک آلمانیایی ناپولئون قارشى آیاقلاندرمق ایچون
 آلمانیا اوزرینه یورودیلر. اشتراکدن امتناع ایدن پرنسسر
 عزل ایدیله جکلردی. اولا ساقسونیا اشغال ایدلدی. بوراسی
 بویوک محاربه میدانی تشکیل ایتدی. ناپولئون قرالغه اصعاد
 ایتدیکی ساقسونیا الکتوری هانکی طرفی التزام ایده جکته بردرلو
 قرار ویره میوردی. ناپولئون ساقسونیا الکتورینی کندی متفق
 اولارق قالغه اجبار ایتدی. ۱۸۱۳ ایملک بهار سفری ایکی قانلی میدان
 محاربه سندن (لوتجن، باوجن) عبارت اولدی. ناپولئون ساقسونیایی
 حاکمیتی آئنده بولوندردی. فقط سوارسی اولمادیغی ایچون اوج
 آیلق برمتارکه طلب ایتدی. انجق آتی هفته لق برمتارکه استحصال
 ایده بیلدی. متفق لر کندیلرینک محاربه ایده جک بر قوته مالک
 اولدق لرینی کوستر مشلردی. کندیسنه اک آزاعتماد ایدیلن ردیف لر
 (لاندور) لر بیه کمال شوق ایله محاربه ایتشلردی. - اوزمان قدر
 آنی بر ترض قورقوسندن طولایی بیطرف قالمش اولان آوستریا
 حکومتی ده ناپولئونی بویله موقیتسزک حائلنده کورنجه اوده جسارته
 کلدی. طرفین مخاصمینه توسطده بولو ناجغنی بیان ایتدی. ناپولئون

آوستریایی کنندینه چکمک ایچون بو توسه طی قبول ایتدی . فقط ائتلاف امکان خارچنده ایدی . ناپولئون، انکلتره داخل اولماق اوزره یالکزبری حکومتلره مصالحه ایتمک ایستیوردی . متفقلر ایسه عمومی بر مصالحه طلب ایدیورلردی . بونلر کندلرینک موافقتی اولمادن هیچ بر معاهده عقد ایدلمه سی ایچون انکلتره یه قارشى تمهداتده بولونمشلردی . کندیلرینه یاره یی انکلتره تدارک ایدیوردی . بناء علیه (پراغ) قونفره سی بر قومه دیدن عبارت اولدی . آوستریا حکومتی درمیان ایده جکی شرائطی ناپولئون قبول ایتدیکی تقدیرده متفقلره بر اولاجغنی خبر ویردی . ذاتاً ناپولئونک بوشرائطی قبول ایتیه جکی ده معلومدی . ۱۰ اغستوسده آوستریا ایمراطوری ده اتحاده داخل اولدی . آرتق اتحاد تکمیل اولمشدی . اورویانک درت دواتی ایلک دفعه اولارق هپ برابر فرانسه یه قارشى حرکت ایدیوردی . ایشته بو ، برنجی صفحه انهمزام اولدی (مارت - اغستوس ۱۸۱۳) .

متفقلر (دهاصوکره بونامی آلمشلردی) بوتون آلمانیا یی ناپولئوندن آلمغه قرار ویردیلر . ۱۷۹۳ ده مغلوبیتلرینه سبب اولان اواصوله موافق، فقط آغبر بر صورتده حرب ایتمکدن واز کچرک ناپولئون سوق الجیشنی تعقیب ایتدیلر . اللرنده مجموعی ۴۸۰۰۰۰ کشى قوتنده اوچ بیوک اردو واردی . بواردولردن باشلیجه سنک تعرضه کچمسنه قرار ویرلدی . طوس طوضرو دشمن اوزرینه حرکت ایدیله جک ، محاصره لرله اوایلانمادن دشمن اردوسی

محوایدیله جکدی. ۱۲ تموز پلاننده: « بوتون متفقین اردولری تعرضه کچه جکلر در. محل اجتماعری دشمن اردوکاهی اولاجقدر. » دینیوردی. یازین دوام ایدن حرب، اوچ منطقه ده، ساقسونیا، سلینزیا و براندبورغده اجرا ایدلدی. ناپولئون (دره سسد) ده غالب کلنجه (ساقسونیا) ده طور ایدلدی. فقط دیکر اردولری یا محو اولدی، و یا خود جوار مملکتلردن طرد ایدلدی. متفقلر آلمانیا به تطبیق ایدم جکلری پلانی ۹ ایلولده قرار لاشدیر دیر. بویلان ده پروسیا ایله آوستریایی ۱۸۰۵ دن اولکی حالنه کتیر مک، (هانوورا) یی (برونسویق) و ویرمک، فرانسه ایمپراطور لفته الحاق ایدیلن و یا فرانسز پرنس لرینه اعطا اولونان آلمان مملکتلرینی اسکی حال لرینه ارجاع ایتمک، (رهن) هیئت متحده سنی طاغیتمق، آلپ طاغیری ایله رهن نهرینه وارنجیه قدر بوتون اوافق حکومتلرک (استقلال تام و مطلق) نی تأمین ایلکدی. بونک ایچون ده ناپولئونک متفقلرینی آلدن آلوب آلمانیا ده کی حاکمیتنی قیرمق لازمدی. ایشته بوکایلیک اول باویه راقرالی مثال اولدی. (رهن) هیئت متحده سندن آریلوب اتحاده داخل اولدی. بوده ناپولئونک اوچنجی صفحه انزراحی ایدی (آغستوس - ایلول ۱۸۱۳)

متفقلرک اوچ اردوسی هپ برابر (لایپزیغ)، فرانسلرک قرارگاه عمومیسی اوزرینه یورودی. بوراده اوچ کون محاربه ایدلدی. ناپولئون یقایی صییروب ۱۰۰۰۰۰ کشی ایله فرانسه به دوندی. فرانسز پرنسلری کاملاً قاچدی. آلمان پرنسلری

اتحاده داخل اولدی . آرتق آلمانیا ناپولئونک کاملاً آندن
چیقمشدی . بوده دردنجی صفحه انہزامایدی (تشرین اول -
تشرین ثانی ۱۸۱۳) .

متفقلر (فرانقفورت) . کلنجه ناپولئو نہ فرانسه بی ۱۸۰۰
دن اول نہ حالده ایدیسہ او حالده براقه جقلرینی تکلیف ایستدیلر .
فقط مذاکرات ائناسنده احتیاطاً ینہ ایلر یلہ مکدن کیری طور مادیلر .
ناپولئون ۳۰۰۰۰۰۰ کشیلک برنفرعام امری ویرنجہ متفقلر ده
فرانقفورت بیاننامہ سنی نشر ایلدیلر . بوبیاننامہ شویله یازلمشدی :
« حکومتلر فرانسه یه قارشى حرب ایتمیورلر ، ناپولئونک حدود
مالکی خارچنده آچیقدن آچیغه ظالمانہ بر صورتده اجرا ایلدیکی
تحکمہ قارشى حرب ایدیورلر . . . کذا فرانسه نک قرالری
زماننده بیله کورمدیکی درجده واسع بر اراضی بی قرانسه
ایمپراطور لغنه تامین ایدیورلر . « - دها صوکره بو اوچ متفق
اردو (رهن) نہرینی کچدیلر . فرانسه یه استیلا ایستدیلر . جنوبدن
(فرانش قونته) و (سن) ، مرکزدن (مارن) ، شمالدن
(فلنک) و (اوواز) طریقہ (پارس) اوزرینہ یورودیلر .
ناپولئون ، عسکر لرینی بوتون آلمانیا استیحاکملرینہ طاغتمشدی .
معیتندہ خاصہ اردوسی ایله بر قاج دو کوتیدن عبارت بر عسکر
واردی . ناپولئون عجمی افراد ایله فاردناسیونالری ده بونلرہ
الحاق ایدرک بر اردو وجہ ده کتیردی . فرانسه سفرینی بواردو
ایله اجرا ایتدی . بوسفر ائناسنده متفقلر ناپولئو نہ (شاتی یون) ده

تکرار مذاکرہ تکلیفمندہ بولونڈیلر۔ آرتق فرانسیہ ۱۷۹۲ دہ کی حدودندن فضلہ برشی براقیورلردی۔ ناپولئون اولابونیقبولہ راضی اولورکبی اولدی۔ فقط صوکرہ ینہ وازکچدی۔ ۱۸ مارت ۱۸۱۴ دہ (شاتی یون قونفرہ سی) دہ قاپاندی .

متفقہ تلغرافلری آلدہ ایدہ رک پارسک مدافعہ ایدیلہ جک بر حالده اولمادیغنی اوکر ندیلر . طوس طوغرو پارسہ یورودیلر . شہر اوکله یہ قدر محاربه ایتدکدن صوکرہ تسلیم اولدی . آرتق فرانسیہ متفقہ رک آلینہ کچدی . بودہ محاربه نک بشنجی و صوک صفحہ سی اولدی . حربک باشلانغچندہ متفقہ فرانسزلی آلمانیدان چیقارمقدن باشقہ برشی دوشونمیورلر ، ناپولئونک آثارینی محو ایتمکدن باشقہ برشی ایستہ میورلردی . فقط مظفریت انلری فرانسیہ قدر کتیرمش ، شمدی بونلر انقلابک آثارینی دہ محو ایتشلردی .

ایمیراطور لفقہ ضنامی . - متفقہ اوروپا ایلہ فرانسیہ یہ حاکم اولنجه ، ہر ایک سنک دہ مقدراتنی تنظیمہ قالدیش دیلر . اولایشہ فرانسیہ دن باشلا دیلر . آرتق بونلر ناپولئوننی ہیچ ایستہ میورلر ، جمہوریتی اعادہ ایتکی عقلارینہ بیلہ کتیر میورلردی . بونک اوزرینہ ادارہ حکمداری بی تأسیس ایدہ بیلہ جک بر حکمدار آرایارق اوروپا ایلہ مصالحو عقد ایتدیلر . بومستہ ایچون اوج نوع چارہ تکلیف اولوندی : اولاً ، ناپولئون ایلہ ماری لوئیزک اوغلی . فقط بو اولورسہ ، قائم پدیری آوستریا ایمپراطورینہ پک زیادہ

بر تفوذ ویرایش اولوردیه قور قولدی؛ - ثانیاً: روسیه ایمراطوری
 آلکساندر، برنادوتی تکلیفه تشبث ایتدی. فقط سائر دولتر
 فرانسه ایله روسیه بیننده غایت صیقی براتفاق وقوعه کلیر دییه
 قور قدقلمی ایچون بونی ایشتمک بيله ایسته مدیلر؛ - ثالثاً:
 بوربونلر. فقط متفقلر فرانسه یه کیردی کیره لی مملکتده
 آرتق هیچ کیمسه نك بوربونلری دوشونم دکلمی، یکر می سنه
 دوام ایدن حر بر ائناسنده بونلرک کاملاً اونودلقلرینی حس
 ایشلمدی. انکلتزه حکومتی ایسه فرانسلره هیچ بر اصول
 اداره تکلیفنده بولونمق ارزوسنده اولمادیغنی، ملتک ایسته دیکی
 حکمداری اتخابده حاکم قاسمی لازم کله جکنی بیان ایدیوردی.
 اوروبارجال حکومتی آرسنده اساساً پک زیاده حائز نفوذ
 اولان آوستریا ناظری مه ترمینسخ بوربونلری التزام ایتدی.
 بونلری قبول ایتدیرمکه چالیشدی. بوربونلر طرفندن کوندریلن
 مرخصلری قبول ایتدی. فرانسیالئلری متفقلر طرفندن اشغال
 ایدلجکه شاید بو ولایتلر بوربونلری ایستلرسه کافه سنک
 بوربونلره ویرلمسنه قرار ویردیدی. متفقلر پارسه کیردکن صوکره
 حکمدارلر اون سکزنجی لوئی پی تکرار مقام حکومته کتیره مک
 ایسته دیلر. طاله یرانک توصیه سی اوزرینه نه ناپولئون ایله،
 نده ناپولئون عائله سیله هیچ بر معامله ده بولونمایا جقلرینی، اسکی
 فرانسه یه شروع قراللری زماننده اولدینی کبی رعایت ایده جکلرینی،
 فرانسه ملتک قبول ایده جکی قانون اساسی پی تصدیق و محافظه

ايله جكلرينى « بيان ايتديلر . بناء عليه اداره امورہ باقق و بر قانون اساسى حاضر لاق اوزرہ بر حكومت موقته تعين ايلكه سناتوي دعوت ايتديلر . بونك ايچونده اساساً تشكيل ايدلمش اولان ايكي هيئته، سناتو ايله هيئت تشريعيه و يا دها طو غرو سى بوربونلرہ طرفدار اولدقلى معلوم اولان بوايكي مجلس اعضاسنه مراجعت ايدلى . ۱۴۲ اعضادن انجق ۶۳ ي ايله اجتماع ايدن سناتو، ناپولونك تختدن سقوطنى و بناء عليه اهالى ايله اردونك ايتمش اولدقلى يميناك ساقط اولديغنى بيان ايدرك ۵ اعضادن مركب بر حكومت موقته تشكيل ايتدى . ۳۰۳ اعضادن يالكر ۷۷ سى ايله انعقاد ايدن هيئت تشريعيه ده بو مقررآتى تصديق ايدلى . پارسك جنوب شرقيسنه طوغرو چكيلن اردويه بو مجلسلردن امر نامه لر كوندردى . (فونتهن بلو) ده ناپولونك اطرافنده بولونان قوماندانلر بيله كنديسنه آرتق فراغت ايتمىنى توصيه ايديلر . ايسته اوزمان بوربونلر راس اداره يه كچه بيلدى . متفقار بونلرہ حر بر اداره تاسيسنى، ۱۷۸۹ دن برى فرانسه ده اجرا اولونان تبدلاتى قبول ايدرك مهاجر لرى، موريتلرده استخدا م ايتمه مكي تعهد ايتديلر . مقام حكومته اون سكزنجى لوئى چاغير يلا جقدى . فقط بو، كنديسنك حقوق ارثيه سندن طولايى دكل، سناتونك يازدينى قانون اساسيدن طولايى ايدى . بو قانونده : « فرانسز قومى كمال حريله تحت حكومته لوئى دو فرانسى دعوت ايدر » دنيوردى . كذا سناتو، اردونك حقوقى ايله ديون عموميه يه

واموال میریہ نیک فروختنہ دہ قرالک رعایت ایدہ جکنی موضوع بحث ایتشدی. ایستہ بویاناندن صوکرہ لوئی فرانسه یه کلمش، سناتوایله ہیئت تشریحیه طرفندن قرالنی تصدیق ایدلشدی .

۱۸۱۴ و ۱۸۱۵ معاہدہ لری . — یکی حکومت فرانسه نامنہ

معاہدہ عقد ایتدی . اولاً برمتارکہ (فرانسز اردولری اشغال

ایتمکده اولدقلری قلعہ لری تخلیه یه مجبور اولدیلر) ، دها

صوکراده بر مصالحه امضالادی . متفقلر فرانسه نیک یالکزر

۱۷۹۲ ده کی حدودی داخلنه رجوعنی ایستہ دیلر (بعض تو-

سیع اراضی یه ینہ مساعده ایتدیلر) . هیچ تضمینات حربیه

ایستہ دیلر (حتی پروسیایه بورج ایدیلن ۱۶۹ میلیونک اعاده-

سنی ده رد ایدیلر) . ناپولئونک تحت انقیاده آلدینی مملکتلردن

کتیرمش اولدینی آثار صنعتی ده موزہ لرده بر اقدیلر . بونلر

فرانسز لری تذلیلدن اجتناب ایتمک ایستیمورلردی . حتی

« بوفلاکت زمانلرینک بوتون آثارینی سیلوب اورتادن قالدیرمق

ارزوسنده بولوندقلرینی اثبات ایچون دول معظمه نیک طلب

ایده بیله جکلری مبالغک کافه سندنده صرف نظر ایلدکلرینی »

بیان ایتدیلر . متفقلر فرانسه ده عساکر محافظه براتقوده ارزو

ایتمدیلر . اون سکزنجی لوئی یکی قانون اساسی بی اعلان ایدر

ایتمز یارسدن چیقارق قرالنی تخلیه ایدیلر .

فقط بو شرائط ۱۸۱۵ ده تعدیل ایدلدی . ناپولئونک

عودتی (ویانه) دن خبر آلنیر آلمانز اوروپا حکومتلری « ناپولئون

بوناپارتنك مناسبات سیاسیه و اجتماعیه دن طرد اولوندیغنی واستراحت عالمك بردشمن وه فسدی صفتیه لغنت عامیه معروض اولدیغنی « بیان ایئدیله . حتی ناپولئونله معاهده ایتمکی هیچ عقللرینه بیله کتیرمدیله . اردولری هنوز ترخیص ایلمدیکی ایچون بونلری درحال فرانسه یه سوق ایدرک فرانسه اراضینه هر طرفدن استیلا ایلدیله .

متفکر ناپولئونك انهمانندن سوکرا ۱۸۱۴ معاهده سنی مفسوخ عدا ایئدیله . بور بونلر کندی نفوذلرینی محافظه ایده جک درجده قوتلی اولمادقلری ایچون فرانسه یی کندیلرینه تابع بولوندیراجق صورتده فرانسه دن تأمینات و تعهدات طلب ایلدیله . کلیتلی بر تضمینات حربیه ایسته مکه ، بوتون آثار صنعتی ناپولئونك صویدیغنی مملکتلره اعاده ایئدیله مکه ، حدود مملکتلرنده مصارفی فرانسه دن اولمق اوزره استحکاملر انشا ایئدیله رک فرانسه ده عساکر محافظه برانغه متحداً قرار ویردیله . دها سوکرا فرانسه یی آره لرنده پایلاشیدیله . هر حکومت کندینه اصابت ایدن ایالته اردوسنی کوندروب یرلشیدی . اردویی اهالی حسابنه اعاشه ایئدی . بو اشغال ، تضمینات حربیه ویریلنجیه قدر ایکی سنه دوام ایئدی .

کذا حدودلرک ده دوزه لتلمسنه قرار ویرلدی . پروسیالیلرله اوافق آلمان حکومتلرندن بعضلری (آلزاس) ی ، (رهن) ی و حتی (فلاندر) ی فرانسلردن آلمق ایستورلردی . بو

مملکت‌لره آرشیدوق شارل ایچون بر حکومت تشکیل ایدیله-
 جکدی. آوستریاده هیج اولمازسه حدود قلعه لرینک ییقلمسنی
 طلب ایدیوردی. انکلتره حکومتی ایله چار فرانسه‌نک انقسامنه
 راضی اولمادیلر. بونک اوزرینه یالکنز برقاچ استحقاک ایله
 صاواوانک و (نیس) قونتلغنک آلماسیله اکتفا ایدلی
 (۲۸ ایلول ۱۸۱۵). نسبة فائده لی اولان بو معاهده اوزمانک
 فرانسرلنجه مضرتلی ایدلی. معاهده‌نی شو صورتله عقد
 ایتدیر مکهموق اولان دوق دوریشلیبو، بونی عادتاً «روحسز بر جسد
 کبی» امضالادی. ناپولئونک عودتی فرانسه‌یه ایکی ملیار فرانق
 ایله ایکی سنه اشغال آلتنه بولونمغه مال اولدی. فقط فرانسه
 انقسامه اوغرامقدن قورتولدی.

ریانه قونفره سی . — متفقلر فرانسه ایشلرندن صوکره
 اوروپا ایشلرینی دوزه لیمکله مشغول اولدیلر. جمله سی ده (ویانه) ده
 طوپالانارق بوراده عمومی (بر قونفره) عقد ایتدیلر. بورایه
 هر دولتن برر مرخص کوندرلدی (بونک طقسانی حاکم
 دولتردن، الی اوچی ده آلمانیا نک حاکمتندن چیقان پرنسلردن
 ایدی). بونجه سنه دوام ایدن حربلردن صوکره دیپلوماتلرک
 شو صورتله طوپالانماسندن طولایی شنلکلر و مراسم اجرا
 ایدلی. حتی آوستریا حکومتی مرخصلرک ویانه ده اقامتی غایت
 خوش کچیرتمکله مأمور اولق اوزره برده (سرای قومیسینی)
 تعیین ایلشدی.

قونفره ۳۰ مایس ۱۸۱۴ده، دهاصوکره ۱ تشرین اولده،
 دهاصوکره ده ۱ تشرین ثانیده آچیلماجقدی . فقط حقیقت
 طالده هیچ آچیلمادی . متفقلر اوروپا ایشلرینی اوفاق حکو-
 متلره مناقشه ایتدیرمک ایسته میورلر، بوتون مسائلی آره لرنده
 قرارلاشدیرمق ایستیورلردی . اصل ایش ایکی قومیته طرفندن
 کوروله جکدی . قومیتلر بوتون مقرراتی حاضر لایوب
 (قونفره) به تودیع ایدیله جکلر ، (قونفره) بونلری یالکنز
 تصدیق ایلله جکدی . فرانسز مرخصی طاله یران هم بواصوله ،
 هم ده (متفقلر) تعبیرینه اعتراض ایتدی (چونکه متفق کله سی انجق
 حرب زماننده بر معنا افاده ایده بیلردی) . نهایت « حقوق
 عمومی قواعدا اساسیه سنه توفیقاً » قونفره یی ۱ تشرین ثانیده
 آچدیرمه موفق اولدی . پروسیا مرخصلری هپ شکایت
 ایدیورلردی . هاردنبرغ آیاقده ، آلرینی ماصه به طیبایارق :
 « خیر افندیلر، حقوق عمومیه دیمکه هیچ لزوم یوقدر . نیچون
 حقوق عمومیه نامنه حرکت ایدیورز دینسین ؟ بونی ایضاحه
 نه حاجت وار ! » دییه باغیردی . طاله یران جواباً : « مادامکه
 ایضاحه حاجت یوقدر . او حالده ایضاح ایدیلیرسه ده
 ائی اولور » دیدی . بونک اوزرینه هومبولد : « بوراده حقوق
 عمومیه نیک نه تأثیری وار؟ » دییه باغیردی . طاله یران ده : « سزی
 بوراده بولوندرمق کبی بر تأثیری ! » دییه جواب ویردی . بعده اون
 سکنز نیچی لوئی به : « حقوق عمومیه تعبیرینی داخل ایتدیردیکمزدن

طولایبی بزم مظفریت احراز ایتمش اولدینغیزی ادا ایدیورلر .
ایشته بو مطالعه قونفرده حکم فرما اولان افکارک درجه سی
حقنده منز بر فکر ویره بیلیر .» دیبه یازدی .

فقط بو، یالکز شکله متعلق بر مظفریتدی . حقوق عمومیه
قواعد اساسیه سی اوروپاده اودرجه صاغلام دکلدی . صوک
حر بلرایسه بونی کاملا رخنه دار ایتشدی . طاله یران «فتو حاتدن
باشقه هیچ بر شیدک حق سلطنت بخش ایده میه جکنی» اون
سکزنجی لوئی نامه بیان ایدیوردی . فقط کندیسی ناپولئون
زماننده حق فتحدن باشقه بر حق تطبیق ایتمه مشدی . فرانسه
فتو حاترورلکدن واز کچدیکی ایچون شمدی اسکی عاداتنه رجوع
ایتمک چالیشوردی . طاله یرانک فکرنجه هر مملکت حقوقاً
حکمدار مشروعه یعنی ارثی حکمدارینه عاقددر . بناء علیه
هر عائله پر نسی به اسکی یرلرینی اعاده ایتلیدر . فقط متفق
بر فاتح اولدق لری ایچون بو مشروعه قارشی ایتدک لری حرمتدن ده
واز کچمشلردی . اسکی قاعده اساسیه کاملاً قالدیرلمش ، بونک
یرینه هنوز یکی بر قاعده قونما مشدی . رجال حکومتدن
هیچ بری آتیلرینه دائر اهالی ایله مشورت ایتک ایسته میوردی .
بو صورتله حرکت ایتک بر نوع انقلاب دیمکدی .
حال بوکه اوزمانلر انقلابدن هیچ اثر بر اقامنه چالیشیلوردی .
بناء علیه یالکز بر قاعده اساسیه موجوددی . اوده
متفق لک ارزوسی ایدی . چار ایسه بوکا «اوروپانک تصویبی»

نامی ویریوردی. طاله یران چارک نه یتده بولوندیغنی استفسار ایچون یانه کیتدی، آلكساندر: «بونده هرکس کندی تصویبنک قبول اولوندیغنی کورمیلیدر» دیدی. طاله یران ده: «کذا حقوقک ده» دییه جواب ویردی. صوکره چار: «بن یداشغالده بولونانی محافظه ایدم جکم». دینجه، طاله یران: «ذات شاهانه لری انجق مشروع بر صورتده کندیکنزک اولان شیدن غیریسنی محافظه ایتمزسکنز. . . نجه اولا حقوق، صوکره تصویب نظر دقته آلتالیدر» دیدی. آلكساندرده: «اوروپانک تصویبی قانون حکمنده در» ریه جواب ویردی.

فی الحقیقه قونفره آچیلمادی. بوتون مسائل صرف دول معظمه نك، بعضا دول معظمه دن بشنك (درت متفق ایله فرانسه نك) بعضا ده سکنز دولتک (متفق لره فرانسه دن ماعدا اسوهج، اسپانیا و پورتیکیزک) مرخصلرندن متشکل (قومیسونلر) طرفندن تسویه ایدلدی. یکی حکومتلره هیچ برشی صورولمادی. بوندن باشقه اراضی ده اهاالینک تصویبی ده نظر اعتباره آلتیوب مملکتک تروتنه و نفوسک مقدارینه نظراً حکمدارلر ییننده تقسیم ایدلدی. — قومیسونلر طرفندن تنظیم اولونان نظامنامه لر مختلف دولتلر ارمسندده خصوصی معاهده لر شکلنده یازلدی. صوکره بوتون بومعاهده لر عمومی بر مجموعه حالنده طوپلانارق بوکا (ویانه قونفره سنک صوک مقرراتی) نامی ویرلدی. ناپولئون بوتون آوروپایه حکم ایتمش، اوروپایی آلتاوست

ایلمشدی. متفقاً اوروپایی شیمدی کنديسنندن آلمشر، فقط ۱۸۰۰ ده اولدینی کبی تأسیس ایتمک ارزو ایلدکری ایچون یکیدن دوزه لیمک ایسته مشلردی. دهه ۳۰ مایسده، پارسدن مفارقت ایتمزدن اول کیزلی بر معاهده عقد ایدرک فرانسه یی ایشه قاریشدیرمامغه و فرانسه دن آله جق مملکتلرک احوالی بعض تدابیر عمومییه نظراً اره لرنده تنظیم ایلمکه قرار ویرمشلردی. فرانسه دن آلتان مملکتلر بلچیکا ایله (رهن) نهرینک صول ساحلندن (۱)، فلمنک، اسویچره، آلمانیا، ایتالیا و (وارشووا) بویوک دوقه لغندن عبارتدی. فقط متفقاً اولا اره لرنده ائتلاف حاصل اولان مسئله لری تنظیم ایستدیلر .

فلمنک (اوراتز) خاندانه ویرلدی. (په یی با) قرالغنی تشکیل ایتمک اوزره بلچیکا ایله برلشدرلدی . - اسویچره بر هیئت متحده حالنه کلهرک (جنوره)، (واله) و (نوشانهل) کبی یکیدن اوچ ناحیه آلدی . - (رهن) نهرینک صول ساحلی ، آلمان پرنسلیرینه ویریه جک تضمیناته قارشیلق اولق اوزره تخصیص ایلدی. - اسپانیا و پورتگیزدهده اسکی حکمدارلر تکراریرلرینه کتیرلمشلردی . - ایتالیاده ، یالکیز جنوه و ونیدیک کبی ایکی جمهوریت مستثنی اولق اوزره هرشی انقلابدن اولکی حالنه ارجاع ایلدی (۲) . (جنوه) جمهوریتی تضمینات مقامنده

(۱) صاواوا ایله نیس قونتلنی فرانسه یه براقیلوردی .

(۲) ناپولثونی ترک ایستدیکنه بر مکافات اولق اوزره ناپولی قرالی

ساردنيا قرالغنه ويرلدى . ونديك جمهوريتى آوستريايه قالدى .
— اسوج قرالى ده فنلانديايه قارشيلق اولق اوزره ، ناپولئونك
متفقى دانمارقه قرالندن آلنان نوروجى آلدى .

منفعتلرينه مغاير اولدينى ايجون دول معظمه بيننده اثتلافه
منجر اوليان اوچ مسئله اويلهجه براقلدى . بو مسئله لرك
برنجيسى : آلمانيانك تشكىلى (پروسيا ايمپراطورلق تاسيس ايتك
اىستيور ، آوستريا ايسه هيئت متحده نى ترجيح ايديوردى) ؛
ايكنجيسى : پروسيايه ويريله جك تضمينات (پروسيا ، ساقسونيا
قرالغنى كنديسنه الحاق ايتك اىستيور ، آوستريا ايسه بوهميا
حدودنده پروسياليلرك بولونديغنى ارزو ايتيوردى . ديكر
متفقرده پروسيايى آلمانايه پك قوتلى بر حاله كتيرمكن
قورقيورلردى) . اوچنجيسى : وارشوووا بويوك دوقه لنى .
(آلكساندر بو دوقه لنى كندى آلق وبونى بر پولونيا قرالغنى
يايق اىستيوردى . انكلتره و آوستريا ايسه چارك اوروپا داخلنه
او درجه ايلريله ديكنى ايسسته ميوردى) . ايشته بو اوچ مسئله
ويانده مناقشه ايدلدى . طاله يران فرانسه يي ده اوروپا آهنگ
دوليسنه صوئق ايجون بو فرصتدن استفاده ايتدى . ساقسو-
نيانك « مشروع » قرالندن آلماسى حقنده كى پروژهره قارشى

مورا ، موقه براقلدى . فقط قرالغنى رسماً تصديق ايدلدى . ۱۸۱۵ ده
ناپوليدى كى بوربونلرده يرلرينه كتيرلدى . فقط مورا تكرار موقعه كيتك
ايسته نجه توقيف ايديلهرك قورشونه ديزلدى .

اعتراضده بولوندى . پروسیا ، روسیه استناد ایدیور ،
 آلكساندرده بولونیایی آلق ایچون ساقسونیاك آلمسینه برشی
 دییوردی . طالهیران انکلتره و آوستریا ایله اویوشدی .
 قومیسونه فرانسهده قبول ایدلدى . نهایت اوچیده تدافعی بر
 اتفاق عقد ایدلدى . بونك اوزرینه طالهیران اون سکزنجی
 لوئییه : « شوکتماپ ، ایشته شمدی اتحاد ابدیاً فسخ ایدلدى .
 فرانسه آرتق اوروپاده متجرد بر حالدہ دکلدر » دییه یازدی .
 حتی حرب بیله موضوع بحث اولدی . دها صوکرده ائتلاف
 وقوعه کلدى . آلكساندر بولونیایی آلدی . پروسیادن آیرلدى .
 پروسیا ایسته دیکنه نائل اولامادی . ساقسونیا قرالنك اراضیسنی
 المقدن امتناع ایدلدى . پروسیالیر ساقسونیا قرالنك اراضیسنه
 مقابل (رهن) نهرینك صول ساحلنده یکی بر قراللق تشکیل
 ایدوب اوراسنك ویرلسنی تکلیف ایدیورلردی . او زماندر
 پروسیا رجال حکومتنك بوتون مقصدلری فرانسز حدودینه
 بك یاقین بولونماقدی . حال بوکه پروسیا ایله کندى ارسسندہ
 ومتفق بر حکمدارک ادارهسندہ ضعیف بر حکومتك بولونماسی
 فرانسه ایچون فائدهلی کورونیوردی . بناء علیه مشروعیته
 مغایر و آلمانیا موازنهسندہ مضر اولدیغی ایچون طالهیران
 بو ائتلافی رد ایتدی . نهایت پروسیالیر درت پارچه دن مرکب
 بر تضمیناته راضی اولدیلر . بو درت پارچه : شمالی ساقسونیاده
 ۷۸۲۰۰۰ ؛ بولونیاده ۸۱۰۰۰۰۰ ؛ جنوبی آلمانیاده

۱۰۴۴۰۰۰ ؛ رهن نهرینک صول ساحلنده ده . هیج ارزو ایتمدیکی
 حالده ، فرانسه حدودینه قدر کتیرلش و (رهن) نهرینی
 مدافعه یه ده مجبور اولمشدی .

آلمانیا ده ناپولئون قارشی « استخلاص حربی » نی تشویق
 ایدن و طنپورلر اسکی جرمن ایمراتورلغنک تاسیسنی ارزو
 ایدیورلردی . پروسیا رجال حکومتی ایسه آوستریا ایمراتورینک
 کندیلرینه ایمراتور اولماسنی تکلیف ایدیورلردی . پروسیا
 شمالده ، آوستریا ده جنوبده اولق اوزره ایکی بویوک دولت
 آلمانیا ایله برابر اداره حکومت ایچون بر (دیره کتووار)
 وجوده کتیره جکلردی . فقط آوستریا ایمراتوری آلمانیا
 ایمراتوری نامنی آلمنی قبول ایتمدی . صلاحیت اداره نک پروسیا
 ایله برابر تقسیمنه لزوم کوسترن عمومی بر اداره حکومتی هیج
 ارزو ایتمدی . سائر آلمان حکومتلرینک اوفاق حکمدارلری
 ایسه بالخاصه ۱۸۰۶ ده استحصال ایلدکلری حاکمیتی محافظه
 ایتمک ایستورلر ، کندیلرینک فوقنده مافوق بر نفوذ اولماسنی ،
 هله کندیلر ایله بر عد ایتمکلری پروسیا قرالنه تابع اولمائی
 خاطرلرینه بیله کتیر میورلردی . بو سبدن ۱۸۱۳ ده آلمان
 پرنسیرینی اتحادیه جلب ایچون متفقلر کرک اراضیلرینی و کرک
 حاکمیتلرینی کندیلرینه اعاده ایده جکلرینی بو پرنسیره بالعاهده
 وعد ایتمشلردی . حائز حاکمیت اولان بو پرنسیر ذاتاً بر ملت

واحدہ تشکیل دینے سے لڑی. بونک اوزرینہ ناپولئونک تخریب ایلدیکی
ایمپراطورلنی تاسیسدن صرف نظر ایلدی. یالکز بر اتحاد
(دویمچہ بوند) یعنی بو حکومتلرله (دیہت مجلسی، بوندہس ناغ)
یعنی ہر حکومتدن کوندریلن دائمی بر قونفہ راس بینندہ
اتفاق عقد ایلدی.

ایشته بوتون حکومتلردن کوندریلن مرخصلرله انعقادیدن (ویانہ)
قونفرہ سنک نتیجہ سی بواولدی. بوتیجہ ۱۸۱۵ دہ ناپولئونک
ایکنجی سقوطندن سوکرہ ا کمال ایلدی. فرانسنک آئندن
ضبط ایتدیکی یرلری آلوب فرانسنہ یہ قارشی بر استحقاک خطی
تأسیس ایدرک فرانسنک آرتق بردها حربہ باشلاماسنہ مانع اولوق
ایچون تداییر اتحاد ایلدیکی کبی آتیا حکمدارلر بینندہ حرب
وقوعہ کلسنہ مانع اولغہ چالیشدی. اوزمانلر سائر اوروپا رجال
حکومتنہ رهربلک ایدن مہ تہرنیخ، بوتون حکمدارلرک بویوک
برئالہ تشکیل ایلدیکنہ وبوتون حکومتلرک تبعہ لرینہ قارشی
کندیلرینی متقابلاً وقایہ ایدرک تبعہ لرینک شکایاتی بر حکم ہیئت
طرفندن تسویہ ایتکدہ منفعت موجود اولدیغنہ دائر اون سکرنجی
عصرده غیر معلوم بر قاعدہ بی تطبیق ایتدیرمکہ غیرت ایتدی.
ہم حکومتلر بینندہ حسن ائتلافی محافظہ ایتک، ہمده غیر ممنون
اقوامہ قارشی تداییر اتحاد ایلک ایچون صیق صیق (قونفرہ لر)
عقدینہ قرار ویرلدی. ایشته بواصولہ (مہ تہرنیخ اصولی)
دیلدی. بواصول اون سنہ قدر اولدیجہ منتظم بر صورتده دوام

ایتدی . دیپلوماتلر بر چوق قونفرمه لر عقدایدرك بر چوق عصیانلری یاتیشدیردیلر . حتی قونفرمه ناپولی قرالنه یاردم ایتمک ایچون بر آوستریا اردوسی ، اسپانیا قرالنی تبه سینه قارشى محافظه ایچون ده بر فرانسز اردوسی کونزدردی .

۱۸۱۵ معاهده لری (قریم حربنه قدر) تمام قرق سینه حقوق بین الملک اساسنی تشکیل ایتدی . بودورظر فنده اوروپاده هیج بویوک حرب اولمادی . ۱۸۶۰ ایله ۱۸۷۰ اره سنده ویانه قونفرمه سنک آتاری ده محوایدلدی . فقط حربلره مانع اولمق ایچون اوروپاده قونفرمه لری عقد ایتمک عادتی ایله حکم محکمه سی فکری محافظه ایدلدی .

۱۸۱۵ ده آروپا . — اوروپا بویوک دولتلر طرفندن منفعتلری کندیلرینه اولمق اوزره تصحیح ایدلمشدی . حالبوکه قاعده انقلابدن اول نصل ایدیسه او حالده تأسیس ایدیله جکدی . حقیقت حالده یالکوز فرانسه ۱۷۹۲ ده کی اراضیسنه ارجاع ایدلمشدی . دیگر بویوک حکومتلر ایسه بو تصحیح اتدن یا بویومش ، ویاخود اوفاق حکومتلرک وبالخاصه ده ایٹالیا جمهوریتلری ایله ناپولئون طرفندن محو ایدیلن و اراضیلری اعاده ایدیلن رهبان حکومتلرک ضررینه تنظیم ایدلمش بر حالده چیقمشلردی . انقلاب انسانسندہ تقسیم ایدلمش اولان پولونیا ، ینه شرک اوچ بویوک دواتی اره سنده تقسیم ایدلمش بر حالده قالمشدی . یالکوز (قاراقووی) شهرى مستقل و سربست بر شهر حالنه کتیرلمشدی .

آوستریا حکومتی ، محافظه‌سنة اودرجه اهمیت ویرمیدیکی (فلمنك) . مقابل ونیدیکی محافظه ایتشدی . بوراسی آوستریا اراضیسنی جنوب شرقیدن آدریاتیق دکزینه قدر اوزاتیور ، وایتالیاده (تهسن) . قدر ایلریله تیوردی . قره اورمان طرفلرینه طاغیلان یرلرینه مقابلده ، حدودینی جنوب غربی ایله برلشدیرن (زالسبورغ) پستپوسلغنی محافظه ایدیوردی .

پروسیا ، ۱۷۹۳ تقسیمنده آنه کچن پولونیا پوزانیاسنی محافظه ایدیوردی . ۱۷۹۵ ده استملاک ایلدیکی دیگر پولونیا ایالتلرینه مقابلده ساقسونیا ایالتی ایله (رهن) ایالتنی آلدی . (رهن) نهرینک صول ساحلنده کی اوافق تفک یرلرینه مقابل تضمینات مقامنده آلمش اولدینی (وهستفالیه) پیده محافظه ایتدی . ایشته بوضورتله ۱۷۸۹ ده کندن فضله اوله رق درت ایالت صاحبی اولدی . اراضیسی اسکیدن اولدینی کچی پارچه پارچه قالمادی . روسیه دن فرانسییه قدر بوتون شمالی آلمانیاده طوپولو برکتله حالنده قالدی (۱) .

روسیه چاری ده ۱۸۰۹ ده اسوه جدن آلمش اولدینی فنلاندا ایله پولونیانک انقسامه اوغرایان ایالتلرینی محافظه ایدیوردی . کذا بر پولونیا قرالفتی تشکیل ایتسی ایچون ۱۷۹۵ ده پروسیایه ویریلوب آلان پروسیانک حاکمیتی آلتنده بولونان پولونیا

(۱) بونلردن بربری ایچنده یالکز ایکی بر واردی . اوده شرقده مکلمبورغ ، غربده هانوروا ، هس و ناساوکچی اوج حکومتدن عبارتدی .

قسمتی استرداد ایدیوردی .

انکلتره ، اوروپاده (هلغولاند) آطه سندن باشقه بریر ایسته مدی . تضمیناتی ده فرانسه وفلمنک مستملکلرینک ضررینه اولمق اوزره آلدہ ایتدی .

(روسیه ، آوستریا و پروسیا کبی) شرقک اوج بویوک دولتی ایله (فرانسه وانکلتره کبی) غربک ایکی بیوک دولتی ارسنده بوتون آوروپای وسطی اوافق اوافق حکومتله آیرلدی . آرتق المانیا بریری ایچنه کرفت اولمش ، نیم حاکیتی حائز اوج یوز متفرق اراضی به تقسیم ایدلمش ، او یله قوتسز بر حکومت دکلدی . فرانسز لک مرورندن صوکر ا بستیون ساده لشدیرلمش ، حاکیتی حائز سه نیورلردن ، کلیسا پرنسارندن ، همان بوتون سربست شهرلردن خلاص اولمش ، اولجه ناپولئونک یایدینی حاله یعنی پرنسلیک اتحادی حالته کلمشدی . فقط بو پرنسارک اداره سی شمدی آوستریا به ترتب ایتمشدی .

ایتالیا تکرار اوافق اوافق حکومتله آیرلمشدی . انلرده جنوبده ناپولی قراللیقی ؛ مرکزده کلیسا حکومتلری ایله طوسقانان ، یاروم و موده ن کبی اوج دوقهلق ؛ شمالده جنوبه اراضیسی ایله (لومباردیا - وندیک) نامیله مشترک براداره آلننده برله شن ، میلان و وندیک ایالتی کبی آوستریانک ایکی ایالتی ایله توسع ایدن ساردنیا ایدی . (بو) حوضه سنه صاحب و آوستریا پرنسارینه طاند اوج دوقهلقه حاکم اولان آوستریا حکومتی آرتق ایتالیایی نفوذی

آلتندہ بولونڈیریوردی .

آلمانیایہ ایتالیا بوضورتلہ قرون وسطادن بری نہ حالہ ایدیسہ لرینہ اوحالہ یعنی پارچہ پارچہ ملتزدن عبارت قالیوردی . بونلرک ہرایکیسی دہ آوستریانک نفوذی آلتندہ ایدی . اوستریا آرتق بویومک ایستہ مدیکی وضعیف حکومتلری ادارہ ایتمک کندیتسنہ دہا قولای کلدیکی ایچون بویارچہ لانمائی بقا ایتمکدہ فائدہ کورویوردی .

فرانسہ حدودندہ اسکی جرمن ایمراطور لغندن انقسامہ اوغرامش ایکی اوافق حکومت واردی . انلردہ (جنوزہ) ، (نوشاتہل) و (والہ) ایلہ توسع ایدرک ۲۲ ناحیہ دن مرکب برہیئت متحدہ حالنہ کلن اسویچرہ ایلہ (پھیبا) قرالنی حالنہ کلن و بلجیقانک الحاقی ایلہ ایکی مثلی بویویہن (فلمنک) حکومتی بولونیوردی . بونلرک ہرایکیسی دہ بی طرفلقرینی اعلان ایتمشلر ، بوتون اورویادولتلرینک حمایتی آلتنہ کیرمشلردی .

شرقدہ پولونیا کاملاً اورتادن قالدیرلمش ، اسوہج (اسقاند - پناویا) شبہ جزیرہ سنہ آتیلمشدی . نوروہج دہ دانیمارقدن آریلارق اسوہج قرالغنہ الحاق ایدلمشدی .

۱۸۱۵ آورویاسی ، اون سکزننجی عصر اورویاسی کبی ، دول معظمہ ایلہ مرکز منطقہ سنک ضعفی آرہ سندہ موازنہ بی اداہہ ایدہ جک وجہ ایلہ تنسیق ایدلمشدی . مرکز منطقہ سندہ ایسہ بویوک حکومتلرک نفوذی یکدیگرینی قورویوردی . ایستہ

بو صورت تسویه ، موازنه مودهسی یرینه ایتالیا و آلمانیاده
اتحاد حصوله کتیرمک ارزوسی قائم اولونجیه قدر تمام یارم عصر قدر
دوام ایشدر.

اونجی فصل

اوروپاده اداره مشروطه

آوروپاده مشروطه سیرہ . — ۱۸۱۴ دہ اسکی پرلرینی
آلده ایدن اوروپا حکمدارلری طرز حکومتی ده انقلابدن اول نصل
ایدیسه او صورتله تأسیس ایتمکه چالیشدی لر . بعضری یالکز
بر رجوع ایله اکتفا ایتمک ایستیورلردی . مثلاً (قورنیش)
یولی فرانسزلرک اثری اولدینی ایچون سباردنیا قرالی بویولی
حو ایتکی دوشونمشدی . هس الکتوری ده کندی غیبوتی
اثناسنده ترفیع رتبه ایدن ضابطانی اسکی رتبه لرینه ایندیرمک
ایستیوردی . — مملکتلری اعاده اولونان حکومتلر فی الحقیقه
انقلاب اثناسنده یاپیلان اصلاحاتک بر قهمنی محافظه ایلدی لکه
اونلرده : زراعت و صنایعک سربستیبی ، قواننده اتحاد ،
منتظم بر اداره ایله وقتیله منور الافکارانه استبداد اثناسنده
باشلانوب علی العموم حکومتک نفوذینی تنقیص ایتمین شیلردن
عبارتدی . فقط بونلر انقلابک غیره شروع برسؤ قصد اولدینی
وبناء علیه اداره مطلقه یی تأسیس ایتمک ایجاب ایلدیکنی اساس
اوله رق ایلری سوردیلر . اون سکرنجی لویی ناپولئون ایچون
فاصل دیبور ، ۱۸۱۵ تاریخی دور حکومتک یکرمی برنجی
سنه سی عد ایدیوردی .
ایشته اداره مطلقه اصوله شو صورتله عودت ایلدلسنه

(رہستوراسیون ، اعادہ حکومت) دیرلر . او تاریخدن اعتباراً اوروپادہ ادارہ حکومت ایکی طرزده تلتی ایدیلیوردی . بری (مطلقیت) نظریه سی ، دیکری ده (مشروطیت) نظریه سی ایدی . هر مملکتده یکدیگری نه مخالف ایکی فرقه ظهور ایتدی . بونلردن بری مطلقیت اداره فرقه سی ، دیکری مشروطیت (احرار) فرقه سی ایدی . ایکی فرقه اره سنده کی فرق یالکیز طرز اداره نک شکلنده دکلدی . مثلاً مشروطیت فرقه سی جمهوریتی مونارشییه (بر حکمدارله اداره یه) ترجیح ایتمیوردی . اصل فرق طرز اداره نک اساسنده ایدی . مطلقیت اداره نظریه سی همان همان اسکی (حقوق روحانیه) نظریه سنک عینی ایدی . - بو نظریه یه کوره مملکتده (قرالندن باشقه کیمسه نک صلاحیتی) یوقدر . بو صلاحیتی قرالک عالیه سنه جناب حق احسان ایتمش وبونک پدردن اولاده انتقال ایتسنی ارزو بیورمشدر . قرالک حقوقی دیناً وتعاملاًدر . قرال بو حقوقی تبعه سندن آلامشدر . بناء علیه تبعه سنه هیچ بر شی طانیشمغه مجبور دکلدز . نصل ایسترسه او یله و وجداننه تبعاً اداره حکومت ایدر . بوتون صلاحیت قرالندن نشأت ایدر . قرال اداره حکومت ایتک حقندن ماعدا قانون وضع ایتک و ویرکی تعین ایتک حقنه ده مالکدر . بهض حکومتلرده تبعه بیننده مبعوثلر انتخاب ایتک عادتی محافظه ایدلمشدی . بومبعوثلر مجلس طرزنده اجتماع ایدرلردی . حکمدارلر بو مجلسه متفقاً اداره حکومت ایتک چالیشیرلردی . فقط حکمدار ایله مجلس

یکدیگر بیه ائتلاف حاصل ایده مینجه او وقت قرالک دیدیکی اولوردی؛ چونکه حق حاکمیت ملنده دکل ، حکمدارده ایدی .

ادارهٔ مطلقه طرفدارلری قرالک تبعه سنه قارشى تمهداتده بولونماسنى قبول ایتدکلى ایچون تحریری بر قانون اساسی بی اصلا قبول ایتزلردی . بونلرک قبول ایتدکلى شی ، عنعنات ایله قرالک ارزوسندن عبارتدی . دینک حکمداره اطاعت امر ایلدیکی نظر اعتباره آلدقلى ایچون دینی مجبوری بر حاله قویمق و کلیسایه بر نفوذ سیاسی ویرمک ارزو ایدرلر (بوکاده «تخت ایله محرابک امتزاجی» نامی ویررلردی) . - حکومتک افعالی موأخذه ایده بیه جک غزته لردن توحش ایتدکلى جهتله بونلری دائمی بر نظارت آلتنده بولوندرمق ایسترلردی . کذا بونلر بوتون مقاله لری نشر ایدلزدن اول تدقیقه مامور بر (سانسورلک) تأسیس ایتمک طرفدارى ایدیلر .

هر مملکتده ادارهٔ مطلقه طرفدارلری سرای ارکانی ایله مأمورلردن مرکبیدی . زادکان ، رهبان و کویلولرده بونلردن طرف ایدی . بو فرقه نك حسیات حاکمسی ماضیه حرمت و انتظامه محبتدن عبارتدی .

مشروطیت اداره نظریه سیده (ملنک حاکمیتنى) اساس اتخاذا ایدیوردی . بو، طبق انکلیزلرک پارلمنتو اصوللرینک عینی ایدی . بو نظریه یه گوره قرالک حق سلطنتی قبول ایدیلیر . فقط قرال ملنک ارزوسى ایله و برمقاوله تحتنده سلطنت سورر .

قراک نه قانون وضع ایتمکه ، نه ویرکی جبات ایلکه ، نهده ناظرلرینی ایستدیکی کبی انتخاب ایتمکه حتی واردر. قرال انجق ملتی تمثیل ایدن مجلس ایله متفقاً اداره حکومت ایدر . شاید قرال ایله ملت بیننده بر اختلاف ظهور ایدرسه ، انقیاد ایتمک قراک وظیفه سی در . چونکه حاکمیت ملتکدر .

ملتك حقوقی تأمین ایچون بر (قانون اساسی) قلمه آلنیر . بو قانون بوتون مملکتک قانون اساسیسی تشکیل ایدر . قرال ایله ناظرلری بو قانون اساسی به رعایت ایلکی تعهد ایدرلر . شاید بونده قصور ایدمک اولورلرسه ملت بونلره قارشی طور مق حقه مالکدر . ناظرلر مسئولدر . اداره جه وقوع بولان سؤ استعمالک اوکنی آلمق ایچون اک امین چاره امور اداره نک اهالیجه ده معلوم اولماسیدر . بوسبیدن مشروطیت اداره طرفدارلری سویله مک ، یازمق وطوبالامق خصوصنده حریت طلب ایدرلر . بوندن باشقه حریت وجدان ایله کافه مذاهب بیننده ده مساوات ارزو ایلرلر .

اداره مشروطه طرفدارلری بالخاصه شهرلرده بولونیورلردی . بونلر بورژووالر ، عمله لر ، ارباب قوانین و محررلردن مرکب دی . یگانه دستوری (ترقی) و (حریت) کله لرندن عبارت دی .

رهستوراسیوندن همان براز صوکر ا بویکی فرقه ارمسندمه مجادلات باشلادی . بوتون مجادلات ایکی مسئله اوزرینه ایدی : اولاً : احرار ، تبعه سنک حقوقی تعیین ایتمک ایچون

حکومتلردن (بر قانون اساسی) قلمه آلمسنی طلب اییدیور ، حکومتلر ایسه حکمدارک حقوق و حیثیتنه مغایر بر تعهد آلتنه کیرمکدن امتناع ایلیوردی .

ثانیاً : احرار سربستیء مطبوعات طلب اییدیور ، حکو-
مترلر ایسه (هیئات اجتماعیه ویا حکومتلرک تشکیلاتنه تعرض یوللو یازیلان) مضر یازیلرک نشرینه مساعده ایتمیور ، سانسور اصولنی محافظه ایلیوردی .

۱۸۱۵ده اروپا حکومتلرینک همان کافه سنده ادارهء مطلقه طرفدارلری راس کارده بولونیوردی . بونلر مخالف محررلر حقنده تعقیبات قانونیهده بولونیورلر ، اجنبی کتابلریله غزته- لری منع اییدیورلر ، بونلری اوقویانلری حبسه آتدیریور- لردی . آلمانیهده حکومتلر طلبه جمعیتلرندن قورقشلر ، بونک اوزرینه (بورشن شافت)ی لغو ایتمک ، دارالفنونلره نظارتجیلر تعیین ایلمک و طلبه اجتماعلرینی منع ایتمک ایچون (قارلسباد) قونفرمسی انعقاد ایتمش ، دهاصوکره برچوق طلبه قلعه بندایدلمشدی .
- احرار ایسه خفی جمعیتلر تشکیل اییدیور ، اتفاقلر ویا عصیانلره حکومتی یا دویرمهک ویاخود قانون اساسی اعلاننه مجبور ایتمک چالیشیوردی .

انگلتیرهده پارلمنتو اصولی — انکلتیره اساساً پارلمنتو مملکتیدر .
بواصول اوراده تاسیس ایدلشدر . اقوام ساثره ایسه هپ انکلیز اصولنی قبول ایلمشدر .

پارلمنتو ایله اداره انکلتره دهدها اون سکزنجی عصرده تاسیس ایدلمش، حتی ایلك زور زلر زماننده (۱۷۱۵: ۱۷۶۰) طبق اون طقونجی عصرده اولدینی کبی دوام ایلشدی . بو کونکی کبی اوزمانلرده انکلترهده یازلمش بر قانون اساسی یوقدی . یالکز عادات ایله تاسس ایتمش قاعده لر موجوددی . اداره حکومت اوچ قوته تابع عد اولونوردی . اوده: ارثی قرال ایله ارثی لوردلر قامارسی و برده منتخب مبعوثلردن مرکب عوام قامارسی ایدی . پارلمنتونک وظیفه سی یالکز قانونلرله بودجه یی تصدیق ایلکدی . ناظرلری انتخاب وقوه اجرائیه یی ایفا ایلك قرالک وظیفه سی ایدی . قرال مسؤولدی (وحالاده او یله در) . شاید قرال غیر قانونی بر حرکتده بولنورسه اوزمان کنديسنه حسن توصیه ده بولونلیور دیمکدر . اوزمان پارلمنتویه قارشی قرال دکل ، ناظرلری مسؤولدر . اساساً مجلس مبعوثانده اکثریتی حائز فرقه رئیسینی قرال باش وکیل اولارق انتخاب ایدر ، دیگر رقاسینی انتخاب ایچون اونی مامور ایلر ، اکثریتی محافظه ایتدیکی مدتجه انی اداره حکومتده سربست براقیر . شو صورتله بوتون قوت مجلس مبعوثانده در . قرال ایله لوردلر زینندن باشقه برشی دکلدر .

اوجنجی زور ز دورنده ، ۱۷۶۰ دن اعتباراً وبالخاصه فرانسه یه قارشی ایدیلن حربلر اثناسنده بو اداره تبدیل ایتدی . قرال حقوقنی تکرار استعماله باشلادی . ناظرلرینی ایستدیکی کبی، حتی اکثریت خارجندن انتخاب ایتدی . اکثریت طرفندن طو-

تولیدینی حالده ناظر لرینی سقوطده ایندیردی. ۱۷۱۵ دن بری رأس ادارهده بولونان ویغ فرقهسی ۱۷۸۳ ده اکثریتی کاملاً غائب ایندی. حرب اناسنده ایسه ۶۰ اعضایه تنزل ایلدی. (امتیازات قرالی) یه مساعد طاورانان طوری فرقهسی ده سیاستی ادارهده قرالی بسبتون سربست براقدی. اوصره لرده فرانسه یه قارشی طور مق ایجاب ایدیوردی. حتی بری آبلوقه یه قارشی ایجاب ایدن تداییر قانون شکننده اولمایارق ساده جه (قرالک مجالس عقیدله ویردیکی امرلر) له اتحاد اولندی .

برقرالک قاننه کیرمش ، کلیسانک تشکیلاتی بوزمش ، خصوصی ثروتلری حجز ایتمش وقانون اساسی ایله تحت حکمداری یی آلت اوست ایتمش اولان فرانسه انقلابی انکلیزله اولیله بردهشت ویردی که بونلر هر درلو تبدلاتدن نفرت ایندیله . تمام اوتوز سنه انکلیتره یه اوافق بر اصلاحاتی بیله قبول ایندیرمک امکان خارجنده اولدی . فرانسزلر اسکی اداره لرینی ییقدقلری ائنده انکلیز لرده « اسکی انکلیتره » یی بسبتون تحکیم ایندیله .

۱۸۱۵ ده صلح تأسس ایندیکی زمان حکومه ته اسکی تشکیلاتی اصلاح ایندیرمک ، مجلس مبعوثانک نفوذینی تزید وقرالک نفوذینی تقیص ایدرک پارلمنتو اصولنی یکیدن تنسیق ایتک ایچون ایکی جریان وقوعه کلدی .

اصلاحات مطالباتی مواد آتییه ده دائردی : اولاً - قسماً اون آلتنجی عصر دن قاله حقوق جزا (بونلر ده الآن داغلامق .

تیکرک و قامچی جزاسی ابقا ایدلمشدی . هان ایکی یوزدن زیاده جراثم ایچون اعدام جزاسی واردی . بر سرکیدن بش شیلین چالمق ، آطه طاوشانی بسله نین بزدن برطاوشان آشیرمق و آفاج کسمک جنایتدن معدوددی)؛ ایشته بو اصلاحات قسماً ۱۸۱۰ ده استحصال ایدیله بیلدی ؛

ثانیاً — قروموه طرفندن تشکیل و ایمپراطورلق حربری زمانده اکیل اولونان اصول اقتصاد . (انکلیز لیمانلرینه انکلیز کیلرندن باشقه سنک کیرمسی ممنوعدی . اجنبی ائتمه سندن آلتان رسوم غایت یوکسک و اوقدر قاریشیق ایدی که ، بونک ایچون بیک ایکی یوز ماده لی برتعرفه یا بغه لزوم حاصل اولمشدی . مملکتده صرف و استهلاک ایدیله جک بغدادی بولونمادینی حالده بغدادی فیثاتی فوق العاده یوکسکمدکجه خارجدن انکلتریه بغدادی ادخالی ممنوع ایدی) . بو اصلاحات ده ۱۸۲۳ ایله ۱۸۲۸ اره سنده اجرا ایدلمشدی ؛

ثالثاً — الان اویدنجی عصرده تشکیل اولونان مظالم اصولنه مستند امور دینیه . (قاتولیکلر بوتون مأموریتلردن چیقاریلیر و پارلمنتوده بولونمازلردی . مأموریته کچن هر شخصدن قاتولیک دساتیرندن بری علیهنده بولونماسی طلب ایدیلیردی) . قاتولیکلرک آزادیسنه ده ۱۸۲۹ ده قرار ویرلمشدی ؛

رابعاً — استحصالی اکاوزون سورهن اصلاحات ،

اون دردردنجی عصر دن قائله انتخابات اصولنك اصلاحی ایدی .
مبعوثلردن بعضری بر قونتلغك اصحاب املا كندن متشكل قونتر
مجلسی طرفندن ، بعضری ده بعض ممتاز شهر (بورغ) لرك
اهالیسی طرفندن انتخاب اولونورلردی . فقط قرون وسطادن
بری نهره دن ونه قدر مبعوث انتخاب اولونا جفی ، نه ده انتخاباتك
طرزی هیچ دكیسه مشدی . بوسبیدن انتخاباته سؤاستعمالات
ایله مناسبتنزلكلر كثرته واقع اولوردی .

اولا مبعوثلق موقعلری اهالی ییننده غیر مساوی بر صورتده
تقسیم ایدلمشدی . ۶۵۸ مبعوثدن ۱۰۰ زی ایرلاندان ، ۴۵ ی
اسقوچیان ، ۲۴ دی غال مملكتندن ، ۴۸۹ ی ده یالکز
انكلتره دن چیقاردی . انكلتره ده ۳ میلیون دن ده آز نفوسه
مالك بولونان جنوبده کی اون قونتلقدن ۲۳۷ مبعوث انتخاب
ایدیلیر ، دیکر لری ۸ میلیون دن زیاده بر نفوسه مالك
اولدقلری حالدله انجق ۲۵۲ مبعوث انتخاب ایدرلردی . اسقوچیا ده
۲ میلیون نفوسدن ۴۵ ؛ (قورنوآی) ده ۳۰۰۰۰۰ نفوسدن
۴۴ مبعوث انتخاب اولونوردی . مساواتسزلق اك زیاده قونتلقلره
بورغلر آره سنده ایدی . همان بوتون اهالی یی تمثیل ایدن قونتلقلر
۱۸۶ ، بورغلر ۴۶۷ مبعوث انتخاب ایدرلردی . بوتون
لوندره شهرینی احتوا ایدن (میدل سه قس) قونتلغك یالکز
بر عائله دن باشقه کیسه قالمیان (اولدسارم) بورغی قدر بیله
مبعوثی یوقدی . بورغلر ك بر چوغنده کی منتخبلر ك مقدراری

هان کولنج بر حالده ایدی . بونلردن قرق آلتیسنده ۵۰ دن؛ اون طقوزنده ۱۰۰ دن ؛ قرق آلتیسنده ده ۲۰۰ دن آز منتخب واردی . یکریمی دردی قرون وسطادن بری نفوسسز بر حالده قالدینی ایچون هیئت انتخابیه بیه مالک دکلدی . بونلر (محوالمش بورغلر) دن عبارتدی . مثلاً (باراطون) نده یالکز بر او ، (فاطون) ده یالکز بر یارق قالمشدی . (دون ویشی) ایسه عصرلردن بری صولر ایچنده ایدی . بو بورغلرک هبسی ده الآن (هر بری ایکیشر) مبعوث کوندریوردی . حال بوکه اون آلتنجی عصردن اعتباراً تأسیس اولونان شهرلر ، از جمله (لیوه رپول) و (مانجسته ر) شهرلری ۱۰۰۰۰۰ نفوسه مالک اولدقلری حالده هیچ مبعوث کوندرمیورلردی . ایدیلن حسابیه کوره ۱۷۹۳ ده مجلس مبعوثانده مجموعی ۲۶۰ منتخبدن ده آاز بر هیئات انتخابیه طرفندن انتخاب ایدلمش تمام ۲۹۴ مبعوث واردی . اکثریت ایسه ۱۵۰۰۰ کشیدن ده آاز بر رأی ایله انتخاب ایدلمشدی . ایشته بوسیدن طولای مبعوثلر ودها طوغروسی بورغ مبعوثلری ملت حقیقی مبعوثلری دکلردی . بونلر حدذاتنده بورغ صاحبی ویا حکومت طرفندن تعیین اولونورلردی . ۶۵۸ مبعوثلقدن ۴۲۴ ی بوضورتله ۲۵۲ حامینک ویا صرف حکومتک اداره سنده ایدی . بو حطیلر کندیبلرینی بومقاملرک صاحبی عد ایدرلر ربومقاملره مبعوث انتخاب ایتدیرلردی . مبعوثلق مقامنی کندیبلرینه ویا اولادلرینه تخصیص ایتدکلری زمانلر ،

آدملرینه تخصیص ایدرلردی . ۱۸۲۹ ده ، (نهوارق) بورغنه مالک اولان دوق دو نیوقاستل بورغ مبعوثلرندن برینی استعفاستی ویرمهک اجبار ایتمش و جمله سی ده کندی مسـتأجرـلرندن معدود اولان اهالی یه قارشی نامزدلکنی وضع ایلشدر . بولردن ۵۸۷ سی دوق رقیب ایچون رأی ویردکلرندن طولایی طرد اولونمشلردر . حتی ایچلرندن بری مجلس مبعوثانه شکایت ایتدیکی زمان دوق : « ملکمی ایستدیکم کبی اداره ایتک حقم دکلی ؟ » دییه جواب ویرمشدر . - اکثریا مبعوثلق پاره ایله ساتیلیردی . اون سکزنجی عصر نهایتنده هندستانده ویا تجارتله کسب ثروت ایدن سوکره دن کورمه (ناباب) لردن بر چوغی پارلمنتوده مقام صاحب اولغی شرف عدایدرلردی . حتی مبعوثلق ایچون تنزل و ترفع ایدر برده فیات تعیین ایدلشدی .

منتخبلرک مستقل بولوندقلری قونتلقلرله بورغلرده ده منتخبلرک مقداری کولنه چک بر درجه ده ایدی . تکمیل اسقوچپاده ۲۵۰۰ منتخب واردی . قونتلقلردن برنده ۲۹ ، دیگر برنده ۲۱ منتخب چیقمشدی . بولردن یالکز بریسی اوراده مقیم ایدی . بر کون (بوت) قونتلغنده انتخابات اجرا ایتک ایچون سه ریف طرفندن وقوع بولان اجتماعه یالکز بر منتخب کلش ، ریاستی بو احراز ایتمش ، مجلسک کشادینی اعلان ایلش ، اهالی یه مراجعت ایتمش ، اهالی نامنه جواب ویرمش ، کندی نامزدلکنی وضع ایتمش ، کندی رأیه قویمش و اتفاق آرا ایله

ينه ڪنڊني انتخاب ايلسدر .

انتخابات الان اسڪي طرزده باپيليردي . نامزدلر بر ڪرهوت
 اوزرينه چيقارلر ، اهاينڪ باغيرتيلري وقارغشهلقلري ايجنده
 نطق ايراد ايدرلردي . منتخبلره ايجه جڪ بر شي اڪرام
 ايمڪ ، هر ايڪي طرفڪ قلوبلري طرفندن نمايش اجرا ايدمڪ
 عادتدي . اڪثريا غوغاده ايديليردي . بوتون منتخبلر آچيق
 بر يره طوبلانيرلر ، آره لرينه منتخبلر اولميا نلرده
 صوقولورلردي . سه ريف ، بونلره اللريني قالديرتارق راى
 ويرديرر و نتيجه سنى اعلان ايدردي . اڪثريا نتيجه اوڳهه دن
 معلوم اولوردي . چونڪه يالڪنز بر نامزد بولونوردي . بر قاچ
 نامزد بولوندينى زمان شايد رقيب ارزو ايدرسه رايه (پول)
 مراجعت ايديليردي . هر منتخبلر راينى يوكسڪ سسله سويلر
 ودرحال قيد ايديليردي . انتخابات اڪثريا هفته لرحه سورردي .
 اون سڪزنجى عصر دن برى انتخابات بوزو قلقلرندن شكايت
 ايديليوردي . بوسواستعمالات ثروتله برابر برقات دهها آرمشدى .
 ملتى تمثيل ايمسى لازم ڪلن مجلس مبعوثان سه نيورلرله زنڪين
 حائله لردن باشقه سنى تمثيل ايميوردي . ۱۸۰۸ دن برى ويغلىر
 همان هر سنه اصلاحات طلبنده بولونيورلر ، ۱۷۸۳ دن ۱۸۳۰ .
 قدر دائما اڪثريتى محافظه ايدن طوريلرده بو فكري رد
 ايديليورلردي .

ويغلىر نهايت اصلاحات اجراسى ايجون اهالى بي آله ايمڪه

موفق اولمشلردی . اوزمانه قدر بورزووالر بيله سیاسته اودرجه مشغول اولیورلردی . پارلمنتو اجتماعلری خفی اولیورلردی . غزتهلر ایسه او درجه تعمیم ایتمه مشدی . فقط اون سکزنجی عصر نهایتنده عظیم بر تبدل حصوله کلدی . صنایع ماکنهلر سایه سنده تجدد ایدر ایتمز شهر اهالیسی بک زیاده آرتمش، حوادث مراقلیسی بر صنف خلق وجوده کلشدی . ۱۷۶۹ دن ۱۷۹۲ یه قدر اوچ بویوک یومی غزته تأسیس ایدلشدی . بونلر هپ مجلس مبعوثانده اولان شیلری یازارلردی . بو غزتهلرک سنوی صایتش مقداری ۱۷۵۳ ده ۷ میلیون ایکن، ۱۸۰۱ ده ۱۶ ، ۱۸۲۱ ده ۲۵ میلیونه بالغ اولمشدی . ۱۸۰۸ و ۱۸۰۹ ده ده ایکی بویوک مجموعه تأسیس ایدلشدی (۱) . ۱۸۰۱ ده مجلس مبعوثان ضبطلری نشر ایدلمک باشلامشدی . - ۱۸۱۵ دن صوکره فرقهلر بویوک سیاسی اجتماعلر (مه تیغلر) عقد ایدرک افکار عمومیه بی تحریک ایتمک باشلادیلر . بو مه تیغلرده ایراد نطق ایدنلر یوکسک یر کره و تدن ویا بر آرابه اوزرندن نطق سویلرلردی (بو ، مه طودیستلردن آلتمش بر عادتدی) . اجتماعلردن اول ویا صوکره فرقه افرادی کچید اجرا ایدرلر ، اللرنده بیاقلر و بیاناها لره سوقاق سوقاق طولاشیرلردی . ده صوکره سیاسی

(۱) وینلر طرفندن (ادیمبورغ ره ویو) ، طوریلر طرفندن (قوآرتلی ره ویو) .

جمعیتلرده تشکیل ایدلشدی. بوجمعیترک اغضاسی اطانه ویررلر، اصلاحات ایچون پروباغاندا یایمغه مأمور بر قومیته تعیین ایدرلردی. ۱۸۲۳ ده پروتستانلق یمینک لغوی ایچون (قاتولیک جمعیتی)؛ ۱۸۳۰ ده انتخاباتی اصلاح ایچون (برمنغام جمعیتی) تأسیس ایدلشدی. ایشته بوصورتله انکلترده (مطبوعات) و (افکار عمومیه) کبی ایکی یکی قوت وجوده کنیرلشدی (۱). بوقوت قرالک و سه نیورلرک نفوذینه قارشی طورارق اکثریتی ویغله تامین ایدیور، وپارلمنتونک نفوذینی تحکیم ایلوردی. بوکون غزتهلر و افکار عامه اولمادن پارلمنتو اصولندن برشی آ کلاشیلاماز. حتی انکلزجه (تایمس) غزتهسی ایچون حکومتک دردنجی قوتی در دینیر. گندا، انکلترده حاکمیتده افکار عامه ده در.

عادانک شو صورتله تبدلی نهایت ۱۸۳۲ ده انتخابات اصولنک اصلاحی ایله نتیجه لندی. هیچ بر تبدل اجرا ایتمه مکده تعند ایدن قرال دردنجی زورز ۱۸۳۰ وفات ایلشدی. ویغله، طوریلرک غیرممنونلریله برلشهرک اکثریتی قازانمشلردی. ایشته اوزمان بونر اصلاحات طلب ایلدیله. طوری قاینه سنک رئیسی اختیار بر جنرال، وانه رلوغالی دوق ده ولدینغتون ایدی.

(۱) اون سکزنجی عصرده کی انکلز حیات سیاسی بر چوق زمانندن بری هپ اون طقوزنجی عصرده کنک عینی کبی تصور ایدلشدور. فقط آره یرده بر فرق واردرکه اوده اون سکزنجی عصرده ایشلر همان کیزلی یا بیلدیفی حالد. اون طقوزنجی عصرده علی یا بیلما سیدر. یعنی یکی برشی وارسه، اوده (علنیت) در.

وہلینغنون کرسی بہ چیقہرق « الیوم موجود اصول تمشیک
تعدیلہ محتاج بولوندیغندن ہیج برشی آ کللامدیغنی، حتی بوفکرک
نابحل اولدیغنی، شاید کندیسنہ بر مملکت ایچون قانون
یاماسی تکلیف ایدیلہ جک اولورسہ شمیدیکی اصولدن مکمل
بر اصول انتخاب ایدہ مہ جکنی، چونکہ بونک دہا مکملنی یامغہ
طبع بشرک کفایت ایلہ مہ جکنی» بیان ایتدی. بویانات اوزرینہ
مجلس مبعوثان قاینہ علمپندہ رأی ویردی. قاینہ سقوط ایتدی.
بوکا خلف اولان ویغ قاینہ سی اصلاحاتہ انجق ایکی سنہ
صوکرہ موفق اولابیلدی. واصلحاتی تمام اوچ دفعہ تکلیف
ایتدی.

۱۸۳۲ اصلاحاتی بر نوع او یوشمادن عبارتدی. فقط صرف
اهالینک مقداری اساسنہ مستند منتظم بر اصول تاسیس ایتک
ایستنلمدی.

عمومی رأی اصولی ابقا ایدلدی. یالکز رأیلرک جمعی ایکی
کوندن فضلہ سورمہ مسنہ قرار ویرلدی.

مبعوثلرک عددی (یعنی ۶۵۸ اولماسی) ایلہ قونتلقلرک
وبورغلرک مبعوثلری اولق اوزرہ ایکی صنف مبعوث بولونماسی دہ
ابقا ایدلدی. یالکز بورغلرہ عائد مبعوثلقلرک بر قسمی آلوب
قونتلقلرہ ویرلدی. بوزولان بورغلردن ۵۶ بورغ ۲۰۰۰ دن
آز نفوسہ مالک اولدقلری ایچون ۱۱۱ مبعوثلق غائب ایتدی.
نفوسی ۴۰۰۰ کشیدن دون اولان ۳۰ بورغ دہ ایکی مبعوث

چيقاراجق ايكن يالكز برمبعوث چيقارايىلدى . ديكرايكي بورغندنه يالكز اوچمبعوث چيقدى . بوصورتله قازانيلان ۱۴۳ مبعوثلق تكرر تقسيم ايدلدى . بونك ۶۵ ى قونتلقره ويرلدى (اوزمان قونتلقرك ۹۴ مبعوثى واركن شمدى ۱۵۹ اولدى) . ۴۴ دىده هيچ مبعوثلرى اولميان بويوك شهرلردن يكرمى ايكيسنه ، ۲۰ سىده وسطى شهرلردن يكرميسنه ويرلدى . متباقيسىده ايرلاندايله اسقوجيايننده تقسيم ايدلدى .

منتخبلك حقى املاك وارداتنه مالك اولانلرك برامتيازى اولارققالدى . قونتلقرده ۴۰ شيلين (۵۰ فرانق) وارداتى اولان بوتون املاك صاحبلرى ايله ۵۰ ليرا وارداتى اولان بوتون چفتلك صاحبلرينه ، بورغلرده ۱۰ ليرا (۲۵۰ فرانق) كيرا ويرن هر مستاجر حقا انتخاب ويريلهرك بو حقا برقاتدها توسيع ايله اکتفا ايدلدى .

بواصلاحات ، منتخبلر مقدارينى يوزده اللى آرتدير يوردى . اهااليدن ۳۲ كشى به برمنتخب اصابت ايدر كن شمدى ۲۲ كشى به برمنتخب اصابت ايدى يوردى . يكي منتخبلر اك زياده چفتجى واصناف ايدى . عملر لالآن حق انتخابدن محروم بولونيوردى . عملر لردن برچوغى بوندن ممنون اولمايارق بويوك بر(عمله جمعى) تشكىل ايلديلر . دها ۱۸۱۶ و ۱۸۱۹ ده بونلردن (راديقال) تسميه اولونان بر فرقه آراى عموميه طلب ايتك ايجون نمايشلر اجر ايلشدى . ۱۸۳۷ ده ايسه غير ممنون فرقه لر راديقاللرك

پروگرامنی قبول ایدرک پارلمنتویه بر استعدا تقدیم ایتدیلر .
 بو استعداده فرقه لرینک مطالباتی ایضاح ایدرک بوکا (اهالی فرمانی)
 نامی ویردیلر . بو فرمانده بوتون اهالینک رأی ویرمک حقنه
 مالک اولارق پارلمنتویه اعضا انتخاب ایدله بیلملرینی ، مبعوثلره
 برپاره ویرلمسنی ، مملکتک مساوی دائره لره آیرماسنی ، انتخاب
 عمومی بردفتره یازلق صورتیه یا یلمیوب کیزلیجه برکاغد (باللو)
 اوزرینه یازماسنی . طلب ایدیورلردی . - (فرمانجیلر) اهالینک
 سفالندن ده شکایت ایدیورلردی . بونلر : « انکلیمشر و طیتی
 بزم ایچون یازورله ایش کورمک و یا خود سفالنه اولمکدن باشقه
 بر معنی افاده ایتمز » دیورلردی . عمله لر کیجه لین بویوک جمعیتلر
 عقد ایتدیلر ، آلرنده مشعله لرله طولاشدیلر . تمام اوچ دفعه
 (۱۸۳۹ ، ۱۸۴۳ و ۱۸۴۸ ده) جسم استعدا لر تنظیم ایدرک
 بونلری تمام اوچ میلیون کشی به امضالاتدیلر . فقط پارلمنتودن
 ینه برشی . الده ایده مدیلر . انجق ۱۸۷۲ ده غلادستون قاینه سی
 کیزلی انتخاب اصولنی تأسیس ایده بیلدی .

اصلاحاتدن صوکره انتخاب اولونان مبعوثلر افکار عمومییه به
 دها مطیع ، کتله اهالینک منافعه دها منقاد و دها فعال برحاله
 ایدی . مجلس مبعوثانک ۱۸۲۴ دن ۱۸۳۲ یه قدر موجود
 مذاکرات مطبوعه سی وسطی اولارق ۳۱ جلده بالغ اولیورکن
 ۱۸۳۲ دن اعتباراً وسطی اولارق ۵۰ جلده بالغ اولدی .
 اهالی پارلمنتو مناقشاتندن دها ای خبردار اولدی . مذاکراتک

کیزی طوتولاسنی امر ایدن قانون هنوز فسح ایدله مشدی . فقط ضبطنامه لرك سته نوغرافی اصولیله طوتولان عینلرینک غزته لره نشری عادت حکمنه کیردی . غزته جیلر ایچونده بر موقع انشا ایدلدی . کذا مبعوثلرک رأیلرینی نشر ایتمک ممنوع ایکن ۱۸۳۶ دن سوکره بونی مجلس مبعوثان کندی نشر ایتمیردی .

پول لغو ایدلدن سوکره غزته لره ده فیثاتی ایندیرلدی (غزته لر بر په نی په ، یکریمی پاره په ایندی) . شمندو فرلر و پوسته لر سایه سنده هر طرفه چارچاق انتشار ایتمدی . آرتق بر آقشام اول مجلس مبعوثانده اولان شیلردن هر کون بوتون لنگلترده خبر آلینیوردی . غزته لره مکصداری آز ایددی (لوندرده انجق یدی سکز غزته واردی) . فقط صایتش پک زیاده اولدینی ایچون بو هر غزته نك نفوذینی آرتدیریوردی . میتینغرلر ده صیق اولیور ، جمعیتلر ده قوتلی و تشکیلاتی ده منتظم اولارق تشکیل اولونیوردی .

فقط شکلاً هیچ برشی دکیشدیرلمدی . کذا هیچ بر قانون اساسی ده قلمه آلمادی . مجلسلر عین عاداته تابع اولارق مذاکراته دوام ایتمدی . معاملات عین قواعد نظرأ اجرا ایدلدی . رئیس دائماً باشنه بر په روقا کیر ، یاننده دائماً بر (هرو) بولونور ، یازی ماصه سنک اوزرینه بر چوق سلاح قوردی . مبعوثلر یرلرندن سویلرلردی . فقط حیات سیاسی ده فعالانه

اولیایه باشلاینجہ عوام قامارہ سنک اہمیتی دہ تزاہد ایتدی . ملتی تمامیلہ تمثیل ایدن مبعوثلرہ قارشلی لوردلر اودرجه قارشلی طورمغہ جسارت ایدہمدی . لوردلرک بر چوغنی مجلسلرینک انعقادندہ حاضر بولونمادی . اکثریا لوردلر قامارہ سندہ اون بش کشتی قدر بولونور ، بونلردہ عوام قامارہ سی طرفندن تصدیق اولونان قانونلری بلااعتراض قبول ایدرلردی . قرال ، امتیازینی دائما محافظہ ایتدی . حکومتک بوتون مقاولاتی ہب قرال نامنہ عقد ایدیلیر ، ناظرلرینی انتخاب ایتک حقی قرال دائما محافظہ ایدردی . فقط انکلتزہدہ قرالک ناظرلری اکثریت رؤساسندن انتخاب ایتسی وایچلرندن بری اقلیتدہ قالیر قالماز ہبسنک بردن چکلملری بو کون انکلتزہدہ کوکلشمش بر عادتدر . قرالیچہ ویقتوریا ۱۸۳۷ دہ تخت حکومتہ جالس اولدینی زمان بو عادتی فسخ ایتہمشدر . کذا آتیا باشقہ بر قرالک دن فسخ ایدہجکی شہیلیر .

بناء علیہ ۱۸۳۲ دن بری قوت مجلس مبعوثانک اکثریتنہ ، یعنی ، بالواسطہ منتخبلرک ارزوسنہ تابعدر . افکار عمومیہ دیکشدجکہ بونی ادارہ ایدنلردہ دیکشیر . ۱۷۱۵ دن ۱۸۳۲ پہ قدرایکی فرقہ ، ویغلر ایلہ طوریلر یارہ شرعصرمدت رأس کاردہ قالمشلردر . ۱۸۳۲ ایلہ ۱۸۹۶ بینندہ ایسہ ہر ایکی فرقہ اون دفعہ سقوط ایتش و اون دفعہ راس کارہ کچمشدر . ہر ایکی فرقہ ، قاینہدہ اولدینی کی مجلسدہدہ مخالف جہتی التزامدہ متحد

بولوناجق وجه ايله تشكيل ايدلمشدى . هر ايكيسنك ده معلوم برر رئيسى (له در) واردى . فرقه رأس كاره كليركلز فرقه نك رئيسى باش وكيل اولور ، هر ايكيسنك ده تشكيل ايدم جكي قايينه اوكله دن حاضر بولونوردى (۱) .

ايشته اون سكرنجي عصرده يالكز طاسلاغى وجوده كتيريلن (پارلمنتو) اصولى اون طقوزنجي عصرده انكلتره ده شو صورتله اتمام اولونمش و اوروپاده بو طرز اداره نك لازم غير مفارقي اولارق كورولمكه آيشلمش نه قدر اساسلى عادتار وارسه كافيسى بو صورتله تأسس ايتمشدر .

انكلتره ده ارثى بر حكمدار واردر . مملكت اونك نامنه اداره اولونور . فقط قرال هيچ بر قوتى حائز دكلدر . «قرال يالكز سلطنت سورر ، اداره حكومت ايتمز» .

پارلمنتو ايكي مجلسدن مركبدر . فقط اتخابله اولميان مجلسك (عالى مجلس) قوانينى تصديق ايتمكدن باشقه صلاحيتى يوقدر . بودجه يي تصديق و قايينه نك حركتنى قونترول ايتك يالكز اتخابله اولان مجلسك وظيفه سيدر .

قايينه مجلس مبعوثانده اكثرى حائز فرقه لردن اتخاب اولونور ، ورئيسى ده او فرقه نك رئيسيدر (انكلتره ده نظارت عنوانى رسمى دكلدر . قايينه اوچ (ديني تهر) ايله بش (سه قره رده تا)

(۱) ۱۸۳۲ دن سوكره طورى فرقه سنه (محافظه كار) ، ويغ

فرقه سنه ده (ليه رال) نهي وپلمشدر .

و بر قاج قلم رؤسا سندن عبارتدر) .
 ناظر لر اتخاذ اولوناجق مقرر آتی مجلس عقدیله مذاکره ایدر لر .
 مجلسک اکثریتی برقرار و یردیکی زمان هر ناظر بوقراری یا قبول
 ایدر ، یا چکیلیر .

ناظر لر مجلس مبعوثانه قارشى مسئولدر . مجلس مبعوثان
 ناظر لر ی اتمام ایده بیلدیکی کبی ناظر لر طرفندن طلب ایدیلن برشیدک
 عکسنی تصدیق ایتمدیکی تقدیرده ناظر لر در حال استعفالی نی و یرر لر .
 ناظر لر متقابلاً مسئولدر لر . ایچلرندن بری اقلیتده قالیر . قالماز
 هبسی بردن چکلمکه مجبوردر .

مجلس مبعوثان آچیلنججه اولاحکمدارک (نطق افتتاحی) سنی
 دیکلر . بو نطقده قاینه مملکتک احوالی قرال نامه ایضاح ایدرک
 سیاستنی آکلایر . مجلس مبعوثان ده بوکابر (نطق جوابی) ایله
 مقابله ایدرک کندى حسیاتی بیان ایدر . - هر سنه ، برسنه
 صوکره کی بودجه نی تصدیق ایدر . مجلس مبعوثانده تصدیق
 ایدیلدن هسج بروبرکی وضع اولوناماز . قاینه اکثریتی حائز
 اولمادینی حالدده ینرأس کرده قالمق ایچون اصرار ایتمدیکی تقدیرده
 یرکینک ردی ، مقصدینه نائل اولمق ایچون مجلس مبعوثانک آئنده
 سلاح مقامنه قائم اولور . - هر قانون لایحه سی و یا قره دی تکلیفنده
 قاینه دائماً مجلس مبعوثانندن (اعتماد رأی) طلب ایدر . یعنی
 مجلس مبعوثان کندیسنه اکثریت بخش ایتمدیکی تقدیرده چکیله جکنی
 بیان ایلر . مجلس ایسترسه اعتماد رأی و یرمه برک عدم ممنونیت بیان

ایده بیلیر . هر اجتماعه کوروله جک ایشلر اوجکهدن بر روزنامه ایله تعیین اولونور . فقط مذاکرات باشلامازدن اول هر مبعوث قاینه بی (استیضاح) ایتمک حقنه مالکدر . استیضاح مجلس مبعوثانک اعتماد آبی ایله نهایت بولور . مجلس مبعوثان بوقراری (روزنامه) به قید استیذیرر . فقط اکثریا استیضاح حقنده کی فکری بی بر حمله ایله بیان ایدر ، بوجهده : « روزنامه به یکسین » سوزیله باشلار . شاید بو اثناده قاینه نک لهنده رأی ویرلمزسه ، قاینه چکلمکده در حال مجبور اولور .

اقلیتده قالان بر قاینه مجلس مبعوثانک طاغیدماسنی قرالدن طلب ایتمک حقنی حازدر . بو اصول ، مبعوثان ایله قاینه دن هر هائیکی بزینک انتخابی منتخبلره براقق ایچوندر . فقط یکی انتخابات ائناسنده قاینه موقعنده قالیر . شاید یکی مجلس مبعوثانده قاینه به اکثریت بخش ایتمه جک اولورسه اوزمان قاینه چکلمکه مجبور اولور . آرتق تکرار انتخاب ایدلمش اولان بویله بر مجلس مبعوثانک بردها طاغیدلمسی ضربه حکومت تلقی ایدیلیر . چونکه مجلسک انتخابی ملت طرفندن واقع اولمشدر . حاکمیتده ملتهدر . (انکلترده پارلمنتونک اجتماعی ایچون تمین اولونان مدت یدی سنهدر . فقط مجلس مبعوثانی بو مدتدن اول طاغیتمق طادندر . هیچ بر مجلس مبعوثان آلتی سنهدن فضیله اجتماع ایتمه مشدر) .

قانون لایحه لرینی مجلس مبعوثانه علی العموم ناظر لر تقدیم

ایدر . فقط هر مبعوث یا بر لایحه ویاخود (تعدیلات) تکلیف ایتمک حقنی جائزدر . بوکاده (پارلمنتو صلاحیتی) دیرلر . هر درلو تداییر، اجتماع عمومیده مذاکره ایدلدکدن صوکره بر (قومیته) طرفندن تدقیق اولونور . (اکثریا) قومیته (بی تکمیل مجلس مبعوثان تشکیل ایدر، اوزمان مسئله یالکزمناقشه اولونور، فقط رأی ویرلمز) . دیگر قومیتلر ایسه رئیس طرفندن تعیین اولوناجق بر قاج اعضادن تشکیل اولونور (۱) .

هر قانون لایحه سی اوچ مذاکره ده (قرانده) بتیریلیر . هر ماده حقنده آری آری رأی ویریلیر . فقط بونک ایچون مجلس مبعوثانک (مستعجلیت قراری) ویرمه سی شرطدر . (شاید مستعجلیت قراری ویررسه اوزمان بر قرانده بتیریلیر) . بر مذاکره نک ویا رایک مرعی الاجرا اولابیلیمسی ایچون مبعوثلردن معین بر قسمنک اجتماعده حاضر بولونماسی ویا رایه اشتراک ایلمسی ایجاب ایدر .

مجلس مبعوثانجه تههد اولونان بر قانون لایحه سی لوردلر قامارهنسجه تصدیق و قرال طرفندن امضا ایدلدکدن صوکره قانون مقامنه قائم اولور . قرال بو لایحه بی مطلقا امضا ایدر . ایشته بوتون بو معاملات، هپایکی فرقه بیننده کی اختلاف

(۱) پارلمنتو اصولنی قبول ایدن اوروپا ممالکنده قومیتلر مجلس مبعوثانجه انتخاب اولونور . مجلس انجمنلره ویا قسملره آریلیر . ۱۷۸۹ دن یری فرانسه ده هپ بو اصول جاریدر .

دورنده تشکیل ایدلشدر. نملکتده هرایکسی ده عاداته رایستکار، اکثریت دکیشر دکیشمز مخالف فرقه به ترک موقع ایتمکه حاضر ایکی فرقه دن باشقه فرقه بولونمادینی ایچون بو اصول منتظماً دوام ایتمشدر. بو فرقه لر عاداتا تشکیلاتی مکمل ایکی حکومت کبیدر. منتخبلر بو ایکی فرقه دن بهمه حال برینی انتخاب ایدرک بو مناوبه دن اصلا خارجه چیقامازلر. بناء علیه هیچ برتبدل وقوعه کلمک احتمالی ده یوقدر. مع مافیله بو ایکی فرقه دن هیچ بری ده چوق بر مدت امور حکومتی سؤ استعمال ایده مز. چونکه سؤ استعمالات منتخبلرک عدم ممنونیتی موجب اولارق بونلرک اوته کی فرقه به کچملرینه سبب اولور. بونک ایچون ایکی فرقه بیننده اینوب چیقمه کیفیتنک موجود بولوندرلماسی پارلمنتو اصولنک شرائط اساسیه سی اولوق اوزره تلتی اولونور.

۱۸۱۴ فرماتی و فرانسه ده ره ستر راسیونه. — بوربونلر ۱۸۱۴ ده تکرار حکومت سورمک ایچون فرانسه به کلدکلیری زمان انقلاب و ایمراطورلق نظاماتنه رعایت ایده جکلرینی وعد ایلمشردی. فی الحقیقه بواثناده هیئت اجتماعیه به هیچ طوقونولمادی. هیئت اجتماعیه ینه حاکیت عوام اساسنه مستند اولارق قالدی. فرانسزلر قانون نظرنده مساوی اولاجقفلر و بوتون مأموریتلره قبول اولونابیله جکلردی. اسکی امتیازلر لغو ایدلشدی. اموال ملت یکی صاحب لرنده قالاچقدی. کذا اصول اداره به ده طوقونولمادی. اصول اداره هپ مرکزیت اساسنه مستند قالدی.

بوتون خدمات عمومیہ ، مالیہ ، عدلیہ ، ادارہ ، ضابطہ ، اردو و حتی ایالت تقسیماتی انقلابک یابدینی خالدہ قالدی . قود نابولٹون ، لژیون دونور و بانقہ ، دارالفنون کبی نابولٹونک احدثاتی ہپ ابقا ایدلدی . اہالی : «قہر اولسون عسکریازمق ، قہر اولسون حقوق موحدہ !» دیہ باغیرارق ایمراطورلق علیہنہ قیام ایتشلردی . بوسبیدن ، ہرکسک نفرت ایتدیکی بو ایکی تشکیلات لغو ایدلدی . انلرک یرینہ (اخذ عسکر) و (بالواسطہ تکالیف) وضع ایدلدی .

ایشته بوصورتلہ فرانسه ۱۸۱۴دن اعتباراً اجتماعی واداری بر تشکیلاتہ مالک اولدی . بو تشکیلات اوزماندن بری ہیج دیکشمیوب فرانسر حسیاتہ صاعلام بر اساس تشکیل ایتدی . فقط انکلترہ اولدینی کبی منتظم برادارہ حکومت مقانیزمسی مقامنہ دکلدی . بونک ایچون قوہ حکومتک نہ کبی قواعد کورہ تقسیم اولوناجفنی تعیین ایتک ، اوزمانک تعبیری وجہ ایلہ بر قانون اساسی اعلان ایتک و بو قانونی عادات میانہ صووق ایجاب ایدیوردی . ایشته بو ، انجق آلتمش سنہده حصولہ کلہ بیلدی (۱۸۱۴ - ۱۸۷۵) .

ایلک قانون اساسی ۱۸۱۴ دن قالمہ در . نابولٹونک ادارہ مطلقہ سنہ دشمن اولان فرانسر رجال حکومتی ایلہ متفق حکومتلر انکلیزلرک پارلمنت و اصولنہ حیران اولیورلردی . بو اصول اونلرہ بوتون ادارہ حکومتلرک اک احرارانہ سی کلیوردی . بونک ایچون

بو اصولی فرانسیہ دہ ادخال ایتمسنی اون سکزنجی لوئی بہ توصیہ ایلدیلر . حتی سناتو بردہ . قانون اساسی قلمہ آلدی . بوقانون . اساسیدہ . ملنک حاکمیت اساسی ایلری بہ سورولبور ، و : « فرانسنز قومی (صوک) قرالک قارده شی لوئی ستانیسلاس قساویہ پی کمال حریتلہ تخت قرالی بہ دعوت ایدیبور . قرال ، ملت طرفندن قبول اولویان قانون اساسی نامنہ یمین ایده جک و قانون اساسی اعلان ایلمدن اونی امضالیہ جقدر . « دینلیوردی .

فقطیکہ قرال بوقانون اساسی پی تصدیق ایتمدی . اول امرده کندیسنک تختہ کچمسنی ایستدی . قرالنی تصدیق اولوندقدن جکرہ یالکزیکہ بر نظامنامہ یاز دیردی . بونظامنامہ بہ ، مخصوص قانون اساسی نامی ویردیرمدی . قرون وسطی اسملرندن برنی قبول ایدرک (مشروطیت فرمانی) دیدی . کندیسیدہ (الطاف الہیہ ایلہ) فرانسه قرالی اون سکزنجی لوئی نامنی آلدی . فرمانہ (دورحکومتنک یکریمی برنجی سنہسی) دیہ تاریخ قویدی . کذا : (امتیاز و مساعده اولازق بخش ایدیبورز) تعمیرینی دہ قوللانندی . بوتون بواشکال ، ہپاون آلتنجی لوئینک وفانندن اعتباراً فرانسه حکومتلرندن ہیج برینک قرال نظرندہ اہمیتی اولمادیغنی اثبات ایچون انتخاب ایلمشدی . بوتون قوت ارثی و روحانی برحق اولمق اوزرہ قرالک آندہ ایدی . بوقوت دہ برقوہ مطلقہ دن عبارت اولوب بونی صرف کندی آرزو حیلہ و یالکز کندیسیدہ تحدید ایتمک حقی جائزدی . یعنی بوہ فرانسدہ حاکمیت قرالہ دہ ، یوقسہ ملندہ دکلدہ و دیلمکدی .

ایشته لیبرال لک عدم ممنونیتی بوندن ایلری کلمشدی .

فقط ۱۸۱۴ فرمائی مطلقیت اداره طرز زاری آلتنده مشروطی بر اداره تاسیس ایدیور ، فرانسه ده انکلیز لک سیاسی عادت لری نی طوری فرقه سنک تطبیق ایتدیکی وجه ایله تاسیس ایلور دی . حکومت اوج قوته آیرلمشدی : انلر ده قرال ایله ایکی مجلسدن عبارتدی . قرال قوه اجرائیه یی حازدی . ناظر لری او عزل و نصب ایدردی . قرال مجلس مبعوثانی طاغیت مق حقی ده حازدی . ناظر لر مسئولدی . اعیان مجلسی قرال طرفندن انتخاب اولونان اعیان دن انتخاب ایدیلردی . صوکره لور دلر کبی بوده ارئی اولمشدی . قانون لری اعیان تصدیق ایدردی . مجلس مبعوثان انتخابه اولوردی . وظیفه سی ده قانون لری و بودجه لری تصدیق ایلکدی . اعیان و مبعوثان ه پاره ویرلمزدی . مطبوعات انکلتره ده اولدینی کبی سربستدی . ده اطو غروسی بو ، (نطق افتتاحی ، نطق جوابی و انجمن لراخ کبی) تفرع اتنه و ارنجیه قدر ه پ انکلیز اصولنک تقلیدی ایدی .

فرمانده یالکز ایکی مسئله معلقده بر اقلمشدی . بو مسئله لر قانون لر له تسویه ایدیله جکدی . انلر ده شون دن عبارتدی : اولاً - مجلس مبعوثان نصل انتخاب ایدیله جک ؛ ثانیاً - حریت مطبوعات نصل اداره اولونا جق ؛ بو قانون لر فرمانه داخل اولدینی ایچون دائماً موقع مناقشه یه قونولا بیلیردی .

انکلیز اصولی نمونه اتخاذ اولدینی دورده بر نقطه اونده ده مهم بر اقلمشدی . اوده شو ایدی : قرالک مجلس مبعوثان ه قارشی حقوقی

نہ دن عبارت در؟ قرال، ناظر لرینی مطلقا اکثریت دن انتخاب ایتکه
مجبور میدر؟ بومسئله هنوز انکلتزده حل ایدله مشدی .
قرانسهده ایسه هیچ حل ایدیلهدی .

بونک ایچون ۱۸۱۴ دن ۱۸۳۵ . قدر انتخاب قانونی ،
مطبوعات قانونی، قرالک صلاحیتی، هپ پارلمنتو مناقشاتی ایچون
واسع بر زمین تشکیل ایلشدی .

فرانسز رجال حکومتی قانون اساسی ایچون اولدینی کبی انتخاب
قانونی و مطبوعات ایچون ده هپ انکلتزه بی کندیلرینه مودل اتخاذ
ایتدیلر .

فقط مبعوث لرینی انتخاب حقنی بوتون فرانسز لره ویرمک
هیچ موضوع بحث ایدلمدی . انقلاب، آرای عمومی دن (سوفراز
اونیوره سهل) هر کسی اورکو تمشدی . مبعوث انتخابی کبی تهلمکلی
برحق انحق کزیده افراد دن بر قسمنه بخش ایدیله بیلردی . بو انتخابک
نه صورتله اجر ایدیله جکنی تعیینده تردد ایدلمدی . انکلتزه ده اولدینی
کبی ثروت بوراده اساسی اتخاذ ایدلمدی . فقط بو ثروتک بلا واسطه
رسم ایله تحقق ایتمی قبول اولوندی . (۱۸۴۸ . کلنجه به قدر)
(سانس تعبیر اولونان) حق انتخاب رسمی آرای عمومی به اساس اولدی .
بورسمی ویرنر (سانسی ته لرلر) دن ماعداسی منتخب اولامازدی .
۱۸۱۴ دن اعتبار آحق انتخاب رسمی یک زیاده یوکسلتلمدی . منتخب
اولق ایچون ۳۰۰ فرائق، انتخاب اولونق ایچون ۱۰۰۰ فرائق قدر
بلا واسطه رسم ویرمک لازمدی . منتخبیر ولایت مرکزنده

طویلانپروردی . بواصول ۱۸۳۰ . قدر دوام آیتدی . بودور
 ظرفنده ۲۵ : ۳۰ میلیون نفوسدن انجق ۱۱۰۰۰۰ منتخب چيقا .
 بیلدی . فرانسزلرایکی صنفه آیرلمشاردی . انلرده : هر درلوجقوق
 سیاسیه دن محروم اولان کتله ملت ایله بوتون ملتی یالکزباشلرینه
 تمثیل ایتک امتیازینه مالک اولان (سانسئ تهر لر) دی . (۱۸۳۰)
 دن اعتباراً سانسئ تهر لره (په بی له فال) یعنی (وطن مشروع) نامی
 ویرلمشدی . فی الحقیقه بونلر قانون سیاسی نظر نده بوتون مملکتی
 تمثیل ای دیور لردی) (۱) .

کذا مطبوعات سیاسیه ده انکلیز اصولنده تشکیل ایدلدی .
 هر نسخه یه بش ساتیمک بر پول بایشدیر یلا جقدی . پوسته
 اجرتی ده اوزمانلر اون ساتیم ایدی . غزته لری تک تک صاتمق
 اصولی معلوم دکلدی . آبوننه دن باشقه برشی یوقدی . بونک
 ایچون غزته لر بورژووا صنفه مخصوص بهالی برلوکس مثابه منده
 ایدی . ۱۸۳۰ ده انجق ۶۰ : ۷۰۰۰۰ آبوننه واردی . اهالی
 اوقومبوردی . حتی حیات سیاسیه دن قطعاً خبردار اولماز ، بونک
 ایچونده حیات سیاسیه بورژووا صنفنک امتیازندن معدود

(۱) انکلیز اصولی ایله فرانسز اصولی بیننده یکانه فرق ، هر فرده حق انتخاب
 بخش ایدن ثروت عقنده کی قواعد مشترکه تک تطبیقنده ایدی . انکلیز لک
 انتخاب رسمی (فرانسیز) حتی ۱۸۳۲ دن اولده فرانسز لک انتخاب
 رسملرندن (یعنی سانس) دن پک آز مقدارده ایدی . انکلتره حکومتک ده
 آزر نفوسه مقابل یکریمی مثلی زیاده منتخبی واردی . بوراده حیات سیاسیه
 صرف بورژووالره مخصوص دکلدی .

اولوردي . بر غزته تاسيس ايتمك ايجون قوتلى بر كفات كو سترمك لازمدى . بونك ايجون پك آز ، هر فرقه به مخصوص اوچ درت غزته واردى . هر غزته نك كندى قارئلى اوزرنده بويوك بر نفوذى واردى . غزته لرك نفوذى الك زياده آرتديران شى ده انكليز اصولى اوزره مقاله لرك امضالى اولماسى ايدى . ايشته بو حدود داخلنه صيقشدير لمق شرطيله بر حریت مطبوعات اعلان اولونش ، فقط قراله ويا قانون اساسى به تعريض ايتمك منع ايدلمشدى .

انكليزلرك اصول سياستلى ده ايشته بو صورتله فرانسه به ادخال ايدلى . فقط انكليز عادتلىنى ادخال ايتمك قابل اولمامشدى . فرقلر انكلترده كندن بسبتون باشقه بر صورتده تشكل ايدى . قولايقله انضباط آلتنه آلنه ميان فرانسز مبعوثلىرى ايكي فرقه حالنده طوبالانمق ايسته مديلر . اوقاق اوقاق بر چوق غروپلر آيرلدير . انكلترده فرقلر نصلكه حيات عموميه نك بر علامت حاكمه سندن معدود ايديسه فرانسه ده ده غروپلر اويله اولدى . هر غروپ كنديسنه مخصوص بر مسلك سياسى تعقيب ايدرك اداره حكومتى آلد ايتمك ارزو ايلديكندن انكليزلرك موازنه قوت اصوللى بوراده غير قابل تطبيقدى ؛ مكر كه بر غروپ يالكز باشنه اكثرى احراز ايتمش اولسون . قاينه تشكيل ايتمك ايجون اكثرى رئيسك نره دن انتخاب ايديله جكي بيلنه ميوردى . بر قاينه نك بقاڭدير اولابيلمسى ايجون

عین زمانده بر قاج غروب طرفندن حمایه ایدلسی لازمدی . حتی بو او یوشمار بیله قاینه یه انجق موقت بر موجودیت بخش ایده بیلوردی . چونکه اداره حکومتدن خارج بولونان بوتون غروپلرک بر (اتحاد) تشکیل ایدرک قاینه یی دوشورمک ایچون قاینه علیهنده رأی ویرملری ممکندی . بناء علیه ناظرلرک منتخبلره امین بر اکثریت انتخاب ایتدیرمک ایچون انلری افساد ویا اخافه ایتمکک تمایل ایتملری لازمدی . بوسبیدن فرانسه ده اداره حکومت دائما انکله ترده کندن دها زیاده (انتخابات تضییقی) ایله وجوده کلش وبونک ایچون ده پک چوق وسائط بولونابیلمشدی . چونکه ناپولئون زمانندن بری ولایتده بوتون اداره ناظرلره تابع بر چوق مأمورلر طرفندن اجرا ایدلمکده ایدی .

کذا پارلمنتو اصولی ، قانون اساسی یی تشکیل ایدن عاداته رعایت ایده جک درجه ده معتدل فرقه لره ده محتاج ایدی . ۱۸۱۴ فرمانی همان هر کس قبول ایده جک ظن ایدلمشدی . فی الحقیقه بو فرمان ناپولئون اداره سیله مقایسه ایدیلیرسه دها احرارانه ایدی . مثلاً بونلر «هیچ بر کیمسه نک اعتراض ایتمدیکی یرخالله» ایدی . بونلر اوتهدن بری ارزو ایدیلن مسالمتی ده تأمین ایدیورلردی . مأمورین حکومت هیچ دیکشمه مشدی . اون سکزنجی لوئی ناپولئونک ناظرلرینی ، اعیانندن ۸۴ کشی ایله بوتون مجلس مبعوثانی ابقا ایدیوردی . دها طوغروسوی یکی

فرانسه ، پارلمنتو اصولیه ، اسکی فرانسه ایله ائتلاف ایتشه بکنزیوردی .

فقط بوربونلرک بجزیکسنزلکلری ایله ناپولئونک عودتی بو ائتلافی عدییم الامکان بر حاله کتیردی . بوربونلر نظامات جدیده نك هیچ برینه طوقونمادن دوستلری مهاجرلرک او ایله برطرز لسان استعمال ایتلمینه مساعده ایتدیلرکه بو طرز لسان اموال ملتیه صاحب اولانلرله ایمراطورلق زادکانی ، مامورین ، ضابطان و کویلولر کبی حال حاضرک محافظه سسنده علاقه دار اولانلری کاملاً قورقوتدی . بالخاصه حدت اردوده پک زیاده اولدی . عسکرلر معاشرینک نصفه ایندیرلمسندن ، ضابطلرده اوچ رنگلی بایراقدن محروم اولوب بونک برینه بیاض بایراق قونولماسندن ممنون اولمادیلر .

ایشته بو سببدن ناپولئون فرانسه یه کلیر کلز اردو ایله کویلولری کندیسنه جلبه موفق اولدی . اوزمان (فرمان) ایله تأسس ایدن پارلمنتو اصولی ده محو اولدی . ناپولئون جمهوریت پرورلرک معاوتنی آله ایتک ایچون مشروطی بر اداره تأسیس ایتدی . بو اداره بی آرای عمومیه ایله قبول ایتیردی . (واترلو) دن سوکره بو اداره ده سقوط ایتدی . تکرار (فرمان) تأسیس اولوندی . فقط بو (یوز کون) انقلابی زوال ناپذیر تأثیرلر براقدی . قراللق طرفدارلرینک جانلری صیقیلارلق ناپولئونه التحاق ایدنلری اعدام ایتدیلر . کذا انقلابک آثارینی ده محو

ایتمکی دوشونیدیلر. نظامات جدیدہ طرفدارلری ده قراللق طرفدا. رلرینه اولان بغض و عداوتلرندن طولایی ایمراطورلق و جمهوریت طرفدارلریله بر آرایه کله رک اوچ رنکلی بایراق اطرافنده طوبلانیدیلر. حتی جمهوریتپرورلرک بر تیران دیسه نفرت ایتمکلی ناپولئون، اداره سابقه بی تأسیس ایتمک ایسته یین بوربونلره قارشى انقلابک بر مدافعی اولوق اوزره تلقی ایدلی.

ایشته بوصورتله فرانسه ده ایکی مفرطفرقه وجوده کلدی. بونلرده: اداره سابقه نك تأسسندن، قرالک صلاحیت مطلقه. سندن ورهبان ایله زادکانک امتیازاتندن بحث ایدن مفرطقراللق طرفدارلری (اولترا رووایالیستلر) ایله بوربونلرک سقوطنی ارزو ایدن جمهوریتپرور بوناپار تیستلر (لیبه رالر، احرار) ایدی. هر ایکی فرقه ده (فرمان) اعتبار ایتموردی. احرار، بر اختلال فرقه سی ایدی. بو فرقه انکلتزه ده کی ویغلهر کی یالکنز احرارانه اصلاحات طلب ایتموردی. قانون اساسی ایله احداث اولونان مونارشییی ده دویرمه که حاضر ایدی. اولترالر ایسه بر ارتجاع (ره آقسیون) فرقه سی ایدی. بو فرقه، طوریلر کی یالکنز هر درلو اصلاحاتی ره ایتمکله قالیور، انقلابسنر تأسس ایتمسی قابل اولیمان محو ایدلمش بر اداره بی ده تأسیس ایتمک ایستوردی.

ایشته مشروطیتک دشمنی اولان بو ایکی فرقه اراسنده

آريجه ايكي مشروطى غروبدها تشكىل ايتدى. انلرده طوريلر كې حال حاضر ك محافظه سنه طرفدار اولان قراللق طرفدارى اعتدالپرورلر (صاغ) ايله انكليز اصولى اداره طرفدارى اولان قراللق طرفدارى احرار (دوقترينه رلر) ايدى .

۱۸۱۵ ده انتخابات ، استيلا ايله (تهرور بلانش) ائناسنده وقوع بولدينى ايجون مجلس مبعوثانده اكرتيتى اولترارو و ايا لى ستلر قازانديلر (بو كا « لاشانبر انطرو و وابل » نامى و يرلدى) . مجلس اموال مليه نك رهبانه اعاده سنى ، ديون عموميه نك عدم تصديقى ، احرار دن اولان حكامك عزلى ، دارالفنونك لغوينى طلب ايلدى . قرالده بوندره مخالف طرفى التزام ايتدى . قراللق طرفدارى احرار ايسه انقلابك آثارىنى محافظه ايجون قرالك صلاحيتنى التزام ايدرك مجلس مبعوثانه مخالف حركت ايتدى . مجلس ، قرالك ناظر لرىنى اكرتيتدن انتخاب ايتمىنى طلب ايدى بوردى . قراللق طرفدارى احرار ايسه قرالك ناظر لرىنى ايتديكى كې انتخاب ايتمىنى فكرنده اصرار ايتدى . حتى روديه - قوللار ۱۸۱۶ ده : « قايينه يالكز مجلسك اكرتيتندن عبارت بولوندينى و مجلسك ده قرالك ناظر لرىنى سقوط ايتديره بيلمى قاعده اتخا اولوندينى تاريخدن اعتباراً يالكز قانون اساسينك دكل ، مستقل قراللق ده ايشى بتمش ديمكدر . آرتق اوكوندن اعتباراً اداره من جمهوريت اولاجقدر » مطالعه سنده بولونى بوردى . مجلس مبعوثان انتخاب رسمى ۵۰ فرانغه اينديرمك ايتيوردى .

شوحالدہ ایک میلیون منتخب چیقابیلہ جکدی. قراللق طرفداری
 احرار ایسہ حق انتخاب رسمی ۲۰۰ فرانقدہ براتق ایستہ دی .
 چونکہ حریتی مدافعہ ایچون بونلرک اوفاق املاک
 صاحب لردن زیادہ بورژووازینک یوکسک صنفنہ اعتماد لری
 واردی . اون سکزنجی لوئی بردنبرہ مجلس مبعوثانی طاغیدارق
 و ۱۸۱۴ انتخاب قانونی تأسیس ایچون بر امرنامہ نشرایدرک
 اولترالردن یاقاسنی قورتاردی . نظامات کاملاً خلاص اولدی .
 فقط ملت سیاستدن اوزاق بولوندرلدی . اداره حکومت قرالک
 النده قالدی . بویسہ حقیقی بر پارلمنتو اصولی تأسیسنہ مانع
 اولدی . ۱۸۱۶ ایله ۱۸۲۹ ارہ سندنہ قانون اساسی منتظماً
 تطبیق ایدلدی . احرار ، مملکتی غلبانہ ویردی . کیزلی کیزلی جمعیتلر
 تشکیل ایدرک عسکری اختلاللر حاضرلادی . هجولر یازارق
 نمایشلر اجرا ایتدی . فقط بونلرک مجلس مبعوثانده انجق
 بر قاچ مبعوثی واردی . اولترالردہ اوفاق بر غروپ تشکیل
 ایدیورلردی . همان تکمیل مجلس مبعوثان مشروطی ایکی
 مرکز تشکیل ایدیورلردی . قرالک انتخاب ایلدیکی قاینہ اکثریت
 طرفندنہ حمایہ ایدلدی - (دہ قاز) قاینہ سی ۱۸۱۶ دن ۱۸۲۰ یہ قدر
 قراللق طرفداری احرار طرفندنہ حمایہ ایدلدی (بودورده احرار انہ
 اصلاحات اجرا ایدلدی) - - (ویلهل) قاینہ سی دہ ۱۸۲۰ دن
 ۱۸۲۷ یہ قدر صاغ جناحدن حمایہ ایدلدی (بودورده اصلاحات تعلیق
 ایدلدی . حتی مجلس مبعوثان ارتجاعہ یارایہ جق بر طاقم قانونلر تصدیق

ایتدی ایسه ده بونلرک بر قسمی اعیان طرفندن رد اولوندی .
 ۱۸۲۷ ده ویلهل قاینه سنک بوتون خصملری اتحاد ایدرک
 مجلس مبعوثانده اکثریتی قازاندیلر (۷۰ رأیه قارشی ۳۶۰ رأی ایله).
 فقط اوننجی شارل صول جناح فرقه سندن بر قاینه تشکیل ایتک
 ایسته مدی . بو قاینه یی صاغ مرکز دن (مارتینیاق قاینه سنی)
 تشکیل ایتدی . مجلس مبعوثان بو قاینه یی اقلیته ایندیردی .
 ره ستوراسیون اداره سی ، ایکی مفرط فرقه آره سنده وقوع
 بولان بو اختلاف اوزرینه کاملاً محو اولدی . اوننجی شارل
 پارلمنتو اصولنی ارزو ایتیموردی . « انکلتره قرالنک بولوندینی
 شرائط داخلنده قرال اولقدنسه یی قیجیلیق ایتکی ترجیح
 ایدرم » « فرانسه ده حکومتی قرال اداره ایدر ، مجلسلردن یالکز
 فکر صورار ، بونلرک افکار و تکلیفاتی نظر اعتباره آلیز . فقط
 قلباً قانع اولامازسه اوزمان کندی آرزوسنی یرینه کتیرر »
 دیبوردی . ۱۸۲۹ ده شارل اولترالردن بر قاینه (پولینیاق
 قاینه سنی) تشکیل ایتدی . بو قاینه یه دیگر ایکی فرقه دشمن اولدی .
 مجلس مبعوثان ۲۲۲ کشیلاک بر رأی ایله بو قاینه نك علیهنده بولوندی .
 قرال قاینه یی التزام ایتدی . مجلس مبعوثان طاغیدلدی . ۱۸۳۰ ده
 انتخاب اولونان یکی مجلس مبعوثان ده اخصمانه طورا ناجقدی .
 اوننجی شارل ۱۸۱۶ ده اون سکزنجی لوئینک موققیته نتیجه -
 لندیردیکی حرکتی تکرار ایتک ایسته دی . فرمانک ۱۴ نجی
 ماده سنده : « قوانینک موقع تطبیقه وضعی و حکومتک محافظه

امنیتی ایچون قرال ایجاب ایدن امرلری ویره بیلیر « دینیوردی . اوننجی شارل اوچ امرنامه نشر ایتدی . بواصرنامه لرده یکی مجلس مبعوثانی دهها طوبلانمادن فسخ ایدیور ، انتخاب قانونی دکیشدیریور ، غزته لر ایچون سانسورلک وضع ایدیوردی (تموز ۱۸۳۰). فقط بوتون افکار عمومییه قرالک آرتق صلاحیتنی تجاواز ایتدیکنه ، امرنامه لرک حقیقی برر قانون مئابه سندله اولدیغنه و مجلس مبعوثانجه تصدیق ایدلمدیکی ایچون امرنامه لرک غیر مشروع اولدیغنه قناعت ایدیوردی . حتی پارس غزته جیلری بر اعتراضنامه امضالادیلر . پارسده بولونان مبعوثلر (مشروع بر مقاومت) اجراسنه قرار ویردیلر . فقط قوتله مسلح بولونان حکومتله قارشى بومشروع وسائط اصلا تفوق ایدمه جکدی .

پارسده بر جمهوریت فرقه سی تشکل ایتشدی . بو فرقه عمله لرله طلبه لردن تشکل ایتمش ، آز بر قوتده (۸:۱۰ بیک کشی) ، مبعوثسز ، غزته سز ، فقط تشکیلاتی مکمل و مسلح ایدی . ایشته ۱۸۳۰ انقلابی بونلر وجوده کتیردیلر . بو فرقه افرادی کاملاً سلاحلاندیلر . پارسک شرقنده کی طار سواقلرده باریقادرل (۱) انشا ایتدیلر . اوچ رنکلی بایراق آچدیلر . حکومت بر عریبده وقوعه کله جکنی کسدره مه مشدی . پارسده انجق ۱۱۰۰۰ عسکر بولونیوردی .

(۱) بونلر ۱۸۲۷دهده بر طاقم باریقادرل انشا ایتشدی . ایلک باریقادرل (فروند) زماننده انشا ایدلمشدی (انقلاب اثناسنده باریقادرل انشا ایدلمه مشدی) .

عاصیلر شهری اوچ کونده ضبط ایتدیلر . اونجی شارل دلی کبی اولدی . شهری استرداد اوغراشمان پارسدن چیقوب کیتدی . محاربه ائناسنده پارسده طوپلانان مبعوثلریکی برعائله قرالی انتخاب ایتک ارزو ایدرک دوق دورله آنی انتخاب ایتدیلر . دوق دورله آن اوچ رنکلی بایراق ایله پارلمنتو اصولنی قبول ایده جکنی وعد ایتدی . آرتق اوچ رنکلی بایراق مشهور اولمشدی . بوتون شهر لر هپ بو بایراغی رکز ایتدیلر . بونک اوزرینه لوئی فیلیپک قرالنی بلامقاومت تصدیق ایدلدی .

۱۸۳۰ فرمانی رعموز حکومتی . — ۱۸۳۰ انقلابی ملنک حاکمیتی نامنه اجرا ایدلشدی . بونی یکی قرالده قبول ایتمش ، کندیسنه الطاف الهی و ارزوی ملی ایله نائل مقام اولمش فرانسر لر قرالی برنجی لوئی فیلیپ تسمیه ایتدیرمشدی . اوزمان یکی بر قانون اساسی به احتیاج حاصل اولمشدی . بوده ۱۸۳۰ فرمانی ایدی . بو فرمان قرالک ارزوسیه ملته (احسان) اولونمامشدی . ملت طرفندن تأسیس ایدلش ، قرالده بوکا رعایت ایده جکنه یمین ایدرک انی قبول ایلشدی . کذا اونجی شارلک طلب ایلدیکی ۱۴نجی مادهده لغو ایدلدی . مطبوعاتک سانسور ایدلمسی صورت قطعیهده منع اولوندی . مجلس مبعوثان ، رئیسنی انتخاب ایتک حقنه مالک اولدی . مذکور فرمانده حکم هیئتلری ، فاردناسیونال ، امور اداره ، حریت تدریسات حقندهده قانونلر وعدا ایدیلوردی . بو فرمان ۱۸۳۱ ده ایکی قانون ایله اکمال اولوندی . ارثی انتخاب

اولونان اعیان مجلسی قید حیات شرطیله اولدی . حق انتخاب رسمی ۳۰۰ فراتقدن ۲۰۰ فرانغه ایندیرلدی . بونک اوزرینه منتخبلرک مقدار ی . ۱۵۰۰۰ اولدی (۱۸۴۸ ده ۲۰۰۰۰۰۰ ایدی) .

مسئله شو صورتله مجلس مبعوثان لهنه حل ایدلمشدی . آرتق حاکم اولان مجلس مبعوثان ایدی ، قرال دکلدی . فقط قانون اساسی به خصم اولق اوزره دائما ایکی مفرط فرقه موجوددی . بونلردن بری صاعده تخت حکومتی غصب ایدن قرالی تصدیق ایتمک ایسته مین (له ژیتی میستلر) ، دیگر ی ده صولده ۱۸۳۰ ده کندیلرینک اغفال اولوندقلرندن طولایی شکایتده بولونان جمهوریت پروردی . قرال کندینی مجلس مبعوثانده کی اکثریته تابع کی کوس-ترمکه برابر مشروطیت پرور بر قرال وظیفه سی کورمکی نفسنه یدیره میوردی . ناظر لرینی کندی انتخاب ایتمک ، اونلره برابر چالیشمق ، قاینه نک سیاستنی کندی اداره ایتمک ارزو اید میوردی . قرال ، اصول اداره سنی اکثریتک ارزو سنه تابع قیلاجق یرده اکثریتی ارزوی قرالی به منقاد ایتمک ایست میوردی .

۱۸۳۰ دن ۱۸۳۵ . قدر قوه اداره ، انقلابی آل بر لکیله یان ایکی فرقه نک ، صول جناح رووایالیستلری ایله جمهوریت پرور لاره سنده منازع فیه قالدی . لوئی فیلیپ شهر امانتینی (اوتله دوویل) الده ایدن جمهوریت پرور لره کندی سنی قبول ایتدیرمک یچون بونلرک

رئیسارندن لافایهت و لافیت ایله دوست اولمش، بش جمهوریت پرور و درت رووایلیستدن مرکب متوسط بر قاینه تشکیل ایلمشدی. فقط مجادله اصل قاینه دهه باشلادی. (فعالیت) فرقه سی (جمهوریت پرور لر) حاکمیت عوامه مستند بر سیاستله برابر اوروپاده حال عصیانده بولونان اهالی لهنده بر حمایه طلب ایدیور، (مقاومت) فرقه سی (رووایلیستلر) ده بورژووا صنفنک حاکمیتنی ودول معظمه ایله صلح و مسالمتی ارزو ایلیوردی. قرال مقاومت طرفداری اولدینی ایچون فعالیت طرفداری اولانلری اوصاندیرمق ارزوایتدی. کرک قاینه ده (لافیت قاینه سی) و کرک پارسه حاکم اولارق یالکز جمهوریت پرورلری بر اقدی. حتی بر مدت بونلرک اوروپا ایله حرب آچاققلمی بیله ظن اولوندی. مملکت دهشت ایچنده قالدی. یوزده اوچلی اسهام ۵۲,۷۰ فرانغه، یوزده بشلی اسهام ده ۸۲,۵۰ فرانغه تنزل ایتدی. مجلس مبعوثان لافیتی حمایه ایتدی. بونک اوزرینه قرال ده رووایلیست بر قاینه (قازیمیر پهریه قاینه سنی) انتخاب ایتدی (۱۸۳۱). آرتق جمهوریت پرور لر فرقه سی ایچون مجلس مبعوثان واسطه سیله راس کاره کچمک امید قالمامشدی. بوسبیدن جمهوریت فرقه سی ۱۸۳۰ انقلابنه تکرار باشلامغه چالیشدی. عمله جمعیتلری تشکیل ایتدی. کذا بر غزته تأسیس ایدرک پارسده بر چوق هر بده لر وقوعه کتیردی. حکومت غزته لره خفی جمعیتلری محکوم ایتدی. کذا خاصه عسکرینک یاردیمی ایله هر بده لری ده باصدیردینی کبی عین زمانده هر بده

عصیان ایدن له ژیتی میستلری ده ازمکه موفق اولدی. ۱۸۳۵ ده (پروسه مونستر) ایله مطبوعاته قارشی تنظیم اولونان ایلول قانونلرندن سوکره نظام و انتظام ده تاسس ایتدی.

۱۸۳۵ دن ۱۸۴۰ قدر مبارزه مجلس مبعوثانده ایکی مشروطیت فرقه سی، صول مرکز (تی یه ر) ایله اوزمان صاغ مرکز اولان دو قترینه لر (کیزو) آره سنده وقوعه کلدی. فقط آره یرده باشقه بر غروپ، (تیه رس - پارتی) ایله ایکی ده جناح غروپ لری واردی. بوندن باشقه، قرال قابینه بی اکثریتی جائز فرقه یه ویره رک اقلیته دوشونجه قدر قابینه بی ابقا ایدمک یرده یا اکثریت خارجنده کی دوستلرینی انتخاب ایدیور و یا خود کندی سیاستنه تابع اولمیان ناظر لری عزل ایلوردی. قابینه لر یا بر اتحاده قارشی و یا قرالک مخالفتی اوزرینه صیق صیق سقوط ایدیوردی. ۱۸۳۲ دن ۱۴۸۰ قدر تمام سکز قابینه دکیشدی. اوئانده فایت پارلاق خطابت مجادله لری وقوعه کلدی. ۱۸۳۸ ده مجلس مبعوثانک ویره جکی نطق جو اینک مذاکره سی تمام اون ایکی کون سوردی. بوئانده ۱۲۸ نطق ایراد ایلدی. فقط پارلمنتو اصولی دواملی بر قابینه تاسیسنه بردزو موفق اولامیوردی.

۱۸۴۰ ده قرال صاغ مرکزله صورت قطعیه ده اتفاق ایتدی. قابینه بی کیزویه تودیع ایلدی. مسلکی ده، دائما قابینه نک له نه قرار ویرمکه عزم ایتمش فکر سنز مبعوثلر انتخاب ایتدیره رک مجلس مبعوثانک معاوتنی تأمین ایتمکدن عبارت اولدی. قرال منتخبلرله

مبعوثوں کو اعتقادات سیاسیہ لرنڈن استفادہ ایتمک ایستہ میور،
 منتخبہرہ توتون بورولری، بورسہر، مأموریتلر، مبعوثلرہدہ
 مناصب اعطا ایدرک بونلرک منفعت شخصیہ لرنڈن استفادہ ایتمک ارزو
 ایدیورڈی. مبعوثلر پارہ آلمادقلمری و مجلس مبعوثانک دہ همان
 نصفی مأموریندن بولوندینی ایچون بوواسطہ لرک پک زیادہ تأثیری
 اولیورڈی. کیزونک سیاستی ایسہ اوروپادہ ہیج اختلافہ میدان
 ویرمہ مک و فرانسدہ ہیج اصلاحات یامامقدی. ایستہ بوادارہ
 سکز سنہ دوام ایندی. اکثریت دائما آر تیورڈی. ۱۸۴۶
 انتخابانسدہ اولدینی قدر اکثریتک قوتلی اولدینی ہیج کورولہ مشدی.
 فقط اہالپنک اکثریتی دہ کیتدکجہ غیر ممنون اولغہ باشلا یورڈی.
 حتی «سقط» برسیاست تعقیب ایستدیکندن، اخلاقی افساد ایدیجی
 بریول طو تدیفندن طولایی حکومتی تقبیح ایدیورلر، و اصلاحات
 طلب ایلورلرڈی. بو اصلاحاتدہ اولاً: حق انتخاب رسمی تزیل
 ایدوب لیاقتک نظر اعتبارہ آلماسنی، یعنی حق انتخاب ویرن منتخبہرہ
 تحصیل کورمش کیمسہ لرک دہ الحاقی (بونلر ۱۸۲۷ دن اعتباراً
 ژورہر اسامیسی میانسدہ کوستریلیرلرڈی) ؛ ثانیاً : مبعوثوں کو
 مأموریت ایفا ایتملرینہ مانع اولقندن عبارتدی. فرانسدہ ایکی فرقہ
 آیرلشدی. بر طرفدہ قرال، قابینہ و مجلس مبعوثان ایلہ حق
 انتخاب رسمی ویرن منتخبہرہ ہر شیئی رد ایچون اتحاد ایتمشہر،
 بوتون قوتی یالکز باشلرینہ ادارہ ایدیورلر و بوتون (وطن
 مشروع) ی تشکیل ایلورلرڈی. دیگر طرفدہدہ افکار سیاسیہ

مالك اولمقله برابر هر درلو وسائط حر كندن محروم اولان مخالفين بولونيوردى .

بو اداره كورونشده صرف پارلمنتو اداره سى ايدى . قرال ، انتخابله تشكيل اولونان مجلس مبعوثان ا كثر يتنك ارزوسنى اجرا ايدىوركى كورونيوردى . فقط حق انتخاب رسمى ايله انتخاباتده افسادات سايه سنده مجلس مبعوثان ملتى تمثيل ايدمك يردم قرالك خدمتكارلردن مركب بر مجلس تشكيل ايدىوركى . انكليزلرك پارلمنتو اصولى ، انكلتره تاريخى معلملى ايدن بر ناظر ك اداره سى آلتندم عادتا بر چه در كه سنه اينيور ، و بوجهه كريسندم يالكيز قرالك شخصى اداره سى محافظه اولونيوردى .

بلچيقه ده پارلمنتو اصولى . — ۱۸۱۴ ده بلچيقاده كنديسنه الحاق ايديلن فلمنك قراللىك ناتماملر اداره مشروطه يه نائل اولمشدى بو اداره يه نظراً قرال ناظر لرى انتخاب ايتمك (ناظر لر مجلس مبعوثانه قارشى مسئول دكلردى) وسياستى اداره ايتلك صلاحيتنى حائز دى . فقط اساساً فلمنكللى اولوب فلمنكده مقيم بولونان قرال هپ فلمنكليلرى حمايه ايدرك بلچيقالى تبعه لرينى كوچندير دى . اودر چه ده كه بونلر هپ برلشوب آياقلا نديلر . فلمنك عسكر لرينى طرف ايتديلر (۱۸۳۰) . اوزمان بونلرى فرانسه تحت حمايه سنه آلدى . بلچيقانك فلمنكدن آيرماسنه ومشروطى بر قراللىق تشكيل ايلسنه دول معظمه يى اقناع ايتدى .

مبعوثلردن مركب بر قونفره عقد ايدلدى . بو قونفره بر قرال

انتخاب ایتدی . بعده بر قانون اساسی قلمه آلدی . بوقانون اساسی آنجق ۱۸۹۳ سنه سنده نعدیل ایدلدی .

فلمنکده اولدینی کبی بلچیقاده ده هیئت اجتماعیه، یکریمی سنه دوام ایدن فرانسز حا کیتنک تاثیر یله تبدل ایلشدی . بوراده ده نه امتیازات ، نه صنوف ، نه ده ایالت قالمشدی . قانون اساسی ، قانون نظرنده مساوات تأسیس ایتمش ، بوتون ولایتلر عین طرزده تنسیق ایدلشدی .

بلچیقالیلر ایکی فرقه یه آیرلمشردی . انلرده : مشروطیتی ره بانک غیری بر اداره طرفداری اولان (احرار) ایله کلیسانک حا کیتنه طرفدار اولان (قاتولیکلر) دی . ۱۸۳۰ ده هر ایکی فرقه ده برلشمش ، انقلاب حریت نامنه اجرا ایدلشدی .

ایشته بوسبیدن قانون اساسی یه حریتک کافه انواعی درج ایدلشدی . بوده : حریت شخصیه ، حریت مکانیه ، حریت کلام ، حریت مطبوعات ، حریت مذاهب ، حریت تدریس ، حریت اجتماعیه و حریت اشترا کدن عبارتدی .

بلچیقالیلر انکلتره پارلمنتو اداره سنک ویغلا طرفندن تعقیب ایدیلن طرزینه حیران اولیورلردی . بوسبیدن قونفره : « بلچیق قومی ارثی بر رئیسک اداره سنده اولق اوزره مشروطی و هیئت مبعوثان ، مالک بر حکومتی شکل حکومت اولارق قبول ایدر » دیدی . بوراده ده اوچ قوت واردی : قرال ، سناتو ، مجلس مبعوثان . قرال ارثی و غیره مسؤلدی ؛ فقط حاکم دکلدی .

حاکمیت، پارلمنتو ابله تمثیل اولونان ملتده ایدی. قرال ناظر لری نصب و مجلس مبعوثانی فسخ ایده بیله جگدی . فقط ناظر لر مجلس مبعوثانه قارشی مسؤلدی. اقلیتده قالر قالماز چکیله جکلردی. بودجه یی مجلس مبعوثان تصدیق ایده جگدی . سناتو (اعیان) انکلیز اصولنه بسبتون مخالف اولارق مجلس مبعوثانی انتخاب ایدن منتخب لر طرفندن انتخاب اولونا جقدی . اعیان ده فسخ اولونا بیله جک، هر ایکی مجلس اعنسانی قسم قسم دیکشدر یله جگدی. انکلترده اولدینی کبی حق انتخاب ویرکی یه تابعدی . منتخب اولوق ایچون موقمه کوره مبتدل ، فقط ۴۲ فرانقندن اصلا دون اولماق اوزره برحق انتخاب رسمی ویرمک لازمدی .

اصلاحی اک زیاده مشکل اولان مسئله ، کلیسانک تنسیق ایدی . احرار ، بوتون اقوام حاضرده اولدینی کبی حکومتک کلیسا اوزرنده کی حق مراقبه سنک ابقاسنی ارزو ایدیوردی. قاتولیک فرقه سی ایسه کلیسانک حکومته قارشی استقلال تام ایچنده بولونماسنی حریت نامنه طلب ایتدی. بوفرده رؤساسندن نوطومب ، قونفرده شو مطالعه ده بولوندی : «بوکون شانلی بر تشبثده بولونمق و مدنیت حاضره نك اک مهم دساتیرندن برینخی بلاقید تأیید ایلک الیزده بولونیور . عصر لردن بری یکدیگریله مبارزاتده بولونان ایکی قوت واردر که انلرده : قوه ملکیه ایله قوه روحانیه در . کویا برینک حاکمیتی دیکرینک عدمنی موجب اولورمش کبی بویکی قوت هیئت اجتماعی بردرلو پایلاشامیور لر .

ایشته بوتون آوروپا بوجادلات ایچنده بولونیور . بوکا انجق بز
 بر نهایت ویره جکز . الیوم یکدیگری قارشیسنده اینکی عالم
 بولونیور . بونلردن بری عالم ملکی ، دیگری عالم روحانیدر .
 هر ایکسی ده یکدیگریله امتزاج ایتمدن بقا پذیر اولیورلر و هیچ
 بر نقطه دهده یکدیگرینه تماس ایتمیورلر . بز ایستیورزکه قانون
 آموز روحانیهده صلاحیتدار اولادیغنی بیان ایتمسین . اداره حکومتله
 هندسه بیننده نصلکه هیچ بر مناسبت موجود دکلسه حکومت
 ایله دین بینندهده هیچ بر مناسبت موجود دکلدر .
 بناء علیه گذرگاه سیاستمزده بویوک بر دستور براقلم . هر ایکی
 قونک آیری بولوندیغنی اعلان ایدهلمه . احرار بوکا راضی اولدیلر .
 بونک اوزرینه قونفرده کلیسا ایله حکومتک تفریقنی اعلان
 ایتمدی . فقط کلیسانک حکومتدن آیرلماسی بلهچیقاده باقیکز
 نصل تلقی ایلدی . اول امرده کلیسا هر درلو قوه جسمانیه دن
 تجرید اولوندی . پسقوسلر طوغر و دن طوغر و یه پاپا طرفندن نصب
 اولونورلر ، بونلرده راهبیری نصب ایدرلردی . مملکتده
 دینی مسلکله تأسس ایده بیله جک ، بونلر اموال اکتساب
 ایده جک ، هبه آلابیله جکدی . هیچ بر تحدیدات ویا تفتیشاته
 تابع اولمایه جقلردی . کلیسا ، آیرلمازدن اول حکومتدن آلمش
 اولدیغنی امتیازاتی کاملاً محافظه ایده جکدی . رهبان حکومتدن
 معاش آلاجق ، خدمت عسکریه دن معاف اولاجق ، کندیلرینه
 مراسم عسکریه ایفا اولوناچقدی . رهبان مزارلقلره تصرفی ،

مدتبری تفتیش حقی محافظه‌ایلیه جکدی. آرتق اوتاریخدن اعتباراً بلجیقاده رسمی ایکی قوت واردی: حکومت ورهبان. فقط بونلرک هر ایکسی ده مستقل و حاکم اولدقلری ایچون چوق کچمه دن چاریشمغه باشلامشلردر .

۱۸۳۱دن ۱۸۴۵ . کلنجیه قدر فرقلر مجادله ایده جک درجه ده تشکیل ایدله مشلردی. هنوز فلمنکله مصالحه عقد ایتمک (بو مصالحه صورت قطعیه ده ۱۸۳۹ ده عقد ایدلمشدی) و انقلابی متعاقب ظهوره کلن بحران اقتصادیدن قورتولغه اوغراشیلوردی . اون سکزنجی عصرده انکلترده اولدینی کبی بوراده ده الآن حکومتک یالکنز بفرقه آئنده قلامسی فکرنده بولونیلیوردی. بونک ایچون مخصوصاً قاینه قاتولیکلرله احراردن تشکیل ایدیلیور ، بو صورتله تهلکلی عد اولونان فرقلرک محو ایدیله جکی امید اولونیوردی. حتی ۱۸۴۰ده عدلیه ناظری: «مملکت مشئوم انقساملره معروض بولونیور. بو انقساماته وقتیه ممانعت ایدلیه جک اولورسه پک چابوق توسع ایده جکدر . قاتولیک و احرار صنفلرینه آیرلق ، قانون اساسیمزله تأیید اولونان قواعد مهمه حریته قارشى هیچ بر معنایی حائر دکلدر » دییوردی .

یشته رهبان سایه‌سنده دهاقوتلی برصورتده تشکیل اولونان قاتولیک فرقه‌سی ۱۸۴۲ قانونی تطبیق ایتدیرمک ایچون بواصول اداره دن استفاده ایتدی. بو قانون، ابتدائی مکتبلرده تدریسات

دینیه یی ابقا ایدیور و تدریسات مذکورہ یی رهبانہ تودیع ایلیوردی . نو طومب: « تربیة دینیه و اخلاقیہ اولمادن تدریسات ابتدائیه اولاماز . بز تدریساتی کاملاً دنیویته تحویل ایدرک هیئات اجتماعیہ یی صرف منطقی اساسلر اوزرینہ تأسیس ایتمک ادعاسنده بولونان اون سکزنجی عصر دساتیر فلسفہ یه سندن بسبتون اوزا قلاشیورز .» دییوردی .

رهبانک نفوذندن اندیشناک اولان احرار ، کندی فرقه لرینی تنظیم ایتدیلر . ۱۸۴۶ ده بوتون باجیق اادن کوندریلن ۳۲۰ احرار اعضادن مرکب اولمق اوزره (بروکسل) شهر امانتندہ انعقاد ایتمک اوزره برقونفرہ (اتفاق) تأسیس ایدرک فرقه نک پروغرامنی مناقشہ ایتدی . دستوری ده شوایدی : (قوه ملکیه نک استقلاللی) . بوندن باشقه « مأمورین ملکیه یه هر درلو مؤسسات خصوصیه یه قارشى رقابتی تأمین ایچون مشروطی وسائط اعطا ایدرک ، قوه ملکیه طرفندن تشکیل اولونان تدریساتہ مذاہب ناظر لرینک مأمور صفتیلہ مداخلہ ایتلمزینی قبول ایتمہ رک صرف مأمورین ملکیه نک اداره سی آ لئندہ اولمق اوزره هر درلو صنوفه مخصوص بر تدریسات عمومیہ تأسیسنی » ده طلب ایدیوردی . ایشته بوکون رهبانک غیری (لایبق) تدریسات نامی ویریلن اصول تدریس بودر . کذا احرار ، حق انتخاب رسمنک ایندیرلمسنى و « عملہ صنفلری احوالک صورت قطعیه ده استنزام ایلدیکی » اصلاحاتی ده طلب ایدیوردی .

۱۸۴۶ دن بری مجلس مبعوثان ایکی فرقه به آیرلمش اولارق
 قالدی. بوفرقلر بربرینی متعاقب اکثریت قازانارق قاینه پی تشکیل
 ایلدیلر (۱۸۴۷ دن ۱۸۸۴ . قدر هر ایکسی ده رأس کاره
 چکوب اوچ دفعه سقوط ایتدی) . قرال دائما قاینه پی اکثریتدن
 تشکیل ایتدی . دهاقوتلی بر صورتده تشکیل اولونان قاتولیک
 فرقه سی فلاناندا بلچیقاسنده کی کویلرک کافه سنی کندیسنه جلب
 ایلدی . دهاکوردولتیجی اولان احرار فرقه سی ده بوتون فرانسز
 بلچیقاسنه حاکم اولدی . فلانان دیانک (غاند) و (آنورس)
 کبی بویوک شهرلری ایکی فرقه دن برینی انتخابده متردد قالارق
 اکثریتی تشکیل ایلدیلر . ایشته بوسبیدن بوشهرلرده احرار
 اولوناجق مظفریت بوتون مملکتده احرار اولوناجق مظفریتک
 مقدمه سی ایدی . کذا مجلس مبعوثانه ، اعیانه ، ولایت
 وقضا مجلسلرینه انتخابده دائما مجادله وقوعه کلدی .

ایشته بوسورتله بلچیقانک پارلمنتو اداره سی انکلیز اصولنده
 و ایکی فرقه آره سنده موازنه اصولنه مستنددر . فقط
 بلچیقاده فرقلر بیننده کی فرق ، انکلترده کی فرقلر بیننده کی
 فرقدن پک زیاده در . بوراده فرقلر آره سنده کی مجادله ایکی سیاسی اداره
 بیننده کی مجادله دن عبارت اولیوب آری آری و بربرینه مخالف
 قاعده لره کوره یتیشمش ایکی هیئات اجتماعیه بیننده بر محاربه دن
 عبارتدر . بونک ایچون غلیبان دائما تزیاید ایتدیکی کبی فرقلرک
 قانون اساسی به رعایت ایده جکلری ده قطعی دکلددر .

سار اوروپا حکومت ندر نہ پارلمنتو اصولی۔ — ۱۸۱۵ دہ
 (اتفاق مقدس) ی وجودہ کثیرن شرک اوج بویوک دولتی ،
 روسیہ ، آوستریا و پروسیا ، ۱۸۴۸ ہ قدر ہب حکومت مطلقہ حالندہ
 قالدیلر . بو حکومتلردہ حکمدار طرفندن انتخاب اولونان ناظرلر
 قونترولسز ادارہ حکومت ایدرلردی . ملت ، منتخب بر مجلس
 مبعوثان ایله تمثیل ایدلمزدی . ایالت مجلسلری بولونان یرلردہ
 بو مجلسلرک وظیفہ سی یالکز حکومتہ ویرکی جباتندہ یاردم ایتمکدن
 عبارتدی . ۱۸۱۵ دہ تبعہ سنہ یازلمش بر قانون اساسی بخش ایدہ جکنی
 وعدایدن پروسیا قراالی ، وفاتنہ یعنی ۱۸۴۰ سنہ سنہ قدر وعدینی
 یرینہ کتیرمہ مشدی . خلفی ایسہ ایالت مجلسلری اعضاسنی (برلین) دہ
 طوپالایارق (۱۸۴۷) بو مجلسک حاکم اولامیہ جفنی و کندیسنگ
 یازلمش بر قانون اساسی بی ارزو ایتمدیکنی بیان ایلمشدی .
 ہراوج حکومت مطلقہ دہ ، کندی نفوذلری آلتندہ بولونان
 حکومتلردہ ادارہ مطلقہ بی ابقادہ کندیلرینہ علاقہ دار نظریہ باقیورلر ،
 اقوام اجنبیہ دہ مستعمل پارلمنتو اصوللرینی تبعہ لرینہ قارشی فنا
 بر مثال اولارق تلمقی ایدیورلردی . بونک ایچون دہ بوتون حکمدارلرک
 اوروپای وسطادہ ، آلمانیا و ایٹالیادہ قانون اساسی اعلان ایتملرینہ
 مانع اولمغہ چالیشیورلردی .
 آوستریا حکومتی ۱۸۴۷ یہ قدر ایٹالیادہ بوکا موفق اولدی .
 ہیچ بر حکمدار نہ قانون اساسی ویرمکہ ، نہ دہ مجلس مبعوثان
 انتخاب ایتمدیرمکہ رضا کوستردی . حتی تبعہ لر عصیان ایدرک

حکمدار لرینی احرارانه بر اداره قبولنه اجبار ایلدکری زمان (ناپولیده ۱۸۲۰ده، کلیسا حکومتلری ایله دو قه لقلرده ۱۸۳۰ده) آوستریا اردولری کلوب اداره مطلقه یی جبراً تأسیس ایلدیلر . آلمانیا ده ایسه قونفره مقرراتنده بیان اولوندیغی اوزره هیئت متحده اراضیسی اوزرنده «حکومتلر هیئات تمثیلیه مالک اولاجقدری» . بومقرراتک ایلك متننده «هیئات تمثیلیه اولاجقدر» صورتنده یازلمش ومدتی ده برسنه اولمق اوزره تعیین ایلمشدی . فقط بالآ خزه بومدت سیلنمش و (اولاجقدر) یرینه ده (اولونور) تعبیری قونولمشدی . دهاطوغروسى بوبر تکلیفدن عبارت اولوب بر قانون عد اولونامازدی . هر پرنس ایسته دیکی اداره یی تأسیسه سربست بولونیوردی . (وورتمبرغ ، باد و باویه راکی) فرانسز حاکمیتک تنسیق و توسیع ایلدکری جنوب حکومتلری ایله وایمار بویوک دو قه لفننده (۱۸۱۶ دن ۱۸۱۹ . قدر) پرنسلر دول معظمه نك اخطار اتنه رغماً ینه قانون اساسیلر قلمه آلدیردیلر . هر حکومتک علی العاده ایکی مجلسدن مرکب بر پارلمنتوسی واردی . حق انتخاب رسمی ویرن منتخبلر طرفندن انتخاب اولونان مجلس مبعوثان ویرکیلرله قانونلری تصدیق ایدردی . فقط اکثریتی نظر اعتباره آلمادن ناظرلری حکمدار انتخاب ایلردی . بورژوا و صنفنک پک آز مقدارده بولوندیغی بوقفیر مملکتلرده منتخبلر مأمورلردن باشقه مبعوثلکه لایق کیمسه بولامیورلردی . حتی مخالفین بیله

حکومت مأمور لرندن انتخاب اولونیوردی . بر مامورک مبعوث اولدینی مدتجه حکومتی تنقید ایتک حقه مالک اولدینی قبول ایدیلیوردی . شو حالده قاینه نك مخالفینی دوشورمک ایچون یالکز بر واسطه سی واردی . اوده مأمور مبعوثلره مبعوثانه کلک ایچون مساعده و یرمه مکدی .

آلمانیا نك شمال حکومتلرنده پرنسیر آریستو قراتیک حکومت مجلسلرینی ابقا ایلکی ترجیح ایتشلردی . بر قانون یامق و یاخود یکی بر ویرکی احداث ایتک لازم کلدیکی زمان بو مجلسلری بر قاج سنه فاصله ایله نادراً اجتماعه دعوت ایدرلردی .

بعض پرنسیر قانون اساسی اعلان ایتدن اداره حکومت ایتمکه تعهد ایلدیلر . تبعه لری ۱۸۳۰ ده آیاقلانهرق بونلری ده قبوله مجبور ایلدیلر . فقط اداره مطلقه یی تاسیس ایچون آوستریا تکرار مداخله ایتدی .

بناء علیه پارلمنتو اصولی آلمانیا ده بر درلو کواکله شه مدی . ۱۸۱۵ دن ۱۸۴۸ . قدر کچن دور ظرفنده آلمان احراری کندیلرینه ظلم ایدن آوستریا و پروسیا حکومتلرندن نفرت ایتکه ، حریت و مساوات مملکتی اولق اوزره فرانسه یی تقدیر و تجیل ایلکه باشلادیلر (۱) .

اوروپانک منتهای غریبسنده اسپانیا و پورتکیز قرالقلری

(۱) بو حسیات ، هاینرخ هاینه نك (آلمانیا) نامنده کی کتابنده عظیم بر شدت افاده ایله بیان ایدلشدر .

۱۸۱۴ ده حکومت مطلقه‌ی حائز برقراللق ایله برابر فرانسزلرك اشغالی زماننده لغوایدیلن (انکیزیسیون) ی ده تاسیس ایلشلردی. بو حکومتلر مستبدانه اداره اولونیورلردی. اسپانیا، قرالک مقربینی (قاماریللا) ایله راهبی، پورتکیزده برانکلیز جنرالی ایله بره. زیلیاده قالان قرالک غیبوبنده نائب حکومت اولان بر قومیسون طرفندن اداره اولونیورلردی. بوراده یکی کتابلر ممنوع اولدینی کبی خفی جمعیت اعضاسی ده جانی صفتیله محکوم ایدیلوردی. فقط فرانسز وانکلیز اردولریله تماس ایده ایده دهاز یاده فکر حریت پرورانه بسلهین ضابطلر عسکرلری آیاقلاندریدیلر. ۱۸۲۰ ده هر ایکی مملکتدهده قانون اساسی طلب ایدیلر. اسپانیا قرالی فرانسزلرك ۱۷۸۱ قانون اساسیلرینه تقلیداً وجوده کتیریلن ۱۸۱۲ قانون اساسیسی قبول ایتدی. پورتکیز قورتهزلری ده ۱۸۲۲ ده عین قانون اساسیسی قبول ایلدی. فقط (مطلقیت طرفداری) اولان اسارت فرقه‌سی : یاشاسین مطلقیتی حائز قرال ! قهر اولسون قانون اساسی ! دییه باغیرارق اسپانیاده عصیان ایتدی. فرانسه حکومتی (له‌ژیتمیست) لره لایق بر نمایش اجرا ایتک ایچون اسپانیاه بر اردو کوندردی. بو اردو مطلقیت فرقه‌سی تاسیس ایتدی. احراک بر قسمی اعدام، بر قسمی نفی اولوندی (۱۸۲۳).

پورتکیزده تخت حکومتک وارنی بره زیلیا ایمراطوری اولنجه برینه اداره حکومت ایچون قیزی کوندردی. مملکتده ۱۸۲۶

فرمانی اعلان ابتدی . بو فرمان قانون نظرنده مساوات و (یا لکز قاتولیکلکه مساعده ایدلیدیکی ایچون حریت مذاهب مستثنی اولق اوزره) حریت تاسیس ایدیوردی . حکومت پارلمنتو شکلنده تشکیل ایدلمشدی : یعنی قرال ، ارثی بر مجلس اعیان، ایکی درجه ایله انتخاب اولونان مبعوثان، مسئول ناظر لر، ۶۰۰ فراتق وارداتی اولان املاک صاحب لرینه مخصوص حق انتخاب واردی . اوزمانک نظریاتنه کوره قبول ایدیلن (تشریحیه، اجرائیه و عدلیه کبی) اوچ قوتدن باشقه برده دردنچی بر قوت، فرانسز محرر لرندن بنترامن قونستان طرفندن ایجاد اولونان برده (قوة معدله) واردی . بو قوتده مجلس مبعوثانی اجتماعه دعوت و فسخ ایتمک ، ناظر لری انتخاب ایلمک ، عفو عمومی ویا عفو اعلان ایلمک صلاحیتندن عبارتدی . بو صلاحیت یا لکز قراله تودیع ایدلمشدی . فقط بو فرماندها موقع تطبیقه قونمازدن اولکنج قرالیچه نیک عمومی میکمل بر ضربه حکومت وقوعه کتیره رک اداره مطلقه بی آینه آلمشدی .

عائله قرالی بیننده تفرقه حاصل اولماسی و غریبده پارلمنتو ایله اداره اولونان ایکی حکومتک، انکلتراه ایله فرانسه نیک نفوذی یوزندن او صره لرده (۱۸۳۳) اسپانیا ایله پورتیکزه ده پارلمنتو اصولی داخل اولمشدی . اسپانیاده فریدیناند، (۱۸۳۳) ده وفات ایدیدیکی زمان بر قیز، یعنی ایزابه لی، برده اوغلان یعنی قارلوسی بر اقمشدی . بوربونلرک راس کاره کچدکلری تاریخدن اعتباراً

اسپانیاجہ قبول ایدلمش اولان (سالیک قانونی) موجبنجہ ولی عهد کارلوس ایدی . فقط فردیناند اسکی قاستیل عاداتی تاسیس ایتک ایچون بر (پراغماتیک) نشر ایدرک تاج حکومتی ایزابله و نیابت حکمداری بی‌ده والدهسی قیرستینه ویره‌شدی . فقط مطلقیت اداره طرفدارلری کارلوسی التزام ایتمشلر ، بونک اوزرینه قیرستینک احرار فرقه‌سنه استناد ایدرک ناظرلری احراردن انتخاب ایتسنه لزوم حاصل اولمشدی . - کذا پورتکیزدهده کنج قرالیچه ماری سن‌رشدہ واصل اولنجه احرارک عصیانی اوزرینه قرالغنه نائل اولدی . احرار ، میکلی طرد ایتدی . ایشته او زمان ایکی مملکتدهده هرایکی مدعی سلطنته طرفدار اولان مطلقیت اداره طرفدارلری ایله ایکی قرالیچه‌نک طرفداری اولان احرار بیننده بر حرب داخلی باشلادی . سلطنت ادعاسنده بولونانلر اوروپانک مطلقیت‌اداره‌یه مالک اوچ دولتنک ، قرالیچه‌لرده پارلمنتو ایله اداره اولونان ایکی دولتنک ، یعنی فرانسه ایله انکلترونک حمایه‌سنه نائل اولدیلر . بونلرله برابر بر (اتفاق مربع) عقد ایتدیلر (۱۸۳۱) .

پورتکیز حکومتی ۱۸۲۶ فرمانی اعلان ایتدی . اسپانیا حکومتی ۱۸۳۴ (فرمان قرالی) سنی یازدیردی . بوفرمانده نائب حکومت قانونلرله ویرکیلری (قورتهز) تصدیق ایتدیره چکنی وعد ایتدی . اسپانیا پارلمنتو سندن معدود اولان (قورتهز) ایکی مجلسدن مرکبدی . انلرده ایکی درجه انتخاب ایله اوچ‌سنه مدتله

انتخاب اولونان مبعوثان (پرو کورادور) ایله بویوکلر (پروچہ رس) ایدی . منتخبلر ، حق انتخاب رسمی ویرلردی . مبعوثلر پاره آلامدقلری کبی کندیلرینک ده ۱۲۰۰۰ فرانق کلیرلی اولمق لازمدی .

هرایکی مملکتده مطلقیت اداره طرفدارلری مغلوب اولمشدی (اسپانیاده پیرنه قارایستلرینه قارشی تمام بش سنه قانلی برحرب اجراسنه لزوم کورولمشدی) . احرار ایکی قسمه آیرلشدی . اسپانیاده اعتدالپرووران (صلاحیت قرالیه طرفدارلری) ایله ترقیپرووران (قورتهز طرفدارلری) ؛ پورتیکیزدهده شارتیستلر (فرمان طرفدارلری) ایله سه پتامبریستلر ایدی . ایشته فرقه رئیسلری کندیلرینی بوناملر آلتنده ستر ایدیورلردی . برخیلی مدت هرایکی قرالغدهده پارلتو اداره سنک اشکالندن باشقه برشی جلب ایدیله مدی . چونکه ناظرلر مجلس مبعوثانه قارشی مسئول اولمادقلری کبی حکومتده اودرجه برنفوزه مالک بولنیوردی که اسپانیا و پورتیکیزده منتخبلر ناظر نامزدی بیله انتخاب ایدیورلردی . بوندن باشقه حرب داخلی ایله کسب نفوذ ایدن جنراللرده فرقه منازعه لرینه مداخله ایدیورلر ، حکمداری کندیلرینی ناظر انتخاب ایتدیرمکه اجبار ایلدیورلردی . ۱۸۳۳ دن ۱۸۵۵ قدر یکریمی بش سنه ایچنده اسپانیاده ۴۷ مجلس وکلا رئیس ایله ۹۶ حربیه ناظری دکیشمشدی . فقط یکی اداره یالکز ایکی بویوک تبدلاته باعث اولمشدی که اولنرده اداره حکومت

قرالک کوزده لری ایله راهبیری طرفندن اجرا ایدیلیرکن شمدی ناظر-
 لرله جنراللره کجمنسی؛ احرارک انکیزیسیوننی لغو و ملتک بورجنی
 اودهک ایچون کلیسااموالنی ضبط ایدرک (پورتکیزده ۱۸۳۴،
 اسپانیاده ۱۸۳۶ سنه سنده) رهبانک حاکیت مطلقه سنی قیرمش
 اولماسیدی .

اون برنجی فصن

۱۸۴۸ دن ۱۸۷۵ • قدر

فرانسه نك اداره سی

شباط انقروبی . — ۱۸۳۰ ده اولدینی کبی ۱۸۴۸ دوده
حکومت علیهنده ایکی نوع خصم واردی . (غوش دیناستیک)
فرقه سی انتخاباتک اصلاحنی و پارلمنتوایله برابر حکمدارله اداره
حکومت اصولنی ابقا ایتمکله برابر کیزو قاینه سنک سقوطنی طلب
ایدیور ، جمهوریت فرقه سی ده قرالنی دویرمک ایستیوردی .
تی بهرایله بارونک اداره سنده بولونان (غوش دیناستیک)
افکار عامه یی تهییج ایتمک ایچون ضیافتلر ویریور ، بوضیافتلر
اتناسنده (اصلاحات) طلب ایدیلیور ، فقط قرالک صحتنه باده نوش
اولقوده اصلا خاطر دن چیقارلمیوردی . بوفرده غرته جیلر ،
بورژواصنی وکافه سی ده مکلفیندن معدود بولونان پارس (فاردنا-
سیونال) ی طرفندن التزام اولونیوردی .

جمهوریت فرقه سی ۱۸۴۰ دن صوکره تشکیل ایدلمشدی .
بوفرده یی یالکز بر مبعوث (لودرو — روللن) ایله بر غرته ،
(ره فورم) غرته سی تمثیل ایدیوردی . فقط بوفرده یی لوئی بلانک
تلامیذندن بولونان پارس عمله لری تشکیل ایدیور ، بونلر (سوسیال
اجتماعی) بر اصلاحات طلب ایلیور لردی . سوسیالیستلر
(او زمان انلره بو نام ویرلمشدی) عمله لرك ایش بولایلمک

ایچون فابریقه صاحی پاترونر طرفندن تکلیف اولونان شرائطی قبوله مجبور اولمالرندن طولایی شکایت ایدیورلر ، حکومتک بالذات عمله استخدام ایتمک ایچون دستکاهلر وجوده کتیره رک (مساعی بی تنظیم) ایتمکی درعهده ایلمسنی طلب ایدیورلردی . فقط مجادله ، انتخابات اصولنک اصلاحی مسئله سنندن باشلامش ، مجلس مبعوثان بونی رد ایلمشدی (۱۱ شباط ۱۸۴۸) . دهاصوکرده ده حکومت ویریله جک ضیافتلردن برینی منع ایلمش ، صول جناح فرقه سی هیج بر مقاومت اجرا ایتمدن یالکزر پروتستو ایتمشدی . بناء علیه ۱۸۳۰ ده اولدینی کبی انقلابه ینه جمهوریت فرقه سی باشلادی . در حال سلاحه صاریلاررق (پارس) ک شرق محله سننده باریقادرل انشا ایتمدی . غرب محله سنه حاکم بولونان (غارد ناسیونال) ده کیزو قاینه سنک علیهنده کی فرقه بی التزام ایتمدی . اوزمانلر (غارد ناسیونال) پارس افکار عمومیهنه سنی تمثیل ایدیوردی . اکزیاذه نظراهیمته آنانده (غارد ناسیونال) ایدی . حتی غارد ناسیونال ۱۸۳۰ ده اورله آن خانداننک رأس کاره چمسنه یاردم ایتمش و قانون اساسی به : « قانون اساسینک تصویب ایلدیکی بوتون حقوق ایله برابر فرمان ، غارد ناسیوناللرک جسارت و وطنپرورلکیرینه تودیع اولونمشدره » دییه یازلمشدی . بو سبیدن لوئی فیلیپ غارد ناسیوناللره قارشی طورامادی . کیزو قاینه سنی سقوط ایتمیره رک یرینه صول جناحدن بر قاینه تشکیل ایتمدی . ارتق اصلاحات طرفدارلری غالب کلشلردی (۲۳ شباط) .

فقط جمهوریت فرقه سی انقلابه ینه دوام ایتدی. کیجه لین بر نمایش ترتیب ایلدی. عسکر باصقینه اوغرا نجه نمایش جیلرک اوزرینه آتش ایتدی. بواننده تاقات وقوعه کلدی. جمهوریت طرفدرلری، اولنلرک جسدلرینی پارسده کزیدریدیلر. ایرتسی کونده تعرضه کچدیلر. اهالی (تویلوری) پی ضبط ایتدی. (پاله - بوربون) استیلا ایلدی. عائله قرالینک سقوطنی اعلانه و موقت بر حکومت تاسیسنه مجلس مبعوثانی مجبور ایتدی (۲۴ شباط). بو سفرده جمهوریت فرقه سی ایله صول جناح فرقه سنک برلشمسی جمهوریت فرقه سنک مظفریتنه سبب اولمشدی. - ایالتلر کاملاً قرال طرفداری اولدینی کبی جمهوریتدن ده قورقیورلردی. فقط پارسده تشکیل اولونان طرز حکومتلری قبوله اوقدر آلیشمش لردی که انقلابی ده بلامقاومت قبول ایتدیلر. حکومت موقته طرفندن کوندریلن (قومیسرلر) ک آینه اداره حکومتی درحال تسلیم ایدیوریدیلر.

آرای عمومییه. - مجلس مبعوثان طرفندن اعلان اولونان (حکومت موقته) معتدل جمهوریت پرورانه منسوب یدی کشیدن ترکیب ایدیوردی. لامارتین ده بونلر میاننده ایدی. عین زمانده سوسیالیست جمهوریت پرورلردن مرکب اولمق اوزره (اوتل دوویل) دهده بر حکومت تشکیل ایداشدی. لوئی بلانده بونلر میاننده ایدی (۱). ایشته بونک اوزرینه حکومت موقته (اوتل

(۱) عین حال ۱۸۳۰ انقلابنده وقوعه کلشدی. فقط ۱۸۳۰

دوویل (کلهړك سوسیالیست حكومتك اعضاسنی قبوله مجبور اولمش، بونلره (سه قره تهر، كاتب) عنوانی ویرلمشدی .

فقط بویکی فرقه آره سنده، تام قاینه اورته سنده بر مجادله ظهور ایتدی . سوسیالیستلر حاکمیت عامه یه مستند واجتماعی (۱) بر جمهوریت ایله برابر مساعینك حكومت طرفندن تنسیقنی، انقلابچی عمله لرك (قرمزی بایراق) لرینك شمال اولارق قبولنی ارزوایدیورلردی . اعتدال پروران ایسه یالکمز اصول تصرفی تبدیل ایتیمه جك و حاکمیت عامه اساسنه مستند اولاجق بر جمهوریت ایله اوچرنکلی بایراغك شمال اولارق قبولنی ارزو ایلورلردی . بناءً علیه معتدل جمهوریت پرورلر مساعینك تنظیمی بر تجربه ایتدیرمك ایسته دیلر .

بونك اوزرینه (ملی دستکاهلر) احداث ایدلدی . بودستکاهلر حکو-
مت طرفندن تعیین اولونان بر قومیسون طرفندن اداره اولوناجق،
عمله یی حكومت حسابنه استخدام ایلیمه جکدی . انقلاب بوتون
معاملاتی طور دیرمشدی . (پارس) ایشسنز کوجسنز عمله لرله
طولمشدی . حكومت بونلره یومیه بر بچق فرانقله ایش بولمق
ایسته دی . فقط بونلره کوردیریمه جك برایش اولمادیفی ایچون

مجلس مبعوثانده تشکیل اولونان قاینه (اوتل دووئل) ده کی قاینه یی ده
کندی آره سنه آلمشدی .

(۱) بونلره ده لایا ایلانه بر تعبیرله (ده موق - صوق) دیرلردی .
دشمنلری ایسه انلری اشتراك اصولنك تأسیسنی تکلیف ایدن ارباب مسلکه
قاریشدی رارق (قومونست) دیورلردی .

(شان دو مارس) زه مینك دوزم لتلمسندہ استخدام ایدلدی. عملہ لر هیچ آلیشما دقلری بولزومسزایشدن پك چابق اوصانارق بوم بوش اوطورمغه باشلادیلر. بویله بوم بوش اوطوران عملہ نك مقداری مارتده ۴۰۰۰۰ ، ۱۶ نیسانده ایسه ۶۶۰۰۰ بالغ اولمشدی . ایشته بوکبی احوال و شرائط داخلنده اجرا ایدیلن شو تجربه، سوسیال لیستلره مساعینك حکومت طرفندن تنظیمی فکرنی بسبتون کوزدن دوشورمشدی .

کذا امور مالیہ دده عین اختلاف موجوددی. انقلاب، وارداتده آچیق حصوله کتیرتمشدی . مالیہ ناظری بالواسطه رسمی آرتدیره رق پاره تدارکنی تکلیف ایدیوردی . فقط بالواسطه رسوم الك زیادہ عملہ یه ترتب ایتدیکی ایچون سوسیالیست فرقه سی بونی ردایتدی . بونك اوزرینه حکومت بلاواسطه رسومده فرائق باشنه اللی سانتیم قدر ضمیاتده بولوندی . بو ضمیات، کویلولری جمهوریتدن بسبتون صوغوتدی .

هرایکی فرقه ده حکومت موقته نك نه قدر امتداد ایده جکنی قرارلاشدرامادی. بونلر، منتخبلرک دهادعوت اولونمامسنی ، جمهوریت فرقه سنك تشکلنه قدر بکنمنسنی آرزو ایدیورلر، عصرلردن بری حکمدارله اداره اولونان برمملکتده برسنه جمهوریتله اداره اولونمق چوق برشی دکلدر دیورلردی. اعتدال پروران ایسه اداره حکومتی بر آن اول ملتی تمثیل ایده جک بر مجلسه تودیع ایتمک ایستیورلردی .

بناء علیه هر ایکی فرقه ده نمایشلر اجرا ایدرک بر برینی قور قوتمغه چالیشدی . سوسیالیستلری عملهلر ، اعتدال پرورانی ده (غاردناسیونال) ایله بورژووا صنفی وطلبه لراتزام ایدیوردی . نهایت غلبه یی اعتدال پروران قازاندی . حکومت (مجلس مؤسسان) ک انتخابی ایچون ۲۳ نیشان تاریخی قرار لاشدیردی . یکر می بریاشنده بولونان هر فرانسز منتخب اولاجقدی . کذا یالکیز مخالف فرقه طرفدن تکلیف اولونان انتخاباتک اصلاحی ایله ده اکتفا اولونموردی . جمهوریتک حاکمیت عامه اساسنه مستند اولمسی ایچون حکومتی یکی بر اساس ، (آرای عمومی) اوزرینه ده تأسیس ایتک ایستیلیدوردی . بو اصول ذاتاً (حکومت متفقہ آمریکا) ایله اسویچر ده واردی . بورالده تدریجی بر صورتده تأسیس ایدلمش ، فرانسه ده ۱۷۹۲ (قونوانسیون) ی ایچون تجر به ایدلمشدی . دهاطوغروسی بو اصول ، انقلاب عنعناتی اینه جمهوریت عاداتنه اساساً وجوددی . سوسیالیستلر اصلاحات قانونیه یی کندی اهلرینه اولمق اوزره طلب ایتک و شرائط حیاتیه اریخی اصلاحه حکومتی اجبار ایتک واسطه سنی عملهلرک آلرند بولوندر مق ایستیورلردی . آرای عمومیه جمهوریتک الزم بر نتیجه تأسیسی کبی تلتی اولونیوردی . بوسبدن غیر قابل مناقشه بر اساس اولمق اوزره وضع ایدلمشدی . فقط قاینه یی تشکیل ایدن جمهوریت پرورلر بویکی قوتی کویلولرک نه صورتله استعمال ایده جکلرینی هیچ دوشونمبورلردی .

مجلس مؤسسان (قونستی تو آنت) (حکومت متفقہ آمریکا) ده

اولدینی کبی هرولایتده تعیین اساسی ایله خفی بر صورتده انتخاب اولونان ۹۰۰ اعضادن مرکبدی . انتخاب اولونایلمک ایچون اکثریت نسیبه لازمدی . منتخبلر قضا مرکزینه کیدوب انتخاب ایدیورلردی . مبعوثلره یومیه ۲۵ فرانق معاش ویریلیوردی . مجلس ، اکثریتی معتدل جمهوریت پرورلر تشکیل ایتمک اوزره اجتماع ایتمدی . سوسیالیستلر علمینده حرکت ایدرک ملی دستکاهلری قاپاددی . سوسیالیستلر ، فابریقه لرذن چیقما ریلان عملهلرله قوت بولارق مجلسه هجوم ایتمیلر (۱۵ مایس) . دهها صوکره حکومتدن مجلسک طاغیدلماسنی طلب ایلدیلر . ایکی فرقه ، تمام اوچ کون پارس سواقلرند محاربه ایتمیلر (حزیران وقایعی) . اردو ایله غاردناسیوناللر شرق محله لرینی عاصیلردن استرداد ایتمیلر . آرتق سوسیالیست فرقه سی قطعاً مغلوب اولمشدی . فقط عملهلرده کندی تعبیرلری وجه ایله «بورژووازی اساسنه مستند» جمهوریتی التزامدن وازکچمشلردی .

۱۸۴۸ قانونه اساسی . — مجلس وؤسسسان ، سوسیال

لیست دشمنلرندن قورتولنججه بر قانون اساسی قلمه آلمغه باشلادی .

آریستوقراتیک بر پارلمنتو اصولندن بسبتون قطع علاقه ایتمک ایستهدی . فقط اجتماعی نظاملره هیج طوقونمادی . قانون اساسینک باش طرفنه برده حقوق وضع ایتمدی . بوبیاننامه ده شوپله دینیوردی : «مجلس ملی حضور باریده وفرانسزملتی نامنه

بیانات آتی‌ده بولونور : فرانسه ، جمهوریت صورتنده تشکل ایتمشدر . فرانسه جمهوریتی ده موقراتیکدر .

« جمهوریت قوانین مثبتته نك فوقنده بولونان حقوق وظائف قدیمه یی تصدیق ایدر . دستوری : حریت ، مساوات ، اخوتدر . اساسی : عائله ، ایش ، تصرف ونظام عمومیدر . » له ژیتی- میست مبعوثلردن بری بو (ده موقراتیک) کله سنك معناسنی سئوال ایدرک : « بوکله اوصورتله آکلاشلمالیدرکه سوکونده تفنك ضربهلرینه وسیله تشکیل ایتمه سین » دیدی . بوکا جواباً : « بوکله یی الكزیاذه ایضاح ایدم جك شی ، طوغرودن طوغروهه تطبیق اولونان آرای عمومیه در . » دنیلدی .

قانون اساسی بوتون حریتلری ، اجتماع ، استدا ، نشریات حققرینی تصدیق ایدیور ، زنجیلرک اسارتی ایله سانسورلکی لغوایلوردی . فضله اولارقده ، هیئات اجتماعیه نك تحصیل وتعیش خصوصنده اعضاسنه معاونت وظیفه سیله مکلف اولدیغنی اعلان ایدیور :

« جمهوریت هراهل وطنك شخصنی ، عائله سنی ، دینی ، املاکنی و مساعیسنی وقایه ایتملی ، هرکس ایچون لزومی اولان (تحصیل) دن عمومی استفاده ایتدیرمیلیدر . ضرورت ایچنده قالان اهل وطنه امکانی داخلنده ایش تدارک ایدرک ، بسبتون چالیشه جق حالده اولمیانلرده معاونتده بولونارق بونلرک معیشتنی برمعاونت اخوت پرورانه ایله تأمین ایتیلیدر . مجلس ، (حق

(مساعى) اعلانى قبول ائتمىشى .

مجلس مؤسسان، بوتون صلاحيت عموميه نك ملتده اولدغى
وملتك هيچ بروقت ارنا تمثيل اولوناميه جغنى بيان ايديوردى . دها
طوغروسى بو، ملتك جمهوريت شكلى آلتنده حاكىتى ديمكى .
حكومتك تشكىلى ايچون موتسكيونك نظريه سنى قبول
ايتدى : « قوتلك تفرىقى هر حكومتك شرائط اساسيه سندنر »
(ماده ۱۹) .

بناء عليه فرانسز قومى « قوه تشريعيه يى بر مجلسه » ،
« قوه اجرائيه يى ده اهل وطندن برينه » ، رئيس جمهوره توديع
ايدىوردى .

بوايكي قوت كاملاً مستقلى . بودجه ايله قوانينى مجلس تصديق
ايدى . جك و قطعياً فسخ ايديله ميه جكدى . رئيس جمهور يالكز
ناظرلى انتخاب ايدى . جكدى . ناظرلى مسئول دكلردى .
بوصورتله (حكومات متفقہ آمريقا) اصولنى تقليد ايتك ارزو ايدلمشى .
هيئت تشريعيه تعيين اسامى و رأى خفى ايله انتخاب اولونان تك بر
مجلسدن عبارتدى . ايكنجى بر مجلسك آريستوقراتيك اولاجنى
بيلنديكى ايچون ايكي مجلس تشكيل اولونماسى ارزو ايدلمىشى .
رئيس ، طوغرودن طوغرويه آراى عموميه ايله ودرت سنه مدتله
انتخاب اولوناجقدى . اقليت ، قوه اجرائيه نك تجربه سزاللره ويرلمسى
تهلكلى اولاجنى ايلرى يه سورهرك رئيس جمهورك مجلس
طرفندن انتخاب اولونماسى تكليف ايتمىشى . بوصرده ناپولئونك

یکی لوئی ناپولئون کنديسنی مبعوث انتخاب اینتدیر مشدی. بناء عليه اداره حكومتی لوئی ناپولئونك آله كچیر مسندن قورقولا بیلیردی. فقط لامارتین غایت بلیغ برنطق ایله بوتون مجلسی کنديسنه جلب ایتمش : « حتی مات ، بنم شو قصیر اولان بصیرتمك توحش ایدمه جکی بر کیمسه بی بیله انتخاب ایتمش اولسه ینه بختمزه ! ایش شوکه ، حق و ملنك موافقی اولسون. بر ازده ایشی تقدیر الهی به بر اقالم. الله یالوارالم ، ملنك افکارینی تنویر ایتمسنه دعا ایدمه. ارزوی ربانی یمه منقاد اولالم. ملت آلدانیرسه... امنیتنی ، حیثیتنی ، حریتنی ایمپراطورلق محصولی آلر مه تودیع ایدرسه ، نه یاپالم ، اوده کندی بختنه . اوزمان ثبات و جسارتده بزلر دکل ، ملت قصور ایتمش اولور . » دیمشدی . بونك اوزرینه رئیس جمهورك بردفعه لقی انتخاب اولونماسنه قرار ویرلمشدی .

۱۰ کانون اول ۱۸۴۸ ده رئیس جمهور انتخابی ایچون منته خیلر دعوت اولوندی . اعتدال پروران قانونیاتی ، سوسیالیستلر له درو - رولله نی نامزد انتخاب ایتمش لردی . فقط یولتیقه یه یانا شدیر لیمان کویلولریالکنز بر اسم طانیور لردی ؛ اوده ناپولئون . بونك ایچون هپسی ده لوئی ناپولئون بونا پارطی انتخاب ای تیدیلر . لوئی ناپولئون (لا اقل ۷ میلیون) رأیدن تمام بش بحق میلیون رأی قازاندی . ناپولئون بر انتخابده قوه اجرائیه بی آله کچیر مشدی . آرتق قابینه ، مامورین ، هپ آنده ایدی .

جمهوریته اعتماد قالمدیغی زمانلر انتخاب اولونان (مجلس تشریحی ،

آسلامنبله له ژيسلاتيو) ۵۰۰ زى حکمدار له اداره (مونارشيست)، ۲۵۰ سى ده جمهوريت طرفدارى اولمق اوزره ۵۰۰ اعضادن ترکب ايتدى (جمهوريت پرورلرک يالکيز ۷۰ ى اعتدال پرور ، ۱۸۰ ى بر معتاد شرق طرفلردن انتخاب ايديلن وکنديلرينه (مونتاني) نامى ويرن سوسىاليستلردن ايدى) . اکثرى تشکيل ايدن مونارشىستلر ، اورله آنيست (اورله آن خاندانى طرفدارى) ناظرلر انتخاب ايتمش اولان رئيس جمهورله اتفاق ايدرک (مونتاني) . (يعنى سوسىاليستلر) . تعرض ايتمکه باشلاديلر . پاپانک نفوذى تاسيس ايجون (روما) به جمهوريت پرورلره قارشى براردو کوندرديلر . مکاتب ابتدائيه ده تدريسات ملكيه يى تصديق ايتديلر ۱۸۵۰ قانونى ايله کفالته لزوم کوسترن مطبوعات قانونى، منتخب اولمق ايجون اوج سنه بر محله اقامتى و تکاليفه داخل بولونمايى طلب ايدرک منتخلردن بشده ايکي ينى حق انتخابدن محروم براقان ۳۱ مایس قانونى ده تصديق ايتديلر .

۱۸۵۱ ده اکثریت، جمهوريت فرقه سنى مغلوب ايدن بجه رئيس جمهور ايله مجادله به کيريشدى . رئيس جمهور پارلمنت و اصولنى ايسته ميور ، اداره مطلقه يى تا مین ايتمک آرزو ايدىوردى . حتى اورله آنيست ناظرلرينى سقوط ايتديرمش ، آنلرک يرينه کندى دوستلرينى کتيرمشدى . کذا بر چوق ضابطانى ده کندينه چويرمش ، رسم کچيدلرده : « ياشاسين امپراطور ! » ديه باغيرتمغه باشلامشدى . بر ضيا فنده (حزينان ۱۸۵۱) :

«فرانسه المده بولوندرجه محواولمازا» دیمشدی . ۱۸۵۲ ده رئیس جمهورلق مدتی ختام بولیوردی . ناپولئون کنديسنی ایکنجی دفعه اولارق انتخاب ایتدیرمک ایستیوردی . فقط قانون اساسی بوکا مانع اولدینی ایچون مجلسدن قانون اساسینک تعدیلنی طلب ایتدی . قانون اساسینک تعدیل اولونا بیلیمسی ایچون ثلثان رأی لازمدی ؛ فقط بو قدر رأی استحصال ایدیله مدی . حکمدارله اداره طرفداری (مونارشست) مبعوثلر قورقغه باشلادی . مجلس مبعوثان مالیه انجمنی اعضاسی مبعوثلری محافظه ایتمک ایچون مجلس مبعوثان رئیسنه ضابط جلب ایتمک حتی ویرلمسنی تکلیف ایلدیلر . فقط سوسیالیستلر (مونتانی) ناپولئون طرفداری اولان مبعوثلرله برلشهرک بو قانونی رد ایتدیلر .

بناء علیه قانون اساسینک وجوده کتیردیکی ایکی قوت یکدیگریله مبارزه ایدیلور ، اختلافه نهایت ویرمک ایچون ده قانون اساسیده بر صورت تسویه بیان ایدلیوردی . قوه اجرائیه بی یعنی قوتی حائز بولونان رئیس جمهور ۲ کانون اول ۱۸۵۱ ده ضربه حکومتی وقوعه کتیرمک ایچون بو قوتدن استفاده ایتدی . مجلس مبعوثانی طاغیدارق آرای عمومیه بی تاسیس ایلدی . منتخبلری جمع ایدرک جمهوره اون سنه مدتله صلاحیت مطلقه ویرمک اوزره قانون اساسی قبول ایتملرینی تکلیف ایتدی .

ذاتاً قانون اساسیده بو احتمال نظر دقته آلمش ، و بویله بر حال وقوعنده قوه اجرائیه نك مجلس مبعوثانه کچه چکی قوه اجرائیه نك

رئيس جمهور دن ساقط اولاجنى تحت قراره آلمشدى . حتى
 رئيس جمهورى تحت محاكه يه آلمق ايجون در حال اجتماع ايتك اوزره
 برده ديوان على احداث اولونمشدى . فقط اردوايله ضابطلر ناپولئونك
 امرينه تابعدى . ناپولئون اولافرقه رئيسلرينى توقيف ايتديرمش ،
 قاجغه موفق اولان مبعوثلرده قانون اساسى نى تطبيق ايتديرمك
 ايجون طولانمشر ، فقط عسكرلر طرفندن طرد ايدلمشردى .
 قانون اساسى نى يالكوز (مونتاني) ، فرقه سنه منسوب جمهوريت
 پرورلر مدافعه ايتمشر ، بونلر شرق ايلتلرندن بعضلرنده
 سلاحلار ق مأمورين حكومت اوزرينه يورومشردى . رئيس
 جمهورده (قرمزىلر) ، قارشى نظام وانتظامى محافظه ايدىوركى
 كورونك ايجون بو عصياندن استفاده ايلمشدى . بونك اوزرينه
 اوتوزايكى ايلتده اداره عرفيه اعلان اولونمش ، خصوصى محكمه لر ،
 (مخلط قوميسيونلر) احداث ايدلمشدى . جمهوريت پرورلر
 كوره ك جزاسنه ، تبديل مكانه ، حبسه و نقيه محكوم ايدلمشدى .
 (محكومينك مقدارى ۱۰۰۰۰ قدر تخمين ايدلمكده ايدى .
 ۳۴۰۰ كشى ده جزايره نفى ايدلمشدى) ،

بايلاجق قانون اساسى حقنده منتخبلر ك فكرى سؤال
 اولوندينى زمان جواب موافقت ويرمشر ، بونك اوزرينه
 ناپولئون فرانسه نك حاكم مطلق اولارق قالمشدى .

ايمپراطورلور . - ۱۸۵۱ قانون اساسيسى سكرنجى
 سنه قانون اساسيسنه تقليدأ وجوده كتيرلمشدى . بو قانون

اساسی رئیس جمهوره بوتون صلاحیتی ، ناظرلری و بوتون مامورلری ایستدیکی کبی نصب ایتمک ، اعلان حرب و معاهده لر عقد ایتمک ، مملکتده اداره عریفه اعلان ایتمک کبی حقوقی بخش اییدیوردی . قرال مسئولدی . فقط یالکز ملته قارشوی ایدی . ناظرلر مجلس مبعوثانه قارشوی مسئول اولمادقلری کبی منتخبلرکده رئیس حکومت علیهنده قرار ویرمکه جسارت ایدهمیه جکلری ذاتاً معلومدی .

قوة تشریعیه ظاهراً اوچ مجلسه تودیع اولونمشدی . « شورای دولت قانونلری حاضر لایه جق ، هیئت تشریعیه قانونلری مذاکره و تصدیق ایده جک ، مملکتک اکابرندن تشکیل ایدیله جک اولان اعیانده مقاوله اساسیه ایله حریت اهلینک محافظی بولوناجق » دی . فقط بو اوچ هیئندن ایکسی ، شورای دولت ایله اعیان ، طوغرودن طوغروه رئیس جمهور طرفندن انتخاب اولوناجقدی . یالکز هیئت تشریعیه هر قضا مرکزنده تعیین اسامی ایله و آرای عمومیه ایله انتخاب ایدیله . جکلدی . فقط هیئت تشریعیه ک قوانین تکلیف ایتمکده حقی یوقدی . بو تشبث ، رئیس جمهوره حصر ایدلشدی . کندیسنه عرض اولونان قوانینی تصدیق ایتمک حقی یالکز رئیس جمهوره عائددی . کذا اعیان « کینی وغیر مشروع هر درلومقراتی ده فسخ ایتمک » صلاحیتینی حازدی .

دها طوغروسوی بو اصول اداره ، هم ده موقراتیک

(حاکمیت عامه به مستند) ، همده مطلقیتی حائز بر اداره ایدی .
 ناپولئون : « حاکمیت عامه نك اساسی یالکمز بر شخصیتده تمثیل
 ایتمکدره دیوردی .

ناپولئون ۱۸۵۲ء ، بر (سه نانوس - قونسولت) قرار یله
 کندیسنی (ارثی ایمپراطور) اعلان ایتدیرمش ، فرانمزلر
 ایمپراطوری اوچنجهی ناپولئون عنوانی آلمشدی . آرتق
 بر حکمدارله اداره حکومت قطعياً تأسس ایتمشدی . فقط بو حکومت
 حاکمیت عامه اساسنه مستنددی . آرای عمومیه ایسه اصلا
 موضوع بحث ایدلمه مشدی .

فقط حکومت ایمپراطوریه ، پارلمنتو ایله اداره نك اشکالی
 محافظه ایتمکله برابر اداره مطلقه بیده ایمپراطور ایله ناظر لرینه
 تخصیص ایتدی . کذا اها لیکده حاکمیتی اعلان اولونمش ،
 حتی حاکمیتی حائز بولونان اهالی ، (بله بیسیتلر) واسطه سیله
 ارزومنی اظهار ایلکه دعوت ایدلمشدی . بو مسئله حکومت
 طرفدن موضوع بحث ایدلدیکی ایچون منتخبلره جواب
 تصدیقدن باشقه چاره قلامشدی . - انتخاب ایله تشکیل ایدلمش
 یالکمز بر مجلس واردی . فقط بو مجلس نه رئیسنی انتخاب ایتمک ،
 نه نظامنامه داخلیسنی باقمق ، نه برای تصدیق کندیسنه
 کوندیریلن قانونلری تعدیل ایتمک ، نهده بودجه به قرار ویرمک
 صلاحیتنی حائزدی . چونکه بوتون قاینه نك بودجه سنی یا
 هیئت عمومیه سیله قبول ویا کاملاً رد ایدله جکدی . مذاکراتی یالکمز

رسمی بر مضبطه شکلنده نشر اولوناچق، مدت اجتماعده اوج آی اولاجقدی .

بوتون اهل وطن منتخب اولابیله جکدی . فقط بونلره رهبرک ایتمک وظیفه سی حکومتک عهده سنده ایدی . هر دایره ده حکومت کندی (رسمی نامزد) دینی کوستره جک ، والی ایله قائم مقاملر بوناامزد حقنده رای ویره جکلردی . مخالف نامزدلر ایچون مجادله یه هیچ امکان موجود کندی . چونکه انتخابات ایچون اجتماع عقدی منتخبلرک حقوقه مغایر عدایدیلرک منع ایدلمشدی . اسامی کاغدلرینی سربست سربست طاغیت مق امکان خارچنده ایدی . بو سببدن ۱۸۵۸ دن اعتباراً هر نامزد ایمراطوره اوکجه دن تحریری اولارق بر صداقت یینی تقدیمنه مجبور اولمشدی . - دوائر انتخابیه حکومتک عادی بر امریله و بش سنه مدته ترتیب ایدلمش و اکثریتی رسمی نامزده قازاندر اچق وجه ایله تنظیم اولونمشدی . مثلاً مخالفتله مظنون ایکی شهر ایکی قسه آیرلمشدی . - انتخابات قضا مرکزنده اجرا اولونیور، وایکی کون دوام ایدیوردی . انتخاب قلمی والی طرفندن تعیین اولونیور، انتخاب قابخده قضا قائم مقامی آلوب کوتوریوردی . سیاسی غزته لر الآن موجوددی . فقط حکومت، اهالی یه کمال حریتله اداره کلام ایتمک ایچون غزته لره هیچ امکان بر اقامشدی . یکی بر غزته تاسیس ایتمک ایچون مساعده آلمق لازمدی . بوتون غزته لر طوغرودن طوغروه والی یه تابعدی .

خوشه کیتیمه جک بر مقاله نشر اولونور اولونماز والی غزته یه بر (اخبارنامه) کوندریر ، ایکنجی اخبارنامه دهده غزته (تعطیل) ایدیلیردی . شاید مقاله حقنده تعقیبات قانونیه اجرا اولوناجق ایسه غزته لغو اولونایلیردی . اون درت آی ایچنده (۱۸۵۲ - ۵۳) تمام ۹۱ اخبارنامه کوندرلمشدی . اخبارنامه آلمق ایچون اک اوفاق ایمالر ، اک اهمیتسنر تنقیدلر کافی ایدی . حتی غزته لزدن بری برنجی ناپولئون حقنده انقلابک میسیونه ری دیدیکی ایچون بر اخبارنامه آلمش و بومقاله ایچون «بوتون فرانسه نك سایه سننده نائل سلامت اولدیغندن طولایی کندیسنه منتدار بولوندیغنی واضع قانون بر قهرمان حقنده مغایر حقیقت بر مقاله» دنیلمشدی . دیگر بر غزته یه «شکرلر حقنده کی امرنامه یه دائر آجی بر تنقیدده بولوندیغنی ایچون» اخبارنامه کوندرلمشدی . لوده آقک غزته سی ده «صنعی کوبره لر حقنده آچدیغنی مناقشه قلمیه ، حکومتجه اتخاذا اولونان تدایر تحقیقیه نك اهمیت و نتایجنی خللدار ایتدیکندن و بایعلرک افکارنده بر تردد پیدا ایتسی ممکن اولدیغندن طولایی» اخبارنامه آلمشدی . (آشاغی لووار) غزته لرندن ایکی غزته یه دهده «ذوق سلیم خارجه چیقدقلری ایچون» اخبارنامه کوندرلمشدی .

قانون اساسیده حریت شخصییه اعلان ایدلمشدی . فقط ضابطه بوتون غیرممنونلری نظارت آلتنده بولوندریور ، بونلری اوفاق برشبه اوزرینه توقیف ایتدیریوردی . قومیق

آفتورلردن غراسه ، قهوه لردن برنده کندیسنه قهوه آلتینک کج کتیرلدیکنی کورونجه : « سیواس تپولده کی کجی بوراده ده برشی ایچمک قابل دکل! » دیدیکی ایچون حبس ایدلمشدی . ۱۸۵۸ده ایتالالی اورزینی طرفندن وقوع بولان سوء قصد اوزرینه حکومت ۱۸۴۸ ایله ۱۸۵۱ اره سنده جمهوریت پرور اولق اوزره مظنون اولانلرک بلاحا که توقیف ایدلمسی حقوقی بخش ایتک اوزره مجلس مبعوثانه زورله بر قانون تصدیق ایتدیرمشدی . بو تداییری تطبیق ایچون داخلیه ناظری نصب اولونان جنرال آیناس ، کندی ایالتلرنده کیملر مظنون ایسه بونلرک توقیف ایدلمرینی هر والییه امر ایتمشدی .

ایشته بوتون بو حرکتلریله حکومت مملکته اودرجه حاکم اولیوردی که ۱۸۵۷دن ۱۸۶۳ه قدر انعقادیدن مجلس مبعوثانده مخالف اولارق انجق بش مبعوث چیقاییلمشدی (بشلر) . ناظرلره والیر هیچ قونترولسز اداره امور ایدیوردی . مجلس مبعوثان بونلرک نظارتی آلتنده انتخاب ایدیلور ، غزته لر اونلرک مساعده ایتدکلری شیلردن باشته سنی نشر ایتمیوردی . فقط او چنجی ناپولئون طرفندن تشبث اولونان حربلر سیاست داخلیه بی یاواش یاواش دکیشدیردی . ۱۸۶۰ه قدر ناپولئون رهبانه استناد ایدیور ، رهبانده کویلولره رسمی نامزدلر ایچون رأی ویردیریوردی . فقط ناپولئون پاییه ضد اولق اوزره بر ایتالیا قرالنی وجوده کتیرنجه قاتولیک فرقه سنی

گوچندىردى . او زمان قاتولىك فرقه سى كنىدىسنة مخالف طاورانمغه باشلادى .

ايمپراطور بوفرقه يه قارشى موازنه يى تايمين ايچون معتدل حرىت پرورانك معاوتنه مراجعت ايتدى . ۱۸۵۹ده عفو عمومى ايله مجازات عرفيه يه نهايت وىردى . ۱۸۶۰ دن ۱۸۶۷ يه قدر برچوق مساعدات بخش ايدرك مجلس مبعوثانك صلاحيتنى براز تزويد ، مطبوعات اوزرىنه ايدىلن قونترولى براز تخفيف ايتدى . ايشته اوزمان جمهورىت فرقه سنك ياننده برده پارلمنتواصوله طرفدار مونارشىستلردن مركب مخالف برلىبه رال فرقه وجوده كلشدى . ۱۸۶۹ ده انتخاب اولونان مجلس مبعوثانده پارلمنتواصولنى طلب ايچون وىرىلن بر استدعا يى امضا ايدى جك ۱۱۶ مبعوث چىقايلىدى . بونلر جمهورىت پرور مبعوثلردن قرق مبعوث ايله برلشرك برا كثرىت تشكيل ايدى بيله جكلردى .

اوچنجى ناپولئون راضى اولدى . ۶ ايلول تارىخلى سه نانوس-قونسولت ايله اداره ايمپراطور يه يى پارلمنتو اداره سته تحويل ايتدى . هيئت اداره سنى انتخاب ، نظامنامه داخلى سنى تنظيم ، بودجه يى فصل فصل تصديق ايتك حقى مجلس مبعوثانه كچدى . قايننه مبعوثلر ميانندن انتخاب اولوناييله جك وانكلىز اصولنده تشكيل اولوناجقدى . رياستنى مجلس وكلا رىسى درعهده ايدى جك ومجلس مبعوثانه قارشى مسئول اولاجقدى .

سنا تونك آرتق قانون اساسى محافظلى قالماشدى . شمدى يالكىز

مجلس مبعوثان طرفندن تصدیق اولونان قانونلری تصویبه مامور
 بر اعیان مجلسی اولمشدی . قوه مؤسسه طوغرودن طوغروه
 منتخبلر طرفندن اجرا اولوناجقدی . یکی قانون اساسی ، جمله سنک
 رایلرینه مراجعت اولونمق اوزره منتخبلره تبلیغ ایدلمش
 (۶ مایس ۱۸۷۰) ویدی بحق میلیون رأی ایله تصویب اولونمشدی .
 حاکمیتی مجلس مبعوثانه بخش ایدن بو اداره یه (آمپیر لیه رال ،
 احرارانه ایمپراطورلق) نامی ویرلدی . بو اداره یکی رجال ایله
 ایشه باشلادی . مجلس وکلا رئیس (بشار) دن امیل اولیویه
 ایدی . فقط جمهوریت فرقه سی بوتبدلاتی قبول ایتدی . جمهوریت
 مبعوثلری آرای عمومیه به مراجعتی تصدیق ایتدیلر . حتی (کندیلر یله
 ائتلاف غیر ممکن) اولدیغنی بیان ایتدیلر . بناء علیه فرقه پارس
 سواققرنده غوزالره کیریشه رک اعلان خصومت ایلدی .

۱۸۷۰ جمهوریتی . — ایمپراطورلنک قوتنی وجوده کتیرن ،

اردوسی ایدی . ایمپراطورلق اردویی پروسیایه قارشی حربه
 صوقدی . اردوسنی کاملاً محو ایتدی . اردونک بر قسیمی (میچ) ده
 قاپاندی قالدی . قسم متباقیسی اوچنجی ناپولئونله برابر (سدان) ده
 اسیر اولدی (۲ ایلول ۱۸۷۰) . پارسده کی جمهوریت فرقه سی
 مجلس مبعوثانی اشغال ایتدی (۴ ایلول) . مجلس ده ا ایمپراطورک
 سقوطنه قرار ویرمزدن اول پارس مبعوثلرندن مرکب بر (مدافعه
 ملیه) حکومتی تشکیل ایتدی . دهاصو کرده جمهوریت اعلان
 ایتدی . جمهوریت بوتون مملکت طرفندن بلاممانعت قبول ایدلدی .

(مدافعه مليه) اداره سى پارسده آلمانر طرفندن محاصره ايدلى . بو اداره ائناسنده قيرمزي بايراق طاشيان انقلابچي برسوسيا ليست فرقه سيپه اوغراشمغه لزوم حاصل اولدى . بوفرقه ۳۱ تشرين اول عر بده سنى وقوعه كتيردى . ولايتده اداره امور ، حكومت طرفندن كوندريپلن بر (هيئت مرخصه) يه توديع ايدلى . ايمراطورلق مامورلرينك يرينه جمهوريت پرور مامورلر كتيرلدى . هيئت مرخصه نك الك فعال اعضاسندن قامبه تا ، هم امور اداره يي ، هم ده حربى اداره ايتدى .

پارسك تسليمندن سو كره فرانسزلك (مجلس ملي) انتخاب ايتيرينه مساعده ويرملرى ايجون آلمانرله بر متاركه عقدايدلى . انتخابات ، قضا مركزلرنده اجرا ايدلك اوزره رأى خفى و تعيين اسامى ايله ۱۸۴۸ له ژيسلاوى شكلكنده وقوع بولدى . كويلولر قامبه تانك حاكميتى آلتنده بولونان جمهوريت فرقه سنك (حربيه صوك راده يه قدر) دوام ايدده جكندن شبه نينورلردى . بونك ايجون معتدل جمهوريت پرورلرايله قرال طرفدارلرينك برلشمه سندن حاصل اولان مسالمت طرفدارى نامزدلر حقنده راي ويرديلو . مجلس مليده اكثريتى قرال طرفدارلرى تشكيل ايتدى . (قوه اجرائيه رياستى) نه تى به رى تعيين ايتدى (جمهوريت اسمى قوللانليه رق مخصوص قوه اجرائيه تعبيرى قوللانلدى) .

پارسده سوسيا ليست فرقه سى مجلس ملى نك صلاحيتنى تصديق ايتدى . ۱۸ مارت ۱۸۷۱ ده عصيان ايتدى . يكي شكلكده

(قومون) نامیله براداره تشکیل ایدلدی . بو اداره ، سوسیالیست فرقه‌سی طرفندن احداث ویا تلتقی اولونان سائر اداره لرکی بورژوا صنفه دشمن و تصرفی عمله لرك منافعه اولمق اوزره اصلاحه مخصوص ، انقلاب طرفداري براداره ایدی . فقط تشکیلاتی باشقه ایدی . سوسیالیستلر اوزمانه قدر هپ اصلاحاتی بوتون مملکتده زورله یاپدیره بیله جک درجه ده قوتلی براداره مرکزیه طلب ایلشلردی . ۱۸۷۱ ده ایسه (پرودونک تلامیذندن) اجنبی انقلابچیلرک نفوذی تأثیریه یالکیز قومونلرک (ناحیه لرك) حاکمیت تامه‌سی اعلان اولوندی . هر ناحیه ، اداره‌سی کندی تنظیم ایده جک ، براتحاد وجوده کتیرمک ایچون سائر ناحیه لرله برلشه جکدی (بوسبیدن بونلره متحید نامی ویرلمشدی) . ۱۹ نیسان ۱۸۷۱ تاریخلی پروغرامده : « بر قومونک امتیازی مقاولهیه اشتراک ایدن سائر قومونلرک مساواتاً حائز اولدقلری حق امتیاز ایله تحدید اولونا جق و مذکور مقاولهیه اشتراکده فرانسزلرک اتحادینی تأمین ایلیه جکدر » دینیوردی .

ایشته پارس (قومون) ی بوا ساسه نظراً تشکیل اولوندی . قومون ، منتخب اعضادن مرکب بر مجلس طرفندن اداره اولوناد جقدی . کذا (لیون) ، (مارسیلیا) و ده سائر بویوک شهر لرده ده (قومون) لر تشکیکنه چالیشلدی .

فقط ایالتلر پارسده وقوع بولان انقلابی ایلک دفعه اولارق قبول ایتمک ایسته مدیلر . (ورسای) . نتیجا ایدن حکومت ایله

مجلس ملی بر اردو وجوده کتیردی . بو اردو غاردناسیونالدر طرفندن مدافعه اولونان یارسی محاصره ایدرک جبراً ضبط ایتدی . انقلابچیلرک بر قسیمی قورشونه دیزلدی ، بر قسیمی ده نفی ایدلدی . آرتق قرمزی بایراقلی فرقه انقلاب اجراسنه قالیشمادی . (غاردناسیونال) صورت قطعیهده لغو ایدلدی . اوزمان مجادله، حکمدارله اداره طرفداری اولان اکثریت ایله جمهوریت طرفداری اولان اقلیت بیننده ومجلسده باشلادی . اکثریت ، مجلس ملینک قانون اساسی وجوده کتیرمک ایچون انتخاب اولوندیغنی بیان ایتدی . مجلسک لغوینی متضمن تقریرلر موجود اولدینی حالده ۱۸۷۶ یه قدر مجلس طاغیدلمادی .

۱۸۷۵ قانونه اساسی . — مونارشی طرفداری اولان اکثریت اوچ فرقه‌نک اتحادندن مرکبیدی . انلرده : (اونجی شارلک طورونی وشانبور قوتی بشنجی هازینک طرفداری اولان) له‌ژیتمیستلر ایله (لوتی فیلیپک طورونی وقونت دوپارینک طرفداری اولان) اورله آئیستلر و(اوجنجی ناپولئونک اوغلنه طرفدار اولان) بوناپارتیستلردن عبارتدی . اقلیتی تشکیل ایدن جمهوریت پرورلرده : (صول مرکز) ، (جمهوریت فرقه‌سی) و(رادیقاللر) نامیله اوچ غروپه آیرلشدی . حکومتک طرز اداره‌سی بو فرقه‌لرک تشکیل ایده‌جکلری غروپلره نظراً اولاجقدی . فقط بونلر تمام ایکی‌سنه ترددایتدیلر . صاغ مرکز (اورله آئیستلر) اولاصول مرکزله (جمهوریت

فرقه‌سی ایله) برلشهرک تی بهرک اداره‌سنی حمایه ایتمکه قرار ویردی . بوکا (مرکز لرك اتحاد سیاستی) دنیلیدی . دهاصوکره صاغ مرکز رادیفالردن قورقیدی . چونکه حکومتک رادیفالردن قارشی اودرجه شدتلی حرکت ایتدیکنی، رهبان صنفی لزومی درجده واضح بر صورتده التزام ایلدیکنی بیان ایدیوردی . بونک ایچون اوده مونارشی طرفداری اولان فرقه‌لرله برلشهرک قاینه علمنده رأی ویردی . تی بهر قوه اجرائیه رئیس قالمای ارزو ایتدیکی ایچون استعفا سنی ویردی (۲۴ مایس ۱۸۷۳) . اداره حکومت (صاغ لرتحادی) نه کچه لرك ۱۸۷۶ یه قدر بونلرده قالدی .

مجلس ملی بر قانون اساسی تنظیم ایده جکدی . صاغ لرت ایسه مونارشی بی تأسیس ایتمک ایسته‌دیلر . قونت دویاری ، قونت دوشانبورک فرانسه قرالغنی تصدیق ایتدی . بونک اوزرینه له‌ژی تی میست فرقه‌سی ایله اورله آنیست فرقه‌سی (امتراج) ایتدی . فقط کندیسنه اکثریت طرفندن حکمدارلق بخش ایدیلن قونت دوشانبور تکرار بیاض بایراق استعمالی طلب ایدنجه مسئله‌نک حلی عدیم‌الامکان بر حاله کلدی (۲۷ تشرین اول ۱۸۷۳) .

حکمدارله اداره تأسس ایده مینجه ، اکثریت یدی سنه مدتله (سه‌ت آنا) بر قوه اجرائیه رئیسکی احداث ایتدی . دها صوکرده قانون اساسی بی قلمه آلمغه باشلادی . اکثریت جمهوریت

شكلی قبول ایتك ایسته میوردی . فقط اوزون اوزادی مناقشاتدن صوکره صاغ سرگذدن آریلان اوفاق بر غروپ جمهوریت پرورلره برلشدی . اکثریت آرایله قانون اساسیده تعدیلات اجراسنه موفق اولدی . (رئیس جمهور) تعبیری ده بو تعدیلات میاننده ایدی . ایسته بوضورتله قانون اساسی ، فرانسه نك شکل اداره سی جمهوریت اولدیغی بالواسطه تأسیس ایتش اولدی .

۱۸۷۵ تشکیلاتی پارلمنتویه مالک و حکمدارله اداره اولونان مملکتله تقلید ایدلدی . رئیس جمهور پارلمنتو طرفندن یدی سنه مدتله انتخاب اولوناجق ، مشروطی بر قرال وظیفه سی ایفا ایدمک ، ناظرلرینی کندی انتخاب ایلجه جکدی . قاینه مجلس تشکیل ایدمک مذاکره ایدمک و مجلس مبعوثانه قارشی متقابلاً مسئول اولاجقدی . یعنی ناظرلر مجلس مبعوثان طرفندن اقلیته تنزیل ایدیلر ایدلر هپ برلکده چکیله جکلردی . رئیس جمهور مجلس مبعوثانی طاغیدابیلجه جک ، فقط بو ، سناتونک موافقتیله اولاجقدی .

قوه حکومت ایکی مجلسک آئنده ایدی : مجلس مبعوثان و اعیان . بونلرک تکمیل اعضاسنه یومیه ۲۵ فرانق معاش و یریله جکدی . مجلس مبعوثان ، هر دائره ده خفی بر صورتده و آرای عمومیله (۱۸۸۵ دن ۱۸۸۹ قدر تعیین اساسی ایله) انتخاب اولوندی . مجلسک وظیفه سی قانون تنظیم ایتک و بودجه تصدیق

ایلیکدی . - ۳۰۰ عضادن مرکب اولان اعیان ایکی قسمدن عبارتدی . اعضانک ۲۲۵ی (بلدییه مجلسلری اعضاسی، مبعوثلر، مشاور عمو میلر و دواتر مشاورلری کی مرکز ایالنده طوبالانان ذواتدن مرکب) سناتو منتخبلری ، ۷۵ی ده اولا مجلس ، بعده قونفره طرفندن انتخاب اولونوردی . ۲۲۵ اعضانک هر سنه ثلثی تجدید اولونور ، ۷۵ی ده قیدحیات شرطیله انتخاب ایدیلیردی . مجلس مبعوثانک وظیفه سی نه ایسه اعیانک وظیفه سی - ده اونک عینی ایدی . یعنی قانونلری و بودجه یی تصدیق ایله مکدی . فقط بودجه نک اولا مجلس مبعوثاندن کچمسی لازمدی . قاینه انجق اعیانک رأی ایله سقوت ایده بیله جکدی . ده ا طوغروسی قوه حکومت مجلس مبعوثانک آنده ایدی . چونکه ناظرلر مجلس مبعوثانه تابعدی . هر مبعوث ویا اعیان ، تعدیلات ویا قانون لایحه سی تکلیف ایتمک ، حکومتدن استیضاحده بولونمق حقنی حاتردی .

مجلس مبعوثان ایله رئیس بیننده اختلاف ظهور ایدرسه حکم وظیفه سنی اعیان کوره جکدی . چونکه اعیان ، رئیسک طلبی اوزرینه مجلس مبعوثانی طاعتیمق حقنی حاتردی . پارلمنتو ایله قاینه پارس خلقنک تاثیرندن اوزاق بولونمق ایچون (ورسای) ده انمقاد ایده جکدی . فقط جمهوریت فرقه سی بونلری پارسده بولونیدردی .

هرایکی مجلسجه ائتلاف حاصل اولمادجه قانون اساسی تعدیل

ایدیلەمبەجکدی. بونک ایچون دە «قوانین مشروطیتک تعدیلنە لزوم اولدیغنه دائرە» ھرایکی مجلسک آیری آیری قرار ویرملری لازمدی. قانون اساسی دە انجیق (قونفرە) واسطەسەیلە یعنی اعیان ایلە مبعوثان ھپ برانشەرك تعدیل ایدیلەبیلەجکدی .

۱۸۷۵ قانون اساسیسی ایلە احداث اولونان طرز ادارە، احرارانە مونارشیرک پارلمنتواصولنی دەموقراتیک اولمش بر مملکتە تطبیق دیمکدی .

ھپارلمنتو ادارەسندە اولدینی کبی بوندە دە اوچ قوت واردی: قوۋە اجرائیە رئیس قرال مقامنە قائم اولاجق ، ناظرلری انتخاب ایدەجک ، مجلسی طاغیتمق صلاحیتنی حائز بولوناجقدی . قوۋە حاکمە، ایکی مجلسدن ترکبایدن پارلمنتونک ائندە ایدی. قانونلری تنظیم و بودجەیی تصدیق پارلمنتویە عائددی . سیاستی طوغرودن طوغرویە ملت طرفندن انتخاب اولونان مجلس ادارە ایدەجکدی. قاینە مجلس مبعوثانە قارشى متقابلاً مسئولدی . فقط حاکمیت تامە اساسنە مستند دەھاسائتر احداثاتە دە لزوم واردی .

انلردە شوندن عبارتدی :

اولا — قوۋە اجرائیە ریاستی ارثی اولامبەجنى ایچون قوۋە اجرائیە رئیسنى پارلمنتو یدی سنەمدتلە انتخاب ایدەجکدی؛

ثانیاً — مجلس مبعوثانی طاغیتمق حقنى بالکمز رئیسە ویرمک ایستئلەمش، رئیسک بو حقه سناتوایلە برابر مالک اولماسنە قرار ویرلمشدی ؛

ثالثاً — مجلس مبعوثان یالکز امتیازلی منتخبلر طرفندن دکل،
 بوتون اهل وطن طرفندن انتخاب اولونا جقدی؛

رابعاً — هر کسک مبعوث اولایلمسی ایچون پارلمنتو
 اعضاسنه معاش اعطاسی قرار لاشدیرلمشدی؛

خامساً -- آریستوقراسی به مخصوص عالی بر مجلس احدائی
 ممکن اولمادینی ایچون سنانو، بر مجلس اولوق صفتیه، منتخب بر مجلس
 عدایدلمشدی. مبعوثلر اهالی پی، اعیانده اراضی پی تمثیل
 ایده جکدی. غامبه تا: « اعیان مجلسی فرانسه قومونلرینک
 الک بویوک مجلسیدر » دیوردی.

سادساً — اعیان مجلسنه لوردلر مجلسندن دهامتعدی بروظیفه
 ویرلمشدی. اعیان یالکز مجلس مبعوثانی قوتتول ایتمیه جک،
 انی تضعیفده ایده جکدی. کذا، لوردلر قاماره سندن فضله اولارق،
 بودجه پی تصدیق ایتمک و مجلس مبعوثانی طاغیتمق حقنهده
 مالکدی.

بناءً علیه شکل اداره پارلمنتو ایله اداره اولونور برمونارشی
 شکلی ایدی. بوشکل، مملکتک اداره سنی حاکمیت عامه اساسنه
 مستند بر مجلسله تأمین ایدیوردی.

اون ايکنجی فصل

۱۸۴۸ دن اعتباراً آوروپاده تبدلات

ملیتہ . — حاکمیتک ملتہدہ بولونامی قاعدہ سی ، اسکی مشروطیت نظر بہ سنک یانندہ بردہ یکی بر (ملیت) نظریہ سی وجودہ کتیردی . مادامکہ کنندینی ادارہ ایتک حتی یالکز بلتہ عائدی ، او حالده ملت اجنبیلرک ادارہ سی آلتندہ بولونامی ویا اجنبی بر ملتہ الحاق اولونامی ده طلب ایدہ بیلیردی . کذا ملت ، برچوق ادارہ لرہ آیرلامی ده آرزو ایدہ بیلیردی . هرملت مستقل بر حکومت تشکیل ایدہ جک ، و بر ملتک کافہ اقسامی یالکز بر حکومت حالندہ طویلانا جقدی ؛ ایشته (ملیت قاعدہ سی) نک اساسی بوندن عبارتدی .

اون طقوزنجی عصرہ کانیجیہ قدر بوقاعدہ ہیج نظر اعتبارہ آلمانمشدی . حکومتلر وراثتہ و فتوحاتہ تابع اولارق تشکیل ایدلمش ؛ لساناً ، عرفاً ، اخلاقاً مختلف اقوامی بریرہ طویلامغہ ویا خود بر قومی پارچه پارچه آیرمغہ ہیج اہمیت ویرلمشدی . ۱۸۱۴ ده ویانہ قونفرہ سندہدہ بو صورتلہ حرکت ایدلمشدی . حکومتلر بینندہ وقوع بولاجق مبادلاتدہ یالکز (نفوسلر) نظر اعتبارہ آلیردی . مملکتک ثروتی ایلہ اہالیسنک مقدارندن

باشقه بر شی نظر اعتباره آلمانزادی . بونک ایچون اوروپاده بر چوق اجنبی ملتردن و یاخود (دولت عثمانیه ، پروسیا و آوستریاده اولدینی کبی) بر برینه دشمن ، (آلمانیا وایتالیاده اولدینی کبی) بر قاج حکومتہ انقسام ایتمش ملتردن مرکب حکومتلر واردی .

رہستوراسیوندن آز بر زمان صوکرہ وطنپرورلر حکومتلر علیہندہ قیام ایتمکہ باشلامشردی . (دولت عثمانیه و آوستریاده اولدینی کبی) هانکی حکومتده اوافق بر ملت بویوک بر حکومتہ الحاق ایدلش ایسه وطنپرورلر اوراده کندیلرینی اداره ایدن حکومتدن او اوافق ملتی آیرمغه چالیشیرلردی . بالعکس (آلمانیا وایتالیاده اولدینی کبی) بویوک بر ملتک اوافق اوافق حکومتلرہ انقسام ایتمدیکی یرلرده ده وطنپرورلر او اوافق حکومتلری بر ملت حالنه کتیرمک ایچون برلشدیرمکہ غیرت ایدرلردی . بناء علیہ بو حرکت بعضاً عکس تأثیر حاصل ایدر ، بعضاً افتراقه ، بعضاًده اتحادہ بلدی اولوردی . بونلردن بعضلری (آزادی) ، بعضلریده (اتحاد) طلب ایدرلردی .

بو فعالیت همان هر مملکتده وقوعه کلدی . یونانیلرہ صربلری ، رومه نلرہ بلغارلری حکومت عثمانیه دن ؛ مجارستان ، بوهیمیا ، لومباردیا و خرواستانی آوستریادن ؛ ایرلاندانی انکلترہ دن ؛ بلجیقایی فلمنکدن ؛ پولونیایی روسیه دن آیرمق ایچون چالیشلدی . آلمانیا ایله ایتالیا اتحادینی وجوده

کتیرمک ایچون اوغراشیددی. یالکز اسپانیا ایله فرانسه ده اتحاد ذاتاً حاصل اولمش بولوندینی ایچون بوراده اوله بر فعالیت وقوعه کلدی .

ملیت طرفدارلرینک قاعده عمومیه سی شو ایدی : هر حکومت بر ملته قلب اولمالیدر. فقط بوملتن مقصد نه در ؟ ایشته بو نقطه نظر دن اوروپاده ایکی مسلک وجوده کلدی . بومسلک لردن برینه کوره ملت، عین حکومته اشتراک ایتمک ایستین انسانلرک هیئت مجموعه سندن عبارتدی . بناء علیه هانکی ملته تابع اولاجغنی قرارلاشدیرمق او مملکتک اهالیسنه قالمش دیمکدی . ملت انجق اعضاسنک مرام و ارزوسی ایله اثبات موجودیت ایده بيله جکدی . دیگر مسلک اربانجه ، ملت عرقاً تشکل ایدر و انسانلرک مرام و ارزوسنه غیر تابعدر . عین عرقه منسوب کیمسه لر، حتی ارزو بيله ایتمش اولماسه لر، ینه بر یره کلیدر لر . - اختیاری ملیت نظریه سنی بالخاصه فرانسزلر التزام ایدیوردی . فرانسه ۱۸۶۱ ده بو نظریه یی تطبیق ایتمش ، (صاووا) ایله (یس) قوتلغنی الحاق ایتمزدن اول اهالینک راینه مراجعت ایلشدی . عرق نظریه سنه اک زیاده آلمانیا و روسیه ده طرفدار بولونیوردی . جرمن عرقه منسوب اقوامی بر یره طوبلامق ایسته ینلره (پان جرمانیست ، جرمان اتحادی طرفداری) ، اسلاو اقوامنی بر یره طوبلامق ایسته ینلره ده (پان سلاویست ، اسلاو اتحادی طرفداری)

دنیلیدی. آلمانیا حکومتی جرمن عرقه منسوب دیبه آژاسلیلری
 ارزولری خلافه الحاق ایدرک بو نظریه یی تطبیق ایتدی .
 ۱۸۷۷ ده وقوع بولان حرب ائناسنده روسلر ، اسلاو
 اولدقلری حالده اسلاولره قارشى محاربه ایتدیلر دیبه رک
 تورکیه خدمتنده بولونان پولونیا لیلری خائن صفتیله اعدام
 ایتدیردی . بوکون عرق نظریه سی هان متروک کیدر . حتی
 بالقان اقوامنک حکومتلر وجوده کتیرملرینه روسیه بالذات
 یاردم ایتمکده در .

هان هر طرفده ملیت فرقه سی احرار فرقه سیله برلشهرک
 حکومتله مجادله ایتمش ، اوصورتله که بوتون حرکات هم ملی ،
 همده مشروطی اولمشدر . بو حال یارم عصر دوام ایدرک مختلف
 شکله کیره کیرمشدر . کاه (یونانستان ، لومباردیا ، بلجیقا ،
 پولونیا ، ایرلندا و مجارستانده اولدینی کبی) مشوقلر عصیان
 ایتمشلر ؛ کاه (بوهمیا ، مجارستان ، خروواتستان و ایرلانداده
 اولدینی کبی) مبعوثان مجلسلرنده مخالف طرفی التزام ایتمشلر ؛
 کاه اتحادی وجوده کتیرمک ایچون اولدجه قوتلی بر حکومتلر
 یاردیمه مراجعت ایتمشلردر .

هان هر طرفده ملیت فرقه سی غلبه ایتمشدر . بو غلبه
 صربستان ، یونانستان و بلجیقاده عصیانله ؛ رومانیا ، بلغارستان
 و لومباردیاده اجنبی یاردیمی ایله ؛ آوستریا ممالکنده حکومتلر
 ائتلاف عقد ایدرک ؛ ایتالیا و آلمانیا ده ساردنیا و پروسیا

قرالنی اطرافندہ برلشیلہ رک تا مین ایدلمشدر . یالکز بولونیا ایلہ ایرلاندا کنڈیلرینی خلاصہ موفق اولاماد قلدنن الان چیر پئمقدمہ درلر .
ایتالیانہ اتحادیہ نسطی . — ۱۸۱۵ دە ایتالیا انقلابدن اول نہ حالده ایدیسہ و فرانسه کنڈیسنی اولجہ نصل بر حالدن قور تار مش ایدیسہ ینہ او حالہ گرفتار اولمشدی .

بوتون ایتالیا یدی اوفاق حکومتہ آیرلمشدی : شمالده ساردنیا قرالنی ایلہ لومباردیا — ونڈیک قرالنی ؛ مرکزده (پارم) ، (مودن) و (طوسقانا) دوقہ لقلریلہ پاپانک حکومتی ؛ جنوبده ناپولی قرالنی . حتی (ناپوائون طرفندن شمالده کی بویوک قراللقہ ویریلن) قراللق نامی بیلہ اور تادن قالمشدی . کنڈیسنہ ایتالیا دن بحث اولونڈینی زمان مہ تہ رنیشخ : « بو ، تعبیرات جغرافیہ دندر . » دیردی .

ایتالیادہ کی اوفاق حکومتلرک کافہ سی حکمدارلرک ناظرلری طرفندن (صورت مستبدانہ دہ) اداره اولونور ، ظالمانہ بر ہیئت ضابطہ یہ تابع بر رادارہء مطلقہ دن عبارتدی . پایا (انکیزیسون) تاسیس ایتمش ، بوتون جمعیتلری منع ایدیور ، اجنبی کتابلری اوقوتدیر میوردی . حتی فرانسزلرک آثاریدر دینہ روما شہرینک تنویراتی بیلہ قالدیرلمشدی . ساردنیا قرالنی سانسورلک تاسیس ایتمش ، (قانون اساسی) کلہ سنی بیلہ یازدیر میور ، کایسانک آفوروزایتدیکی مأمورلری عزل ایدیور ، دارالفنونلری ترصد آلتندہ بولونڈیر میوردی . حتی (تورہن) دە فرانسزلر طرفندن

احداث اولونان نباتات باغچه‌سنی بیله تخریب ایتدیرمشدی . ناپولی اسکی سیجلیا قانون اساسیسی لغو ایتمش ، لومباردیا نظامنه مغایر یعنی احرارانه هیچ بر نظام وضع ایتیمه جکئی آوستریا به وعد ایلمشدی . بناء علیه ایتالیا اداره مطلقه آلتنده یاشایوردی . استبداد ایسه ایتالیا به سکونت بیله تأمین ایدمه میور ، هله جنوب و مرکز حکومتی سابقه سابقه کروهنی انقیاد آلتنه آلامیوردی . ده طوغروسوی ناپولی قراللی ایله پاپا حکومتی حیدود لرله مالی ایدی . ۱۸۱۷ ده (ناپولی) ده ۳۰۰۰۰ حیدود واردی . پاپا حکومتنده ۵۷ باش کسيلمشدی . ایتالیا نیک شمالنده میلان ایله اسکی ونديک اراضیسی ایله وجوده کلن (لومباردیا - ونديک) حکومتی آوستریا به تابعدی . بورا به مأمور لری و عسکر لری هپ آوستریا کوندر یردی . اوچ دو قه لغه بالواسطه آوستریا حکومتی تحکم ایدردی . بو اوچ دو قه لنگ پر نسلری هپ آوستریالی ایدی . کذاتبعه لرینک عصیان لرینه قارشى ناپولی قرالی ایله پایایی ده حمایه ایدردی . همان آزقالدی بوتون ایتالیا پر نسلرینی هیئت متحده حالنده طوپا لایوب جمله سنی کندی اداره ایدمه جکدی . ده طوغروسوی ایتالیا ، اجنبی تابعیتنده بولونیوردی . بو حال ۱۸۴۸ . قدر دوام ایتدی . جوار قومشولره تقلیداً ایکی دفعه عصیان تشبثی واقع اولدی . ۱۸۲۰ ده ضابطان اسپانیولره تقلید ایدرک ناپولی و ساردنیا قراللی قانون اساسی اعلاننه مجبور ایتمک ایسته دیلر (ناپولی قرالی اسپانیول قانون اساسیسی قبول ایتدی) . ۱۸۳۱ ده احرار ، فرانسرله تقلید

ایده رک یایا ایله طوسقانا ومودن دوقه لرینی براداره احرارانه تاسیسنه اجبار ایلدیلر . فقط بو حرکت یالکزر برقسمنده وقوعه کلدی . هر دغه سنده آوستریا اردولری کلوب اداره مطلقه یی تاسیس ایئدیلر .

ایتالیا انقلا بچیلرندن فرانسه یه التجا ایدن ماززینی بوتون اوروپاده کی اداره مطلقه لری آلت اوست ایتک ، هر قومی مستقل برجهوریت حالنه کتیره رک سائر جمهوریتلری اخوت واسطه سیله برلشدیرمک ایچون خفی بر جمعیت تاسیس ایتدی . ماززینی نک دستوری شوندن عبارتدی : « حریت ، مساوات ، انسانیت ؛ برالله ، بر حکمدار ، قانون ربانی » . بوجعته (کنج آوروپا) نامی ویرلدی . بوجعته هر قوم برشعبه تشکیل ایدیوردی : کنج ایتالیا ، کنج پولونیا ، کنج آلمانیا الخ کبی . ۱۸۳۱ ده تشکیل اولونان (کنج ایتالیا) طرفدارلری بالخاصه (جنوه) و (روما) ده بولونیورلردی . کنج ایتالیا ، فساد جمعیتلری و عریده لرله ۱۸۴۴ و ۱۸۴۵ ده کندینی تمامیله طایتدی . مقصدی بوتون ایتالیایی جمهوریت حالنده طوبلامقدی .

۱۸۴۳ . طوغرو محررلر آره سنده باشقه بر حرکت نمایان اولدی . ایتالیانلر بوکا (بعث بعدالموت ، ری زورزی مه نطو) نامی ویردیلر . بو حرکتدن مقصد ایتالیاه احرارانه براداره بخش ایدرک ایتالیایی سفالت واغتشاشدن قورنارمق ، آوستریالیلردن چکوب اجنبی تحکمندن خلاص ایلمکدی . بو حرکتی تمثیل ایدنلردن

بالبو ، ماقسیم دازہ غلی بو ، دوران دو و جی یو بہرتی (۱) ایتالیا پرنسلیرنی سقوط ایتدیرمکی ہیج عقللرینہ کتیرمیورلر ، بالعکس پرنسلیرہ مراجعت ایدیورلر ، معتلرندہ کی اہالی یہ قانون اساسی بخش ایتلرینی ، برایتالیان ملتی وجودہ کتیرمک ایچون یکدیگریلہ برلشملرینی استرحام ایلدیورلر ، ایتالیا نیک مشروطی و مونارشیک حکومتلرینیندہ برہیت متحدہ شکلی آلماسنی آرزو ایدیورلردی .

یومی و احرارانہ حرکانہ اوچ حکمدار قانع اولابیلدی .

انارده : ساردنیا قرالی و طوسقانا دو قہسی ایلہ ۱۸۴۶ ده انتخاب اولونان پاپا طقوزنجی پی ایدی . ۱۸۴۷ ده دو قہ ایلہ پاپا ، تبعہلرینہ سانسورلنکک تخفیفی ، فاردناسیونالر تشکیلی و قانونلری اصلاحہ مأمور شورای دولتلر تأسیسی ایچون مساعده ایتدیلر . ہراوچ حکمدار ، حکومتلری بیندہ کمرک اتحادی تأسیس ایتک ایچون معاہدہ عقد ایلدیلر . آوستریادہ بوکا قارشی (بارم) و (مودن) دو قہلریلہ اتحاد ایدرک مقابله ایتدی .

آرتق ایتالیا حکومتلری ایکی فرقہ یہ آیرلشدی . بری آوستریا فرقہ سی ، دیگریدہ ملی فرقہ ایدی . ملی فرقہ یہ منسوب

(۱) بوفر قہ نیک سیاسی اثرلری بروجہ آتیدر: جی یو بہرتی ، ایتالیا نلرک فائیت اخلاقہ و ملکیتلری (۱۸۴۳) . عصر حاضر ژہ زویتی (۱۸۴۴) بالبو ، ایتالیا نیک امیدلری (۱۸۴۴) . - دازہ غلی بو ، صوک رومانخی وقایعی (۱۸۴۶) دوران دو ، ملی ایتالیا . - ۱۸۴۷ ده تأسیس ایتدکاری غزتہ لردہ: فلورانسہ دہ (فجر) ، تورہ ندہ (بعث بعد الموت) ایدی .

پرنسپر اجنپیلری طرد ایتمک خصوصنده کی ارزولرینی صاقلان-
میورلردی . اوصره لرده ایٹالیانلر باشقه بر حکومتک معاوتنه
محتاج اولمان آوستریالیلری یالکز باشلرینه دفع ایده جکلرینی
امید ایدیورلردی . ساردنیا قرالی شارل آلبر ، دازمغلی بو
ایله کوروشدیکی صرمده دازمغلی بو ایٹالیانک نه صورتله
قورتاریلابیله چکنی سئوال ایتمش ، بونک اوزرینه قرال :
«ایٹالیا کنندی کندینی قورتاراجق!» دیمشدی .

۱۸۴۸ ده اداره احرارانه بوتون حکومتلرده بردنبره
تأسس ایتمدی . کانون ثانیده ناپولی قرالغنده پارله مو احرارینک
عصیانای ایله ، شباطده ساردنیاده ، طوسقانای ایله کلیسا
حکومتنده پرنسپرک آرزوسیمله مارتده اعلان اولوندی .
بو حکومتلرک دردنده حکمدار قانون اساسی اعلان ایتمدی .
دردی ده اجنپیلری چیقارمق ایچون اتفاق ایتمدی . اوزمان
آوستریا حکومتی ۱۸۴۸ انقلابی ایله بوزولمش ، بوتون اهلینک
عصیانیه مشغول بولونیوردی .

فرصت تام کوزم دلمش کییدی . حتی قونت قاوور (تورمن)
غزته لرندن برنده شو مطالعهده بولونیوردی : « آرتق صاووا
حکمدارلغنک دوری ، جسورانه قرارلر ویرمک زمانی کلدی .
قرالغک موجودیتی ایشته بودملرمتابمدر . قلبک احتساساتندن
زیاده عقلک ارشاداتنه تابع اولان بزلیر کی محاکمه ساکتانه
اربابی ، آرتق ملت ، حکومت و قرال نامنه آچیقندن آچینه حرب ،

ہمان شمعی حرب اعلان ایڈیورزہ .

بو حرب آوستریاہہ قارشى ملی بر حرب اولدی . لومباردیا۔
ونڈیک قرالغندہ کی ایٹالیانلر عصیان آیتدی . ساردنیا عسکری
آوستریالیلر طرفدن تخلیه اولونان لومباردیایی کاملاً اشغال ایلدی .
اهالی رأى عمومی طویلادی . لومباردیانک ساردنیا قرالغنه
الحاقی ۵۶۰,۰۰۰ رأى ایله طلب ایلدی . ونڈیکده عصیان
ایدن اهالی جمهوریت اعلان آیتدی . صوکرہ ۱۲۷ مبعوثدن
مرکب بر مجلس ، الحاق طلبنده بولوندی .

آوستریا اردوسی ونڈیکی ایٹالیانک قسم متباقیسندن آیرمق
اوزره (مانطو) ، (لوغناغو) ، (پهسچی بهرا) و (وہرون) کبی
درت قلعه ایله وجوده کتیریلان (ذواربعه الاضلاع) ده و قرالغک
تام اورتاسنده اجتماع آیتمشدی .

فقط آوستریالیلرک قوتنه قارشى مقاومت ایچون ایٹالیا
اردولری کافی کلیوردی . کذا ایٹالیانلر هپ برلکده حرکت
آیتمکده ایستہ میورلردی . اجانبی طرد ایچون برلہ شن
ایٹالیانلر ایٹالیایی تنسیق خصوصنده بر درلو برلشہ مدیلر .
حکمدارله اداره طرفداری احرار ، پرنسلا ارہ سنده بر ہیئت
متحدہ تشکیلی ارزو ایڈیورلردی . ماززینی طرفداری اولان
جمهوریت پرورلرده بر ایٹالیا جمهوریتی وجوده کتیرمک ایچون
بوتون ایٹالیانلر طرفدن انتخاب اولوناجق بر مجلس ملی طلب
ایلیورلردی . حکمدارله اداره و ہیئت متحدہ طرفداری اولان

فرقه، شمالده ساردنیا عسکری طرفندن حمایه اولوندینی ایچون غلبه ایتدی . بونک اوزرینه اتحاد و جمهوریت طرفدارلری مرکز طرفلرینی اشغال ایتدی . پاپانک تبعهسی طرفندن انتخاب اولونان مجلس مؤسسان روما جمهوریتنی اعلان ایتدی (شباط ۱۸۴۹) . اداره حکومتی (مازینی و غاریبالدی کبی) تریوم ویزلرک آلینه تودیع ایلدی . طوسقانا دوقه لنی جمهوریت حالنده تنسیق ایلدی .

جنوبدهده اداره مطلقه طرفدارلری غلبه ایتدی . ناپولی قرالی قانون اساسی یی لغو ایدرک سیجلیایی جبراً ضبط ایلدی . (مسینا) یی بومباردمان ایدرک احرارلری کورمک جزاسنه محکوم ایتدی (بوسبیدن کندیسنه (قرال بومبا) نامی ویرلدی) .

شمال و مرکز طرفلرده ملیت و احرار فرقه سنه قارشی محاربه ایتک ایچون اجنبی اردولری مداخله ایتدی . انقلابدن دوچار دهشت اولان پاپا درحال مطلقیت طرفداری اولدی . اوروپانک قاتولیک حکومتلرینی جمهوریتلره قارشی حرکت ایتک اوزرینه امدادینه چاغیردی . ناپولی قرالی ایله فرانسه ، اسپانیا و آوستریا حکومتلری اردولرینی کوندردی . فرانسه اردوسی (روما) یی محاصره ایتدی . آوستریالیلر (رومانی) یی اشغال ایلدی . پاپا حکومتنده اداره سابقه تاسیس ایلدی .

آوستریالیلره قارشی تک باشنه قالان ساردنیا قرالی ۱۸۴۸ دن صوکره (لومباردیا) دن طرد ایلدی . ۱۸۴۹ ده آوستریا بحارلره

قارشی محاربه ایله . مشغول ایکن سار دنیا قرالی ده بوراپی تکرار
آلق ایسته دی . اردوسی (نووار) ده طارما طاغین اولونجه بوندن
واز کچدی . ونیدک یالکز باشنه قالارق ۱۸۴۹ آغستوسنه
قدر مدافعه ده بولوندی .

آوستریالیلرله مطلقیت طرفدارلری غلبه ایدنجه ۱۸۱۵ ده کی
اداره نك عینی بر اداره تاسیس ایتدیله . احرار طارما طاغین
ایدلی . اوصرم لرده دازم غلی یو شو سـ طرلری یازیوردی :
« آرتق شوساعتده هرشی بیتدی . هیچ بر فرصت امید ایتمدن
بوتون حیاتی یالکز بر فکرک حصولنه وقف ایتمک ، صوکرده ده
بوتون بو مباتی تصـ وراتک بر کونده محو اولدیغنی کورمک !
آرتق بویله ضرب لردن صوکره حیاتک ظواهرندن باشقه برشی
قالماز . . . شم دیک نه یاپیلاجغنی بر درلو کس دیره میورم .
توقف ایدینجه قدر کردابک اعماقنه قدر یوارلانوب صوکره کندیغنی
طوبلامقدن باشقه چاره یوق . کندیغنی طوبلاینجه ینه باشلا .
مالی یز . فقط بونک ثمراتی اقتطاف ایتمک بکا قسمت اولمایه جق .»
مع مافیه ۱۸۴۸ حرکاتندن یالکز بر نتیجه قالمش اولیوردی که
اوده ۱۸۴۸ شباطنده شارل آلبر طرفندن سار دنیا قراللقنه
ویرین (ستاتو) ایدی . بو ستاتو سار دنیا بلیچقا اداره سنه
مشابه بر پارلمنتو اداره سی تاسیس ایدیوردی . بو اداره ده
مسئول بر قاینه ، بر سناتو (اعیان) ، حق انتخاب رسمی ویرن
منتخب ل طرفندن انتخاب اولونور و قوانین ایله بودجه یی تصدیقه

مأمور بر مجلس مبعوثان ایله حریت مطبوعاتدن عبارتدی .
 اوستریا حکومتی ، بو سناتویی لغو ایتدیکی تقدیرده یکی قرال
 ویقتور امانوئهله اک مساعد شرائط صلحیه یی وعدایدیوردی .
 فقط قرال بونی رد ایتدی . ساردنیا قرالنی بوتون ایتالیاده
 حر و مشروطی بر حکومت اولارق قالدی . عین زمانده تام
 ایتالیان بر حکومتدی . امانوئهله ۱۸۴۸ ده ملیت فرقه سی طرفندن
 قوللانیلان (یشیل، بیاض، قرمزی) اوج رنگلی بیراغی ابقا
 ایتدی . حرکات ملیه رؤساسندن دازه غلی یوپی باش وکیل تعیین
 ایلدی . کندیسنه التجا ایدن بوتون ایتالیا وطنپرورلرینی قبول
 ایتدی . آرتق اوتاریخندن اعتباراً ایتالیاده حر و ملی بر حکومت
 واردی . بوتون احرار و وطنپرورلر بو حکومت اطرافنده
 طوپلانا بیلرلردی .

۱۸۴۸ موقیتسنز لکی برتجر به مقامنه قائم اولمشدی . ایتالیانلر
 ائتلافده قصور ایتدکری ویالکوز باشلرینه حرکت ایتک ارزو
 ایلدکری ایچون موفق اولامامشردی .

بناء علیه مشترک بر حرکت حاضر لاق، اجنبی حکومتلردن
 برینک معاوتنی جلب ایلک لازمدی . ایشته بو وظیفه یی ۱۸۵۰ ده
 ساردنیا باش وکیلی قونت قاوور ایفا ایتدی . قاوور، پیه مون
 زادکانندن، همان یاری ایتالیاندی . فرانسه زجه ایله پیه موننت لسانندن
 باشقه لسان بیلیمزدی . قاوور طوپجی ضابطلکی ایتدکن صکره
 بالذات قاز ائمش اولدینی مالکانه یه چکلمشدی . بعده فرانسه یه

سیاحت ایتمش ، اورادہ حکومت احرارانہ یہ مفتون اولمش ، انکلترہ دہ ایسہ سربستی مبادلہ طرفدارانی خوشنہ کیتمشدی . قاوور ۱۸۴۸ دہ جمہوریتدن نفرت ایتدیکی ایچون محافظہ کار عدایدلشدی . فقط ۱۸۵۰ دن اعتباراً دازہ غلی بو قاینہ سنی دوشورمک ایچون صول مرکزله برلشدی . صول مرکزدن تشکیل اولونان یکی قاینہ (قاینہ نک ایلک رئیس راطاززی ایدی) برصرہ اصلاحات اجرا ایتدی . ۱۸۵۰ دہ کلیسا محکمہ لرینی لغو ایلدی . ۱۸۵۵ دہ ۳۰۰ مناستر استملاک ایتدی (یالکنز بووافق قرالقدہ ۴۱ بسقیوس ، ۱۴۱۷ پاپاس ، ۱۴۰۰۰ راہب واردی) . کذابردہ باقہ احداث ایدرک تجارت معاہدہ لری عقد ایتدی . اردوینی پروسیا اردوسی طرزندہ تنسیق ایلدی . ایتالیا وطنپرورلری آرتق یاواش یاواش ساردنیا قرالنی اطرافندہ طوپالانیورلردی . حتی اسکی ونڈیک رئیس جمہوری اولوب پارسہ التجا ایدن مانہن ، آرتق اودرجه ظالمانہ اولمیان آوستریا کیتنہ انقیاد ایتسنی کندیسنہ تکلیف ایدن انکلیز رجال حکومتندن برینہ ۱۸۵۴ دہ یازدینی برمکتوبدہ : « برملت ایچون اجنبی تحکمنہ انقیاد ایتمک آلاقلقدر . بز آوستریادن ملایمتکارانہ برادارہ ایستہ میورز ، دفع اولوب کیتمسنی آرزو ایدییورز » دبیہ یازدی . مانہن ، جمہوریتک آرتق امکان خارچندہ اولدیغنی ، ساردنیا قرالک بوکاراضی اولمایا جغنی بیلوردی . بناء علیہ مسئلہ نک حل ایچون برقرالک ریاستی آلتندہ طوپالانمقدن باشقہ چارہ یوقدی . « صاووا خاندانہ منسوب پرنسلا ! سز ایتالیایی

وجودہ کتیریکنز۔ بندہ سزکلہ برابرم۔ استقلال و اتحاد ! ایستہ دستوریمز بو اولمالیدر « دییوردی . ماززینی تک جمهوریت فرقه سی دوچارضف اولیوردی . بوسبدن ملی برفرقہ تشکل اییدی . بوفرقه ساردنیا قرالنک ریاستی آلتندہ ایتالیا اتحادینی طلب اییدیوردی . ایستہ بوفرقه (اتحاد ملی) نامیلہ بر جمعیت تشکیل اییدی . بوجعیتہ بوتون ایتالیا دن اعضا انتخاب اولوندی . جمعیتک کاتبی ساجیلیالی لافارینا هر صباح ایرکندن قاوورلہ کیزلی کیزلی ملاقاتدہ بولونوردی . قاوور ، لافارینا یہ : « آلکزدن نہ کلیرسہ یاپیکز . پیر نصلکک حضرت یسوعی انکار ایتدیسہ بندہ عالمہ قارشی سزی کلیاً انکار ایدرم » دیدی .

آوستریا ایلہ حرب ایتمک ایچون قوتلی برمتفقہ لزوم واردی . قاوور : « پیہ مونٹ پک چوقد فہ لر اتفاقلریلہ مباہی اولمشدر ، فقط بیطرفلقہ اصلا . » دیردی . انکلز یہ اعتماد ایدیلمیہ جکنی قاوور پک ایی بیلیردی . بونک ایچون اوچنجی ناپولئوننی آلدہ ایتمکک چالیشدی . ناپولئونک خوشنہ کیتمک ایچون جنوم تاجر لرینک آرزوسنہ مخالف اولارق - اردنیاقر اللغنی روسیہ یہ قارشی حربہ اشتراک ایتدیردی . قریمہ ۱۵۰۰۰ کشی کوندردی . بوندن اییدیکی استفادہ ، عقد صلحہ مأمور اولان (۱۸۵۶) پارس قونقرہ سنہ دول معظمہ سفراسیلہ برابر ساردنیا نکلدہ برمرخص کوندرہ بیلیمسنی و آوستریا دن کورولن جفالری ایتالیا نکر نامنہ بیان ایده بیلملرنی تامیندن عبارت اولدی . قاوور ، ناپولئونک معاونتی

تامین ایدہ بیلیمک ایچون اورزینی نك سؤ قصدندن صوکره
(۱۸۵۸) احرارک آرزوسنه مخالف اولارق کرک ایمپراطور وکرک
مخاضم بولونان غزته لر علیهنده تعقیبات قانونیه اجراسنه راضی اولدی.

نهایت ۱۸۵۸ ده اوچنجی ناپولئون اورزینی طرفندن تحویف
ایدلی . اورزینی ، وعدنده ثبات ایتدیکندن طولایی ناپولئونه
شکایت ایتدی (ناپولئون ۱۸۳۱ ده ایٹالیایی قورتارمق ایچون
ایٹالیاده تشکیل اولونان خفی جمعیتک اعضاسندن ایدی) . ناپولئون
قاووری (بلومیهر) . دعوت ایدرک براتفاق عقد اولوندی .
ناپولئون آدریاتیق دکزینه قدر ایٹالیانک کاملاً حر بولوناجفی
ساردنیاقرالغنه وعدایدیور ، بوکامقابل ده صاووا ونیس قونتلغی
آلیوردی . ایشته اوزمان در حال ایٹالیایا اتحادی باشلادی . بو اتحاد
انجق اون برسنده ا کمال اولونایلیدی (۱۸۵۹ - ۱۸۷۰) .

۱۸۵۹ ده ناپولئون آوستریا به اعلان حرب ایدیور ، آوستریا
اردوسنی لومباردیادن طرد ایلوردی . فقط ناپولئون ، عقد
اولونان مقاوله موجنبجه آوستریا اردوسنی آدریاتیکه قدر تعقیب
ایدجک اپکن ذواربعه الاضلاع اوکنده طوردی . اردوسی
بوزوق بر حالده ایدی . ناپولئون پروسیا طرفندن تعرضه دوچار
اولاجفندن قورقیوردی . بونک ایچون آوستریادن یالکز
لومباردیایی آملقه اکتفا ایتدی ، بعده ساردنیاقرالنه ویردی .
(ونه تیا) آوستریا ده قالمشدی . قاوور مایوس اولدی . چونکه
کندی حربه دوام ایتک ایستور ، فقط پیه مونت یالکز باشنه حرب

ایدہ میوردی. بونک اوزرینہ مصالحہ یہ اودہ راضی اولدی. حرب انناسندہ اتحاد ملی اعضاسی طرفندن اداره اولونان اتحاد طرفدار لری (طوسقانا) ، (پارم) و (مودن) دوقه لقریلہ پاپانک ایالتلرندن برینک ، (رومانی) ایالتنک اھالیسنی آیاقلاندر مشلر، هر برنده برر اداره موقته تاسیس ابلشردی. بو اداره لر ساردنیا حکومتی نامنه دیکتاتورلک اجرا ایدیورلردی. (رومانی) ، (پارم) و (مودن) حکومتلری بو اوچ مملکتی (أمیلی ایالات قرالیہ سی) نامیلہ برلشدیر مشلر ، ساردنیا قانون اساسیسنی اعلان ایتشلر، ساردنیا قرالیہ موارداتنه قارشى کمرکی لغو ایلشلر، پوسته خانہ لری ساردنیا مامورلرینہ تودیع ایتشلردی. صوکره دردی ده اتفاق ایدرک ساردنیا قرالیہ الغنه التحاق طلب ایلشلردی. ناپولئون ایسه مستقل برطوسقانا دوقه لغنی دهاز یاده ترجیح ایدیوردی. بناء علیه ناپولئون راضی ایتک ایچون اھالی یہ مراجعت ایدلدی. اھالی جواب موافقت ویردی. طوسقانا ۱۵۰۰۰ رایہ قارشى ۳۶۶۰۰۰ ، أمیلی ۷۵۶ رایہ قارشى ۴۲۶۰۰۰ رای ایلہ موافقت ایتدی. ناپولئون صاووا ایلہ نیس قونتلغنی ایستهدی. قاوور ، اھالی راضی اولدینی تقدیرده بورالری ترک ایتکده قرار ویردی. صاووا ۲۰۰۰ رایہ قارشى ۱۳۰۰۰۰ ، (نیس) ۱۶۰ رایہ قارشى ۲۵۰۰۰۰ رای ایلہ الحاقی قبول ایتدی. ۱۸۶۰ ده شو صورتله وسعت کسب ایتمش اولان ساردنیا قرالیہ الغنده بر مجلس مبعوثان کشادا ایدلدی. فقط بو مجلسه نه نام ویریلہ جکی هنوز

معلوم دکلدی. نهایت (ملی پارلمنتو) نامی ویرلدی .

ناپولی قرالی ایله پاپا بو حرکات ملیه یه مخالف بولونیور -
 لردی . فقط کندیلرینی مدافعہ ایچون تشکیلاتی بوزوق
 اسویچرہ لی آلیلردن باشقه قوتلری یوقدی (تبعہ سنک اجنبی
 خدمتندہ بولونمسی اسویچرہ حکومتک عزت نفسنه طوقوند-
 یغندن بونلردن ملی بایراغی کری آلمشدی) . فقط ساردنیا
 حکومتی بر درلو تعرضه جسارت ایده میوردی . بونک ایچون
 هیچ کندی خبری یوقش کبی طاورانارق ایٹالیہا جمهوریت
 پرورلرینی محاربه یه باشلاتدی . غاریبالدی ۱۰۶۷ کوکللو ایله
 سجیلیایه متوجہاً حرکت ایتدی . جنوہ والیسنه بونلری کور-
 مہ منزلکدن کلسی امر ایدلمشدی . قاوورده ساردنیا آمرالنه :
 « موسیو لوقونت! غاریبالدی ایله ناپولی قرووا زورلری آرہ سندہ
 بولونمغه چالیشیکیز . ظن ایدر ایسہم مقصدیمی آکلادیکیز . »
 دیہ یازمش ، آمرالده شو جرابی ویرمشدی : « موسیو
 لوقونت ، مقصدیکزی آکلادم . ایجاب ایدرسہ نبی (فہ نہ سترمل)
 قلعه سنہ حبس ایدیکیز . » کوکللولر سجیلیایی بلامقاومت ضبط
 ایدرک ناپولی قرالغنه کچدیلر . قرال فرار ایتدی . اتحاد
 طرفداری اولان بحریہ ضابطلری کبیلرینہ دومن آلمنی ویا
 قزغانلرینہ صو آلمنی اونوتمش کبی یابدیلر . بوتون ناپولی،
 غاریبالدینک آینه کچدی . غاریبالدی کنیدیسنی دیققتاتور اعلان
 ایتدیردی .

پاپانک حکومتی ہر مملکتدن (وبالخاصہ فرانسرلردن) کلن ۲۰۰۰۰ کوکلودن مرکب بر قاتولیک اردوسیہ مدافعہ اولونیوردی . غاریبالدی ایله کلن جمہوریت پرورلر بورالری ضبط ایتمک ایچون جنوبدن حرکت ایدیورلردی . فقط ساردنیا حکومتی دھا اول طاورانمش ، قاتولیک اردوسی پریشان ایدرک (مارش) و (اومبری) ایالنرینی ضبط ایلمشدی . پاپانک آئندہ یالکز (روما) ایالتی قالمشدی . صوکرہ کرک غاریبالدی وکرک ساردنیا اردوسی ایله ضبط اولونان بوتون مملکت اھالیسنک رأینہ مراجعت ایلمش ، کافہسی دە الحاق ارزوسندہ بولونمشلردی . سجیلیا ۷۰۰ رأیہ قارشی ۴۳۰۰۰۰ ، ناپولی قرالینی ۱۰۰۰۰ رأیہ قارشی ۱۳۰۱۰۰۰ ، (مارش) و (اومبری) ۱۶۰۰ رأیہ قارشی ۲۳۰۰۰۰ رأی ایله التحاق ارزوایتمشلردی . ایلك (ایٹالیا) پارلمنتوسی ۱۸۶۱ دە (تورن) دە کشاد ایلدی . ویقتور امانوئل (اللھک عنایتی وملتک ارزوسی ایله) ایٹالیا قرالی اعلان اولوندی . صوکرہ پارلمنتو ، ایٹالیاک اصل پانتختی روما اولمق لازم کلہ جکنی اعلان ایئدی .

یکی قراللعک اردوسی پک فضلہ ایدی . بو حال بودجہ دە آچیق حاصل ایدیور ، ایٹالیانر ایسہ اتحادی کمال شدتلہ اکمال ایتمک ایستیورلردی . فقط آرتق فرانسدن ہیج برشی بکلنہ مزدی . ناپولئون پاپانک قوہ جسمانیہ سندن آئندہ قالان صوکرہ قسمی دە آدیرمق ایستہ میوردی . حتی بونک ایچون

عساکر محافظه کوندرمش ، ایتالیا حکومتندن پایابه تعرض ایتیمه جکنه دائر سوز آلمادقندن سوکره بورادن چیقمامشدی (۱۸۶۴) . بو ائشاده پروسیا حکومتی آوستریابه قارشی ایتالیا ایله برلشمک ارزو ایتدیکی ایچون قاورور پروسیابه دوندی . نتیجه سی بوشه چیقان ایکی تشبثدن سوکره (۱۸۶۲ و ۶۵) یالکز اوچ آی مدتله بر اتفاق عقد ایدلدی (۱۸۶۶) . پروسیا اردوسنک استیلاسنه دوچار اولان آوستریایی صلح طلبنه مجبور ایتمک ایچون بو زمان کفایت بیله ایتدی . آوستریا حکومتی ایتالیا نلری مغلوب ایتمش اولدینی حالدنه (وندیک) ی ناپولئونده بونی ایتالیا قرالغنه بخش ایتدی . شمدی یالکز سن پیه ریک ملک موروثی قالمش اولیوردی . غاریبالدییه نلری بونی ده ضبط ایتمک ایسته دیلر . پاپا اردوسنی مغلوب ایلدیلر . فقط فرانسه عسکر کوندره ریک غاریبالدییه نلری طرد ایتدی (۱۸۶۷) . بو عسکر (روما) یه یرلشدی . ایتالیا حکومتی آرتق قیلدامغه جسارت ایدمدی . ایتالیا یه سربستی حرکتی بخش ایدن ینه پروسیا اولدی . ۱۸۷۰ حربنک ایلیک بوزغونلقلرندن سوکره فرانسه (روما) ده کی عسکرینی کری چکدی . ایتالیا نلر رومایه جبراً کیرمش کبی کورونمک ایچون پاپانک ارزوسی اوزرینه بر برمش آچارق رومایه بلامقاومت داخل اولدیلر . اهلینک رأینه مراجعت اولوندینی زمان ۱۵۰۰ رأیه قارشی ۱۳۰۰۰۰ رأی ایله الحاقه

طرفدار اولدیلر . (روما) ایتالیا قراللیغی پایتختی اولدی . پاپا بر حکمداره کوستریله جک حرمت و احترامی محافظه ایتمک اوزره ، بر محافظ قطعه سی بولونمق ، سفراسی اولمق و کندیسنه ۳ میلونلق واردات تأمین ایدمک شرطیله (واتیقان) ده قالدی . فقط وارداتی قبول ایتمدی .

ایشته ایتالیان جمهوریت پرور لر یله اتحاد طرفداری اولانلرک آوستریا طرفندن کوستریلن مقاومت اوزرینه یالکز کندی قوتلریله آله ایدمکلری ایتالیان اتحادی بو صورتله اولا فرانسه نك ، بده پروسیانک یاردیمی ایله ساردنیا قراللیغی طرفندن اون بر سنه ده آله ایدیله بیلدی .

۱۸۷۰ دن بری ایتالیاده برفرقه تشکل ایتمشدر . بو فرقه ایتالیانجه سویله نین بوتون مملکتلرک ، آوستریاده بولونان ایتالیا (تیرولی) ی ایله (تریسته) نك ، فرانسه ده بولونان (قورسیقه) ایله (نیس) ک ، انکلتره ده بولونان (مالطه) نك و حتی اسویجیره ناحیه لرندن (تسهن) ناحیه سنک ایتالیا قراللیغنه الحاقنی طلب ایدر . فرقه بو مملکتلره (ایتالیا ایرره دانتا) یعنی (تکرار صاتین آله میان ایتالیا) نامی ویردیکی ایچون فرقه یه منسوب اولانلره (ایرره دانیست) دنیلیر .

آطامه اتحادینک تشکلی . — ۱۸۴۸ ده ایتالیا کبی آلمانیا ده تعبیرات جغرافیهدن معدوددی . ایتالیانلر ده زیاده پارچه لانیمش ، یالکز بر هیئت متحده حاننده یکدیگرینه مربوط

اوتوز آلتی حکمدارلغه آیرلمشدی . یکانه قوه مشترک لری
 (فرآققورت) ده انعقاد ایدن (دیهت) مجلسنک آئنده ایدی .
 بو مجلس امور مشترکینی رؤیتسه مأمور ، هر معامله ایچون
 حکومتدن اوامر مخصوصه طلب ایدرک تعلیمات اخذینه مجبور ،
 دائمی صورتده نصب اولونان دیپلوماتلردن مرکب بر
 قونفرانسدی . مسائل مهمه نك کافه سنده اتفاق آرا اولادجقه
 هیچ برشیئه قرار ویریله مزدی . حتی اک اوافق ایشلرده بیله ،
 قرار ویرلمزدن اول بوتون حکومتلرک رأیلرینی آلتق ایجاب
 ایتدیکندن هر حکومتک آئنده مسئلهینی عقیم براقاجق برواسطه
 موجود دیمکدی ؛ اوده جوابی نامتنهاهی اوزاتمقدی .
 حاکمیتلرینه درت ال ایله صاریلان-اوافق قراللرک ادارهسی ،
 دائما (دیهت) مجلسنک نفوذینی عقیم براقغه چالیشیردی .
 حتی معاملاتده بطاات دها صوکره مثل سائر حکمنه کیردی .
 ۱۸۱۶ دن بری متداخل معاشلرینی طلب ایدن اسکئی ایمراطورلق
 آووقاتلری نهایت ۱۸۳۱ ده آلفه موفق اولدیلر . ۱۷۹۲ دن
 ۱۸۰۱ . قدر وقوع بولان دیونات حربیه ۱۸۴۳ ده تسویه
 ایدلدی . اوتوز سنه حربنک دیوناتی ایسه انجق ۱۸۵۰ دن
 صوکره تادیه ایدیله بیلدی . هیئت متحده اردوسنک تعلیمنامه سی
 انجق ۱۸۲۱ ده قلمه آئندی . اوافق حکومتلرک قول اردولری
 ۱۸۳۰ ایله ۱۸۳۶ آره سنده تشکیل اولوندی . ۱۸۱۵ ده
 انشاسنه قرار ویریلن هیئت متحده استحقاملری ۱۸۲۵ ده

هنوز انشا ایدله مشدی .

هیئت متحده (قونفده راسیون) بر آلمان ملتنه قادرو بیله تشکیل ایدمه یوردی. ذاتاً بو اتحاد آلمان اقوامی آره سنده دکل، حکمدار لر آره سنده عقد ایدلمشدی. حتی آلمان اولیمان ایکی برنس بیله هیئت متحده اعضا سندن بولونیورلردی. انلرده شله زویغ وهولشتاین دوقی اولارق دانیمارقه قرالی، لوکسمبورغ دوقی اولارق ده فلمنک قرالی ایدی. دیگر ایکی برنسک حکومتلرندن بر قسیمی ده هیئت متحده خار جنده بولونیوردی. پروسیا قرالنک (پوزن) ایالتی، آوستریا ایمپراطورینک مجارستان، غالیچیا، دالماسیا و لومباردیا قرالقلری کی. بو اجنبی مملکتلر هیئت متحده دن آیری بر اداره و آیری بر حدود ایله ده تفریق ایدله مشدی .

ناپوائونه قارشی اجرا ایدیلن حربلر بر قسم وطنپرورلرک ظهورینه بادی اولمشدی. بونلر مملکتی و آلمان منافعی جوار حکومتلرک و بالخاصه فرانسه نک تجاوزاتنه قارشی مدافعه ایتمک ایچون آلمانجه سویله ن بوتون مملکتلری بر ملت حالنده طوپلامق ایستیورلردی. بالخاصه محررلر ایله طلبه لردن متشکل اولان بوفرکه (ایمپراطورلق) ک تأسسی تخیل ایدیوردی. حتی تمثال اولارق ده سیاه - قیرمزی - صاری بر بایراق قبول ایلمشدی (۱). فقط بوتون حکومتلر بونلرله انقلابچی دیبه رک مجادله

(۱) طلبه لر ۱۸۱۳ ده کی فرائق تیروور قطعه لردن برینک، (لوتچوو)

هوسارلرینک البسه سی کوره رک بوفکری آلمشدری .

ایدنجه انلرده در حال احرار فرقه سنه التحاق ایتدیلر . ۱۸۴۰ .
 قدر منور الافکار آلمانلر آلمان اتحادینی تأسیسدن زیاده
 احرارنه بر اداره استحصال ایتمکه مشغول اولدیلر .

یالکز ، منفرد قالان بر قاج محرر آلمان ملتینی تکرار
 تشکیل ایتک ایچون بر واسطه ارائه ایدیورلردی . بونلرک
 فکر نجه هیئت متحده ، حکومتلرک اتحادندن (شتاتن بوند) دن باشقه
 برشی دکلدی . و بو حکومتلرک هر بری ده باشلی باشنه حاکمدی . بناء علیه
 بونی اویله بر حکومت متحده (بونده س شتات) حالنه کتیر ملیدی که
 هپسی ده یالکز مرکزی بر قوه حاکمیه تابع بولونسون .
 المان اتحادی فکری ۱۸۴۰ ایله ۱۸۴۸ آره سنده دارالفنون
 عالنده (۲) انتشار ایتدی . ۱۸۴۶ ده انمقاد ایدن جرمانیست
 قونفرملر آلمان علماسندن مرکب حقیقی بر رملی قونفرمایدی .
 ۱۸۴۸ انقلابی حکومتلری اغتشاشه دوشوردی . مارتده
 (ویانه) و (برلین) ده صریده لر وقوعه کلدی . حکمدارلر بوندن
 توحش ایدرک ، احرارانه قانون اساسیلر اعطا ایلیه رک مؤسسان
 مجلسلری طویلا دیلر . بوندن جنوبی آلمانیا احرارای ده استفاده .
 ایتدیلر . احرار فرقه سنه منسوب ۵۱ اعضا ایله (هایدلبه رغده

(۲) تی بهر قاپینه سی ۱۸۴۰ ده فرانسه نك اورویا به قارشی حرب
 ایتسندن بحث ایتدیکی صروده غایت مشهور ایکی وطن شرقیسی نظم
 ایدلشیدی . انلرده : (آلمان رهنی) و (رهن ساحلنده نوتجی) یعنی
 (واخت آم راین) شرقیلری ایدی .

عقدایدیلن) بر اجتماعده، آلمان حکومتلرندن هرهانکی برینک مجلسلرنده برنده بولونمش مبعوثلردن مرکب اولوق اوزره (فرانقفورت) ده بر (حاضرلق پارلمنتوسی) عقدینه قرار ویرلدی (بو مبعوثلرک قسم اعظمی جنوبی آلمانلردندی). صوکره بو مجلس ده مجلس مؤسسان مقامنه قائم اولوق اوزره بوتون آلمانیا ایچون حقیقی بر پارلمنتو عقدینه قرار ویردی. مبعوثلر ۵۰۰۰۰ کشیده بر اولوق اوزره آرای عمومیه ایله انتخاب اولونا جقدی. بوتانخابانه پروسیا و پوهیمانک بوتون ولایتلری داخل اولاجقدی. (دیته) مجلسی بو مقرراتی قبول ایتدی. حکومتلر انتخابات اجرا ایتدیردیله.

محررلر و معلملرله اداره ایدیلن فرانقفورت پارلمنتوسی (مایس ۱۸۴۸) آلمانیایی متحد وحر برحکومت حالنه کتیرمک ایستیوردی. تمثال اولار قده احرار بایراغنی، سیاه - قیرمزی - صاری بایراغنی قبول ایتدی. فقط قوت هنوز آللرنده بولونان اسکی حکومتلره قارشى بو پارلمنتونک معنوی قوتندن باشقه بر قوتی یوقدی. کذا مقرراتی اجرا ایده جک هیچ بر واسطه ده موجود دکدی ده ا طوغروسى بو پارلمنتو آلمانیا به ویریله جک اک مکمل قانون اساسی بی، مذا کره ایچون طوبلانمش بر علما قونفره سنه بکز یوردی. پارلمنتو اولاموقه ایمپراطورلنی اداره ایده جک برینی تعیین ایتک ایسته دی. آوستریا آرشییدو قلرندن برینی انتخاب ایتدی. پوذات بر (ایمپراطورلق قاینه سی) تشکیل ایلدی. ده ا صوکره ده

قانون اساسینک تصدیقنه باشلاندى .

قانون اساسی احکامنده ائتلاف پک قولای حاصل اولدی . اهل وطنک (حقوق اساسیه) سی ایچون احرارانه اداره لر نموه اتخاذا اولوندى . قانون نظرئنده مساوات ، کافه مخصوصده حریت ، استتقلال محاکم ، اهلینک مبعوثلرله تمثیل اولونمق حقی اعلان ایدلدى . کذا بر حکومت متحده (نه تافه ده رال) تشکیلی ایچون ده ائتلاف حاصل اولدی . یالکز اجرا آتہ متعلق مسئله لر بر اقلدی . بونلردن هله ایکیسی حقنده هیچ ائتلاف حاصل اولامادی . اومسئله لردہ شونلردن عبارتدی :

اولا : آلمانیا ایمپراطورلنی هانکی مملکتلردن تشکل ایدہ جک ؟ آلمان مملکتلرینک حدودی اوتہ دن بری معین دکلدى . ۱۸۱۵ ده اویله تاقی ایدیلیموردی که آلمانیا ، آلمانجه سویله نین یلردن ده اوتہ سنه کچیوردی (۱) . حتی بللی باشلی حکومتلردن ایکسینک تبعه سی . آلمانجه سویله یئلردندی . پروسیا ایالتلردن بری (۲) ، پوزانیا ایالتی ، پولونیا لی اولدینی کبی آوستریا مملکتلرینک درتده اوچی ده اسلاو ، مجارو یارومانیا لی ایدی . بواجنبی مملکتلر نه یاییلا جقدی ؟ پارلمنتو بونلرک ایمپراطورلغه داخل اولمامسنه ، عین حکمداره عائد آلمان ایالتلریله یالکز شخصی بر رابطه مربوط بولونماسنه قرار

(۱) آلمان وطنی زره سیدر ؟ عنوانیله تنظیم اولونان مشهور وطن

شرقیسنده ده بوفکر بیان اولونمشدی .

(۲) پروسیا ایالتی اسکی ایمپراطورلنک حدودی خارجنده ، فقط کاملاً جرمئلمش

ایدی .

ویرمشدی. فقط آوستریا حکومتی بونی رد ایتدی. آوستریا یکی
ایمپراطورلغه بوتون ایالتلریله برابر داخل اولمق ایستیوردی.
ثانیاً: ایمپراطورلنی هانکی حکمدار اداره اید. جک؟ هیئت
متحدہ ایچنده آوستریا و پروسیا کی یکی بویوک دولت قالمشدی.
فقط بر حکومت متحدہده بہمہ حال ادارہ بی بونلردن بزینک
درعہده ایتمی لازمدی. عجبا آوستریامی، یوقسہ پروسیامی درعہده
ایده جکدی؟ بو مسئله برنجی مسئلہ بہ تابعدی. شاید آوستریا
ایشہ قاریشدریلہ جق اولورسہ او زمان ایمپراطورلغک رئیسی
پروسیا قرالی اولاجقدی.

بناء علیہ پارلمنتوایکی بہ انقسام ایتدی. بر قسمی آوستریادہ کی
سکزمیلیون آلمانلہ اتحادی محافظہ ایتمک و آوستریا ایمپراطورلنی
کاملآ داخل اولاجق وجہ ایلہ کنیش بر اتحاد وجودہ کتیرمک
ایستیورلردی. شو حالده حاکمیت آوستریادہ بولوناجقدی
(بو فرقیہ بویوک آلمانیا فرقیہ نامی ویرلمشدر). دیگر
بر قسمی دہ آوستریادہ کی آلمان قاردرشلرندن واز کچہرک پروسیا
قرالنک اداره سندہ اولمق اوزرہ سائر حکومتلرلہ فایت کوچوک،
فقط تشکیلاتی مکمل بر ایمپراطورلق وجودہ کتیرمک ایستیور-
لردی (بونلر دہ کوچوک آلمانیا فرقیہ دنیلمشدر).

نہایت پروسیا فرقیہ ۲۲۴ رایہ قارشی ۲۶۱ رایہ ایلہ
غلبہ ایتدی. دہا صوکرہ پارلمنتو ارتنی بر ایمپراطور انتخابہ
قرار ویردی. بونک ایچوندہ پروسیا قرالنی انتخاب ایتدی.

فقط پروسیا قرالی احرارانه بر قانون اساسی قبول ایتیمور ،
 کنديسنه تحت حكومتی ملتك ويرديكنی ایسته میوردی . بوكا
 « چاموردن و تحتهدن بر تاج » دیوردی . حتی : « آلمان ملتنك
 تاجنی احسان ایده جك بر کیسه وارسه اوده بن و بنم اقرانم
 اولاندره » دیوردی . بناء علیه قرال بونی قبول ایتدی . بونك
 اوزرینه جمهوریت پرورلر آياقلاندى . پر نسلر پارلمنتوده کی مبعوثلرینی
 چاغیردی . پارلمنتوده ۱۰۵ جمهوریت پرور مبعوثدن باشقه
 کیسه قالمادی . پروسیا عسکرلری ساقسونیاده ، باد مالمکنده
 وبوتون آلمانیده کی جمهوریت پرورلری ازمکه باشلانجه بونلرده
 (ستوتفارت) . التجا ایدرك قانون اساسینك صوك مدافعی
 اولارق قالدیلر . ایشته متحد وحر بر حكومت تشکیلی ایله
 آلمان اتحادینی وجوده کتیرمك تشبثی شو صورتله عقیم قالدی .
 دیگر خصوصی حكومتلرده قانون اساسی بی تصدیق ایتیه رك
 ویا خود تبعه لری قانون اساسی بی جبراً تطبیق ایتك ایستدكلری
 زمان انلره عاصی معامله سی ایدرك بوتشبتی عقیم بر اقدیلر .

آوستریا ایمراطوریه بروسیا قرالترینك هر ایکیسی ده
 ۱۸۴۸ ده دوچار تزلزل اولان هیئت متحده بی تکرار تشکیل
 ایتك ، امور اداره سنی آلرینه آلمق ایچون کوچوك حکمدارلر
 نزدنده تشبثانده بولوندیلر . پروسیا قرالی عسکرى بر رئیسك
 اداره سنده بر (اونیون) ایله حكومت مرخصلرندن مرکب بر
 مجلس و برده اتخابله طوبلانمش بر پارلمنتو احداث ایتدی .

بوپارلمنتويه شمال حڪومتلر نندن اون يديسى داخل اولدى. پارلمنتو (أرفورت) ده انعقاد ايتدى (مارت ۱۸۵۰). برلينده پروسيا قرالنك رياستى آلتنده بر حڪومت تاسيس ايدلدى. فقط آوستريا ايمراطوزى مجارستان حربندن قورتولنجه، (باويه را، وورتمبرغ، ساقسونيا و هاننورا كې) پروسيا قرالنه تابع اولمق ايسته مين اوافق قراللكرك پرنسليله برلشدى. فقط پلاننى بونلره قبول ايتدیره مينجه هيئت متحده يى ۱۸۴۸ دن اول نه حالده ايديسه اوصورتله تاسيس ايتك ايجون اويوشدى .

پروسيا قرالى متجرد بر حالده قالنجه حربدن قورقدى ، موافقت ايتدى . هيئت متحده يه اوده داخل اولدى (۱۸۵۰). ايسته اوزمان آلمان ياده ايكي باش بولونديجه آلمان يانك يك وجود بر ملت تشكيل ايدمه جي آكلاشدى. مملكتهك پارچه پارچه بولونماسنه اك زياده پروسيا ايله آوستريا بيننده مكي رقابت سبب اوليوردى. فقط بو ايكي حڪومت اويله الاابد نيم خصومت حالنده ياشايامازلردى . آلمان يانك مقدراتنى تنظيم ايدمه بيلمك ايجون بو ايكي حڪومتدن بهمه حال برينك اوبرينه غلبه ايتمى بلكه مك لازمى . پروسيا ايله آوستريا بيننده وقوع بولاجق بو دوئللوده غلبه نك آوسترياده قالاچنى اميد ايديليوردى . آوستريانك اهالىسى و اراضيسى ايكي مثلى (۱۸ ميليونه قارشى ۳۶ ميليون) اولديغى كې آلمان پرنسلى طرفندن هيئت متحده نك بر مدير طبيعى تلىق ايدلك كې فوائدى ده حائزردى (چونكه

آوستریا، ایمپراطوری اسکی جرمن ایمپراطور لرینک وارثی ایدی). کذا آوروپاده اودرجه حائز قدرت عدایده یں پروسیاقرالکده ایکی استفاده سی واردی. پروسیا قرالی آلمانیا ایشلرنده اک زیاده حائز نفوذ اولاندردندی. چونکه یالکزبرولایت مستثنی اولمق اوزره بوتون حکومتی آلمان ایدی. تبعه سندن پک چوق وسائل تحصیل ایدردی. چونکه مملکتک بوتون قوتی محاربه نقطه نظرندن تشکیل ایدلمشدی.

بوتشکیلات ناپولئون دؤرندن قاله ایدی. قراللق درت ولایتله بش میلیون نفوسه تنزل ایتمشدی. قرال، ناظرلربی آلمان وطنپرورلرندن انتخاب ایدرک (ناساودنشتاین، هانوورادنده هاردنبورغ وشارنهورست ایدی) مملکتندن آنده قالان قسمی دول معظمه درجه سنده بولوندیرا بیله جک اصلاحاتی اجرایه راضی اولمشدی. حکومت، تبعه سندن یکی یکی فداکارلقلر طلب ایدیوردی. ایشته بونی ممکن قیلا بیلیمک ایچون اولان نظاماتی اصلاح ایتدی (۱). مرکزیته یاقین بر اداره احداث ایدلدی. زراعت و تجارتیه قارشی موجود موانع بر طرف اولوندی.

(۱) فرانسه ده ۱۷۸۹ اصلاحاتی اها لینگ شرائط حیاتیه سنی اصلاح ایچون پایلمشدی. حکومت حاکم حقیقی اولارق یالکزها لینی طانیوردی. بونک ایچون بو اصلاحات بر اعلان حقوقدن عبارتدی. پروسیاده ایسه بالعکس حاکمیت قرالده ایدی. قرال، حکومتک قوتی آرتدیرمق ایچون اصلاحاتی اوامر قرالیله اجرا ایتدیریور، تبعه سنک وظائفندن باشقه برشیدن بحث ایتمیوردی.

يکي يکي منابع ماليه، فرانسه يه تقليداً (پاتنه وشخصي ویرکی کې) ویرکیر، لوکس اشیا ایچون رسوم و برده ژاندارمه احداث ایدلدی . بو ایشلری هپ هاردنبرغ یادی . کذا برده اداره عسکریه تأسیس اولوندی . بونی ده شارنهورست وجوده کتیردی .

تشکیلات عسکریه نك اسامی شوایدی : «قرالغك هر فردی انك فطرة مدافعیدره . شارنهورست قرون وسطانك اسکی بر عادتنی اساس اتخاذا ایدیوردی ؛ حتی بونك ایچون اسکی لاندوهر (مدافع وطن، مستحفظ) تعبیرینی ده قبول ایتدی . هر پروسیالی خدمت عسکریه ایله مکلفدی . فقط ناپولئون ، قرالک ۳،۰۰۰ کشیدن فضله عسکر بولوندرماسنه مساعده ایتدیکی ایچون خدمت عسکریه اوچ سنه یه ایندیرلدی . افراد وقت حربده تکرار سلاح آلتنه دعوت اولونمق اوزره صالیو-یریلیور، اردوده یالکز ضابطلر قالیوردی. شو صورتله اردو آرتق اهلینک سائر اقسامندن آیری ، اصناف عسکریه دن مرکب بر هیئت اولمقدن چیقیور، بوتون کنجلا ایچون برمکتب عسکری ، حرب زمانی بوتون ملتک طوبلاناچنی بر قادرو تشکیل ایدیوردی. ایشته بو صورتله اردو (موظف) و (احتیاط) اردوسی نامیله ایکی قسمه آیرلدی . شارنهورست بوندن باشقه اردوده خدمت ایتمین آلی سلاح طوتار کیمسه لردن برده (لاندوهر) مستحفظ تشکیل ایتمک ایسته دی . بو صنف انجق

۱۸۱۳ ده غایت ساده بر اونیفورمه ایله ، بر لیته و قا (بر نوع ماوی ستره) و شابقه کیمک اوزره تشکیل ایدلدی . صرف وقت حربه مخصوص اولان بو تشکیلات وقت حضرده ایدلدی . پروسیانک ۱۱۵۰۰۰ کشیدن فضله دائمی اردوسی یوقدی . فقط خدمت عسکریه نك اوج سنه به اینمسی ایله احتیاط و مستحفظ سایه سنده وقت حربده بو قوتی اوج مثلنه ابلاغ ایده بیلیردی . قرال، زنکین دلیقانلیرک یرینه بدل شخصی ده قبول ایتدی . یالکز تحصیلده بولونانلرک بر سنه خدمت عسکریه ایفا ایتلیرینه و اولرنده یاتمالرینه مساعده ایدلدی . قرالک بوتون تبعه سنک خدمت عسکریه ایله مکلف اولماسی اسامی ینه ابقا اولوندی . لاندوهرلر موظف اردویه دهها زیاده بکزمه به جک وجه ایله تنسیق ایدلدی . بردنبره سفره داخل اولابیله جک صورتده تعلیمه ده آیشدیرلدی . اوروبا حکومتلری ایچنده اک چوق عسکر چیقاران حکومت پروسیا اولدی . کذا پروسیانک اداره مالیه سنی ده تنسیق ایتک لازمدی . حکومت ۱۸۱۵ ده حرب یوزندن محو اولمشدی . محصولک فنا اولماسی قحط و سفالت حصوله کتیرمشدی . بری آبلوقه زماننده بیغیلوب قالان انکلیز امتعه سی آلمانیاده اوقدر چوق و اوقدر آز بر فیئانله ساتیلیوردی که پروسیا ارباب صناعتی بوکا قارشى بردرلور قابت ایده میوردی . اوزمانلر سائر حکومتلرده اولدینی کبی پروسیا ده کمرک اداره سی پک قاریشیددی . هر ولایتده باشقه باشقه ۶۷ تعرفه واردی . پروسیا ده

اراضیسی بربرینه قاریشمش او قدر چوق حکومتلر واردی که بونلری منتظم برکمرک قوردونی ایله احاطه ایتمک امکان خارجنده ایدی .

پروسیا حکومتی غایت معتدل و غایت ساده بر رسوم تعرفه سی تأسیس ایتمک جسارتنده بولوندی . امتعه اوزرینه یوزده اون، مستملکات ذخیره سنه یوزده یکریمی وضع ایتدی . بوتون رسوم وزن اوزرینه تحصیل ایدلدی . اوزمان اوروپاده بواک واسع بر اصول تجارت اولدی . بو اصول پروسیا صنایعی ترقی ایتدیردیکی کبی بوتون آلمانیا تجارتنه حاکم اولاجق بر طریقه ده ادخال ایتدی .

اراضیاری کمرک خطنه کیرمش بولونان اوافق پرنسسلر بو تعرفه دن شکایت ایتدیلر . پروسیا حکومتی کمرک حاصلاتی نفوسلرینه کوره بینلرنده تقسیم ایتلرینی بونلره تکلیف ایتدی . امور اداره یی پروسیا درعه ده ایدیور، تعرفه یی تمین، تجارت معاهده لرینی عقد و کمرک مامورلرینی پروسیا نصب ایلوردی . ۱۸۱۷ ده عقد اولونان بو معاهده مملکتلری بربرینه قاریشان اوافق حکومتلره عقدایدیان معاهده لره نمونه اولدی . ۱۸۲۸ ده بو حکومتلرک اک . همملرندن اولوب اراضیسی هیچ بر حکومته قاریشمامش بولونان هس دارمشتاد حکومتی بر معاهده عقدایتک ایسته دی . آله ایدیان منافک تقسیمندن فضله اولارق کندی حدودی اوزرینه کمرک مامورلری نصب ایتمک حقنی ده استحصال

ایلدی. فقط تعرفه فی تعیین ایتمک حتی سینه پروسیاده قالدی. بومعاهدده مملکتلری بربرینه قاریشیمان حکومتلر ایچون نمونه اولدی. ایشته آلمانیا ناک کمرک اتحادی (چولفهراین) بوصوله غایت آغرو مشکل بر صورتده باشلادی.

کذا بری جنوبی آلمانیا حکومتلری، دیگریدیه وسطی آلمانیا حکومتلری آره سنده ایکی اتحاد دهاتشکیل ایدلشدی. بونک اوزرینه بو اوج هیئت متحده آره سنده بر مبارزه باشلادی. بونلردن اگ قوتلی اولان پروسیا هیئت متحده سی دیگر لرینی جذب ایتدی. ۱۸۳۶ ده هانوررا ایله قومشولری و اوستریا داخل اولماق اوزره بو اتحاد بوتون آلمانیا حکومتلری داخل اولدی. ۱۸۴۱ ده (چولفهراین) کمرک اتحادی اون ایکی سنه مدته تجدید ایدلدی. ۱۸۵۲ ده ده تکرار تجدید اولوندی فی زمان حکومتلر اوستریا یی ده اتحادده داخل ایتمک ایسته دیلر. فقط کندی اسلاو و مجار مملکتلرینی ده برابر کتیره جکی ایچون پروسیا اوستریا یی قبول ایتمک ایسته میوردی. بناء علیه یالکزه هانوررا ایله قومشولرینی قبول ایتدی. بونلر اولجه تعرفه لری غایت یوکسک بولدقلری ایچون اتحادده داخل اولماشلردی. شمندی پروسیا اتحادده انلری ده داخل ایتدی. دیگر حکومتلرک کافه سی، قائمه استعمال ایتدیکی ایچون اوستریا ایله ائتلافدن واز کچدی لر. ۱۸۶۵ م قدر تمدید ایدیلن و اوستریا دن ماعد بوتون آلمانیا یه تشمیل اولونان کمرک اتحادینه بونلر ده داخل اولدی لر. آرتق آلمان تجارتسک اداره سنی پروسیا در عهده ایتمش دیمکدی.

۱۸۵۰ دن ۱۸۶۰ قدر آلمانیاده حیات سیاسیہ یک ضعیف اولدی . ۱۸۴۸ حرکاتندن دو چاردهشت اولان حکومتلر ملی ویا خور احرارانه نمایشلره مانع اولیورلردی . ۱۸۶۰ ده آوستریانک مغلوبیتی اوزرینه افکار عمومیہ هیئت متحده نكده کفایت ایتمدیکنه قائل اولدی . پرنسپلره تبعه لری اوچنچی ناپولئونک رهن نهری صول ساحلی آلمانلردن آلفه قیام ایتمسندن قورقیورلر ، جمله سی ده اجانبه قارشى مقاومتی تأمین ایده بیله جک فایت قوتلی برتشیکیلات طلب ایدیورلردی . فقط اجرا ایدیله جک اصلاحاتده فکرلر دائما انقسام ایدیورلردی .

آوستریا ، براتحاد محکمه سی ایله حکومت مرخصلردن مرکب بر مجلس احداث ایتکی ، امور اداره نی بالمناوبه بویوک حکومتلره تودیع ایلمکی تکلیف ایدیورلردی . فرانقفورته پرنسپل طرفندن مذاکره ای دیلن بو پروژه نهایت (۱۸۶۳ ده) ۲۱ مرخصدن مرکب بر مجلسله ۱۶ اعضادن مرکب بر هیئت اداره و ۳۰۲ مبعوثدن عبارت بر پارلمنتو احداثیله ختام بولدی . بو فکره ۲۴ پرنس اشتراک ایتدی .

پروسیاده ۱۸۶۱ دن بری قرال اولان کیلیوم امور اداره نی بیسمارقه تودیع ایتشدی . بیسمارق اسکی صرقه منسوب بر جنتلمن ، احرارانه قانون اساسیلرله پارلمنتولره دشمن ، قرال طرفندن اداره حکومتلر طرفدار ، پروسیا نظاماتسک مفتونی بر ذات ایدی . (دیهت) مجاسنه بر قاچ سنه بر مدت پروسیا طرفندن مبعوث اولمش ،

صوکره (فرانقفورت)، (دیهت) دن ، قونفده راسیوندن
 و آوستریادن نفرت حسی ایله عودت ایلمشدی. بیسمارق، پروسیا
 قونفده راسیونده دائماً آوستریانک تحکمی آلتنده بولنه جغنی
 وکندیسنه سائر حکومتلر حسدایده جکی ایچون قونفده راسیونی
 (هیئت متحده یی) محو ایتمک پروسیایه دها فائده لی اولاجغنی
 آکلامشدی . بیسمارق قونفده راسیونک یرینه اتخابله تشکیل
 اولوناجق بر پارلمنتو ایله دها طار براتحاد وجوده کتیرمک ،
 بو اتحادک اداره مجاریه و عسکریه سنی پروسیا قرالنه ویرمک ،
 آوستریایی ایشک ایچندن آتمق ایستیوردی .

بیسمارق ۱۸۶۲ دن اعتباراً آوستریا حکومتنه آلمانیدان
 آیرماسنی و « مرکز حکومتنی بوداپشته یه تحویل ایتمسنی » توصیه
 ایدیئوردی . فقط بیسمارق آوستریانک اولیه حربسز بوقونفده ده .
 راسیون چیقیمی جغنی آکلاینجه حربی حاضرلامغه باشلادی .
 بونک ایچون ده ایکی شرطه لزوم کوردی . بوشرطلردن بری :
 پروسیا اردوسنی تقویه ایتمک (سیاست داخلیه سنک غایه سی بو اولدی)
 دیکری ده آوروپا دولترینک اتفاق ویا بیطرفلغنی تأمین ایلمکدی
 (بوده دیپلوماسیسنک غایه سی اولدی) .

پروسیا اردوسی ۱۸۱۵ ده نه قدر ایدیسه ۱۸۶۱ ده ده
 او قدردی . نفوس چوغالدینی ایچون خدمت عسکریه ده آرتق
 عمومی اولمقدن چیقمشدی . هر سنه مکلفیت عسکریه یه داخل اولان
 ۶۳۰۰۰ قرعه نفر دن آنجق ۴۰۰۰۰ نی سلاح آلتنه آلتیور ،

۱۸۴۰ء دن بری دہ سلاح آئندہ آنجق ایک سنہ قدر بولونڈیر یلیوردی .
 ۱۸۱۵ دہ کی کبی تنسیق اولونان مستحفظلق خدمتی قرق یاشنہ قدر
 دوام اییدیور ، ویکرمی بشده باشلیوردی . احتیاط بہری ایک
 سنہک ایک صنفدن عبارت بولونیوردی . قرال کیلیوم اوج
 اصلاحات یادی : بوتون صنف یکیدن باشلامق اوزرہ خدمت
 عمومیہ عسکر بہ بی اوج سنہ بہ چیقاردی . احتیاط مدتی یکرمی یدی
 یاشنہ قدر اوزاندی . مستحفظی اوتوز ایک یاشندہ براقدی .
 شو صورتلہ وقت حر بدہ اسکیدن ۲۰۰,۰۰۰ کشی بولونور کن شمدی
 موظف واحتیاط ۴۴۰,۰۰۰ کشیک براردو بولونا جقدی .

بویکی عسکر لرہ قادرو وجودہ کتیرمک ایچون قرال یکی یکی
 آایلر احداث ایتدی . بونک ایچون دہ بودجہ بی آرتدیرمغہ
 مجبور اولدی . ۱۸۴۸ انقلابندن بری پروسیادہ منتخب بر مجلس ،
 (لاندتاغ) واردی ۱۸۴۹ ارتجاعندہ بومجلس نہ باقی قالا بیلمشدی .
 فقط بو، سائر مشروطی مملکتلر دہ اولدینی کبی بر پارلمنتو دکلدی .
 قاینہ مسئول اولدینی کبی مجلسک دہ قانونلرہ بودجہ بی تصدیق
 باشقہ وظیفہ سی یوقدی . کذا حکومت دہ بودجہ بی صرف ایتدکن
 صوکرہ مجلسہ تقدیم ایتکی عادت ایدینمشدی . بوايسہ قونترولک
 فرضی اولماسنہ سبب اولیوردی . بناء علیہ مجلسک صلاحیتی ،
 یکی قانونلرہ ویرکی تزییدینی رد ایتدکن عبارت قالیوردی .
 بوسبیدن مجلسک وجودیلہ عدمی مساوی ایدی . مبعوثلرہ اوقدر

حرمت ایدلمزدی. مراسمده بر مبعوث بر یوزباشیدن سوکره کلیردی .

اردونک اصلاحی، حکومت قارشی قطعی بر مخالفنده بولونمق ایچون مبعوثلره ایلك برفرست وجوده کتیردی . مجلس مبعوثان ۱۸۵۸ دن ۱۸۶۱ ه کلنجیه قدر قرال طرفندن تشکیل اولونان آایلره اعتراض ایتمه مشدی . بونلرک ابقاسنی (موقه) قبول ایلمشدی . ۱۸۶۲ ده ایسه اکثریتی یکی برفرقه، (ترقی) (فورت شریت) فرقه سی قازانمشدی . بوفرقه حربدن قاچنمق واقتصادیایمق ایستیور، اردونک قوتنی چوق بولدیغنی کبی خدمت عسکریه پی ده ایکی سنه یه ایندیرمک آرزو ایدیوردی . بناء علیه مجلس اردونک تزید اولونماسنی تصدیق ایتمدی . بونک اوزرینه قرال مملکتی مدافعه ایتمک وظیفه سی اولدیغنی جهتله اردونک احتیاجاتنی ده آنجق کندی تقدیر ایدمه بیله جکنی وامور حکومتی تدویر وسائطنی مجلس مبعوثانک کندیسنه رده حقی اولمادیغنی بیان ایتمدی . مجلس مبعوثان ده، قرالک هر ایستدیکی پاره نی تصدیق ایتمکدن سوکره مجلس مبعوثانک بر قومیدن عبارت اولاجغنی و بناء علیه بو مجلسک مبعوثلردن مرکب بر مجلس اولمقدن زیاده بر مجلس مشاوره درکه سنه اینه جکنی جواباً بیان ایلدی . اصل اختلاف، ۱۸۴۸ ده احداث اولونان مجلس مبعوثانک اساساً بر بیانجی تشکیلاتی اولماسندن ایلری کلپوردی . بو تشکیلات، حاکمیتک ملته اولدیغنی قبول ایدن بر مملکتدن آلمش ، قرالک حاکمیتی اساسنه مستند عسکری بردولته

تطبيق ايدلمشدى . بناء عليه يا مجلس مبعوثانك قرالى فراغته يعنى مجلسك تمثيل ايتمكده اولدينى اهلينك حاكيتنى تصديقه قرالى مجبور ايتمى، وياخود قرالك مجلس مبعوثان ايله اهالى يي فراغته يعنى كندى حاكيتنى تصديقه انلرى مجبور ايلمى ايجاب ايدىوردى .

اختلاف ۱۸۶۱ دن ۱۸۶۶ يه قدر دوام ايتدى . مجلس مبعوثان ايكي دفعه طاغلوب تكرار انتخاب ايدلى، وداثماده تصديقدن اجتناب ايتدى . فقط قرالده واز كچمه دى . بيسمارق ۱۸۶۲ ده باش وكيل اولنجه قرالى التزام ايتدى . بيسمارق آلمان اتحادينك (ديمروقان) دن باشقه برشيله قابل اولاميه جفنى بيان ايدىوردى . حتى مجلس مبعوثانده : « بز، ضعيف وجوديمزه پك بويوك كله جك برززه طاشيمقدن حظ ايدىوروز . فقط بوندن استفاده ايتمكى ده بيلملى بز! » ديدى . ينه بركون : « بوتون حيات مشروطيت متسسل او يوشماردن عبارتدر . شايد قوتلردن برى، مسلكى براستبداد ايله كندى فكرىنى يوروتمك ايسستيهرك بونى عقيم براقه جق اولورسه او زمان بو او يوشمارك صر مسنه خلل طارى اولور ، انك يرينه اختلافلر باش كوسترر . بر حكومتكده حياتى توقفه دوچار اولاميه جفنى ايجون اختلافده بر قوت مسئلهسى شكلنى آير . اوزمان كيمك آندده قوت وارسه او طرف ايستديكى يولده حركت ايدر . » ديدى . قوت، بيسمارق ايله قرالك آندده ايدى . بونك ايجون آلايلرى ابقا ايتدكلرى كچى كويا مجلس مبعوثان طرفندن تصديق ايدلمش كچى وركى ده جبايت ايتمكه باشلاديلر .

بیسمارق بوائناده آوسٹریائی یالکز برافقہ چالیسیوردی .
 بیسمارق ۱۸۶۳ دە عصیان ایدن پولونیا لیری انقیاد آلتنه آلمق
 ایچون روسیہ ایمپراطورینہ یاردم ایدرک انی کنڈیسنه جلب ایلشدی .
 کذا کرک بلچیقانک، کرک رمن ساحلارینک فرانسه یه الحاقی ایچون
 کنڈیسنه یاردم ایدہ جکنی ظن ایتدیرہرک اوچنچی ناپولئونی دە
 آلدہ ایتدی . (وونہ تیا) بی ویدا ایدرک ایتالیائی دە جلب ایلدی .
 انکلترہ یه کلنجه ، بونک هیچ برشی یامیہ جفنی ذاتا بیلوردی .
 آرتق اتحاد مسئلہ سی ، بیسمارقک استدلالاتی وجه ایله ،
 اوچ حربده دمیروقان ایله حل ایلدی .

۱۸۶۴ دە پروسیا و آوسٹریا (هولشتاین) و (شله زویغ)
 دوقه لقلرینی آلمق ایچون دائیمارقه قرالی ایله حرب ایتدیلر .
 فقط بودوقه لقلری آلمان ولی عهدینہ ویرہ جک یرده کنڈیلرینہ
 آلیقویدیلر . موقه آره لرندہ پایلاشدیلر . هولشتاین آوسٹریا یه
 اصابت ایتدی .

۱۸۶۶ دە پروسیا ، آوسٹریانک (هولشتاین) دە انقلاب
 فکر لرینی ترویج ایلدیکنی بهانه ایدرک بوراسنی اشغال ایتدیردی .
 آوسٹریا ، مسئلہ بی (دیهت) عرض ایتدی . دیهت مجلسی آوسٹریا یه
 حق و یردی . بونک اوزرینہ پروسیا حکومتی آرتق قونفہ ده راسیونہ
 مفسوخ نظریله باقادیغنی بیان ایدرک حربہ کیریشدی . بیسمارق
 ده ۱۸۶۵ دە باویہ راناظرینہ : « یالکز بر دوئلویہ لزوم وار .
 آلمانیا بیطرف قالا جق اولورسه بوده پک چاقق بیتہ جک . آوسٹریانک

تسلیحاتی مکمل دکلدر۔ کذابونک ایچون وسائطی ده یوقدر۔ بناء عليه
برمیدان محاربه سی کافدر۔ « دیمشدی۔ بیسمارق ۱۸۶۶ حربی
ایچون ایٹالیانک اتفاقنی جلب ایتمشدی۔

آمانلر ایکی دشمندن هالکیسنی التزام ایده جکلرنی بیلیمبورلردی۔
حکمدارلر، حاکمیتلرنی آلرندن آلق آرزو ایتمین آوستریایی
ترجیح ایدیورلردی۔ لوطنپرورلرایسه اتحادک انجق پروسیانک
معاونتی ایله تاسس ایده بیله جکنی امید ایدیورلردی۔ ایٹالیانلر
کبی بونلرده ۱۸۵۹ ده بر (اتحاد ملی) تشکیل ایتمشدر، یکر می بیک
قدراعضا جمع ایلمشدردی۔ بونلر « پروسیایی طریق خیره سوق
ایتمک » ایستورلردی۔ فقط احرار پروسیا حکومتنی بیسمارک
النده و مجلس مبعوثانه قارشی حال مبارزه ده کورونجه پروسیان
نفرت ایلدیلر۔ ۱۸۶۲ ده بر (اصلاحات جمعیتی) شکل ایندی۔
بوجمیت تکرار بویوک آلمانیا پلاننی آله آلدی۔ آوستریا برقات دها
رغبت قازاندی۔ ۱۸۶۳ ده ایمپراطور (فرانقفورت) ده کال
صمیمیتله استقبال ایلدی۔ ۱۸۶۶ ده ده هان بوتون آلمانیا
حکومتلری پروسیا بیله قارشی آوستریایی التزام ایستیلر۔

یالکز برمیدان محاربه سیله ختام بولان ۱۸۶۶ حربنک اوچ
نتیجه سی اولدی :

اولا : آوستریا هیئت متحده دن واز کجدی۔ یالکز پروسیایی
آلمانیا ده کم بر اقدی۔ کذا شله زویغ۔ هولشتاین دوقه لقلر نندن
واز کجدی۔

ثانیا : پروسیا بودوقه لقلری کندیسنه الحاق ایتدی . کذا (هانوو را ، هس ، ناساو و فرانقفورت کبی) حرب زمانی اشغال ایتدیکی شمالی آلمانیا حکومتلرینی ده الحاق ایلدی . شو صورتله کندی اراضیسندن کچن قاریشیق حکومتلری ده آرادن قالدیردی . الحاقک اسباب موجب هسی ده شو صورتله اراه ایلدی : « بو حکومتلر... پروسیانک کندیلرینه تکلیف ایلدیکی بیطرفلق و یا اتفاقدن امتناع ایتشلر ، و پروسیایه قارشى اجرا ایدیلن حرب به فعلاً اشتراک ایدرک مقررات حربیه بی هم کندیلری ، هم ده مملکتلری اوزرینه جلب ایلشلردر . بومقررات ده ، (تقدیرالهی) نتیجه سی اولارق کندی علیلرینه ظهور ایتشدر ارتق اردولریمزک سیر مظفرانه سی اوزرینه کاملاً غائب ایتدکلى قدرتی اونلره تکرار اعطا ایتمه مکه لزوم سیاسى بزى اجبار ایدیور . چونکه بومملکتلر شاید استقلاللرینی محافظه ایده جک اولورلرسه وضعیت جغرافیه لری حسدیله پروسیا سیاستنه قدرت و اهمیتلرندن پک فضلّه مشکلات ایقاع ایده بیلیرلر . » فقط مجلس مبعوثان بو الحاق ایچون « یالکز قوت کبی الیوم حقوق و حکوماتی تاسیسه کفایت ایده میه جک » وسأطدن دها باشقه برنام آرانلسنی طلب ایدیوردی . بیسمارق ایسه بوکاجواباً : « او حالده آلمان ملتنگ یا شامق ، نفس آلمق و اتحاد ایتک حقى ؛ پروسیانک آلمان ملتنه بقای موجودیتی ایچون لزومی اولان اساسی بخش ایتک حق و وظیفه سی ، دینسینا ، دیدی .

ثالثاً : پروسیا حکومتی مستقل بر حالده قالان شمالی آلمانیا

حکومتاری ایله هم آلمانیا، هم دپه روسیایه عائدبر (قونفدهه راسیون ، بوند) عقدايتدی. بو اتحادك قانون اساسیسی پروسیا حکومتی ایله مشترکاً حکومت موجوده مرخصلرندن مرکب برقونفره ایله، آرای عمومیه ایله منتخب مبعوثلردن مرکب بر پارلمنتو طرفندن تنظیم ایدلدی .

(شمالی آلمانیا هیئت متحده سی) نه داخل اولان حکومتلرک هربری کندی امور اداره سنی محافظه ایدم جک، فقط بونک فوقنده برده مشترک بر اتحاد اداره سی تشکیل ایدم جکلردی . قوه اجرائیه ارتنا (هیئت متحده رئیس) اولان پروسیا قرالی ایله مسئولیت یکانه بی حائز برناظره ، (هیئت متحده باش وکیل) نه ویریله جک، بوده پروسیا ناظرلری آرمسندن پروسیا قرالی معرفتیه انتخاب اولونا جقدی . قوه تشریحیه ایکی مجلسه عائددی. بری آلدقلمری تعلیماته نظراً رای ویرمهک مجبور حکومت مرخصلرندن مرکب (اتحاد مجلسی ، قونسه ی فدهه رال) ، دیکری ده بوتون اهالی طرفندن منتخب مبعوثلردن متشکل (رایخس ناغ) ایدی . بیسمارق آرای عمومیه بی قبول ایتدی . فقط مبعوثلره اجرت ویرلمسنی و برده ایمپراطورلق قاینه سی تشکیل ایدلمسنی قبول ایددی . هیئت متحده اداره سی ایله محلی اداره لر بیننده صلاحیتلر شو صورتله تقسیم ایدلدی : هر حکومت کندی عدلیه سنی ، ضابطه سنی ، اداره سنی ، مالیه سنی ، مذاهب و معارفنی محافظه ایتدی . هیئت متحده اداره سی یالکز شونلری درعهده ایدلدی :

— اردو و دونما. پروسیاقرالی بوتون اردونک قوماندانیدر.
بوتون حکومتلر پروسیانک اصول عسکرینسی (اوچ سنه خدمت
مکلفه) و تشکیلاتنی قبوله مجبوردرلر .

— مناسبات بین الملل . صلح ، حرب و معاهدلر عقدی ایله
بالجه مامورینک نصبی پروسیاقرالنه عائددر .

— تجارت و وسائط اتصالیه . کمرکلر ، مسکوکات ، بانکه ،
اولجو و اوزان ، پوسته و تلغراف ، شمندو فرلر .

— قوانین تجاریه ، جزایه و اصول محاکمات .

— طبابت و حفظ صحت عمومیه نك تشکیلی .

هیئت متحده نك احتیاجاتنه نظراً کمرک حاصلاتی ایله
هر حکومتک ویره جکی تکالیفدن عبارت اولمق اوزره بر هیئت
متحده بودجہسی تنظیم ایدلی . بو بودجه بر قاج سنه ایچون اوکجه دن
تصدیق ایدلی . بونک اوزرینه بیسمارق : « شاید هیئت متحده
اردوسنک تنسیقاتی هر سنه تصدیقه اقران ایدره رک دائم
موضوع بحث ایدیله جک اولسه ایدی ، اوزمان عینله بر سد
سندیقه سی (۱) تشکیل ایدوب هر سنه : عجباً بویوک فیضانلر
اولنجه سدی آچالمی آچایلمی ؛ دیبه (هیچ مال صاحبی اولمایانلر ده
داخل اولمق اوزره) هر کسدن رأی طوبلایان سندیه لرک

(۱) شمالی آلماننک قسم سفلاسی بویوک نهرلرک ویا دکرلرک فیضاننه
معروض اولدینی ایچون اهالی ، مصارفنی مشترکاً تأدییه ایدرک سده انشا
ایتمک ایچون جمعیتلر تشکیل ایدرلر .

حالی کوزیمک اوکنہ کلہ جکدی . « دیدی .

پروسیانک مظفریتی پروسیا مجلس مبعوثانک مخالفتنہدہ نہایت ویردی . ترقی فرقہ سی اکثریتی غائب ایتدی . بونک یرینہ حریت و اتحاد اساسلرندن آیرلامق اوزرہ بیسمارک پولتیقہ سنی تعقیبہ قرار ویرمش بر فرقہ تشکل ایلدی . بو فرقہ یہ ناسیونال لیبرال (ملی احرار فرقہ سی) دینلیدی .

اتحاد ، فرانسه حربیلہ بسبتون اکمال اولوندی . پارس محاصره سی اثناسندہ (ورسای) ده طویلانان پرنسیر پروسیا قرانی (آلمانیا ایمپراطوری) اعلان ایتدیلر (کانون ثانی ۱۸۷۱) . جنوبدہ کی درت حکومت ده هیئت متحدہ یہ داخل اولارق (ایمپراطورلق) نامنی آلدی . فقط بو ، اسم دیکشمہ سندن باشقہ برشی دکلدی . تشکیلات ینہ عینیلہ قالدی . ایمپراطورلق ایچون بر قانون اساسی ده یازلمادی . یالکزیکی بر بایراق ، سیاہ - بیاض - قیرمزی بایراق قبول ایلدی . فرانسه صلح طلبندہ بولوندیغی زمان پروسیا حکومتی (آلزاس) ایلہ (لورہن) دن بر قسمنک ترکنی طلب ایتدی . بونلری پروسیایہ الحاق ایدہ جک یردہ (ایمپراطورلق ممالکی) نامیلہ بر یرہ کتیرہ رک بوتون آلمانیاہ عائد فرض ایتدی . اداره سنی ده بر باش وکیلہ تودیع ایلدی . ۱۸۶۶ ویا ۱۸۷۱ ده الحاق اولونان مملکتلردن هیچ برندہ اہالینک رایلرینہ مراجعت ایدلمدی . حکومت دائما حق فتح ایلہ اکتفا ایتدی .

ایشته شو صورتله آلمان اتحادی «دمیروقان ایله» پروسیانک منافعه اولارق قومدن فعله کلدی . دها طوغروسو بو یکی ایمراطورلق پروسیا قراللیغک (چولفهراین) حدودینه قدر بویومه سندن باشقه بر شی دکلدی .

یکی آلمان ایمراطورلغی نه عرق ، نه ده اختیاری بر ملیت اساسنه مستنددی . آوستریاده کی سکز میلیون آلمانی خارجه بر اقدینی کبی پروسیا قراللیک تبهمه سی اولق اوزره الحاق اولونان ایکی میلیون اسلاو پولونیالی بی ده کندی ارسنه ادخال ایلشدر . بوندن باشقه پولونیالیلر ، هانوورالیلر ، دانیمارقه لیلر و آزاسلیلر کبی متادیاً اعتراض ایدن قوملرده زورله ادخال ایدلشدر .

اصول حکومتده تبدلات

اورویاده پارلمنتو اصولنک ترقیسی . - ۱۸۴۸ده پارلمنتو اصولی تام بر صورتده یالکز انکلتزه ، فرانسه و بلجیقاده ؛ نا تمام بر صورتده آلمانیاک درجه ثانیه ده کی حکومتلری ایله فلمنکده ؛ ظاهری بر صورتده اسپانیا و پورتگیزیده تطبیق ایدیلیوردی . جنوبی آلمانیاک بعض حکومتلری مستثنی اولق اوزره پارلمنتو اصولی اورویانک نه مرکز ، نه ده شرق طرفلرنده هنوز انتشار ایتمه مشدی .

فقط ۱۸۴۸ انقلابی ، روسیه مستثنی اولق اوزره ، مطلقیت اداره بی حائر مملکتلرک کافه سنی صارسدی . عریده لردن دوچار

دهشت اولان حكومتلر قانون اساسيلر اعلان ايدرك مؤسسار
مجلسلري اجتماع ايتيرديلر . بروسيا ، آوستريا و مجارستانده
بر مجلس مؤسسار ، آلمانياده بر پارلمنتو ، بونون ايتاليا حكو-
مترلندهده قانون اساسيلر اعلان ايدلدي . فقط حكومتلر يك
چابق كنديلرينه امنيت حاصل ايتديلر ، اولجه ويردكلريني
۱۸۴۹ ده درحال استرداد ايديلر .

بناء عليه بو حركاتك اثرى اولارق يالكز فلمنكده ۱۸۴۸ ده
تشكيل اولونان پارلمنتو اصولى ايله ساردنيا قراللىقك يارلمنتو
اصولى ، روسيانكده ۱۸۵۰ قانون اساسيسى قلابيلدي . بو
قانون اساسى بلجيقا قانون اساسيسنك تقليدى اولان ۱۸۴۸
قانون اساسيسنك عيني ايدى . بوندهده قانون نظرنده مساوات
و هر خصوصده حریت شخصيه اعلان اولونيور ، سه نيورلر
مجلسندن مركب بر پارلمنتو ايله، منتخب بر مجلس مبعوثان تاسيس
ايديليور ، فقط قرال فعلاً مطلقيتي حائر بولونيوردي .

۱۸۴۸ حركاتنه قارشى اجتماع ۱۸۶۰ . قدر دوام ايتدى .
بورژوا صنفى چوغالوبده كسب ثروت و تنوير افكار ايتدكجه
اوتاريخدن اعتباراً اداره مشروطهده غايت چابق ترقى ايتدى . -
غريبك اك متمدن مملكتلري اول امرده اداره مشروطه ايجون
بر مثال ايدى . - صوكره مى حركتلهده التزام اولونيوردي . -
مطلقيت اداره نك تاسسنه چالیشان آوستريانك ضعفنندنده
استفاده ايدلدي . بونك اوزرينه ۱۸۶۰ - ۶۱ ده ايتيلاده ،

۱۸۶۲ دن ۱۸۶۷ به قدر آوستریاده ، ۱۸۶۶ ده مجارستانده پارلمنتو اصولی تاسیس ایدلدی .

اداره مشروطه نك تاسس ایتدیکی مملکتلرده قرال ایله اعیان مجلسنك نفوذی کیتدیجه آزالدی . اتخنا بله طوبیلانان مجلس مبعوثانك نفوذی ایسه کتدیجه آرتدی . ملتک حاکمیتی اوکنده حکمدارک حاکمیتی کاملاً زائل اولدی . هر یرده قوت ایکی مجلسک آئنده قالدی . اهل وطنک حقوقی قانون اساسی ایله تنظیم ایدلدی . مطبوعات سربست اولدی . مطلقیت اداره فرقه سندن اثر قالمادی . بوتون ارباب سیاست ، حتی حکمدارلر ، هپ مشروطیت اساسلرینی قبول ایتدیلر . یکدیگرینه مخالف فرقه لره آرتق اوندن صوکره (محافظه کار) و (احرار) نامی ویرلدی . اختلاف یالکز نسللاً ویا ثروتاً اسکی کبار صنفنه منسوب عائله لرك حائز اولاجق لری نفوذ حقنده وقوعه کلدی (بونلره اداره امور ایدن صنفلر نامی ویرلدی) .

اورویاده یالکز بر مملکت اون یدنجی عصرک اداره مطلقه سنی محافظه ایتدی ؛ اوده روسیه ایدی . بوراده اداره حکومت منتخب بر مجلس مبعوثان اولمادن چارک ناظرلری طرفندن ایفا ایدیلردی (ولایتلرده مشاوره مجلسلری ده آرتق انعقاد ایتیموردی) . غزته لر سانسوره تابعدی . ضابطه حسیات انقلابجویانه بسله مکله مظنون کیمسه لری بلا محاکمه «اداره» سربیا به نفی ایدیوردی .

آلمانیا ایمپراطور لښه کلنجه، بوراسی ۱۸۶۶ دن بری ایکیسی اورته سی براداره آلتنده ایدی. آلمانیاک عمومی بر پارلمنتوسی (رایخستاغ)، ایله هر حکومتده اهالی طرفدن منتخب وویرکو تصدیقی ایله مکلف خصوصی پارلمنتولری (لانداغ) لری واردی. فقط آلمانیاده حاکمیت پارلمنتوده دکلدی. ایمپراطور، پروسیا خاندان قرالیسی عنعناتنه نظراً حاکمیتی کنديسنده عد ایلدیکی کبی کنديسنی ده رایخستاغک فوقده عد ایدر.

راديقال فرقیسی. — مشروطیت فرقه سی عنعناتندن بستیون قطع علاقه ایتمک ایسته میور، اسکی اصولده اداره حکومتده دوام ایلمسینی و بوتون ایشلری کورمک ساده، ملنک آئنده اولماسینی موافق کورویوردی. بوفرده ایجابنده ملنک حکومته آرزوسینی قبول ایستیره بیلمسی ایچون نه کبی اصلاحات لازمه اونلرک یایلماسینی طلب ایدیوردی.

فقط ۱۸۳۰ سنه لینه طوغرو دیکر بفرقه دهاتشکل ایتمک باشلادی. بوفرده یالکنز پارچه پارچه اصلاحات ایله اکتفا ایتمیور، اصول حکومتده راديقال (اساسندن) برتبدل اجراسینی طلب ایدیوردی. ایشته بوفرقه یه (راديقال فرقه سی) نامی ویرلدی. بوفرقه اولو (۱۸۱۵ دن اعتباراً) انکلتره واسویچرده، دها صوکره اوروپانک غرب مملکتلرنده تشکل ایئدی. راديقال فرقه سی، هر مملکتده مجلس مبعوثانده اکثریتی قازانمق و حکومتی کندی قواعد اساسیه سنه کوره تنسیق ایتمک ایچون منتخبلر جلبه چالیشیر.

عنعنانه قطعاً اهمیت ویرمز . قاعدهٔ اساسیہ سی دە شودر: برملت کمندینی اسکی قاعده لوله اداره ایتدیرمه ملی ، حال حاضرہ موافق بکی بکی قاعده لر تاسیس ایتلمیدر . بر قسمی بوقاعده لری انسانیت وعدالتدن استخراج ایدیورلر (کہ فرانسز رادیقاللرینک اصولی بالخاصہ بودر) ، بر قسمی دە عنمدن استخراج ایتمک ایستیورلر (بودہ انکلیز رادیقاللرینک اصولیدر) . بوسبیدن نہ کبی بر اصول اداره تاسیس ایتمک لازم کله جکی حقننده رادیقاللرک افکاری مختلفدر .

کذا ادارهٔ حکومتک فایہ سی حقننده ده فکر لری مختلفدر ؛ ہم اودرجه مختلفدر کہ بونلر نتیجہ ده یکدیگری نہ ضد ایکی نظریہ به منجر اولور .

بونلردن بر قسمی ، ادارهٔ حکومتک غایهٔ قطعیمی اشخاصک حریتنی تأمین ایلکدن عبارتدر ، دیورلر . بونلرک فکر نیجه انسانلر کمال آزادی ایله تکمل ایتمکه براقیلر لسه دها مسعود ، دها فعال اولورلر ، ودهاز یاده ترقی ایدرلر . هیئت اجتماعیہ ، نظامنا- مه لردن زیادہ کندی کندینه دها مکمل کسب انظام ایدر . حکومت یالکز هر شخصک حریتنی تأمین ایتمک ایچون تدایر اتخاذا ایتمکه اکتفا ایللمیدر . سائرلرک حریتنی وقایه ایچون هیچ کیمسه بی لزومندن فضله اجبار ایتمه ملیدر . حکومت ، بر مدافعهٔ مقابله مؤسسہ سیدر . جمعیات ایچون فائده سی اولاجق ایشلری اوزرینه آلملمیدر . او ، بو کبی ایشلرده علاقہ دار اولان اشخاصک

وظیفہ سیدر . بناءً عليه اشخاصك حریتہ تجاوز ایتمکہ متمایل اولماق ایچون حکومتك ضعیف اولسی اقتضا ایدر . ایشته (لیبه رال رادیقاللر) ك نظر به سی بوندن عبارتدر .

مخالقین نظر به سنده ده : حکومتك وظیفه سی انسانلری مسعود قیلمق وعدالتی حکم فرما ایلمکدر فکری اساس طوتولمشدر . بونظریه به کوره حکومت عمومك منافعه اولمق اوزره هر شیئی تنظیم ایتمک حقنه مالکدر . چونکه حکومت به بوصلاحتی ، حاکم اولان ملت ویرمشدر . اشخاصك حریتی حکومتك ایفای وظیفه ایتمسینه مانع اولورسه حکومت بوحریته مطلقا رایته مجبور دکلددر . شخصصك حکومته قارشی حقوقی بوقدر . بناءً عليه اشخاصك مقاومتنی قیرمق ایچون حکومتك قوتلی اولماسی اقتضا ایدر . ایشته بوده اوطوریتهر (صلاحیت طرفداری) رادیقاللر ك نظر به سیدر .

بوایکی نظریه یکدیگرینه مخالف ایکی حسه مطابقدر که انلر كده بری حب ترقی ، دیگری حب انتظامدر . احرار ، نامتناهی برترقی آرزو سنده درلر . اوطوریتهر لر ایسه مکمل بر هیئت اجتماعیه آرزو ایدر ك ترقی بی آنجق درجه مکملیته کلدکن صوکره موافق بولیورلر . — مع مافیہ بوایکی مفراط نظریه بیننده افکار متوسطه ده موجوددر . لیبه رال رادیقاللردن بر قسمی ، حکومتك وظیفه سی یالکز صاحب ومسالمتی ادامه ایتمک دکلددر ، هیئات اجتماعیه به تابع اولمق به برابر منفرد کیمسه لر ك بالذات یا بمقدہ علاقہ دار اولمدق لری بوتون ایشلرده توسل ایلمکدر . حکومت کوپرولر ، لیانلر ،

یوللر انشاسنی ، اورمانلرک محافظه سنی ، مؤسسات علمیه و تدریسیه به نظارتی ده تعهد ایتلملدر (۱). یالکز، حکومتک مذاهبه ده نظارت ایدوب ایتمه مسنده ائتلاف افکار موجود دکلدر . بوبابده اک عمومی نظریه کلیسانک حکومتدن آیرماسیدر .

اورویا رادیقاللرینک اکثریتی اوطوریته رشعبه سنه منسوبدر . آرای عمومی . — پارلمنتو اصولنده قاعده اساسیه ، قوت دائمانتخب بر پارلمنتونک آندمدر . فقط بوتون اهلینک حق انتخابه مالک اولماسنه وبوتون منتخبلرک مساوی برحق رأی حائر بولونماسنه لزوم یوقدر . انکلترده یالکز بویوک املاک صاحببری ایله بویوک مستأجرلر حق انتخابه مالک بولونیور ، بربورغ منتخبنک رای برقونتلق منتخبنک رایندن ده نافذ عداولونیوردی .

بناء علیه انکلز لرک پارلمنتو اصولنی قبول ایدن مملکتلرک کافه سی ده حق انتخابی قانوناً معین اولان (حق انتخاب رسمی) نی ویرن اهالی به حصر ایتشلردی . یالکز بور رسمی ویرن لر رأی ویره بیلیرلر ، یالکز اونلر انتخاب اولونورلر ، اداره حکومته یالکز اونلر اشتراک ایدم بیلیرلردی . (وطن مشروع) ی یالکز بونلر تشکیل ایدرلردی . دیگر لرینک ایسه رأیلرینه مراجعت ایدلمزدی . ایشته (آرای محدوده) اصولی دیه بوکا دیرلردی .

فقط حاکمیت تامه طرفدارلری بواصوله قارشى هرکسک منتخب اولابیللمسنى تأمین ایدن (آرای عمومی) بی قبول ایتشلردی .

آرای عمومییه بدایتده یالکزاسویجره قضاالزنده تطبیق ایدیلردی. بوراده قرون وسطادن بری تطبیق اولوندینی کبی آمریقا حکومات متحده سنهده ۱۷۸۳ ایله ۱۸۳۰ بیننده تدریجاً داخل اولمشدی. فرانسه جمهوریت پرورلری ده ۱۷۹۲ ده تطبیق ایتمشلردی. فقط فرانسهده بو اصولدن پک چابق واز کچمشلردی. بناءً علیه رادیقاللر قانون نظرنده مساوات قاعده سنی اساس اتخاذایدرک بوتون مملکتلرده بو اصولک تطبیقنی طلب ایلشلردر.

آرای عمومییه فرانسهده ۱۸۴۸ انقلابی سایه سنده بردنبره تاسیس ایتمش، آلمانیا دهده پروسیانک مظفریتلرندن صوکره (۱۸۶۱) اتحادی تاسیسه مدار اولاجق ظن ایتدیکی ایچون باش وکیل یسمارق طرفندن تاسیس ایدلشدر. سائر مملکتلرده، آرای محدودده اساسنی بر اقامقله برابر بوتون اهالی یاواش یاواش هیئت انتخابیه داخل اولاییله جک وجه ایله حق رأی کیتدکجه توسیع ایلشلردر. آز بر زمان صوکره انکلتزدهده ۱۸۶۵ و ۱۸۸۵ ده یاپیلان ایکی اصلاحات، هر مؤجره حق انتخاب بخش ایدنجه حق انتخابده بستیون عمومی اولمشدر. انکلتزدهده حق انتخاب خارجنده قالانلر، کویلرده کی کونده لکجیلردر (انکلتزدهده حق انتخابه مالک اولیانلرک مقداری ۱,۸۰۰,۰۰۰ قدر تخمین ایدلمکده در). ایتالیا ده سار دنیاقر اللغنگ قانون اساسیسنده موجود حق انتخاب رسمی ۱۸۸۲ ده تنزیل ایدلش، اووجه ایله که منتخبلرک مقداری یارم میلیوندن ایکی یچق ملیونه چیقمشدر. اسپانیا ده ۱۸۶۸

انقلاب‌بندن صوکره تأسس ایدن آرای عمومیہ ۱۸۷۴ ره ستورا۔ سیونندن صوکره لغو ایدلمش ایسه ده (۱۸۹۰د) صوکره تکرار تأسیس ایدلمشدر۔ - هیچ بر مملکتده آرتق یوکسک برحق انتخاب رسمی قلامشدر .

طوغرورده طوغریه مجلس مبعوثانه طرفنده اداره حکومت . - جمهوریت حالنده شکل ایدن حکومتلرده حاکمیت ملیہ قاعده سی پارلمنتو اصولندن بسبتون باشقه ایکی نوع طرز حکومت میدانه چیقارمشدر . حکومت متفقده (ایکی درجه انتخاب ایله) ملت بر (رئیس جمهور) انتخاب ایدر ، بو رئیس درت سنه مدتله اداره حکومت ایلر . ناظرلر یالکزر رئیس جمهورک کاتبلرندن عبارتدر . بونلر رئیس جمهور طرفندن انتخاب ایدلکلری کبی مجلس مبعوثانه قارشی ده مسئول دکلدلرلر . قوانینک تنظیمی و ویرکولرک تصدیق (قونفره) یه عاندر . مامورلری نصب و قوه اجرائیه بی ایفا ایلمک رئیسک وظیفه سیدر . قونفره ایله رئیس جمهورک هر ایکسی ده حاکم و مستقلدر . قونفره رئیس جمهور علیهنده رأی ویرمکه رئیس جمهوری دوشوره مدیک کبی رئیس ده قونفره بی طاغیتمق صلاحیتنی حازر دکلدر . - بواصول اداره ، پارلمنتو اصولنده کندن دها زیاده حکومتی مجلس مبعوثانه تابع اولمقدن قورتاریر . فی الحقیقه حکومت متحده آمریکاده هر حکومت امور عامه بی بالذات تسویه ایلدیکی ایچون حکومت مرکزیه یه پک آز بر وظیفه قالمش اولور .

اليوم پارلمنتو اصولی اسکیدکجه و مجلس مبعوثان ده قوتلندکجه، اصول اداره ده تبدل ایدیور. حتی یاواش یاواش مجلس مبعوثانی ناظرلری ده انتخاب ایتک، انلری دوشورمک و ناظرلره امرلر ویرمک صلاحیتینی ده حائز بولوندیراجق بر اصوله تقرب ایدیلیور. ارتق او زمان هیچ قاینه فلان موجود بولونماز، یالکیز مجلس مبعوثانک ارزولرینی اجرا ایده جک ناظرلر اولور. ایشته بوکا طوغرودن طوغروهیه مجلس مبعوثان طرفندن اداره حکومت دیرلر. بو اصول فرانسه ده (قونوانسیون) طرفندن تطبیق ایدلمشدر. فقط بو اصول پارلمنتو اصولندن بساتون باشقه در. پارلمنتو اصولنک اساسنه نظراً، ناظرلری اکثریت فرقه سنک رئیسی کندی رفقاسندن انتخاب ایدر، بوتون اموری قاینه نك سیاستیه حقنده تنظیم اولونان پلانه کوره تسویه ایلر. مجلس مبعوثان قاینه نك سیاستنی تصویب ایتمزسه علیهنده رأی ویره رک قاینه یی سقوط ایتدیره بیلیر. فقط قاینه یه طوغرودن طوغروهیه امر ایده میه جکی کی قاینه نك خط حرکتینی ده تعیین ایده مز. مجلس وکلا رئیسی عادتاً مجلس مبعوثان طرفندن اداره حکومته مأمور ایدلمش بر ملتزم کییدر. بناء علیه اداره حکومت ایچون مجلس مبعوثانده دائماً قاینه لهنده رأی ویرمکه عزم ایتمش ثابت بر اکثریت بولونمق اقتضا ایدر.

پارلمنتوده ایکی فرقه بولوندکجه بونلردن دائماً بری اکثریتی حائزدر. انکلترده تمام بر بچق عصردن بری هپ بویله در.

فقط برجوق فرقه لر بولونان مملکتلرده اکثریتی محافظه ایتمک
مشکلدر . چونکه یالکز بر فرقه نك اکثریتی دیگر فرقه لرك
مجموعه فائق اولمادجه ، قاینه یه مخالف اولان فرقه لر هپ بریره
کله رك قاینه علیهنده رأی ویره بیله جکلری کبی بر (قو آلیسیون ،
اتحاد) ده تشکیل ایدر لر . او زمان قاینه سقوط ایدر ، ویکی
قاینه ده اکثریتی حائز اولامه جنی ایچون بو قاینه نك هانکی
فرقه دن انتخاب اولوناجنی بیلنه من . انکلترده اسکی ایکی
فرقه ایله برابر بر ایرلاندا ، برده رادیقال فرقه سی ظهور ایدنجه
عین حال وقوعه کلشدر . ایشته او زمان پارلمنتو ایله اداره
حکومت کتدکجه کسب مشکلات ایدر ، و بونک یرینه طوغرودن
طوغروه مجلس مبعونان طرفندن اداره حکومت اصولی قائم
اولمش اولور (۱) .

(۲) اسویچرده یکی طرزده بر اداره حکومت ، طوغرودن طوغروه
ملت واسطه سیله اداره حکومت اصولی (ره فهرانوم) و (اینی سیاتیو)
طرزنده تجربه ایدلشدر . فقط بو ، یکی بر اصول سیاستک عادتاتخی
مناه سنده در .

اون اوچنچى فصل

دولت عثمانیه نك انقسامى (*)

اونه طغوزنجى عصرده دولت عثمانیه . — قرون وسطى
نهایتلرینه طوغزو عثمانلى پادشاهلری طرفندن تأسیس اولونان
عثمانلى دولتی ، اراضیء وسیه سنی تمامیله محافظه ایلشدی . بو
اراضی : آوروپاده بوتون بالقان شبه جزیره سی ایله طونه نك
شمالنده رومانیا (بونلرک کافه سنه روم ایلی تعبیر ایدیلیوردی) ؛
آسیاده آسیای صغری ایله ایرانه قدر بوتون فرات ممالکی
(آناتولی) ، سوریه و عربستان ؛ آفریقاده مصر و طرابلس
ضربدن عبارتدی . فقط اون یدنجی عصردن بری اساسلری
بوزولان عثمانلى امپراطورلنی همان انقراضه یوزطومش کیدی .
بوتون شرق دولترلنده اولدینی کبی حکومت عثمانیه ده
مستبدانه وغیرمنتظم بر اصولده اداره اولونیوردی . بوتون
صلاحیت ، کیفی بر صورتده پادشاهک النده ایدی . فقط پادشاه
سرایندن طیشاری چیقما دینی و امور دولندن ده خبردار
اولما دینی ایچون ادارهء حکومت بر وزیر ایله پادشاهک بندکانندن
انتخاب اولونمش دوائر رؤسانه تودیع ایدلشدی . اردو :
سواریلر (سپاهیلر) ایله پیاده لر (یکچریلر) دن مرکب دی .
سواریلر کندیلرینه حکمدار طرفندن ویریلن مراضیدن
(*) کتابک اساسنی بوزماق ایچون عیناً ترجمه ایدلشدر .

یاشارلردی . پیاده ۱۹۹ اورتیه تفریق ایدلش اولدینی حالده (استانبول) ده کی قیشله لرده اوطوروردی . فقط آرتق سپاهیلر هیچ بر ایش کورمدکلری کبی یکچریلرده پادشاهک اسراسندن انتخاب اولوناجقلری وتاهلده ایتیه جکلری حالده تاهل ایدیورلر ، یرلرینی اولادلرینه بر اقیورلر ، اونلرده بونی ارئی بر ماموریت عد ایدرک عین زمانده باشقه بر صنعتلده مشغول اولیورلردی . ده اطوغروسی بونلر حربده غایت مضر ، حضرده پاطیرتیجی ، پادشاهی عادتا بر اسیر کبی سرایندن چیقارتیمان بر قطعدهن باشقه بر شی دکلدی .

هر ولایتده استانبولدن منصوب بر والی بولونوردی . بو والی بوتون صلاحیتیه مالک اولدینی کبی پاشا عنواتی ده حائزدی . پاشالر ، پادشاهک بندکانندن معدوددی . پادشاه ایسترسه بر امرله بونلرک قفالرینی کسدیرر ، سرایه کندی حضورینه کتیرتیردی . فقط بونلردن بر چونغی والیلکی پادشاهک کوزده لرندن رشوتله آلیرلر ، بو کوزده لر عزل ونصبده قاریشیرلردی . اکثریا اردو قوماندانلغی ایدنلرک استانبولدن کلن امرله قارشی عصیان ایتدکلری ده واقع اولوردی .

امورمالیه اسکیدن نصلسه اوپله ، غایت بایاغی بر صورتده قالمشدی . منتظم اصول محاسبات ، سبجالات یوقدی ؛ اوراق هب بر طوربه یه طولدیریلردی . بودجهده یوقدی . پادشاه

ایله بندکائی خزینه دن ایستدکلری قدر باره آلابیلردی .
 اصول جبايت ده موجود دکلدی . واردات ، یعنی خرستیانلرله
 موسویلردن آلتان ویرکی ، خزینه خاصه وارداتی ، امتعه دن
 آلتان کمرک هپرسومی ملتزم لره احاله ایدیلیر ، بونلر ده اهانلنک
 جانی چیقارلردی .

شرقه مخصوص اولان بو مستبدانه اداره لرك بوتون
 فنالقرینه ، حکومت عثمانیه نك طبعنه مخصوص بر طاقم اسباب
 ضعفده انضمام ایتشدی . دولت عثمانیه صرف اسلام بردولتدی .
 پادشاه خلیفه عد اولوندینی ایچون عین زمانده رئیس روحانی
 ایدی . بوتون ممالک اسلامیه ده اولدینی کبی بوراده قرآن کریم دینی ،
 مدنی و سیاسی یکانه قانوندن عبارتدی . حکومت شریعتنه
 تابعدی . دین مجبوری ایدی . تنصر ایدن هر اسلام ، حکومت
 طرفدن اعدام اولونوردی . - عثمانلی ملتنی یالکز اسلام
 اولانلر تشکیل ایدیوردی . فقط کندی اراضیلری اوزرنده
 خرستیانلردن باشقه سنه مساحتده بولونمیان قرون وسطی
 خرستیان حکومتلردن بسبتون باشقه اولوق اوزره اسلاملر
 کندی آره لرنده غیر مسلملرک (عیسوی و موسویلرک) ده
 بولونماسنه مساعده ایدیورلردی . غیر مسلملر اهل وطندن معدود
 اولمادکلری ایچون هر درلو حقوق سیاسیه دن محروم ، حکومتک
 قانونی قرآن کریم اولدینی ایچون قانوندن ده خارج و آشانغی
 بر مرتبه ده یاشارلردی . بونلره (رعایا) نامی ویریلردی .

غیرمسلم خراجہ و آنفاریہ بہ تابعدی . بونلر اردویہ و حکومت ماموریتنہ قبول ایدلزلردی .

مع مافیہ عرقہ قطعاً اہمیت ویرلمزدی . ملت مغلوبہ افراندن اوروبالی برخرستیان اسلام اولورا اولماز در حال تورک برمسلمانلہ مساوی اولوردی . مسلملرینندہ عدم مساوات ایسہ قرآن کریمہ منافی ایدی . ایستہ بوصورتلہ آرناوودلردن ، اسلاولردن (بوشناق لہ بلغارستاندہ کی پوماق لکچی) برچوق مسلمان واردی . بناء علیہ حکومت عثمانیہ دہ ہم حاکمیت عامہ اساسنہ ، ہم دہ آریستوقراسی اساسنہ مستند برتشکیلات واردی . مملکتدہ مساوات تامہ موجوددی . فقط بوبہ مساوات یالکوز اسلاملر آرسندہ ایدی . مسلم اولانلر غیرمسلملرہ نظر آدینی بر آریستوقراسی تشکیل ایدیورلردی .

ایستہ بو صورتلہ ہیئت اجتماعیہ بالضرورہ غیرمساوی ایکی صنفہ (مسلم ورتایا صنفنہ) آیرلمشدی . بو ایکی صنف یکدیگریلہ امتزاج ایدہ مدیکی کی بربرینہ قارشیدہ دائما خصم اولارق قالیوردی .

پادشاہک یالکوز مسلملرہ اعتمادی واردی . بناء علیہ دوچار ظلم اولان خرستیانلرک صادق برتبعہ اولامیہ جقدر طبیعی ایدی . بونککہ برابر حکومت غیرمسلملری تحت انقیادہ آملقلہ برابر انلرک تشکیلاتنہ ہیچ طوقونماشدی . خرستیانلر دینلرنی ، لسانلرنی ، عادتلرنی ، حتی رهبان صنفلری ایلہ کویلرنندہ کی اصول ادارہ بی

بیه محافظه ایتمشردی. آیاصوفیه کلیسا سنده کی رسملر سلطان محمد ثانی طرفندن اوزرلرینه سورولن بادانه لر آلتنده نصل قالمش رسه اون بشنجی عصرک خرستیان اقوامی ده پادشاهلرک حاکمیتی آلتنده او یله قالمشردی .

آناطولیده اکثریت اهالی بی تورکلر واسلاملر تشکیل ایدیوردی . اوفاق اوفاق جماعتلر حالنده طاغیلمش ، غایت مسالمت پرور ، عصیانه غیرمقتدر روملر، یهودیلر وارمنیلردن باشقه رعایا موجود دکلدی . روم ایلیده اسلاملرک مقداری آز ایدی. فقط پادشاهلرک تحت انقیاده آلمق ایچون برعصرمدت اوغراشدقلری او اوفاق اوفاق خرستیان ملتلری هپ اسلاملرک مادوننده بولونیوردی .

طونونه نك شمالنده رومانیا لیلر یالکنز خر جکذار بولونیورلردی . فقط بونلر اون یدنجی عصردن بری فنار روملری طرفندن اداره اولونورلردی . فنار لیلر بوماموریتی آلمق ایچون حکومت عثمانیه یه یارمویرلردی . بومملکتلره یرلشمش مسلمان یوقدی .

طونونه نك جنوبنده ، بوتون اراضی یه صاحب اولان عثمانلی عسکرلری واسطه سیله پک آغز صورتده چالیشدیریلان صربلر ، کویولردن مرکب برملت تشکیل ایدیورلردی . شرق قومشولری بولونان بلغارلرده بالفان طاغلرینک ایکی سطح مائل اوزرنده بلغارستان ، روم ایلی وما کدونیا ولایتلرینی اشغال ایدیورلردی . بونلرده کویولردن عبارتدی . فقط مملکتک کندیلرندن باشقه اهالیسی

یوقدی . دها کزیده کی طاغیرده دین و شرائط حیاتیه بسبتون قاریشیددی . بوسنه اسلاوا اولار قالمش ، فقط اسلاو بوشناق لک هان یاریسی اون بشنجه عصرده اسلام اوله رق خرسیتیان کویلو لری اسارت آلتنده بولوندر اراق درجهده قوتلی وزنکین بر جنکاور صنفی تشکیل ایلمشردی .

(آپیر) ده ینه اسکی اهالی (آرن اوود لر) ، واسکی یونانجه یه یاقین لسان تماماً قالمشدی . آرن اوود لر دن بر قسمی اسلام اولمش ، بر قسمی خرسیتیان قالمشدی . فقط جمله سی ده عادت لری نی محافظه ایتمشردی . بونلر طاغیر نده یاری کویلو ، یاری اشقیا ، هان هان مستقل ، اوافق اوافق بکلک لک تشکیل ای دیور لردی . حکومت عثمانیه بونلری سلاح آلتنه آلتنه جق لری زمان دعوت ایتمکدن باشقه بر شی یایموردی .

جنوبده و جزائر بحر سفیده کی روملر بر ملت تشکیل ایتمشردی . بونلرک زیاده تحصیل کورمش اولان لری کن دیرینه اسکی یونانیا لک احقادی نظریله باقعه باشلامشردی .

ایشته بوتون بواقوام هپ قوت یار دیمیله تحت انقیاده لشمشردی . بناء علیه تحت انقیاده بولون دیر یلا بیلملری ده انجق قوتله اولابیلردی .

بوندن باشقه ، دولت عثمانیه بر اسلام دولتی اولمق صفتیه اورویانک خرسیتیان آهنگ دولیسنه هیچ بر زمان قبول ای دلمه مشدی . خرسیتیان حکمدار لر هان بر عااله تشکیل ای دیور لردی .

عثمانلی پادشاهی ایسه یابانچی قالپوردی . عثمانلی پادشاهنك یالکیز برمتفتی واردی ، اوده فرانسه قرالی ایدی . عثمانلی پادشاهی آوروپا په فتوحاتله یرلشمشدی . بناء علیه دیگر حکمدار لر اونی آوروپا دن قوت یار دیميله ینه چیقار ایلیردی . ممالک عثمانیه حقوق بین الملل خار جنده ، هر کسک اشغال ایده بيله چکی منحل بر مالکانه ایدی . ۱۷۸۷ ده روسیه و آوستریا حکومتری روم ایلی پی ضبط ایدوب پایلاشمق ایچون اتفاق ایتمشردی .

ایشته بوصورتله حکومت عثمانیه بر چوق تهلهکه لره معروضدی . اولنجه : استانبولده یکدیچری پاطیر دیلری ، ولایاتده باشالرک عصیانلری ، ملل خرستیانیه نك آیاقلانماسی ، روسیه ویا آوستریانک استیلا سندن عبارتدی .

آوروپانک فرانسه په فارشی اجر ایتدیکی حر بلر ائناسنده آوروپا جهتمندن تهلهکه بسبتون آزالدی . آوستریا حکومتی غربله مشغول اولنجه ، شرق طرفدن توسیع اراضی فکرندن واز کچدی . آوستریانک طونه اوزرنده کی منافعی اونوتدی . دولت عثمانیه پی ضبط ایدمه جک یرده بقاسنی التزام ایتدی . اوزمانه قدر شرق ایشلریله اودرجه مشغول اولمیان انکلهترده ، فرانسرک مصر سفری اوزرینه عثمانلی پادشاهی ایله اتفاقه مجبور اولدی . انکلیزلر دهاصوکره هند فتوحاتی بسبتون بیتیرنجه آوروپا دولتلرینی یعنی فرانسه ایله روسیه پی شرق ایشلرندن اوزاق بولوندیرمق فکرینه بسبتون آلیشدیلر . آرتق اوتاریخدن اعتباراً حکومت عثمانیه نك بقاسنی

ارزوایدن اوچ متفق بولونیوردی ؛ اولنرده فرانسه ، آوستریا وانکلترمایدی . یالکز بردشمنی قالمشدی . اوده روسیه ایدی . روسیه رومانیا یی ضبط ایتک ایسته مش (۱۸۰۶ - ۱۲) ، فقط فرانسه یه قارشی اجرا اولونان حربلردن طولایی چار استیلا پروژهلرینی تأخیره مجبور اولمشدی .

اوده طرفلریمجه عصرده شرق مسئله سی . — ۱۸۱۴ ده آوروپاده صلح تاسس ایتدیکی زمان دولت عثمانیه ، آوروپادول معظمه سی بیننده منازع فیه بر مسئله شکلنی آلدی . آوستریا حکومتی ویانه قونفره سنده عثمانلی پادشاهی اداره سنده بولونان اراضینک تمامیتی تأمین ایدلمسنی تکلیف ایتمشدی . شو حالده دولت عثمانیه ده آوروپا آهنگ دولیسنه داخل اولمش بولونیوردی . فقط روسیه بونی رد ایتدی . دولت عثمانیه حقوق بین الملل خارچنده ، انقسام تهلیکسنه معروض بر حالده قالدی . فقط بو واسع ایمپراطورلنی تشکیل ایدن اراضینک مقدراتنده دول معظمه دن هر برینک علاقه سی اولدینی ایچون جمله سی ده شرق امورینک تسویه سنده کندیلرینه مراجعت اولونماسنی ادعا ایدیورلردی . بناء علیه رجال حکومت ، دول معظمه دن بری تورکیه امورینه مداخله ایدر ایتمزدر حال ایشه قاریشمغه حاضر بولونمق ایچون عثمانلی دولتنده تبدلات وقوعه کتیرمک تهلیکسنی حاصل ایده جک بوتون وقایعی ، آوروپا حکومتلرینک بوتون تصورلرینی تعقیب ایتمک باشلادیلر . ۱۸۱۵ دن بری دیپلوماتلرک یکانه دوشونجه سنی بو (شرق مسئله سی) تشکیل

ایتدی (اوتاریخدن اعتباراً بوکا شرق مسئله‌سی نامی ویرلدی) .
 شرق مسئله‌سی شو طرزده موضوع بحث ایدله بیلوردی :
 دولت عثمانیه‌ی عجا محافظه‌می ایللی ، یوقسه تقسیم‌می ایتلی ؟
 شاید تقسیم ایتک لازمه او حالده ایکی مسئله واردی : اولاً
 تقسیم اولونان یرلر هانکی دولتک اولاجق ؟ ثانیاً : سلطانک
 تحت تابیتندم بولونان او اوفاق خرسیتیان ملتله اولاجق ؟ بو ایکی
 مسئله دن دیپلوماتلری الك زیاده اشغال ایدن ، برنجی مسئله ایدی .
 دیپلوماتلر حکمدار لردن باشقه کیمسه بی نظر اعتباره آمامغه آلیشمش
 اولدقلری ایچون تورکیه ده کی اقوامه او درجه اهمیت ویرمیور .
 لردی . بناء علیه یالکمز اور و یادولتلی اره سنده حصوله کله جک
 رقابتی دوشونیورلر ، هپسنگ ده متفقاً قبول ایده جکلری یکی
 بر چاره حل تحریسندن کندیلرینی قورنارمق ایچون حال
 حاضرک محافظه سنه غیرت ایدیورلردی . ایشته بوسبدن دول
 معظمه نك مداخله‌سی شرق مسئله‌سنی بیتمز توکنمز بر حاله
 کتیره شدر .

فقط دولت عثمانیه‌ی محافظه به دول معظمه‌ی مجبور ایتک ایچون
 دیپلوماتلرک ارزوسی خلافتنه اولارق عثمانلی پادشاهک نفوذ
 و قدرتی بر چوق دفعه لر اولدجه تهلکلی دشمنلر طرفندن
 تبدیل ایدلمش و هر دفعه سنده ده شرق مسئله‌سی یکی بر شکلده
 موضوع بحث اولمشدر .

اولاً : ۱۸۲۵ دن ۱۸۲۹ . قدر شرق مسئله‌سی یونانستان

مناسبتیله موضوع بحث اولدی . یونانیلر عصیان ایدرک اسلام عثمانیلره قارشى خرستیان دولتلرک حمایه سنی طلب ایملرلردی . مه تهرنیخ دول معظمه یی بو تکلیفی رده تشویق ایدیور ، حکومت عثمانیه نك ابقاسنه اهمیت ویریور ، یونانیلرک انقلابنه ، حکمدار مشروعلرینه برعصیان نظریله باقیوردی . فی الحقیقه مه تهرنیخ روسیه چاری آلکساندری ضبطه موفق اولدی . عثمانلی عسکری (ساقز) ده کی ساکن اهالی یی قلیجندن کچردی . استانبولده پادشاه اوچ بسقپوسله ۳ پاپاسی بللی باشلی کلیسارلردن برینک قابوسنه آصدیردی . مه تهرنیخ بوندن او درجه متأثر اولمادی . مشرق حدودیمزدن اوتده ۳ الی ۴۰۰,۰۰۰ کشینک آصیلماسنه ، بوغولماسنه ، قازیقلانماسنه او قدر اهمیت ویرم . « دییوردی . فقط اوروپا مملکتلرندن برچوغنده اهالی وبالخاصه منور الافکار کیمسه لر ، اسکی یونانیلرک احفادی اولان بو خرستیان ملتیه آجیدیلر . بونک اوزرینه (فیل الهن ، یونان محبلری) ندن مرکب جمعیتلر تشکیل ایدلدی . جنوره بانکرلرندن بری براغانه دفتری آجدی . یونانیلره یاره وسلاح کوندرلدی . فرانسز ، انکلیز و آلمان کولکلورلی یونانستانلی مدافعه ایچون یونانستانه کیتدیلر . صوکره یاواش یاواش اهالی ده رجال حکومتی یونانیلر لهنده مداخله یه مجبور ایتدیلر . یکی روسیه چاری نیقولا ، خرستیانلق مناسبتیله یونانیلری التزام ایتدی (۱۸۱۵) . روسیه وانکلتره حکومتلری ده دولت عثمانیه دن یونانستانک استقلالنی

طلب ایچون ائتلاف حاصل ایندیلهر. مذاکرات اوچ سنه قدر دوام ایندی. مختلف چاره‌لر بیان ایدلدی. باب عالی تمام اون درت دفعه بو تکلیف‌لری رد ایندی. یونانستانه بر دونانما ایله برابر مصر والیسنگ اردوسنی کوندردی. بونلر (موره) پی خراب ایدرک عصبانی یاتیشدیردیلر. بونک اوزرینه روسیه وانکلتره دولت‌لری فرانسه ایله برلشهرک بردونانما کوندردیلر. فقط بودونانما دولت عثمانیه ایله حرب ایتمکدن زیاده مصر دونانماسنی چکلمکه مجبور ایتمک ایچون کوندردلی (۱۸۲۷). ایشته ناوارین محاربه‌سی بو صورتله وقوعه کلدی. ۱۸۲۸ده چار، کندیسنگ نه فتوحات، نه‌ده انقلاب فکرنده بولونمادیغنی بیان ایدرک تورکیه‌یه قارشی ایکی اردو کوندردی. دولت عثمانیه یکیکچریلرک تخریبی اوزرینه دوچارضعف اولمشدی. عثمانلی حکمدارینک اوتهدن بری متفق‌لری بولونان انکلتره، فرانسه و آوستریا بوسفر دولت عثمانیه پی مدافعه‌یه جسارت ایدمه‌مدیلر (حتی فرانسه یونانیلره یاردم ایتمک ایچون موره‌یه بر قول اردو بیله کوندردی). روسلر ۱۸۲۹ده طوننه‌پی کچوب استانبول اوزرینه یورودیلر. پادشاه صلحه طالب اولدی. یونانستاندن واز کچدی. طوننده وچناق قلعه بوغازنده سر بستی سیرسفائی تمهد ایندی. روسیه تضمینات حربیه وعد ایلدی. فقط بو تضمینات حربیه‌پی ویره‌مدیکی ایچون روسیه‌نک تحکمی آلتنه دوشدی. ده‌ها طوغروسی دولت عثمانیه چارک حمایه‌سنه کیردی.

ثانیاً: ۱۸۳۱ دن ۱۸۳۳ . قدرده شرق مسئله سی مصر والیدی محمد علی پاشایه قارشی اجرا ایدیلن محاربه مناسبتیه موضوع بحث اولدی . محمد علی ، یونانیلره قارشی اجرا ایلدیکی سفره مقابل عکاوایلکنی آلد. ایتمشدی . فقط محمدعلینک شخصی دشمنی خسرو پاشا صدر اعظم اولنجه بوراسنک محمدعلی به ویرلسنه مانع اولدی . محمدعلی عکایی جبراً آلفه قرار ویردی . محمدعلی به عاصی نظریله باقلدی . فقط اردوسی سوریه بی ضبط ایدهرک پادشاهک اردوسی آناطولیده مغلوب ایتدی . پادشاه ، محمد علینک دشمنلری طرفندن وقوع بولان تشویقات اوزرینه روسیه دن یاردم ایسته دی . بر روس اردوسی استانبول اوکنه کلوب اردوگاه قوردی . انکلتره وفرانسه حکومتلری پادشاهک کاملاً روسیه تحکمی آتنه کیرمسندن قورقارق محمدعلی طرفندن تکلیف ایدیلن شرائط داخلنده یعنی سوریه بی قید حیات شرطیه محمدعلی به ترک ایدرک صلحی قبول ایتمکه راضی اولدیلر . دیگر طرفدن چار ، پادشاهه (خنسکار اسکله سی) معاهده سنی امضالاق ایچون نفوذندن استفاده ایتدی (۱۸۳۳) . بو معاهده موجبجه چار ایله پادشاه یکدیگرینی متقابلاً مدافعه ایده جکلرینی تعهد ایدیورلردی . فقط یالکز پادشاه روسیه به امداد ایچون عسکر کوندرمیه جک ، بوکا مقابل بوغازلری روسیه سفائن حربیه سنه آچیق بولوندر اچقدی . دها طوغروسو اتفاق نامی ویریلن بو معاهده دولت عثمانیه بی روسیه

حمایه‌سی التنه قویوردی .

ثالثا : شرق مسئله‌سی ۱۸۳۳ - ۴۰ ده تکرار محمدعلی پاشا یوزندن موضوع بحث اولدی . خسرو پاشا ، دجله طاغیرنده کی کردلره قارشی اجرا ایلدیکی سفردن عودتده سوریه به تعرض ایتشدی . حرب تکرار باشلامش ، ۱۸۳۳ ده اولدینی کی ینه محمد - علینک اردوسی غلبه ایدرک آسیای صغرایه استیلا ایلشدی . محمد علی متبوعی اولان پادشاهه قارشی حرب ایتدیکنی بیان ایدیور ، یالکز پادشاهک بندکانیله محاربه ایلور ، بونلری دوشوروب پادشاهک صدراعظمی کندیسی اولیق ایستیوردی . فقط بوسفر چارله برابر و چارله برلکده انکلتره حکومتی مداخله ایتدی . روسلر کی انکلیزلرده محمدعلینک دشمنی ایدی . روسلر ، حکومت عثمانیه بی‌اله کچیروبده قوتلندیرر و صوکره کندیلرینه قارشی قویاجق برحاله کتیرردیه قورقدقلری ایچون محمدعلی به دشمن اولیورلر ، انکلیزلرده محمدعلی برکره مصره حاکم اولدقن صوکره هندستان ایله موصلاتی قطع ایدردیه ایسته میورلردی . حتی پالمه رستون : « هندستانک اکز یاده متأثر اولابیله جکی بریر وارسه اوده مصردر » دیوردی . انکلتره ایله روسیه ، پروسیا و آوستریا ایله ده برلشیدیلر . بوسورتله بر (اتفاق مریبع) وجوده کلدی . متفقلر پادشاهی مدافعه ایدرک محمدعلی به مصردن چیقماسنی امر ایتدیلر . فرانسه ایسه بالعکس محمدعلی بی‌التزا ایدیور ، محمدعلی مصری تنسیق ایتدیکی کی تورکیه بی‌ده احیا ایدر امیدنده بولونیوردی .

بوسبیدن فرانسه دیگر دول معظمه ایله برلشمکدن امتناع ایتدی . شو صورتله بوتون اتفاق سیستمری آلت اوست اولدی . ۱۸۳۰ دن بری ایکی حکومت مشروطه . فرانسه وانکلتره حکومتری ، حکومت مطلقه قارشی اتفاق ایتش لردی . ۱۸۴۰ ده ایسه فرانسه ۱۸۱۴ ده اولدینی کبی اوج دوات معظمه ایله برله شن انکلتره حکومتنه قارشی تک باشنه قالمشدی . ناپولئون مفتونیتله پرورده اولان فرانسه احرار فرقه سی حرب ایستوردی . شو صورتله شرق مسئله سنی فرصت اتخاذا ایدرک ۱۸۱۵ معاهده لری فسخ اولونا جق ، رهن نهرینک صول ساحلی آله ایدیله چکدی . بو پولتیقه یی تی بهر قاینه سی ده التزام ایدیور ، محمدعلی بی راضی اولماغه تشویق ایدیوردی . فقط قرال صلح آرزو سنده بولوندینی کبی ذاتاً تی بهر ده آوروپا به قارشی حرب ایدمه جگنی بلیوردی . بناء علیه فرانسه حکومتی شرقد کی دونماسنی کری چکدی . انکلتره بردونما کوندردی . بودونما اتفاق مربع طرفندن تکلیف اولونان شرائطی قبوله یعنی سوریه بی براتغه محمدعلی بی مجبور ایتدی (۱۸۴۰) . روسیه نك دولت عثمانیه بی حمایه سی آلتنده بولندیر ماسنه مانع اولوق ایچون انکلتره حکومتی بر (بوغاز لر معاهده سی) عقد ایتدیردی (۱۸۴۰) . بو معاهده موجبنجه دول معظمه نك کافه سی قره دکنز بوغازی ایله چناق قلعه بوغازندن هیچ برسفینه خزیبه ادخال ایتمه کی تعهد ایتدیلر . کذا دولت عثمانیه اراضی سنک تمامیتنی ده وعدا ایلدیلر . بناء علیه آوروپانک هپ برلشوب مداخله ایتمی سایه سنده

دوات عثمانیه به هیچ برشی اولامش اولیوردی. دولت عثمانیه ایلک دفعه اولق اوزره بر آوروپا حکومتی عدایدیلیور، حقوق بین الملل ایله ده تمامی محافظه اولونیوردی.

دها سوکره حکومت عثمانیه آوروپا نظاماتندن بعضلرینی قبول ایدرک آوروپا دولترینه بکزه مکه و دولت عثمانیه پی قوتلشدیر مکه کندی چالیشمغه باشلادی. اصلاحات ۱۸۲۶ دن اعتبار آباشلامشدی. سلطان محمود کندیسنی، مملکتی مدنیت حاضره به ادخال ایتمش اولان بویوک پترویه بکزه تیوردی. حتی آوروپا لیره تقلید ایچون عشرت ایدیور، قرآن کریمده ممنوع اولدینی حالد و کلاس سنده عشرت ایتدیور، صقالک ایکی پارمقدن فضله اوزادلاماسی ایچون امر لور تیوردی. سلطان محمود بالخاصه آوروپا طرزنده براردو ایستیوردی. ۱۸۲۶ دن اعتبار آیکچریلردن کاملاً قور تولمشدی. سلطان محمود یکچیری قوماندانلریله سوزلشدکن سوکره یکی قطعه لره الحاق ایدلک اوزره هر بلو کدن یوز اللیش نفر انتخاب ایتملرینی امر ایتمش، بونک اوزرینه یکچریلر آیاقلانمش، حتی ایسته یلر قاچسینلردیه قیشله لرک آرقه قبولری آچیق بر اقلارق یکچیری قیشله لری طوپه طو تولمشدی. سوکره آوروپا اردولری طرزنده ۷۰۰۰۰ کیشلک براردو تشکیل ایدلشدی. بواردونک تشکیلنه یاردم ایدن پروسیاضا بلرندن مشهور مولتکه اردوی شو صورتله تصویر ایدیوردی: « بواردو قابو طلری روس، تعلیمنامه سی فرانسز، تفنکلری بلچیکا، صارق لری تورک، اکر لری مجار،

قلیدجری انکلیز، معلمری هرملتن، آوروپانیستمنده براردور. اویله براردوکه آرباب تجارتن، قیدحیات شرطیه عسکره کیرمش صف افرادندن، غیرمعین مدتله مکلف احتیاط عسکرندن مرکبدر. بو اردونک قوماندانلری عجمیلردن وبرکون اولکی دشمنلرک عجمیلردن یتشمشلردر.»

اولاسلطان محمد، دهاصوکرده خلفی نامنه اداره امورایدن رشیدپاشا دها اساسلی اصلاحاته تشبث ایتدی. استانبولده برصحیه قرآنده سی تأسیس و دکز فنارلری انشا ایتدیردی. یکنسق برکیرک تعرفه سی قبول ایتدیردی. بوتمرقه اجنبیلرک تورکیه ایله تجارتنده بولونمالرینه مدار اولدی (اوزمانه کلنجیه قدر امتعه، عائد اولدینی ملته کوره آیری آیری رسملره تابعدی). کذا مأمورینک معین برمعاش آلمالرنی ده قبول ایتدیردی. حتی دها ایلیسنه وارارق تورکیه ده حریت مدنیه اصولنی تأسیس ایتک ایستدی. ۲ تشرین ثانی ۱۸۳۹ ده باشلیجه ارکان دولته خرسنتیان کلیسائی رؤسائی و آوروپادیپلوتلرنی کلخانه سراینه طوبلادی. بونلره کمال دبدبه ایله بر (خطهایون) اوقوتدی. بوخطهایونده اصلاحات عمومیه و عایدیوردی. خطمذکورده بیان اولوندیغنه کوره تورکیه نک بوتون فلاکتلرینه سبب عادات قدیمه دن تباعد ایدلمش اولماسیدی. بونلری تعمیر و اصلاح ایچون یکی برقانون اساسی تنظیم ایتک لازمدی. (حکومت اسکی عادتلرینه آلآن رعایت ایدن اسکی تورکلرله اصلاحات تکلیفنده بولونان آوروپالیلر آرسنده قالمشدی.

بونک ایچون باش طرفی نهایتنی تقض ایدن بویله برجه ایله ایشدن صیرلق ایسته مشدی) . پادشاه امنیت شخصییه ایله ویرکی مساواتنی اعلان ایدیور ، انحصار لرك ، حجز لرك ، ویرکی التزام لرينك لغوینی بیان ایدیور ، علاوه مقال اولارق ده : « بومساعدات قطعیه هر هانکی دین و مذهب منسوب اولور سه اولسون هر کس حقنده جاریدر » دینوردی . حتی خرسیتیان جماعتلری رؤسائنه وقوع بولان بر رسم قبولده رشید پاشا مسلم و غیره مسلملرک هپ تبعه پادشاهیدن اولدقلرینی بیان ایلشدی . شو حال بر انقلاب وجوده کتیرمک دیمکدی . فقط اسکی تورکار ، غیر مسلملرک ده مسلملرکی معامله کور مسنه حد تلندیلر . رشید پاشا علمینده دسائسه باشلایارق رشید پاشایی سقوط ایتدیر دیلر . رشید پاشا تکرار رأس کاره کچدی . فقط اسلاملرک اعتقاداتنه طوقونماق شرطیه موقعی محافظه ایده بیلدی . حتی کنج برارمنی بر شینه حد تلنلرک اسلامیتی قبول ایتمش ، صوکره تکرار خرسیتیان اولمشدی . قرآن کریم خرسیتیانغی قبول ایدن بر اسلامک اعدمانی امر ایدیور ، دول معظمه ده دلیقانلینک عفوینی طلب ایلدیوردی . بناء علیه دلیقانلی اعدام ایلدی . اوزمان رشید پاشا آوروپا دیپلوماتلرینه شو جوابی ویرمشدی : « اداره مک مؤثر اولمادیغنی بیلدورم . فقط نه یایم ، دها فابرا داریه مانع اولوق ایستدورم . » دیمشدی . مملکتده حقیقی اصلاحات یایمق ایچون امین بر هیئته لزوم واردی . حال بوکه اسلاملر یکی اداره بی آکلامیه جق درجه ده جاهلدی . حتی

موانتکه : « اوقومه یازمه بیلن برترکه حافظ دیرلر » دیبور
 وعلاوهٔ مقال اولارق امور حکومتده اجنبی استخدا می ممکن
 اولمادیغنی و چونکه « برخرستیان آلدن کله جک الک مکمل برهدیه به
 بیله امنیت ایدلمیه جکنی » بیان ایدیوردی .

مع مافیه بش سنه سی نظامیه ویدی سنه سی احتیاط اولوق
 اوزره منتظم بر اردو تشکیکنه موفقیت حاصل اولدی . هیئت
 اداره سی اورویالیلردن اولوق اوزره بر بانق عثمانی تأسیس
 ایدلدی . سیان بر یوزده طقوز ادخالات کمرک رسمی وضع
 ایدیلهرک حکومت اورویا اتمه سنه آچیق بولوندرلدی . اورویا
 حکومتلری آرتق دولت عثمانیه نك کندی کندیغنی اصلاح ایدرک
 انقسامدن قورتولاجغنی امید ایتمهک باشلادی . تمام اون ایکی
 سنه شرق مسئله سی هیچ موضوع بحث اولمادی (۱) .

رابعاً : شرق مسئله سی تکرار ۱۸۵۲ ده موضوع بحث
 اولدی . چار نیقولا دولت عثمانیه استیلا ایتمکن هیچ واز
 یکمه مشدی . چار حکومت عثمانیه ایچون « خسته آدم »
 دییوردی . حتی انکلتره به سیاجتنده (۱۸۴۴) : « قاینه مده
 تورکیه حقنده ایکی فکر جاریدر . بر قسمنک فکر نجه تورکیه
 اولمک اوزره . بر قسمنک فکرینه کورده ده چوقدن اولمش .

(۱) یالکز مسجد اقصی آناختارلری ایچون اورتودوقس ولاتین
 خرستیانلر اده سنده کی اختلافدن ، (مقامات مبارکه) مسئله سندن باشقه برشی
 ظهور ایتدی .

فقط هر حالده یاقین بر زمانده اولمسنه مانع اولونامیه جقدر. «
دیمشدی . ۱۸۵۲ دده انکلتره سفیرینه آرتق « تورکیه نك
رسم تدفیننه » حاضر لانه زمانك كلدیكنی و کندیسنك بر ملك
اولق اوزره دكل ، فقط بر رهن مقامنده استانبولی اشغاله
قرار ویرمش اولدیغنی سولمشدی .

دولت عثمانیه یکدن بر روس استیلاسنه معروض اولمشدی .
انکلتره دولت عثمانیه بی جبراً قورتارمغه قرار ویرمك متفقلم
تحریر ایتدی . پروسیا قرالی مداخله جسارت ایدمدی .
آوستریا یالکز پروتستورله اکتفا ایتدی . فقط اوچنجی
ناپوئون امپراطور اولنجه فرانسه یه اوروپاده فعالانه بر وظیفه
بخش ایتك ایچون بو فرصتدن استفاده ایلدی . کندیسنه
خوش کورونمکه چالیشان ساردنیایی ده پیشندن سوروکله دی .
بناء علیه انکلتره ، فرانسه و ساردنیا ارسنده بر اتفاق عقد
ایدلی . روسل طونه ایالتلرینه استیلا ایتمشردی . اوچ دولت
تورکیه یه اولا بر دونامسا ، صوکره بر اردو کوندر دیلر .
روسلر همان محاربه ایتدن چکل دیلر . فقط متفقلم چارك قره
دکزده کی قوتلرینی محو ایدرک حربه بر دها باشلامسنه مانع
اولق ایسته دیلر . قریم و سیواستپولده کی روس ترسانه سنی
محاصره ایتدیلر . اوچ یوز اللی کون محاصره دن صوکره ضبط
و خراب ایلدیلر .

عموم دول معظمه مرخصلریله انعقاد ایدن پارس قونفره سی

شرق مسئله سنی فصل ایتدی (۱۸۵۶). قره دکز بی طرف
عد ایدلدی . بوراده سفائن حربیه بولوندر مق منع اولوندی .
طونه نك بی طرفلنی اعلان ایدلدی . نهرده سیر سفائی تنظیم
ایچون بین الملل بر قومیسون تشکیل اولوندی . دول معظمه
ممالک عثمانیه نك تمامیتنی محافظه بی تعهد ایتدی . بو صورتله
اوروپا دولتری عثمانلی پادشاهنی روسیه قارشی حمایه ایتمش
اولیورلردی . — بوکامقابلده خرسیتیان تبعه سی حقنده عادلانه
بر اداره تاسیس ایدرک اولجه بیان ایتمش اولدینی اصلاحاتی
حقیه اجرا ایتسنی طلب ایدیورلردی . بونک اوزرینه پادشاه
پارلاق بر بیانانده بولوندی (۱۸ شباط ۱۸۵۶ خطهایونی) .
بویانانده عمومک قانون نظرنده حر و مساوی اولدینی اعلان
ایتدی . خرسیتیانلر آرتق خراج و یرمیه جکلر ، اسلاملر کبی
اردویه قبول ایدیله جکلر ودوآزده مأمورلر بولوندر ابقلردی .
آوروپا حکومتلری کندیلرینه « نه ذات شاهانه ایله تبعه سی
بیننده کی مناسبانه ، نه ده دولت عثمانیه نك اداره داخلیه سنه
مداخله » حق و یرمین بو « بیانانک اهمیت فوق العاده سنی ده
کورمک » ارزوسنده بولوندقلرینی سویلدیلر . بونلر حکومت
عثمانیه دن اصلاحات وعدنده بولونماسنی طلب ایدیورلر ، فقط
حکومت عثمانیه بی وعدلرینی طومتفه مجبور قیلاجق هیچ بر تدبیر
اتخاذ ایتمیورلردی .

حکومت عثمانیه ، دولت عثمانیه نك تشکیلاتنی آلت اوست ایتدکجه

بووعدینی انفاذ ایده‌میه جگدی. حکومتده یکانه قانون شریعتدی؛ شریعت ایسه غیر مسلملری حمایه ایتیموردی. غیر مسلملر اوفاق اوفاق جماعتلر تشکیل ایتشلردی. هر مذهب بر جمعیت تشکیل ایدیور و پستقوسلر طرفندن اداره ایدیلیموردی. پستقوسلر امور روحانیه و جسمانیه بی اداره ایتک امتیازاتنه مظهر بولونیورلردی. بوسبیدن حکومت کرک شریعته و کرک غیر مسلملرک امتیازاتنه طوقونادجه عموم ایچون سیان بر قانون تاسس ایده‌میوردی. مسلملر غیر مسلملره اطاعت ایتک ایسته‌میورلردی. بناء علیه غیر مسلملری مأموریتنه قبول ایتک ممکن اولیموردی. مسلملر بونلره سوء معامله ایدیورلر، غیر مسلملر ایسه قاضیلره حققرینی مدافعه ایتدیره‌میورلردی. دیگر جهتندنده خرستیانلر عثمانلی اردوسنده خدمت ایتک ارزو ایتیمورلر، بدل نقدی ویرمکی ترجیح ایدیورلردی. او صورتله‌که، او صروده لغوایدلمش اولان خراج شمدی بدل عسکری شکلنده تأسس ایتمش بولونیوردی. او دورده رأس کارده بولونان رجال حکومتدن اینکی ذات، عالی و فوآد باشلر بوتون حکومتده مجالس اداره ایله محکمه‌لر تأسیس ایتدیلر. بو مجلسلره غیر مسلملرده قبول ایدیله جگدی. فقط اکثریت مسلملرده ایدی. (ادرنه) ده ۶۰,۰۰۰ ۴,۰۰۰ اسلامدن ۱۱ مرخص چیقدینی حالده ۶۰,۰۰۰ غیر مسلمدن انجق ۳ مرخص چیقمشدی. فقط اوروپا دولتلری اصلاحات حقنده تحقیقات اجرا ایتدیردکلری زمان قوانینک

تطبیق ایدیه‌مه‌مش اولدینغی آکلادیلر . غیرمسلملره بر معتاد
 مادون نظریله باقیلیور، واونلرده اوصورتله حرکت ایدیورلردی .
 یالکز ایکی کشی باشالغه چیقہ بیلمش ، اونلرده ماموریتسز
 قالمشدی . غنی اولق لازم کلن محکمه‌لرده قپولر ضابطه‌یه
 قاپاتدیریلور ، خرسیتیانلرک شهادتی مسموع اولیوردی .
 ضبطیه لر حیدودلردن آلینیور، بونلرده اهالی‌یه ظلم ایدیوردی .
 پادشاهک متفقری کندیسندن حقیقی اصلاحات طلب
 ایتدیلر . بونلر پادشاهه ایکی اصول تکلیف ایدیورلردی .
 فرانسه حکومتی « مختلف ملل عثمانیه ارسنده هیچ فرق
 کوزہ تمه‌مسنی » تکلیف ایدیور، عموم تبعه‌یه عین حقوق بخش
 اولوندینغی تقدیرده فرانسه‌ده اولدینغی کبی جمله‌سنی بر ملت حالنه
 قلب ایتمک ممکن اولاجغنی سویلیوردی . روسیه حکومتی ایسه
 ائتلاف عناصری مضر کوریورز، « غیرمسلملرک منافعی مسلملرک
 منافعندن آیرماسنی » تکلیف ایدیور، احکام قرآنیه، غیرمسلملرله
 تورکلر بیننده غیر قابل مرور بر خط فاصل چکمشدر . تورکیه‌ده
 قانون نظرنده مساوات، بر خیال خامدر « دیوردی (۱۸۶۷) .
 فرانسه‌نک توصیه‌سی صمیمانه ، فقط غیر قابل تطبیقدی . روسیه‌نک
 توصیه‌سی ایسه قابل تطبیق ، فقط دولت عثمانیه‌نی پارچه‌لایاجق
 بر صورتده ایدی . ذاتاً روسیه حکومتکده ارزو ایتدیکی شی
 بوایدی .

بناءً علیه دولت عثمانیه یالکز فرانسه‌ایله انکلتزه بیننده موجود

ائتلاف واسطه‌سیله حمایه اولونیوردی - فقط فرانسه نك ۱۸۷۰
 انهمزای روسیه حکومتی بسبتون سربست براقدی. روسیه، پارس
 معاهده‌سنه آرتق تابع اولامیه جفتی بیان ایدرک قره دکزده بردونما
 وجوده کتیردی. دهاصوکره هر سگده کی خرستیان اسلاوری
 پادشاه‌علینده عصیانہ تشویق ایتدی.

خامساً: شرق مسئله‌سی آوروپاده تکرار خرستیان اسلاوری
 ایچون موضوع بحث اولدی (۱۸۷۵). حضرت پادشاه ۱۸۷۵ ده
 برطاقم فرمانلر نشر ایتمش و بوفر ماندرده حریت و مساوات اعلان
 ایلشدی. فقط دولتلر آرتق پادشاهک وعدینه اینانمور لرذی.
 بناء علیه آوستریا حکومتک تشویق اوزرینه دول معظمه ویرکیله
 محاکم اصلاحی و «اصلاحاتک اویله پاشارک کیفنه بر اقلمامسی»
 لازم کله جگتی بیان ایلدیلر. بونلر «مملکتک مسلم و غیر مسلم
 اشرفندن مرکب بر قومیسون طرفندن اصلاحاتک قوتتول
 ایدلسنی طلب ایدیور لرذی. فقط هر سک طاغیلری قره طاغیلرک
 حمایه‌سندمه اولارق عثمانلی اردوسنی اشغال ایتدکلی صرده
 بلغارستانده کی اسلاو کویولورده استقلاللرینی اعلانه چالیشدیلر.
 حکومت بلغارلره قارشى باشی بوزوقلری کوندردی. باشی بوزوقلر
 کویلر اوزرینه هجوم ایدرک ۲۵۰۰۰ : ۴۰۰۰۰ کشی پی تلف
 ایتدیلر. «بلغارستان مظالمی» (۱۸۷۶) بوتون آوروپانک
 نفرتی موجب اولدی. دول متمدنده آرتق دولت عثمانیه پی حمایه،
 جسارت ایده‌مدی.

تورکلرده ایکی قسمه آیرلدیلر . مدحت پاشا طرفندن اداره اولونان کنج تورک فرقه سی هر هانکی دین و عرقه منسوب اولور سه اولسون بوتون اهالی یه منسوب مبعوثلردن متشکل بر مجلس مبعوثان طلب ایدیوردی . مدحت پاشا ، پادشاهی خلع ایتدی . یزینه برادرزاده سی سلطان مرادی کچیردی (۱۸۷۶) . اوچ آی صوکره اوده خلع ایدلدی . صوکره صورت خفیه ده بر قانون اساسی قلمه آلنه رق ۱۸۷۶ کانون اولنده اعلان اولوندی . مذکور قانون اساسی بر اعیان ، برده مبعوثان مجلسی ایله اصول مشروطه تاسیس ایدیوردی . فقط سوزده انتخاب اولونان مبعوثلر حکومتک ارزوسندن باشقه برشی یا میورلردی . حتی بونلره : « اوت ، افندم ! » عنوانی ویرلمشدی . دها طوغروسی بو ، آوروپا به قارشی اوینانان بر قومدیا ایدی . حکومت عثمانیه : « نظامات جدیده داخل مملکتده بر دور حریت ، عدالت و مساوات یعنی مدنیتک غلبه سنی تأمین ایلور » دیوردی . بوندن ده شو نتیجه یی استخراج ایدیوردی که ، تورکیه کندی کندینه اصلاحات اجرا ایتدیکی جهتله آرتق اجنبی مداخله سنه محتاج دکلدیر . فقط آوروپا حکومتلری « اهالی یه کندی ایشلری ایچون بر حق مراقبه و حاکمیت کیفیه یه قارشی تأمینات اعطا ایده بیله جک بر اصول مختاریت بخش ایدلسنی » طلبی ایچون ائتلاف حاصل ایلدیلر . بو اصولی روسیه تکلیف ایدیوردی . فقط حکومت عثمانیه بو مطالباتک یکی قانون اساسی یه مغایر اولدیغنی بیان ایدرک مسئله یی

مجلسه حواله ایندی . مجلس ده بررایه قارشی ۲۳۶ رای ایله رد ایندی . بونک اوزرینه حکومتلری سفیرلرینی کری چکدیلر . آرتق حکومت عثمانیه یالکزباشنه بر اقلمشدی . اولافره طاغاه مقاومت ایتمش ، ده اصوصو کرده صرپیلری پوسکورتمشدی . حربه چارده مداخله ایندی . رومانیا دن کچمک حقوقنی استحصال ایدرک تورکیه یه استیلا ایلدی (۱۸۷۷) . ۱۸۵۳ ده اولدینی کبی بوسفر آوروپا هیج مداخله ایتمدی . مزاحم آلود برسفردن صوکره روس اردوسی ۱۸۲۹ ده یاپدینی یورویشی تکرار اجرایه موفق اولارق (ادرنه) یه کلدی . ۱۸۲۹ ده اولدینی کبی ینه چار شرائطنی ایلری یه سوردی .

عبدالحمید روسیه ایله اتفاق ایدرک اوچ خرسیتیان دولنک ، قره طاغ ، صربستان و رومانیا نك استقلال نامنی تصدیق ایندی . بونلره بر قاچ پارچه اراضی ترک ایلدی . بلغار مملکتلرینک کافه سندن واز کچدی . بالقان طاغلرینک شمال و جنوبنده کی روم ایلی و ما کدونیا ایله برابر یکی بر بلغار حکومتی تشکیل ایدیله جکدی . روم ایلیدن عبدالحمیدک آندمه ، یالکز آره لرنده هیج ارتباط بولونماق اوزره ، بوسنه ، آرن اوودلق و روم ایلی کبی اوچ پارچه اراضی قالا جقدی .

آوروپا حکومتلری بواقسامی پک فضلّه و روسیه یه ده پک مساعد کور دیلر . دولت عثمانیه نك احوال و وضعیتنی تنظیم ایچون عمومی برقونفره عقدینی قبوله چاری اجبار ایلدیلر . برلین قونفره سی

اوج خرستیان حکومتک استقلالی ایله کندیلرینه ترک اولونان اراضی بی قبول ایتدی . فقط قره طاغه دوشن قسمی بر از آزلندی . کذا عبدالمجید طرفندن آنا تولیده و سیه به ترک اولونان یرلری ده آزالته رق (باطوم) ک سربست بر لیمان اولماسنی اعلان ایتدی . بوغاز لره طونه نک بی طرف بولونماسنی ابقا ایتدی . فقط معاهده ده اولدینی کبی اوله بر بلغارستان تشکیل ایدلسنی قبول ایتدی . یالکز بالقانلرک شمالنده کی مملکت بلغارستانی تشکیل ایدمکک و بوده حکومت عثمانیه به تابع بولونا جقدی . بالقانک جنوبنده کی ممالکده پادشاه طرفندن منصوب بر والینک ریاستی آلتنده آوروپالیردن مرکب بر قومیسون معرفتیه اداره اولونمق اوزره روم ایلی شرقی ولایتی نامنی آلدی . ما کدونیا بلغارلری هیئت عمومیه سیله حکومت عثمانیه به براقلدی .

قونفره ، روسیه ایله متفقلرک حصه سنی آزالتمشدی . فقط حکومت عثمانیه بی بی طرف دولتر حسابنه انقسامه اوغراتدی . فرانسه و ایٹالیانک طلبی اوزرینه تسالیانک بویوکه بر قسمنی یونانستانه ویردی . عصیان ایدن بوسنه هر سکنک اشغالی آوستریا به براقدی . قبریس آطه سنی اشغال ایچون ده انکلتره عبدالمجیددن مساعده آلمشدی .

هان بوتون روم ایلی بو صورتله عبدالمجیدک لندن آلدی . کندیسنه (آرناوودلق و استانبول ولایتی کبی) اسلاملر طرفندن مسکون ، خرستیان تبعه اولار قده ما کدونیا بلغارلریله سلانیک

ولایتندہ کی روملردن باشقہ برشی قالمیوردی . حکومت عثمانیہ نك انقسامہ اوغرایان مملکتلری اون بشنجی عصرده کی استیلادورندن اول اولدینی کچی ینه مستقل برر حکومت اولمشلردی . بناء علیه شرق مسئله‌سی (قره طاغ داخل اولمادینی حالده) روم، صرب، رومنه و بلغار کی درت ملنك تکرار احیاسی کچی دیپلوماتلرک هیچ کسدیره مدکلری برطرزده حل ایدلمشدی .

یونانستانك تشکلی . — قرون وسطاده بسبتون خراب اولان روملتی عثمانیلرک حاکمیتی آلتنده تکرار تشکل ایتمشدی . روملر ، یونانستانده بولونان اسلاولرله آرناولری ده یواش یواش روملاشدیرمشلردی . بونک اوزرینه روحه تکلم ایدر برملت وجوده کلشدی . بوملت همان همان اسکچی یونانیلرک اوطوردقلری یرلرده ، یعنی تسالیادن اعتبارا روم ایلینک بوتون جنوبنده ، جزائر بحر سفید ایله آناطولی ساحلنده کی اراضیده ساکن بولونیوردی . ۱۷۹۳ دن ۱۸۱۴ . قدر وقوع بولان حرب برائناسنده ، دشمن ملتلرینینده بیطرف قالمق منافعی حائز اولق اوزره عثمانلی بایراغی آلتنده سیر وسفر ایدن یونان کیمجیلری بحر سفیدک همان بوتون تجارتی آلدہ ایتمشلردی . (اوده سا) یه کلوب روسیه دن بغدادی اونلر آلیرلر ، آوروپایه اونلر کتیر لرلردی . ۱۸۱۶ ده یونانیلرک ۶۰۰۰ طویله مجهز ، ۱۷۰۰۰ مرتباتی حاوی ۶۰۰ کیلری واردی . بو کیمجیلرک همان کافه‌سی ده قیالق، چیلاق ، چوراق ، (آرغولید) قارشیسنده کی اوج آطهده ،

(هیدرا) ، (سپهزا) و (بصارا) اطه‌سندہ اوطورر لر ، بورادہ اوچ‌اوقاق جهوریت تشکیل ایدرلردی . حکومت عثمانیہ بونلرک امورادارہ لرینی کندیلرینه بر اقریدی . اهالی سلاح طاشیرلر و دکزده قورصانلرہ قارشی محاربه ایتمکہ آلیشقین بولونورلردی . فقط آوروپا حر بلرینک بیتمسی بونلری سفالته گرفتار ایلشدی . (اسکی لاقونیا) ایله یونانستان وسطادہ کی (ماینی) طاغلرندہ طولاشان قله فته لر و بالیقاریالر کبی نیم اشقیا جنکا ورچته لری دائما سلاحله کز مکہ آلیشمشلردی . بونلر قبالر آرقه سنه صاقلانوب طاغنیق نظامده محاربه ایدرلر ، کندی مملکتلرندہ کی رؤسادن باشقه کیمسه یه اطاعت ایتمزلردی . (ماینی) ده بو رؤیسلردن هر برینک بر رستم تحکم قولہ سی واردی .

ایشته بو صورتله یونانلرک محاربه یه حاضر بر بحر یه لری ، برده اردولری واردی . عین زمانده ، زنگین یونان تاجرلری اولادلرینی تحصیل ایچون ممالک اجنبیه یه کوندرییورلر ، تحصیل و تربیه کورن یونانلر آقاده میلر و مکتبلر تاسیس ایدیورلردی . بونلر عثمانلی حاکمیتی ائناسنده بسبتون چیغرندن چیقان لسانلرینی اصلاح ایدرک ملیت لرینی تکرار تاسیس ایتمک آرزو ایلدیورلردی . ده ا ۱۷۹۷ ده تسالیالی ریغ نامنده بر یونانلی ، فرانسزلرک (مارسه یه ز) ینه تقلیداً بروطن شرقیسی یامشدی . بو شرقیده : « هایدی یونان اولادلری ، شان و شوکت زمانی حلول ایتمدی ! » دنیلدیوردی .

عصیان (موره) ده ، (اوپر) ده و (رومانیا) ده هپ بردن باشلادی . شمالده چارچاق باصدیرلدی . (موره) ایله (جزائر بحر سفید) ده ایسه یونانیلر عثمانیلری چیقارمغه موفق اولدی . ایشته او زمان قانلی بر حرب باشلایارق تمام سکز سنه دوام ایلدی (۱۸۲۱ - ۲۹) . یونانیلر تسالیایی غائب ایتدی . فقط (موره) ایله آطه‌لرده مدافعتده بولوندی . بو حرب صرف بر پوصو و محاصره حربندن عبارت اولدی . عاصیلر اوچ حکومت تاسیس ایتشلردی . صوکره بونلر هپ برلشدیلر . فقط رؤسایسی ایکی فرقه‌یه آیرلدیلر . بر فرقه‌یی آطه‌لیلرله موره اشرفی ، دیگر فرقه‌یی ده قله‌فته‌لر تشکیل ایدیوردی . ۱۸۲۶ ده بوتون یونانستان اسلام‌لر فندن تحت انقیاده آلمش و (باطراس) النجایدن یونانی ایکی فرقه‌کندی آرم‌لنده چارپیشمغه باشلامشدی .

فقط بو ائناده اوروپا دولترینک مداخله‌سی یونانستانی قورتاردی . دولتر اولاً حکومت عثمانیه‌یه تابع اوچ اوفاق یونان حکومتی تشکیلنی تکلیف ایتدیلر . یونانیلر بوتون قوتلرینی صرف ایتش اولدقلری ایچون (حکومتلرنده یالکز اون آلتی غروش قالمش و هیچ باروت قالمشدی) بونی قبول ایتدیلر . فقط بو سفر پادشاه قبول ایتدی .

۱۸۲۹ ده چار غالب کلنجه یونانستانه استقلال تام ویرمک ایچون پادشاهی زورلادی . یونانستان ، آوروپالی بر قرال ایله

بر قراللق تشکیل آیدى . فقط اوروپا دیپلوماتلری یونانستانى حقیقى بر دولت حالنه کتیرمک ایسته مدیلر . تسالیا ایله کریدی یونانستانه ویرمکدن امتناع آیدیلر . یونانستانى یالکز (آرتا) و (غولوص) کورفلرلى جنوبنده کی اراضی به منحصر قیلدیلر . بوراسی یونانستانک اک فقیر قسمی آیدى . ۱۸۲۹ ده همان چول حالنده آیدى . چونکه حرب بو طرفلری او درجه خساره اوضراتمشدى .

کذاباوافق قراللق یاشایه جق درجه ده زنکین دکلدی . بو سبیدن یونانیلر ، یونانیلر طرفندن مسکون اولوب الحاق طلبنده بولونان مملکتلری ، تسالیا ایله کریدی ده آلتی ایچون هیچ راحت طور مدیلر . اوروپا حکومتلری دولت عثمانیه نك دوچار ضعف اولاجغندن قورقورلردی . بناء علیه فرانسه حکومتی انجق ۱۸۷۸ ده برلین قونفره سنده تسالیاده روملره مسکون اراضی یی یونانستانه ویردیرمکه موفق اولدی . فقط یونانستانک بورایى آله ایده بیلیمی ایچون ده اوچ سنه قدر بر زمان کجدی .

۱۸۳۳ ده یونانستان بر حکومت مطلقه شکلنده تأسس آیتمشدى . قرالی ده باویه را پرنس لردن اوتون آیدى . ۱۸۴۲ ده یونانیلر کندیلرینه قانون اساسی اعلان آیتمی ایچون قرالی زورلادیلر . ۱۸۶۳ ده اوتون طرد آیدلدى . یونانستانده پارلمنتو اصولیه اداره اولونور بر حکومت اولدی .

صرب ، رومنه دبلغار قومنک تشکیلی . -- صرب قومى

استقلالی تدریجاً و پاپیردیسز بر صورتده استحصالی ایشدر .
اون سکزنجی عصر بدایتنده صربلرک کافه‌سی کویلو حالنده
ایدی . بعضلری مصر تارلاسی اکرلر ، بعضلری جسیم میشه
اورمانلرنده طوموز چوبانلقی ایدرلردی . یکانه اشرافی طوموز
تاجرلریله آوستریا خدمتنه کیرمش عسکرلردن عبارتدی .
۱۸۰۴ دن ۱۸۱۳ . کلنجیه قدر صربلر یکچیریلرله اسلام
والیلری بیننده حصوله کلن غوغالردن استفاده ایدرک آوستریا
کوچوک ضابطلرندن اسکی برطوموز تاجرینک ، قاره ژورژک
ریاستی آلتنده (اولا پادشاه نامنه) آیاقلاشمیلردی . صوکراده
اعلان استقلال ایشدر ، فقط روسیه حکومتی بونلری برانججه
عاصیلر آوستریایه التجا ایتمهک مجبور اولمشلردی .

کذا دیکر بر طوموز تاجری ، میلوش او بره نوویچ ده
تورکارک تابعیتنه کیره رک و عاصیلرله محاربه ایدرک نفوذینی
تأسیس ایتدی . صربلری سلاحلی بولوندیرمغه موفق اولدینی
کپی ویرکی طویلامغه و صربلردن حاکم نصب ایتمهکده بالذات
مأمور اولدی (۱) . ۱۸۲۰ ده (صرب بکی) عنوانی آلدی .
بوتون حربلر ائناسنده دائماً پادشاهه صادق قالدی . پادشاهده
بوکا مکافاتاً کندیسینی ارثی پرنس نصب ایتدی (۱۸۳۰) .

(۱) ۱۸۱۸ ده قاره ژورژ عودت ایش ، صربلری سلاح آلتنه
طویلامشدی . میلوش ، قاره ژورژک التجا ایتدیکی خانه صاحبندن ژورژک
قناسنی ایسته مش ، صوکره بونی پادشاهه کوندرمشدر .

بلغراد و لایتندن ماعداصر ب مملکتلرینک کافه سنی کندیسنه ووردی .
 (بلغراد) مستثنی اولوق اوزره بوتون صربستانک تخلیه سنی امر
 ایتدی (۱) . آرتق صربلرده مستقل بر ملت اولشلردی .

میلوش مملکتی مستبدانه اداره ایدیوردی . طوز و طوموز
 تجارتی انحصارینی هپ کندی آلمشدی . تبعه سنه زورله اراضیسنده
 حصاد یابدیریوردی . روسیه ، صربستانی پک قوتلی کورونجه
 صرب اعیانندن مرکب بر مجلس اعیان تشکیلی ایچون پادشاهدن
 مساعده آلدی . میلوش بو قوتروله تحمل ایدمدی . نهایت
 ۱۸۳۹ ده حکومتدن فراغت ایتدی . یرینه اوغللری کچدی .
 ایکنجی اوغلی حکومتدن عزل ایدلدی (۱۸۴۲) . عاصیلر
 قاره ژورژی پرنس انتخاب ایتدی . ۱۸۵۹ ده او بره نوویچلر
 رأس کاره کچدی . صربستان ۱۸۷۸ قدر پادشاهدن یالکیز اسماً
 مستقل قالدی . برلین قونفره سی صربستانک حاکمیتنی اعلان
 ایتدی . ۱۸۸۲ ده (پرنس) ، (صربستان قرالی) عنوانی
 آلدی .

طونه نک شمالنده کی رومانیا لیلر (مولداوا) و (اولاح) بکلکلی
 نامیله ایکی بکلکه آیرلشلردی . بو مملکنده بر قسمی کویلو ،
 بر قسمی ده املاک صاحبی (بویار) اولوق اوزره صرف خرسیتیانلردن
 مرکبیدی . بوراده کنندی ملتلردن دائم پرنسلر (هوسپودارلر)

(۱) اسلاملر ۱۸۶۲ دن بلغراددن چیقه شلردر . بوراده یالکیز

بر جامع قالمشدر .

كلمشى. فقط اون يدنجى عصر دن اعتباراً پادشاه بورايه استانبول روملرندن هوسپودارلر (بكلر) كوندرييور ، بونلري ايستديكى كبي عزل ايدييوردي . ۱۷۷۴ ده روسيه حكومتى رومانيايليرى حمايه آلتنه آلاجغنى وعدايتدى . هوسپودارلر ك بويارلر طرفندن انتخاب اولونماسنه (۱۷۸۴) ، دهاصوكرده ويره جكلرى ويركى مقدار نى تعينه (۱۷۸۳) وهوسپودارلر ك يدى سنه مدتله ايغاي وظيفه ايتديرمكه پادشاهى مجبور ايلدى (۱۸۰۴) . ۱۸۰۸ دن ۱۸۲۸ م قدر روسلر بوتون رومانيايى اشغال ايتديلر . ۱۸۱۲ ده تكارار تخليه ايتديلر . فقط بر قسمنى ، بسار ايبايى ترك ايتديلر . ۱۸۲۸ حربنده رومانيا تكارار اشغال ايدلدى . بواشغال ۱۸۳۵ م قدر دوام ايتدى . روسيه ، عثمانلى استحكاملرينك كافه سنى بيقتيردى . ۱۸۵۶ ده پارس قونفره سى رومانيا اوزرنده كى روس حمايه سى يرينه آورويپا حمايه سنى وضع ايتدى . طونه نك شمالندن برير ويره رك مولداوايى بوولتدى . فقط رومانيايلر ك اوچنجى ناپولئون طرفندن ده التزام اولونان طلبلر نى ديكه ميره رك بوايكي پرنسلكى بر حكومت حالنده برلشديرمدى .

ايكى پرنسلكك هر برنده مى بر مجلس (ديوان) ايله منتخبا بر پرنس بولوناجقدى . اولاولا اواخر پرنسى مولداوايلر انتخاب ايتسين ديه بكه ديلر . صوكره كنديلرى ده عين پرنسى انتخاب ايلديلر . بو پرنس ، رومانيايى پرنس كوزا ايتدى . دهاصوكره بوايكي ديوان (بكرش) ده بر ديوان حالنده طوپلاندى (۱۸۶۲) .

کوزانک حکومتدن فراغتی اوزرینه مشروطی براداره ، واجنبی پرنس ، شارل دو هو هتزو له رن ایله یالکنز بررومانیا پرنسلیکی وجوده کتیرلدی . بعده پرنسلیکک استقلالی اعلان اولوندی (۱۸۷۸) . دهاصوکراده قراللق نامنی آلدی (۱۸۸۱) .

بلغارلر اسلاو وخرستیان بر قوم اولارق قالمشردی . فقط بونلرک پاپاسلری وپستقیوسلری روم اولدقلری وبلغارلسانی قالدیرمه چالیشدقلری ایچون بر چوق زمان بلغارلرله روملر بربرینه قاریشدیرلدی . روسلر ۱۸۲۸ ده بلغارستانه استیلا ایتدکلی زمان بوراده اسلاولسانی سویلر بر قومه تصادف ایدنجه تعجب ایتدیلر . ایشته بو استیلا اوزرینه بلغارلرده کندیلرینک بر ملت تشکیل ایتدکه اولدقلری فکری حاصل اولدی . آرتق بلغارلر روم پاپاسلرینی دیکله مدیلر . ۱۸۷۰ ده استانبولده کی روم کلیساسندن آیری اولق اوزره ملی بر کلیسا تشکیلی ایچون بادشاهدن مساعده آلدیلر .

۱۸۷۷ حربی بلغارستانی بردنبره قورتاردی . چار بلغارستانک مستقل بر حکومت اولماسنی ارزوایتدی . فقط برلین قونفرهسی بلغارقومنه اودرجه مساعد طاورانمادی . بلغارستانی اوچ پارچه یه آیردی . یالکنز شمال پارچه سی اوروپالی بر پرنس و برده مجلس ملی (صورانیه) یه مالک اولق اوزره بلغارستان پرنسلیکنی تشکیل ایتدی . جنوب قسمی پادشاه طرفندن منصوب بر والی اداره سنده بولونمق اوزره روم ایلی ولایت ممتازه سنی

تشکیل آیتدی . ما کدونیا بلا قید و شرط حکومت عثمانیه‌یه
بر اقلدی .

باغارلر بو ائتلافه راضی اولمادیلر . روم ایلیده کی بلغارلر
بر میللیس ایله بر طاقم مسلح جنناستیق جمعیتلری تشکیل ایلدیلر .
۱۸۸۵ده حکومت عثمانیه ایله اوروپا دولترینک شکایاتنه رغماً
بونلرده بلغارستان پرنسلیکی ایله برلشدیلر .

ایشته شو صورتله تورکیه‌ده بولونان درت خرسیتیان ملت
تورکلردن قور تولدیلر . صربلر مستثنی اولمق اوزره هبسی‌ده
کندیلرینه حکم ایتمک ایسته‌ین روسیه‌نک یاردیمیه بوکا موفق
اولدیلر . فقط جمله‌سی‌ده بر کره قور تولور قور تولماز مستقل
حکومتلر طرزنده تشکیل آیتدیلر .

مصر . — حاکمیت عثمانیه آفریقایه قدر تمادی ایدیوردی .
مصر اسماً حکومت عثمانیه ایالتندن معدوددی . حقیقت حالده
ایسه مملوک رؤساسنک آئنده ایدی . بونا پارت ۱۷۹۸ ده
بونلرله حرب ایتمشدی . فقط انکلتره مصری فرانسه‌یه بر ائتمق
ایسته‌میه رک کندی آلدی . صوکره حکومت عثمانیه‌یه تسلیم
آیتدی . حکومت عثمانیه‌ده بورایه بر عثمانلی والی کوندردی .
والینک هیئت محافظه‌سی میاننده محمدعلی نامنده بر آرناوود،
عامانک یاردیمی ایله کندیسنی قاهره والیسی نصب آیتدیرمکه
موفق اولدی . صوکره مملوکلری کاملاً قیلجیدن کچیرتیرک
مصرک حاکم مطلق کسیددی . کندیسنی بوتون مصرک صاحبی

اعلان ایستی . مصر کویلولری (فلاحلر) برر مستاجر
 حالنه کلدی . مملکتہ چیوید ، کوک بويا ، دوت آغاجی
 وپاموق کبی زراعت صنایعہ ادخال ایدرک مملکتک زراعتی ده
 تبدیل ایستی . کندیسنه اوروپا طرزنده بر اردو وجوده
 کتیردی . عسکرلری هپ یرلی مصر لیلردن (فلاحلردن)
 مرکبدی . ضابطان تورکدی . یالکز امرا اجنبی وبالخاصه
 فرانسزلردندی .

محمد علی ، یونانیلری تحت انقیاده آلمق ایچون پادشاهه
 اردوسنی ودونائاسنی یاردمه کوندردی (۱۸۲۵ - ۲۸) . بوکا
 مکافاتا مصر پر نسلکنک عائله سینه ارثاً قالماسنی تأمینه موفق
 اولدی . آرتق اوتاریخدن اعتباراً مصر استانبوله تابع اولمادی .
 فعلاً محمدعلی خاندانی طرفندن اداره اولونور بر حکومت حالنه
 کلدی . فقط مصر والیسی ، بوتون اسلاملرک خلیفه سی
 اولمق اعتباریله پادشاهه یالکز ظاهراً اطاعت ایدیوردی .
 ۱۸۲۹ ده انکلتره حکومتی محمدعلی پی مستقل بر حکمدار اولارقی
 تصدیق ایده جکنه دائر کندیسنه خبر کوندردی . محمد علی
 انکلتره مرخصنه : « سز اجنبیسکز ، بر اسلامک حالت
 روحیه سنی بیلمزسکز . حکومتکز هانکی حقله بنی کندی
 اویمده تحقیره جسارت ایدیور ؟ حکومت عثمانیه نک انقسامه
 اوغراماسی بنم ایچون نه نتیجه حاصل ایدر ، بیلیرمیسکز ؟ او
 زمان هر اسلام ، حتی ایلک اول کندی اوغلم بندن نفرت

ایدرو . . . خنکار ، دینک بری . الله اوننی کناهلریمزه قارشی بزہ جزا اولارق کوندرمش . « دیسه جواب ویردی . ایشته بونک ایچون محمدعلی ، عثمانلی عسکر یله ایتدیکی هرا یکی حربدهده دائما پادشاهه صادق بر بنده قبالجغنی بیان ایتدی .

محمد علینک خلفلریده دائما عین حالی محافظه ایلدینر . پادشاهه دائما ویرکی ویره رک (پاشا) عنواننی محافظه ایتدیلر . بونلردن بری ، اسماعیل پاشا ، (سویش) قاتالی آچدیرمق ایچون بر فرانسه لره ، فردیناند دوله سسه پس ایله مناسباته کیریشدی (۱۸۵۶ - ۶۶) . بر مدت ، بو تشبک قومدن فعله کله میه جکی ظن ایلدی . او صره لرده پادشاه ، اسماعیل پاشایه پک مساعد طاورانیوردی . حتی مصرده طرزوراتنی دکیشد . یرمه سنه ده مساعدده ایتدی (او زمانه قدر عثمانلی عادتنی اوزرینه خاندانک اک یاشلیسی وارث اولوردی ، اوندن سوکره وراثت بویوک اولاده انتقال ایلدی) . اسماعیل پاشانک (خدیو) عنواننی حائز اولماسنه واوروپا حکومتلری نزدیکه مأمور سیاسی کوندرمسنه مساعدده ایتدی . آرتق مصرده بر حکومت اولدی .

۱۸۶۹ ده (سویش) قاتالی بیتدیکی زمان خدیو ، رسم کشاده حکمدارلری دعوت ایتک ایچون ناظری نوبار پاشا ایله برابر اوروپایه کیتدی . حکومت عثمانیه نک بوکا جانی صیقیلارق تابعتنی خدیوه اخطار ایتک ایسته دی . حتی ۲۰۰,۰۰۰ تفنکی تسلیم ایتسنی ، اردوسنی ۳۰۰۰۰ کشی به تنزیل ایلسنی

و استانبوله بودجه سنی یولایه رق عقد ایده جکی استقر اضلر ایچون پادشاهدن مساعده الماسنی امر ایتدی . بوندن باشقه ، امر پادشاهینک علناً مصدرده او قونماسنی ده امر ای دیوردی . انکلتزه حکومتی بو مطالباتی التزام ایتدی . نهایت خدیو اطاعت ایتدی . فقط فرمانی تورکجه اولارق او قوتدیردینی ایچون تبعه سی بوندن هیچ بر شی آکلامادی . صوکره پادشاهی یاتیشدیرمغه چالیشدی . ۱۸۷۱ دن اعتبار آده کرک امتیازاتی ، کرک امور اداره سنی تنظیم حقنی استحصاله موفق اولدی .

بو اصلاحات ایچون اوروپا دولترندن ایکسینه ، مصرله اک زیاده معاملات تجاریده بولونان فرانسه ایله انکلتزه یه مراجعت ایتدی . ۱۸۷۵ ده اعضای اوروپا لیلردن اولق اوزره محکمه لر تأسیس ایدرک ، آوروپالی بر قومیسونه یکی قانونلر یازدیرارق اصلاحات اجرا ایدلدی . - ۱۸۷۶ ده مصر خدیویتنک ایتر یله مسنی تأمین ایچون فرانسه وانکلتزه مأمورینندن مرکب بر اداره تأسیس اولوندی . ایشته او تاریخدن اعتباراً فرانسه وانکلتزه حکومتلری مصدرده پادشاهدن دها زیاده نفوذ صاحبی اولمشلردر . فرانسه مصدردن چکیلنجه ، خدیوک امور حکو - متنده کاملاً انکلتزه اداره ایلمکه باشلامشدر .

اون دردنجی فصل

یکی دنیا

حکومات متحدہ آمریکا . — حکومت متحده ۱۷۸۷ ده
تشکیل ایدلمشدی . قانون اساسیسی یکی فرقه سیاسیہ آرہ سندہ
برمقاولہ دن عبارتدی . بوفرقة لردن بری ، آمریکا حکومتلرینہ
حا کم اولاجق درجہ ده قوی برحکومت متحده آرزو سندہ بولونان
(فہدہ رالیست) لر ، دیکری ده ہر حکومتہ بر صلاحیت حاکمانہ
بخش ایتک ایستہ بن (جمہوریت پرور لر) ایدی . کذابوقانون اساسی ،
اراضیلرینی کندی کندیلرینہ زرع ایدن بیاضلرک ساکن اولدق لری
شمال حکومتلری ایلہ ، مالک اولدق لری جسم چفتلک لری زنجی اسرایہ
زرع ایتدیرن زراعک ساکن بولوندینی جنوب حکومتلری
آرہ سندہ ده برمقاولہ دن عبارتدی . ہر ایک فرقه ده یکدیگریہ
مساعدا تہ بولنمشدی . حرب ، صلح و معاہدہ عقد ایتک ،
مسکوکات و تجارتی تسویہ ایتک صلاحیتی کاملا حکومت اتحادیہ بہ
ویرلشدی . صلاحیت سائرہ ، ہر حکومتک کندی آئندہ ایدی .
جنوب حکومتلری کندی « نظامات خصوصیہ » لرینی محافظہ
ایدیور لر ، اسارتہ « نظامات خصوصیہ » نامی ویریور لردی .
واشینقتون رئیس حکومت اولدینی صرہ لردہ ایدی کہ
(۱۷۸۹ - ۹۶) حکومت متحده نك تشکیلاتی ده بیتدی .
حرب زمانی قونفرہ ویا حکومتلر طرفدن ایدیلن بورجلری

حکومت متحده کندی اوزرینه آلدی. ایشته بوصولتله حکومت متحده نك دیوناتی اور تابه چیقدی . بو بورجلرك فائضلرینی اوده مك ایچون برویرکی تأسیس وبرده كمرک اصولی احداث ایلدی . کذا برده حکومت متحده بانقہ سی تأسیس ایتدی .

حکومت متحده اراضیسی اوزمانلر دها بحر محیط ایله (آله غانی) طاغری بیننده کی مملکتدن عبارت اولوب اون اوچ حکومتدن متشکلدی . فقط بو حکومتلردن بمضلرینك اراضیسی کاملاً چول حالنده، (میسی سیپی) یه قدر امتداد ایدیوردی . حکومت اتحادیه بو مملکتلره حکومت متحده اهالیسی ایله اسکان ایدیلرک یکی یکی حکومتلر تشکیلنه مخصوص بر مستعمره اراضیسی نظریله باقدی . بورالری کنديسنه ترك ایتدیردی . آمریقا حکومتلری ایله (میسی سیپی) آره سنده کی ایصنزاراضی یه کاملاً صاحب اولدی . ۱۷۸۷ ده بر امرنامه ایله بورایی ده تنسیق ایتدی . بو امرنامه بالجمله اراضیء جدیده ایچون قاعدهء عمومیه اتخاذاولوندی .

مملکت ، نصف النهار استقامتنده عمودی وموازی خطلرله برچوق (اراضی) لره آیرلدی . حکومت اتحادیه هر اراضی یه بروالی کوندریور ، بووالی بدایتده یالکنزباشنه ادارهء امور ایدیوردی . فقط نفوسی ۵۰۰۰ کشی بی بولنجه منتخب بر مجلس مبعوثان وبرده مجلس تشریعیدن عبارت اولق اوزره حکومتی کندی کندينه تشکیل ایدیور ، اتحاد قونفره سنه مشاور راینی حائر بر مرخص کوندریوردی . بو یابده قاعدهء اساسیه ، مذکور

اراضیلر ده ساکن اهالی بی تدریجاً کندی کندیلرینی اداره ایده جک برحاله کتیر مکدی . نفوس ۵۰۰۰۰۰۰ بالغ اولنجه (اراضی) (حکومت) حالنه انقلاب ایدیور ، حکومت متحده یه قبول اولونماسنی طلب ایده بیلینوردی . صوکره قانون اساسیسی کندی یاپیور ، بونک ایچون ده یالکز مقاوله اساسیه موادینه توفیق حرکت ایتمکدن یعنی بر اصول مساوات و حریت قبول ایلمکدن باشقه شرطه رعایت ایلینوردی .

ایشته بوصورتله حکومت متحده معین حدلر داخلنده قالمادینی کبی نامتناهی بر صورتده توسع ایده بیلیردی .
 (آله غانی) ایله (میسی سیپی) بیننده کی مملکت ۱۷۸۷ ایله ۱۸۲۰ آرسنده کاملانفوسلاندى .

(میسی سیپی) نهری کریسنده (لوئی زییان) تابع واسمع برچول باشلا یوردی . فرانسه بوچولی ۱۷۶۳ ده اسپانیایه ترک ایتمش ، برنجی ناپولئون ده جسیم برفرانسز مستملکسی تاسیس ایتک ایچون بورایی تکرار آلمشدی . جمهوریت فرقهسی ۱۸۸۰ ده راس کاره کچدیکی صرده آرتق حکومت متحده اراضیسی بو یولتمک ایسته میور ، جمهوریتک بو یوک بردولت حالنده دوام ایده میه جکنه ذاهب اولیور (۱) ، حکومت اتحادیه نك نفوذینی آرتدیر اچغندن قورقینوردی . فقط هر شیدن اول فرانسه کبی مدهش بردشمنک قومشولغندن قور تولق لازمدی .

(۱) بو ، مونتسکیونک نظریه سی ایدی .

بوصرمده انکلتره فرانسه به اعلان حرب ایتمش ، ناپولئون ده فتوحات جدیده سنی انکلنزلره قارشی مدافه به غیر مقتدر بولوندیغنی حس ایدنجه بورالری صاتین آلماسنی حکومت متحده به تکلیف ایلشدی . ایشته بونک اوزرینه حکومت (لوئی زیان) ی صاتین آلمغه قرار ویردی (۱۸۰۳) . حکومت متحده مالکانه سنک حدودی بوصورتله (روشوز) طاغیرینه قدر امتداد ایتدی . بووجه ایله الحاق اولونان ایصسزاراضی ده برطاقم اراضیلره آریلارق نفوسلاندرلمغه باشلادی .

اوزمان حکومت متحده هر ایکی جهندن ، جنوب وغربدن مکسیقایله هم حدود بولوندی . مکسیقانک غایت واسع چوللک براراضیسی واردی . حکومت متحده دن کلن برطاقم سرسریلر (ته کساس) نک جنوبه یرلشدیلر . بوراده استقلال اعلان ایدرک (ته کساس) جمهوریتنی تشکیل ایلدیلر (۱۸۵۳) . صوکره بوجهوریتی ۱۸۴۶ ده آمریکا حکومت متحده سی میانه قبول ایتدیرمکه موفق اولدیلر . مکسیقا حکومتی بونی پروتستو ایتدی . شو حال حربیه وسیله اولدی . حکومت متحده اردوسی مظفر آ (مکسیقو) به کیردی . (روشوز) طاغیریه بحر محیط کیر آره سننده کی بوتون مملکتی حکومت متحده به برافاسی ایچون مکسیقا حکومتی زورلادی (۱۸۴۸) . اوزمان حکومت متحده اراضیسی بوتون آمریقای شمالیه ، بر بحر محیطدن او برینه قدر توسع ایتدی . بو اراضی فرانسه نک اونیدی مثلی بویوکدی .

فقط اوزماندن سوکرده هیج بویومه دی .

اوصره ده مملکت هم نفوسلانمش ، همده زنیکنلشمشدی .
 آمریقایه ادخال ایدیلن امتعه دن آنان کمرک رسمی ، تجارت
 فعالیت کسب ایتدجکه حکومته دائما مزاید بر واردات کتیریوردی .
 حتی آزمان سوکرده حکومت اتحادیه به متعلق ویرکی ده کاملاقالدرلدی .
 بورجک فائضلری اوده ندیکی کبی بورجده تادیه ایدلدی .
 سوکرده او یله بر زمان کلدی که خزینه دولت صرف ایدیله مبه جک
 درجه ده فضله یاره یه مالک اولدی . فقط آمریقا ، تجارتی حمایه
 ایتدیکی ایچون کمرکلری قالدیرمق ایستمیوردی . حکومت اتحادیه
 فضله وارداتک امور نافعیه حصر ایدلسنی تکلیف ایتدی . (اوخیو)
 جاده سی ایله (آریه) کولنی بحر محیطه برلشدیرن (آریه قنالی) نی
 یایمق ایچون مساعده آلدی . کمرکلری هم صنایعی حمایه به بر واسطه ،
 همده امور نافعیه خادم بر منبع اولمق اوزره قوللانمق اصولی
 حکومت متحده ده دائما مرعی الاجراقالدی . بوکا (آمریقا اصولی)
 نامی ویرلدی .

وراثت حربلرنده (۱۸۶۰-۶۵) تکرار ویرکیلرک تاسیسنه ،
 کمرک رسمنک تزیدینه وقائمه لراخر اجنه لزوم حاصل اولدی .
 حربک مصارف فوق العاده سنی قایتمق ایچون بومنابع ده تیشمه دی .
 حکومت اتحادیه استقراره مجبور اولدی . ۱۸۶۰ ده ۹۰ میلیون
 دولاره اینمش اولان بورج ، ۲،۸۰۰ میلیون دولاره (یعنی ۱۴
 ملیار فرانسه) چیقدی . فقط حرب بیتربیتمز تکرار بورج اودنمکه

باشلادی. ۱۸۷۸ ده قائمه تداول جبریسنی قالدیر مغه موقیت حاصل اولدی (۱). حکومت اتحادیه نك تأسسندن اعتبار آنفوسی دنیانك هر عملكندن ده از یاده برسرعتله تزیاید ایتدی. بوتون اراضی، کیم اشغال ایتمك ایسترسه اوکا آچیق ایدی. دها چو جقلقنرنده اوزاق مملکتلره کیتمهک آلیشقین بولونان آمریقایلر غریبه کی ایصنر مملکتلره هیچ زحمت چکمدن سیاحت ایدیورلر، هنوز (پوروزلر- قیرمنی دریلیر) له مسکون اراضی به آو ایچون کیدیورلردی. حتی بهضاری تحت برقوله انشا ایدیورلر، (فارمه) یعنی چفتجیلک ایدیورلردی.

اون طقوزنجی عصر اواسطنه طوغرو بومهاجرلرک هان کافه سی آمریقالی ایدی. فقط آوروپا مملکتلری کندیلرینه طارکلمکه باشلا نجه اهالی ده نفوسلرینک فضلہ سنی آمریقایه بوشالتمه باشلادیلر. ذاتاً وسائط نقلیه ده حال مکملته کتیرلمش، سرعتلری دائما تزیاید ایتمک اوزره واپورلرله سیرسفرلر تشکیل ایدلمشدی (انکلتزه دن آمریقایه سیاحت اون کون قدر سوریوردی).

۱۸۲۰ ده حکومت متحده آمریقایه سنه ده انجق ۲۰۰۰۰

(۱) حکومت اتحادیه نك تشککندن بری دائما بربرله مجادله ایدر آیری آیری اسمده ایکی فرقه واردی. بونلر ۱۸۰۰ ه قدر (فده رالیست) لر ایله (جمهوریت پرورلر)، ۱۸۳۶ دن صوکره ده موقراتلرله ویفلر؛ ۱۸۵۴ دن صوکره ده موقراتلرله جمهوریت پرورلر ایدی. فقط بوفرقه لر بیننده سیاستجه همان هیچ فرق یوقدی. بومجادله لرایسه پولتیقه جیلنی صنعت ایدینلردن ماعدا کیمسه بی علاقه دار ایتزدی.

مهاجر کلیوردی . ۱۸۴۰ . طوغرو بومقدار ۱۰۰۰۰۰۰ .
 بالغ اولیوردی . ۱۸۴۷ ده نیورق حکومتی آوروپالیری مهاجرته
 تشویق ایتک و مواصلت لرنده کندیلرینه یاردم ایلک اوزره
 بر (مهاجرت قومیسونی) تشکیل ایلدی . اوزمانلر سنهده
 ۲۳۵۰۰۰ مهاجر کلیوردی . ۱۸۵۰ ده بو ۳۰۰۰۰۰ نه بالغ
 اولدی . ۱۸۸۲ ده ۷۸۰۰۰۰ کشی کلدی . آرتق بوندن زیاده
 چوقالمادی . آلتمش سنهده (۱۸۲۱ دن ۱۸۸۱) قدر (آمریقایه
 ۱۱,۲۰۰,۰۰۰ مهاجر یرلشدی . بونلردن ۳,۵۰۰,۰۰۰ ی
 آلمان ، ۶ میلیونی ایرلانداالی ، ۲ میلیونی انکلیز ایدی .
 مهاجرلر کز زیاده نفوسی ده آاز و یاداها فقیر اولان شمال
 مملکتلرندن کلیوردی . بونلرده آلمانلر ، نوروه جلیلر ،
 ایرلاندا لیلر و انکلیز لردی . ایرلاندا لیلر سفالت یوزندن کلیر لردی .
 حتی باتاس خسته لک لری ظهور ایدوبده بویوک بر قحط حصوله کلدیکی
 سنه لر ایرلاندا تمام ۳ میلیون نفوس فائب ایلشدی .

آمریقا اراضی سنک نفوسی ایوم مهاجرلر سایه سنهده تاریخ طالده
 مثلی کورولمدک بر سرعتله آرتیور . ۱۸۲۰ ده حکومت متحده نک
 نفوسی آنجق ۵ میلیوندی (۷۰ سنه صوکره ، ۱۸۹۰ ده ۶۳
 میلیونه بالغ اولمشدی (۱) . ۱۸۲۰ ده (فاروه ست) دنیلن

(۱) آریقا ایستانستیتجیلری ۱۷۹۰ دن بری هراون سنهده
 بریایلان بحریر نفوس مقدارینی بکد بکر یله مقایسه ایدرک حکومت متحده
 نفوسنک ۱۹۰۰ ده ۱۰۰ هیلیونه بالغ اولاجقنی تخمین ایلش لردی . فقط

(اقصای غرب) یعنی میسی سیپی نك غربنده کی مملکت یرلی اشقیایا ایله طولو برچولدن عبارتدی. بوکون بووحشی آمریقالیلرک برقسیمی محوایدلمش، برقسیمی ده چوراق اراضیلره بوسکورتو. لمشدر. ایکی بحر محیط بیننده کی مملکت کاملابیاضلر طرفندن ضبط ایدلمشدر.

بیاضلر بویکی مملکتلره آوروپا مدینیتی بردنبره تطبیق ایلشدر. آمریقا مستملکات اصولنک اک مؤثر ماهیتی ده بوراده آوروپانک اسکی مملکتلر نده کندن بساتون عکسی بر صورتده جرکت ایدلمسیدر. مثلاً کاملابیاضلر برحوالی به برشمندوفر خطی انشا ایدیلیور (۱۸۶۹ ده آچیلوب ۵,۲۰۰ کیلومتره طولنده بولونان) (پاسی فیک) خطی کذرکاهنک همان نصفی جسم چایرلردن، ایصنر طاغلردن عبارتدی. حتی ایلك سنه لر، تره نلری بوچایرلرده اقامت ایدن آمریقا وحشیلرینه قارشی محافظه به لزوم حاصل اولمشدی). شتمندوفر کذرکاهنده هراستاسیون بر شهر اولیور. در حال بوراده تلغرافلر، هواغزلری، مطبعه لر تاسیس ایدیلیور، ده اولرک انشاسی بیتمدن غرته لر نشر اولونیور. اوچ سنه ایچنده چول اور تاسنده قوجه بر شهر تاسیس ایدیلیور. ۱۸۴۶ ده وجودی اولیمان (سان فرانسیسکو) نك نفوسی ۱۸۸۰ ده ۲۵۰۰۰۰ کشی به بالغ اولمشدی. فقط صحرا لر

وراثت حربی نفوسک تزایدینه مانع اولدینی ایچون بوتخینلری ظهور ایتیمشدر.

شهر لردن پک صوکره اسکان ایدیلیور. کذا آمریقا چفتجیلری فرانسز کویلولری کبی دکلدر. بونلر ماکنه لرله ایش کوردکلری کبی طور اغی ده عادتا بر فابریقه ده اولدینی ایشلر لر. آمریقا ده اراضینک قیمتی اولدینی ایچون بورالری اده ایدن حکومت، اراضی بی برچوق پارچه لره آیرمش، بونلری غایت آزر فیئاتله، حتی هکتارینی بش فرانقه صائمشدرد. مثلا فرانسه ده برهکتار اراضی ۱۰۰۰ : ۲۰۰۰ فرانقه در. بوراده ۱۰۰ هکتارلق اراضی بویوک برمالکانه عدایدیلیر. آمریقا ده ایسه مالکانه لر بیکلرجه هکتار لرله حساب اولونور.

حکومات متخده نك ترقیات ماده یولنده نه درجه یه قدر ایلیله دیکنی کوسترمک ایچون برقاچ رقم کفایت ایدر.
 ۱۷۹۰ ده بوتون حکومت متخده ده، نفوسی ۱۴۰۰۰ دن فضله آنجق درت شهر واردی. بونلرک الک نفوسلیتی اولان (فیلادلفی) نك نفوس ۴۲۰۰۰ ایدی. شهرلرک نفوسی مجموع نفوسک یوزده اوچنی تشکیل ایدیوردی. ۱۸۸۰ ده ۹۶۳ شهر واردی (اوتوزدن زیاده سنک نفوسی ۱۰۰۰۰۰ دن فضله ایدی). نیورک نفوسی ۶۰۰۰۰۰ ایدی. شهرلرک نفوسی مجموع نفوسک یوزده یکرمی بشنی تشکیل ایدیوردی.

۱۷۹۰ ده ممالک اجنبیه ایله اولان تجارت، ۲۳ میلیون دولار ادخالات، ۲۰ میلیون دولار اخراجادی. ۱۸۸۰ ده ادخالات ۶۵۰، اخراجات ده ۷۰۰ میلیونه بالغ اولمشدی.

۱۷۹۰ ده حکومت اتحادیه وارداتی ۴ میلیون ، مصارفاتی بر میلیون دولارایدی . ۱۸۸۰ ده واردات ۳۰۰ میلیون ، مصارفات ۲۰۰ میلیون دولاراولمشدر .

آمریقا ده اسپانیول جمهوریتیری . — اسپانیاحکومتی اون آلتنجی عصر دنبری مستملکه لرینه بر مالکانه نظریله باقیش وبونلری هپ اسپانیوللره اداره ایتدیرمشدی . (قره ٹوللر) یعنی مستملکاتده طوغان کیمسه لر بوتون مأموریتلردن اوزاق بولوندیریلور ، بونلرک اسپانیوللرک غیریسندن امتعه صاتین آلماری تجارت نظامنه واسطه سیله منع ایدیلوردی . ایشته بوسبیدن ۱۸۰۸ ده فرانسه اردوسی اسپانیایه استیلا ایلدیکی زمان قره ٹوللرده آوروبالی اسپانیوللر کبی یدنجی فردیناندی التزام ایتدیلر . تحت سلطنتی غصب ایدن ژوزوف بوناپارطی فرانسه قرالی طانیادیلر . اصلاحات طلب ایتک ایچونده بوفرصدن استفاده ایتدیلر . و نه زوئللاده کائن (قاراقاس) اهالیسی ۱۸۰۸ دن اعتباراً بر بیاننامه نشر ایتدیلر . بوبیاننامه ده قره ٹوللرکده حقوقاً اسپانیوللره مساوی اولمارینی ، کندیلرینک اراضی زر عنده ، اعمالتده ، ادخالاتده ، اخراجاتده اسپانیوللر کبی سربست بر اقلمالرینی ، مستملکاتده مأموریتلردن یاریسنک کندیلرینه تخصیص اولونماسنی ، والینک مقیم بولوندینی هر مرکز اداره ده امور حکومتی قوتتول ایتک اوزره مبعوثلردن مرکب بر مجلس (ژونط) بولونماسنی آرزو ایدیلورلردی .

فقط مستملکه کرده کی اسپانیول والیر بونی قبول ایتدیلر .
مستملکه لر آیاقلانیدیلر . حکومت متحده کی بونلرده
جمهوریتلر تشکیل ایلدیلر .

حرب فایت اوزون سوردی . (عصیان ایدنلر) ک تسلیحاتی مکمل
اولمادینی کی انضباطلری ده یولنده دکلدی . بونلر اسپانیاده فردیناندک
حکومتی اعاده ایدلمسی اوزرینه مغلوب اولدیلر . ۱۸۱۶ ده ایسه
کاملان تحت انقیاده آلمشلردی . فقط اسپانیاده وقوعه کلن انقلاب
(۱۸۲۰-۲۳) بونلره تکرار جسارت ویردی . بونلر برربرر ،
بوتون مستملکه لرك استقلانی تصدیقه اسپانیا قرالی مجبور
ایلدیلر (اسپانیانک آنده کوبا ایله فیلیپن آطه لرندن باشقه
قلمدی) .

کندیلرینی خلاص ایدن مستملکه لر ، اولا انکلیر مستملکه -
لرینک یابدقلمری کی بر هیئت متحده حالنده برلشمک ایستدیلر .
فقط اکثریتی یرلی ویا ملز دن عبارت اولان اهلینک اداره
حکومتده هیچ تجربهلری اولمادینی کی هر ولایتده او برولایته
خصم نظریله باقیوردی .

اسپانیوللرک حاکمیتی دورنده بوراده درت والیلک واردی .
بونلرده مکسیکو (مکسیقا) ، لیما (پهرو) ، سانتافه (قولومبیا)
بوئنه نوس آیرهس (آرژانتین جمهوریتی) ایله غو آتمالا (آمریقای
وسطی) ، قاراقاس (ونهزوئلا) و والپارمزو (شیلی) کی
اوج عمومی قابودانلقدن عبارتدی .

عصیاندن سوکره تأسیس اولونان حکومتلرده همان همان اسپانیوللرک بویدی ایالتلرینه توافق اییدیوردی . فقط یالکز زه زوویتر طرفندن تشکیل اولونان یرلی آمریقایلرله مسکون (پاراغوا) ، مستقل بر حکومت تشکیل ایلشدی . ونه زوئللا (سانتافه) والیلکی ایله برلشهرک بولیوارک ریاستی آلتنده اولوق اوزره قولومیا جمهوریتنی تشکیل ایلشدی . بولیوار (پرو) نی اداره ایندیکی کبی آریچه برده (بولیویا) حکومتی وجوده کتیرمشدی (۱) .

فقط اوزاق منطقه لرده کی اهالی مرکزده کیلره تابع اولوق ایسته مدکلری ایچون بو حکومتلرده پارچه پارچه آیرلدیلر . (اوراغوا) بوئه نوس آیره سدن آریلاروق شرقی اوراغوا جمهوریتنی تشکیل ایندی (۱۸۲۸) . پرو ایله بولیویاده بولیواره قارشی عصیان ایدرک آیری آیری ایکی جمهوریت تشکیل ایلدی . قولومیا حکومت متحده سی ده یکی غروناد ، ونه زوئللا ، اکوآتور کبی اوچ پارچه یه آیرلدی . اولا آمریقای وسطی مکسیقایه قارشی عصیان ایدرک (۱۸۲۳) (آمریقای وسطی حکومت متحده سی) طرزنده طوپلانندی . سوکره ، بو هیئت

(۱) حتی بولیویا بوتون آمریقا حکومتلرینی بر (هیئت متحده) حالنده طوپلامفه اوغراشمش ، (پاناما) ده عمومی بقونفره عقد ایندی برمشدی . فقط بقونفره یه کندی اداره سنده بولونان مملکتلره مکسیقایه خصیلرندن ماعدا کیمسه اشتراک ایتمه مشدی .

متحده بی تشکیل ایدن بش حکومت، اوزون مجادله لردن سوکره
۱۸۴۷ ده بردنره کاملاً آیرلدی .

بوکون اسپانیا و آمریقالی اولق اوزره تمام اون بش جمهوریت
واردر .

بویکی حکومتلر ، تشکیلاتلرینی اکل ایدنجه قدر اوزون
بر حرب و انقلاب دوره سی کچیرمشلردی . اساساً مملکت هان چوراق
بر حالده ایدی . اسپانیوللر بورایه یازنکی نیشمک و یا خود بویوک
سه نیورلر کبی حکم سورمک ایچون کلشدر ، چالیشمق ایچون
کلمه مشلردی . بونک ایچون بوراده ایالت مرکز اداره لری ایله
بویوک املاک صاحب لرینک یکدیگر ندن ایصنزار اضیبرله آیرلمش
اقامتگاهلر ندن باشقه شیلری یوقدی . صنایع هان مفقود اولدینی
کبی زراعت ده پک آزایدی . اهالینک اکثریتی یرلی آمریقالی لرله
زنجیلردن ونیم وحشی ، سفیل ، کلیاً جاهل ملزدن عبارتدی .
حتی بیاضلرده هان هان مدنی بر حالده ایدیلر . بونلرده اسپانیوللره
قارشی ایدیلن حربک تأثیر یله وحشیلشمشلردی .

هان هر طرفده اهالی ایکی قسمه آیرلدی . بویوک املاک
صاحب لر یله رهبانی کندیلرینه جلب ایتمش اولان (محافظة کارلر)
ماموریتلری صرف بویوک عائله لره منسوب ذواته حصر ایتمک ،
محدود بر آرای عمومیه قبول ایتمک ، رهبانک مالکانه لرینی ، محکمه لرینی
و امتیازلرینی ابقا ایدرک ، باشقه هیچ بر دینه مساعده ایتمه رک
قاتولیکلکی حکومتک دین رسمجیسی اولارق قبول ایتمک ،

غزته‌لز ایچون موجود سانسورلکی ابقا ایلك، اجنبیلری یاناشدیرماق ایستیورلردی . الكزیده تاجرلره ملزدن مرکب اولان احرار ویا (پروغره، سیستلر) ده اسارتک لغری ایله آرای عمومیه‌یی، حریت مذاهب ایله رهبان اموالکک حجزینی طلب ایدیورلر، اجنبیلرک مهاجرته مساعده اولونماسنی ارزو ایلیورلردی (۱) .

بوندن باشقه (سانترا لیستلر) نامیله ایکی فرقه‌دها واردی . سانترا لیستلر، آروپا حکومتلرینی تقلیداً، برپا تئخنده یرلشمش وایلتلری اداره ایچون والیر تعیین ایده جک بر حکومت طلب ایدیورلردی . فده رالیستلر ده حکومت متحده آمریکا یه تقلیداً بر اداره ایله همان همان مستقل ویکدیگرینه بر حکومت اتحادیه ایله مربوط ولایتلر تشکیلنی آرزو ایلیورلردی .

علی العموم محافظه کارلر سانترا لیست، احرار ده فده رالیست ایدی (آمریقای وسطی مستثنی ایدی) .

فقط فرقه منازعه لری الكزیده یکدیگرینه رقیب اشخاص وشهرلر بیننده مجادلاته وسیله تشکیل ایدیورلردی . یرلی، زنجی و ملزکی هیچ بر مسئله سیاسی یی آکلامغه کلیاً قابلیت سز اولان اهلینک قسم اعظمی آرتق بر چوق چته رئیس لرندن باشقه سنی طانییورلردی . حرب

(۱) بعض مملکتلر ده بوفره لره برده لقب ویرلشدی . محافظه کارلره مکسیقاده (أسقوزه‌س) ، شیلیده (پولوقونوس) ؛ احراره مکسیقاده (یورکینوس) دیرلردی .

اساساً حریص برچوق چته رئیس لرینی مشغولیتسز برافش ، اہالی بی زورلہ سلاح آلتہ آ لارق اردو تشکیل ایتمک کبی برعات وجودہ کتیرہ مشدی . واقعاً مجادلات سیاسیہ ایچون وسائط یوقدی . فقط حرب داخلیر ایچون وسائط پک چوقدی . حتی بوداخلی حربلرہ بالاخرہ حدودلری تنظیم ایتمک ایچون قومشو حکومتلر آرسندہ وقوعہ کلن حربلر دہ انضمام ایتمشدی .

تمام یارم عصر اسپانیول جمہوریتلری آرسندہ حرب بر عادت حکمنہ کیرمشدی . فقط اکثریا فرانسدہ سویلندلیکی کبی ، اورویا مملکتلرینک بر قاج عصر اول اوکر . ندکلری حریت سیاسیہ بی بونلر ہنوز اون طقوزنجی عصر دہ اوکر ندیلر دیسہ بو حکومتلری کندی کنڈیلرینی ادارہ یہ غیر مستعد تصور ایتمک طوغرو اولامزدی (۱) . بونلرک حریت سیاسیہ بی اوکر نملری انکلتزہ وفرانسہ دہ اولدینی کبی نہ او قدر اوزون سورمش ، نہ دہ او درجہ قائل اولمشدر . حتی پک آز برزماندہ حاصل اولمشدر .

۱۸۷۰ دن اعتباراً حرب داخلیر پک اندر وقوعہ کلدیکی کبی حکومتلر بینندہ کی حربلردن دہ ہیج اثر قالمشدی (۲) . همان ہر طرفدہ پروغزہ سیستلر (ترقی پروران) محافظہ کارلرہ ،

(۱) (پاراغوی ، ا کواتور و بولیویا کبی) اک آز ترقی ایدن حکومتلرک داخلی حربلرہ اک آرقاریشمش حکومتلردن اولماسی شایان دقتدرہ .
 (۲) یالکز شیلی ایلہ پورو آرسندہ بر حرب ، آمریقای وسطادہ دہ قیصہ بر حرب وقوعہ کلمشدر .

فده رالیستلر پروغره سیستلره غلبه ایتشلردر. حکومتلرک هان کافه سی ده ایکی مجلس اوزرینه مؤسس بر قونغره و شمالی آمریقاده اولدینی کبی بر قاچ سنه مدتله منتخب بر رئیس ایله حکومات متحده شکلنده تشکل ایشلدر. جمله سی ده زنجیلری آزاد ایتشلر، هان بوتون حکومتلر آرای عمومیه ایله حریت مذاهب اعلان ایدرک حکومتی ره بانیتدن قورتارمشلردر. کافه سی ده اوروپا اجنبیلرینه قارشلی کشاده اولمش، حتی اراضیلرینی و معدن او جاقلرینی ایشلتمک ایچون اجنبیلری کندیلری چاغیرمشلردر.

مهاجرت بالخاصه یکریمی سنه دن بری فعالیت کسب ایتشلدر. آرژانتین جمهوریتنک اقلیمی بالخاصه او قدر صیجاق اولمادینی کبی اوروپالیر ایچون ده نافع اولدینی جهته، بوجریان اک زیاده آرژانتینه طوغره وقوع بولمقده در. هر سنه بوئه نوس آیره سه ۱۰۰۰۰۰ دن زیاده مهاجر چیقیور. بونلرک هان کافه سی ده ایتالیا، فرانسه (واک زیاده باسق ممالکندن) اسپانیا کبی لاتین ممالکندن کلورلر، چایرله مستور واسع صحرائه (پامپاره) یرلشهرک غایت جسیم صغیر وقویون سورولری یتشدریورلر. اراضی اوت انقاضدن مرکب قالین بر طبقه دن متشکل بولوندینی ایچون کوبریه هیچ لزوم حاصل اولمادن خارق العاده بقدای یتشدریور. مهاجرلر یالکنز تارلایی سوروب اکیورلر، کوبرله مکّه هیچ لزوم کورمیورلر، حصاد موسمی کلیر کلز

ملتزم لر ما کنه لرله مملکتلری طولاشارق بندهایی یچوب دوکمی کندی اوزر لرینه آلیور لر.

فقطدها صیجاق اقلیم لرده بولونان سائر اسپانیول جمهور-یتلرینه او قدر مهاجر کلیور. بونکله برابر اوروپا سرمایه لری بورالرده داخل اولمغه باشلا یور. بو سرمایه لر اک زیاده شمندوفر لر انشاسنده، معدن او جاق لری آچیلما سنده و چفتلک لر تأسیسنده قوللانیلیور.

اهالی چوغالدیجه محصولات ده آرتیور. بو محصولات ده بغدای، کوساله، ات کبی زراعی و معدنی محصولات ایله (قهوه، قاقاؤ، توتون، پاموق و قیناقینا کبی) ممالک حاره محصولاتندن، معدن وقوش کوبره سندن عبارتدر. بو ذخائر هپ لیمانلره بریکدیر یلهرک اورادن اوروپایه سوق اولونیور. اوروپاده بوکا مقابل کاملاً امتعه اخراج ایدیور. چونکه بورالرک صنایعی استهلاکه هنوز کفایت ایده میور.

کذا ثروتله برابر مالیه عمومیه دهده انتظام حاصل اولمغه باشلامشدر. صوگ سنه لره کلنجیه قدر (شیلی مستثنی اولمق اوزره) بوتون اسپانیول جمهوریتلرینک بودجه لری آچیقدی. بونلر بورجلرینک فائضنی اوده یه مدکلری کبی اوروپایه قارشیده هیچ بر اعتباره مالک دکل لردی. بوکون یاواش یاواش موازنه تأسس ایدیور، اعتماد حاصل اولیور، پاره یه احتیاجی اولان حکومتلر بوباره یی هپ اوروپادن استقراض ایدیور.

آمریقایی جنوبیده کی اسپانیول حکومتلرده وقتیلہ آمریقایی شمالیده کی انکلیز حکومتلرک داخل اولدق قری رفاه مادی و مساعی طریقنه داخل اولمغه باشلا یورلر .

بره زیلیا . — آمریقایی جنوبی مملکتلرندن اسپانیوللر ائنده بولونیمان یالکز بر مملکت، بره زیلیا مملکتی، اسپانیا مستملک لری ایله عین زمانده و اولدقجه قولای بر صورتده مستقل بر حکومت حالنه کلشدر .

۱۸۰۸ ده وقوع بولان فرانسز استیلاسی اثناسنده پورتیکیز عائله قرالیسی بره زیلیا یه کلش (پورتیکیزک باشلیجه مستملکسی بوراسی ایدی)، حتی فرانسزلر چکلدکن صوکرده بوراده قالمشدی . فقط پورتیکیزلیر، آمریقایه یرلشن بر حکمدارله اداره اولونمقدن ممنون اولمایه رق نهایت عصیان ایتدیلر (۱۸۲۰) . قرال لیزبونه دونمکه راضی اولدی . اوغلی پهدروی بره زیلیا ده نائب حکومت اولارق براقدی .

پورتیکیز قورته زلی آزر زمان صوکره پهدروی ده عودته اجبار ایتدیلر . پهدرو ملی بر مجلس مؤسسان تشکیل ایتدی . مجلس بره زیلیانک استقلالنی بیان و نائب حکومتی ده بره زیلیا ایمراطوری اولمق اوزره اعلان ایتدی (۱۸۲۲) . پورتیکیز دونمسی دفع ایدلدی .

بره زیلیا حکومت حالنده تشکل ایدنجه، آرای محدودده ایله منتخب بر مجلس مبعوثان، بو یوک املاک صاحب لردن مرکب بر مجلس

اعیان، وایمپراطور طرفندن منتخب برده قاینه دن عبارت اولوق اوزره فرانسه وانکلتره حکومت مشروطه سنه تقلیداً تنسیق ایدلی .

فقط اسپانیول جمهوریتلرنده کی مشکلات بوراده موجوددی . یعنی مملکت غایت واسع، نفوس ده اکثریت اوزره زنجی ، ملز ، جاهل و تجارب سیاسیہ دن محروم بریلردن عبارتدی .

داخلی حربلردن بره زیلیاده قورتولامادی . حکومت (پرناموقو) و (پارا) ده جمهوریت فرقه سنک عصیانلری ایله جنوبده کی ایالتلرک عصیانلرینی یاتیشدیرمغه مجبور اولدی . بو حربلرده آرژانتین جمهوریتنده کی حربلر قدرقانی و اوزون سوردی . یاواش یاواش عادات ملایمت کسب ایدنجه ۱۸۶۳ دن سوکره حربلرکده آرقه سی کسیدلی .

بعده محافظه کارلر ایله احرار آره سنده مجادله باشلادی . ۱۸۸۰ ده قانون اساسی تصحیح ایدلی . معتدل احرار راس کاره کچرک ره بانک امتیازاتی لغو ایتدی . ۱۸۸۹ ده جمهوریت فرقه سی حکومت ایمپراطوریه نی بردنبره سقوط ایتدیره رک بره زیلیایی جمهوریته تحویل ایدلی .

بره زیلیا اراضیسی غایت واسعدر . بوتون آمازون نهری حوضه سی ایله (کویان) دن (اوراغو آی) قدر امتداد ایدن ساحلدن مرکبدر . الکچوق قسمی آوروپالیرله مسکون دکبدر .

بوراسی وحشی قبیلہ لرہ طولو، باتاق اورمانلرہ مستور ایصنر بریردر . اڤز یادہ مسکون اولان قسمی بحر محیط اطلاسی ساحلی بونجہ شرقہ طوغرو امتداد ایدر . بوحوالینک منطقہ خارہیہ تصادف ایدن شمال قسمی قہوہ وتوتون مزروعاتیلہ طولو برملکتدر . بورالر بالخاصہ زنجیلر طرفندن زرع اولونور . جنوب طرفلرینک ہواسی اوقدر صیجاق اولمادیفی ایچون آرژانتین جہوریتنہ مشابہ و آوروپامہا جرلرینک اسکانہ مساعددر . مہاجرت ہب او طرفلرہ واقع اولقدہدر .

آمریقادہ امارتک نفوی . — آمریقادہ مستملکاتی اولان آوروپا اقوامنک کافہسی قہوہ وشکر قامشی زرع ایتمک ایچون آفریقا ساحلندن زنجی اسیرلر صاتین آلوب بورالرہ کتیرہ مشلردی . زنجی اسارتی صیجاق منطقہ لرہ تصادف ایدن آمریقا مملکتلرینک ہمان کافہسنہ مخصوص بر اصول ایدی . زراعتدہ انجق زنجیلرک قوللانیلہ بیلہ جکنہ وبونلرکدہ انجق اسیر اولارق چالیشا جقرینہ قناعت حاصل اولشدی .

اسارتہ قارشی ایلمک اعتراض ، انقلاب ہنکامنندہ فرانسدن باشلادی . مجلس مؤسسسان ، املاک صاحبقرینہ ہیچ بر تضمینات ویرلہ مک شرطیلہ فرانسز مستملک لرنندہ کی زنجیلرک کافہسنہ حریت اعلان ایلمشدی . بونک اوزرینہ زنجیلر آیاقلانیدلر . (ہایتی)دہ کی زنجیلر چفتلک صاحبی بیاضلری کسدیلر . مستملک لر اسارتسز اولاماز دنیلدیکی ایچون ناپولئون

اسارتی تکرار تاسیس ایستی . ذاتا دیگر حکومتلرک کافه سی بونی
 ابقا ایتمشردی . فقط بعضلری یالکز زنجی تجارتی قالدیردیلر .
 ۱۸۱۵ده ویانه قونفره سی بوتون دول متمدنه آره سنده برائتلاف
 عقدایدرك زنجی تجارتنه مانع اولدی . فرانسه وانکلتره زنجی
 تجارتیه اشتغال ایدن کیلری یاقالماق ایچون آفریقا ساحلرینه
 قرووازور کوندردیلر . بناء علیه زنجی صاتان کیجیلره قورصان
 نظریله باقیلاجق ، یعنی بوکیجیلر اعدام ایدیله جکدی .

فقط آمریقادا زنجیلره عائله لری اسیر اولارق قالمشردی .
 تاجرلر بونلری الان صاتیورلر ، قانون ایسه هر فردک فرار ایدن
 زنجیلرک صاحب لرینه تسلیمنی امر ایدیوردی . تمام اوتوز سنه
 اسارتک لغوینه موفق اولق ایچون کرک حاکمیت عامه اساسنه
 مستند بر حسک ، کرک حس شفقتک تأثیر یله آوروپا هیجان ایچنده
 قالدی . ۱۸۴۷ده اسوئچ ، ۱۸۴۸ده ده فرانسه اسارتی قالدیردی .
 دیگر حکومتلرده بومثاله ائقنفا ایستیلر .

حکومت متحده آمریقادا اسارتک لغوی بر حرب داخلی ایله
 برابر اولدی .

۱۷۸۷ده مستملکلر یالکز بر ملت حالنده طویلاندق لری زمان
 چفتجیلر له مسکون بولونان جنوب حکومتلری « نظامات خسو -
 صیه » لرینک (اوزمانلر اسارته بونام ویریلیوردی) محافظه سی
 قانون اساسیجه تامین اولونماسنی طلب ایلمشردی . فقط انسانلرک
 حریته اولان حقوق طبیعی لرینی اعلان ایدن ۱۷۷۶ بیاننامه سندن

صوکره آرتق (اسیر) تعمیرینی قوللانمغه جسارت ایدلمدی .
 بونک یرینه بر تعمیر مخصوص ایله : « برایش ویا خدمتله مشغول
 اشخاص » دنیلمدی . کذا زنجی تجارتی ده قالدیرمق ارزو ایدلمدی .
 حتی ۱۸۰۸ مکنجیه قدر اسرا ادخالنه مساعدله ایدلمدی .

اوزمانلر آمریقا رجال حکومتی زنجی طائله لرینک محوی ایله
 اسارتک کندیلکندن قالدیجغه ذاهب اولیورلردی . فقط
 ۱۸۹۳ ده (ویتنه) پاموق آیتلامایه مخصوص برما کنه ایجاد
 ایتدی . بوما کنه ایله ای برایش جی کونده ۳۵۰ اوقه پاموق
 آیتلامایلیوردی . آرتق پاموق حاصلاتی فوق العاده چوغالدی .
 (ژه نورژی وقارولین آطه لری کبی) غایت جسم پاموق تارلاری
 بولونان حکومتلرک زنجیلره پک زیاده احتیاجی واردی .
 (ماریلاند و ویرجینی کبی) اقلیملری پاموق یتشدیر یله میه جک
 درجه ده صیجاق اولان قومشو حکومتلرده ، پاموق یتشدیر نره
 صاتمق ایچون زنجی یتشدیر مکه باشلایلر . بناء علیه زنجیلرک
 عددی آزالاجق ایکن کیتدکجه آرتمغه باشلادی . ۱۷۹۰ ده ۷۰۰۰۰۰
 ایکن ۱۸۲۰ ده بر بچق ملیون اولدی . رسماً منع ایدیلن زنجی
 تجارتی جنوب مأمورلرینک وساطتیه قاچاقچیلق شکلنده اجرا
 ایدلمدی . برکینک حموله سی مصادره اولونجه ، ایچنده کی زنجیلرده
 صاتیلردی .

شمالی حکومتلرده اسرا کیتدکجه اورتادن غائب اولیوردی
 (۱۸۴۰ ده بونلردن بنه قالان واردی) . بوصورتله شمال

طرفلری بر حریت مملکتی حاله کلیوردی. نهایت بوراده اسارت کامالغوایدلی. فقط اسکی حکومتلردن چیقان مهاجرلر (اوخیو) نك جنوب طرفلرینه کیدوب یرلشدکلی زمان عادتلرینی ده برابر کوتوردیلر. بناء علیه جنوب حکومتلرینه منسوب مهاجرلرله مسکون یرلر، اسرالی حکومتلردن معدود اولدی. بو اراضی اولجه جنوب حکومتلرک ایکسینی، دهها صوکرده جنوب حکومتلری بورالری حکومتلر متحده آمریکا یه ترک ایتیش اولدقلی ایچون بورایه اسیر کتیرمک حقوقی اودرجه اعتراض موجب اولموردی. (لوئی زییان) ده اسارت فرانسزلرک اشغالی انساننده بیله موجوددی. فقط اهالی (میسی سیپی) نهرینی تجاوز ایتمکه باشلا ییجه اسارت مسئله سی ده آرتق قطعی بر صورتده حل ایدلک اوزره موضوع بحث اولدی. املاک صاحبی اسرالیله مسکون بولونان (میسوری) اراضی سی ده کنديسنک بر حکومت اولارق قبولی طلب ایتدی. مجلس مبعوثان بوکا شرط اولمق اوزره میسوریده اسارتک لغوینی تکلیف ایتمک ایسته دی. اعیان راضی اولمادی. نهایت (میسوری حقنده بر مقاوله) ایله ایشه نهایت ویرلدی. (میسوری) حکومت اولارق قبول اولوندی. فیما بعد ۳۰، ۳۶ دن کچن عرض دائره سنک شمالنده کی یکی مملکتلرده اسارتک قالدیرلمسنه قرار ویرلدی. دهها طوغروسی بو، بو حدود جنوبنده اسارته مساعده واردیمکدی (۱۸۲۰). جنوبنده اهالی تکرار اسرایه مالک حکومتلر تشکیل ایتمکه دوام

ایدیلر . بونک اوزرینه حکومت متحده آمریکا شمالده حر ، جنوبده اسرا طرفداری اولمق اوزره ایکی منطقه جغرافییه اتقسام ایتدی .

جنوب اهالیسی او قدر چوق دکلدی . فقط جنوب اهالیسی اک زیاده نه قدر حر حکومت وارسه او قدرده اسرا طرفداری حکومت بولونماسنه اهمیت ویریوردی . سناتوده هر حکومتک ایکی مبعوثی بولوندینی جهتله جنوب حکومتلری ایچون اقلیتده قالمق تهلمک سیده موجود دکلدی .

جنوب مبعوثلری ، آره لرنده ائتلاف موجود اولمیان شمال مبعوثلرینه قارشی اسارتی محافظه ایتمک ایچون مشترکاً حرکت ایدیورلردی . بونلر اک زیاده شمال (ده موقراتلر) ی طرفندن التزام ایدیلورلر ، کندیلری ده بو ده موقراتلره باشقه ایشلرده یاردم ایدیورلردی . هبسی ده اسارت مسئله سنی باصدیرمق ایچون آل برلکیله غیرت ایدیورلردی .

فقط ۱۸۳۳ . طوضرو بعض کیمسه لر غلیبانه کله رک خرستیانلق و انسانیت نامنه اسارتک لغوینی طلب ایتدیلر . (اسارت علیهنده جمعیت) لر تشکیل ایدیلر . بو جمعیت رساله لر نشر ایتدی . قونفرانس لر ویردی . زنجیلر ایچون مکتبلر تأسیسنه چالیشدی . بو جمعیت ارکانی شهرلردن ، وبالخاصه ده قوآ که لرلردندی . حکومتلر اولا بونلر علیهنده ، قوانین دشمنلری دیه تعقیباتده بولوندی . فقط اسارته هیچ آیشقین اولمیان

يکي اوروپا مهاجرلری حکومت متحده آمريکايه کلنجه اسارتک لغوينه طرفدار اولانلرچو قالدی .

۱۸۴۸ - ۴۹ ده اوروپادن کله معدنجيبرله مسگون اولان قاليفورنيا حکومتی اسارتی قالديردی . بو حکومتده حکومت متحده آمريکا ميانه ادخال ايدلدى . بونک اوزرينه اسارت طرفدارى حکومتلر اقليتده قالدى . فقط بوکا مقابل اسارت طرفدارى حکومتلرده برقانون تصديق ايتديرديلر . بو قانون موجبنجه حکومت متحده آمريکا اهاليسندن هر فرد، فرار ايدن اسرايى صاحبنه تسليم ايدم جکدى .

اسارتک لغوينه طرفدار اولانلر ، اسرا تاجرلری ايله قاچاقچيلری عليهنده کي نفرتک دائما تزايد ايتمندن استفاده ايديلر . بالخاصه پروتستان راهبلىر انسانيته وخرستيانلغه مغاير اولدینی ايچون اسارتک عليهنده بولونديلر . تام او صروده (عموجه طومک قولبهسى) نامنده کي اثر انتشار ايتدی . بو اثرده مادام بهخه رستوو ، زنجيلرک حال سفيلانه سنی ، اسارت يوزندن کرک اسرانک و کرک صاحبلىرینک دوچار اولدقلىر فساد اخلاقی رومان طرزنده تصوير ايلدی . کتاب غایت پارلاق وسريع بر موقعيته مظهر اولدی . ۱۸۵۴ ده شمال حکومتلرنده يکي برفرقه ظهور ايتدی . بو فرقه (جمهوريت پرور) نامنی آلارق آچيقدن آچيغه اسارت عليهنده بولوندى . ۱۸۶۰ ده ، ده موقرات فرقه سنک انقسامی اوزرينه ، نامزدی (لهن قولن) ی حکومت

متحدہ آمریکا ریاستہ انتخاب ایتدیرمکہ موفق اولدی .
جنوب حکومتلری ، حکومت متحدہ آمریقانک تاسسندن
بری اجرا ایلدکلری نفوذی آلدن چیقارمغه راضی اولمادیلر .
حکومت متحدہ دن آیرلمغه قرار ویره رک یکی بر ہیئت متحدہ
تشکیل ایلدیلر . بونک اوزرینه حرب ظهور ایتدی . حرب ،
اولا قانون اساسی یه متعلق بر مسئله دن چیقدی . حکومت یالکز
جنوب حکومتلرینی زورله حکومت متحدہ یه داخل ایتک ایتدیور ،
حتی اسارتک لغوینی آغزه بیله آلمقدن اجتناب ایدیوردی .
فقط حرب ، مسئله یی کاملاً حل ایتک حکومتی ده مجبور
ایتدی . اولا شمال ازدولری طرفندن اسیر ایدیلن زنجیلر
آزاد ایلدی . دها صوکره رئیس جمهور ۱ کانون ثانی ۱۸۶۳
تاریخنندن اعتباراً هر زنجینک حر اولدیغنی اعلان ایتدی .
نهایت قونفره ۱۸۶۵ ده اسارتی کاملاً لغو ایلدی . دها صوکره
قونفره ، زنجیلرکده بیاضلرکی حقوق سیاسی یه مالک
بولونمالرینه قرار ویردی .

اسارت یالکز خرسیتیان حکومتلردن برنده ، بره زیلباده
قالشدی . فقط ایمراطور زنجیلرک دنیا یه چوجقلری کلدکجه
بونلری آزاد ایتدی . دها صوکره اسیر قالان زنجیلرده آزاد
ایدلی .

موزو قاعده سی . — اسپانیول مستملکلری مستقل
حکومتلر حالنده تشکل ایدنجه اک اول بونلری حکومت متحدہ

آمریقا تصدیق ایتدی . او سرده اتفاق مقدسی عقد ایتمش اولان اوروپا دول معظمه سی ، حکمدار مشروعری بولونان اسپانیا قرالنه قارشی عصیان ایدن اسپانیول جمهوریتلریله محاربه ایتمک ایچون آمریقایه مداخلتده بولونولماسنی ۱۸۲۳ قونفره سنده تکلیف ایتدیلر .

حکومات متحدهٔ آمریکا رجال حکومتی ده ۱۷۸۰ ده اوروپا لیلرک آمریکا ایشلریله مشغول اولامیه جقلمی قاعده اتخاذ ایشلردی .

بناء علیه حکومت متحدهٔ آمریکا رئیس حکومتی انکلتره حکومتی ایله ائتلاف و روسیه ایله عقد ایلدیکی مذاکره دن استفاده ایدرک ۱۸۲۳ بیاننامه سنی اعلان ایتدی .

مذکور بیاننامه ده یازلدیفنه کوره « آمریکا اراضیسی ، شمدی به قدر اکتساب و محافظه ایلدکلری وضعیت مستقلانه حسبیه بوندن بویله هیچ بر اوروپا حکومتی طرفندن مستملکه اراضیسی اولق اوزره نظراعتباره » آله میه جقدی . کذا رئیس حکومت شوسوزلری ده علاوه ایدیوردی : « بز اوروپا دول معظمه سنک حر برینه هیچ اشتراک ایتمک . چونکه بو بزم سیاستمزه قابل تألیف دکلدیر . بناء علیه اوروپا دولتلی طرفندن وقوع بولاجق آشبثاتکده نصف کرمه قدر توسعنی صلح و مسالمت و امنیتمزه نامنه بر تهلکه عد ایدرزه » .

ایشته بوکا « مونروئه قاعده سی » نامی ویرلدی . و بو

قاعدہ شدہ شو طرز زدہ بر دستور شکلنہ قونولدی : « آمریکا ،
 آمریقاییلر کدر ! »

اوروپاییلرک آمریقاده (کویان) ایله (آنتیل) آطه لرندن
 باشقه یرلری یوقدر. آمریقا قطعہ سنک هرایکیسنه اوروپادن کن
 مهاجرلرک احفادی ایوم مستقل بر قوم تشکیل ایتمکده درلر .

اوروپا خارجنده اوروپايي اقوام

آفريقاده فرانس . — فرانسہ اون سکزنجي عصرده
هان بوتون مستملڪه لريني آلدن چيقارمشدي . فرانسہ يه
آفريقاده (ره ئونبون) ، (سن لوئي) و (غوره) آطه لري ، —
آمريقادہ (آنتيل) اراضي سي ، — آسياده ده هندستانده
انكليزلر ك فرانسزلره براقده قلري بش اسكله دن باشقه ير قالمامشدي .
فرانسہ يي بر مستملڪات حكومتي حالنه قويمنجي ارزو ايدن
ناپولئون ، انكلتره يه قارشى اجرا ايلديكي محاربه دن طولايي
بوكا موفق اولامادي . رستموراسيون اداره سى ده مستملڪات
مسئله لريله هيچ مشغول اولمادي . فقط ۱۸۳۰ دن اعتباراً
فرانسہ اداره حكومتلرينك كافه سى ده بر مستملڪات ايمراطورلنى
تأسيسنه غيرت ايلديلر . بونلر اوسترايلا ده يكي قاله دونيا ايله
تايي آطه لريني ، جوارده كي بر قاچ آطه يي ، آسياده ده هند
چيني يي اشغال ايلديلر (۱) .

فرانسہ مستملڪاتنه اكز ياده زمين تشكيل ايدن ، آفريقا اولدى .

(۱) اسكى انكليز ، اسپانيول و پورتكيز مستملڪه لري مستقل حكومتلر
حالنده تشكيل ايدوبده آمريقاليلر ك اوروپا ليله مخصوص بر مستملڪه
اولماديفنى بيان ايتكلى تاريخدن اعتباراً طبيعي فرانسہ نك ، آمريقادہ
مستملڪه تاسيس ايتنى موضوع بحث اولامازدى .

فرانسه نك ۱۸۱۵ ده آفریقاده کی مالکانه سی طاغنیق برقاچ مؤسسهدن عبارتدی . بونلرده : (سن لوئی) و (غوره) آطه سی ایله آفریقانك غرب ساحلنده (غابون) موقعنده برقاچ اسکله دن، شرق ساحلده کی (ره نیون) آطه سندن عبارتدی . فقط بالاخره فرانسه بوراده درت بویوک راشغال ایتدی . انلرده : ۱ - شمال ساحلده جزایر تونس ؛ ۲ - سنه فال و سودان ؛ ۳ - غرب ساحلده قونگو و غابون ؛ ۴ - ماداغسکار آطه سندن عبارتدی . اشغال، اولاً شمال ساحل دن، جزایردن باشلادی . بوراده بربرینه قاریشمش اوج قوم واردی . بری، رومالیلر زمانده آفریقانك اسکی اهلینك احفادن دن اولان (کابل) لرایدی . بونلر اسلام اولشلر ، فقط لسان و عادت لری نی محافظه ایتشلردی (۱) . کابللر، یلرلندن آیرلماز و چفتجیلکله اشتغال ایدن برطاقم کویلولردن، فقط عین زمانده سلاح طاشیان و طاغیر اوزرنده مستحکم شهرلرده اقامت ایدن جنکاور کویلولردن عبارتدی . بونلرک اک چوق بولونقلری ی (آطلاس) طاغیری ایدی .

اون برنجی عصرده مصر دن کلش اولان صر بلرده چادرده اوطورر، بدوی و چوبان بر قوم اولارق قالمشلردی . بونلر هر بری بر شیخه مطیع برطاقم قبیله لره آیرلمشلردی . کذا بونلرده سلاح طاشیرلردی . بناء علیه بر برینك قویونی جالمق ایچون بوقبیله لر آره سنده دائمی ر حرب و قوعه کلیردی . صر بلرک زیاده (آطلاس)

(۱) بربری لسانی قونوشانلره (بربری) دینیر .

طاغلیرنیک اوک طرفنده کی یایلالرله آرقه طرفنده کی صرترلرده
اوطوررلردی .

اون آلتنجی عصرده کلن تورکلر بوراده برقوم تشکیل
ایتمزلردی . بونلر شهرلره و اکزایاده دکزقیسیسنه یرلشن
عسکرلره قورسانلردن عبارتدی . رئیسلرینه برتورک عنوانی (بک
ودایی) و یریلیر، بوبکلر استانبولده اوطوران پادشاهه وکاله آدازه
حکومت ایدیور عداولونوردی . حقیقت حالده ایسه بونلر حادتا
برر حکمدار کی سلطنت سوررلر، فقط نه کابللری، نه ده صربلری
کندیلرینه تابع قیلامازلردی .

بو اوج جنکاور قومدن باشقه شهرلرده ده (مغربی) تعبیر
اولونان یهودیلرله ملزلردن مرکب ، مسالمت پرور و تجارتله
مشغول براهالی واردی . حتی نه یهودیلر، نه ده مغربیلر هیچ
بر تجاوزه قارشی طور مامشلردی .

فرانسه، بو اوج صنف جنکاور ااهالی بی بربرر تحت انقیاده
آلدی . ۱۸۳۰ دن ۱۸۳۷ یه قدر تورکلری (صولک حادته
قسطنطینیک ضبیطی اولدی) ، ۱۸۳۷ دن ۱۸۴۷ یه قدر صربلری
(صربلر اکزایاده عبدالقادرک قومانداسی آلتنده اولارق قارشی
طور مشلر ، فقط فرانسه عبدالقادری رسماً صربلرک رئیس
طاینته رق مشارالیهک موقعنی تحکیم ایلمشدی) ، ۱۸۴۴ دن ۱۸۷۱
قدرده کابللری (مجادلات ۱۸۵۲ ده ختام بولمش، آرتق اولندن
صوکره عصیانلردن باشقه برشی ظهوا یتمه مشدی) .

ایشته بویله یکر می سنه محاربه ایندکدن صوکره فرانسه
 (صحرای کبیر چولنده کی ۱۰۰۰۰۰ کیلومتر و مرابی جسامتنده
 اراضی داخل اولمادینی حالده) ۳۰۰۰۰۰ کیلومتر و مرابی
 جسامتنده بر اراضی آله ایتمشدر . دهاصوکره کابلی و عرب کبی
 اسکی اهلینک یانه آوروپالی مهاجر لکلوب یرلشمشدر . بونلرک
 نفوسی ۱۸۸۱ ده ۴۲۰۰۰۰۰ کشی به بالغ اولمشدر . نوم مهاجر لکلوب
 یاریسی فرانسه و یاخود همان کافه سی ده جنوب ایالتلردن کله فرانسه
 نسلندن و یاخود فرانسه تابعیتی قبول ایدن اجنبیلردن عبارتدر (۱).
 متباقیسی ده ایتالیا ، اسپانیول و مالطه لی کبی اجنبیلردن (بوکا
 ۱۸۷۰ ده فرانسه تابعیتی قبول ایدن ۵۰۰۰۰ جزایر یهودیسی ده
 علاوه ایتک اقتضا ایدر) . یرلیرک نفوسی ۳۶۰۰۰۰۰ قدردر .
 بوتون مملکت ایکی قسمه آیرلشددر . مهاجر لکلوب او طور دقلری یرلر
 اراضی مدنیه بی تشکیل ایدر . بوراسی فرانسه ده کی کبی مأمور لرله
 اداره اولونور ، فرانسه اصولنجه تشکیل ایدلمش اوج ایالته آیرلشددر .
 اهالی مجلس مبعوثان ایله اعیانه اعضا انتخاب ایدر لر . یرلیرک
 قسم اعظمی اراضی مدنیه دهده او طور لر . دینلرینی ،
 قانونلرینی و قبیله رئیس لرینی تمامیله محافظه ایدر لر سه ده فرانسه
 عد ایدلر لر .

یالکز یرلیرله مسکون بولونان ممالک (بوراسی بالخاصه

(۱) ۱۸۷۰ دن صوکره جزایر ده آزاسیلردن مرکب مستملکلر

تشکیلده تجربه ایدلمش ایسه ده موفقیت حاصل اولمامشدر .

صحرائی کیردر (اراضی عسکریہ) دن معدوددر . بو اراضی
 عسکری بر صورتہ تشکیل ایدلمشدر . فرانسر ضابطلری بورادہ
 ہم عسکری قوماندان ، ہم دہ ادارہ ، ماموریدر . بونلر امور عدلیہ
 قاریشدقلری کبی یریلیر آرمندہ نظام وانتظامی دہ محافظہ ایدرلر .
 یریلردن آنان ویا جزایدیلن محصولدار یرلرک الک بویوک
 قسمی مهاجرلرک ایلنہ کچمشدر . مهاجرلر بورایی کاملاً زرع
 ایتمشدر . اساساً زراع بر قوم اولان کابلرایسہ بونلرک محصولی
 برقات دہا آرتدیرمشلردر . جزایر ہرشیدن زیادہ حبوبات
 مملکتیدر . ۱۸۸۷ دہ بورادن ۱۵ میلیون کنتالہ یاقین بغدادی
 ویا آریہ آلمشدر . کذا بورادہ صیجاق مملکتلرہ مخصوص میوہ لردہ
 بیتیشیر . ۱۸۸۷ دہ ۱۶۰۰۰۰ ہکتولیترہ زیتون یاغی چیقمشدر .
 کذا پورنتقال وخرما آغاجی ایلہ شکر قامشی دہ چیقار .
 بر قاج سنہدر جزایردہ یکیدن اوچ منبع واردات دہاظہور
 ایتمشدر : جزایر ساحلندہ سبزہ دیکیلہرک تر فندہ اولارق فرانسیہ
 سوق اولونور (بورادہ سبزہ فرانسدہ کیلردن چوق اول
 نشوونما بولور) . داخلہ کی صرتلرہ (ہالفا) دنیلن بر نوع
 یابانی اوت زرع اولونور کہ بوندن کاغدیاسیلیر . ۱۸۸۷ دہ بو اوتدن
 ۲،۲۰۰،۰۰۰ کنتال محصول آلمشدر . وسطدہ کی منطقہ دہ ایسہ
 باغ بیتیشدیرلمش والآن دہ بیتیشدیرلمکدہدر . ۱۸۸۶ دہ بورادہ کی
 باغلرک مجموعی ۷۰۰،۰۰۰ ، ۱۸۸۰ دہ ۸۸۰،۰۰۰ ہکتار ایدی .
 ۱۸۸۶ دہ ۱،۵۶۹،۰۰۰ ، ۱۸۸۸ دہ ۲،۷۲۸،۰۰۰ ہکتولیترہ

شراب آلمشدر .

جزایرک تجارقی ۱۸۸۷ ده ۲۱۱ میلیون ادخالات و ۱۸۶ میلیون اخراجاتن عبارتدی .

ایدیلن حسابه کوره ۱۸۳۰ دن ۱۸۸۸ مقدر فرانسه حکومتی جزایر ایچون بش میلیار صرف ایتمش و آنجق ۱۰۲۵۰ میلیون قدر آلابیلمشدر . فقط شوراسنی نظر دفته آلملیدرکه بو پارمه نک ۳،۱۴۰۰ میلیونی مصارفات عسکریه به تخصیص ایدلمشدر . بالآخره واردات مصارفاتی تجاوز ایتمشدر . ایوم جزایر ده کی املاک قیمتی ۳ میلیار دن زیاده تخمین ایدلمکده در .

جزایرک همایی طرفنده مستقل ایکی اسلام حکومتی قالمشدر . بونلرده ضربده فاس، شرقده تونسدر . فرانسه ۱۸۴۴ ده عبدالقادرله اتفاق ایتمش اولان فاس سلطاننه قارشی احراز مظفریت ایتدکن صوکرده فاسی اشغاله اهمیت ویرمه، مشدر . تونس جهتنده ایسه یالکز تونس بکنی بحر سفیده اجرا ایلدیکی قورصالقندن واز کچیرمکه اکتفا ایلمشدر .

تونس بکی ده مملکتنه أوروبا اصولی ادخال ایتمکه اوغرا . شمشدر . فقط فرانسزمهندسلرینه یالکز برقاچ ایش بایدیرمق و أوروبا دن استقر اضاتده بولونمق دن باشقه برشینه موفق اولاماش ، نهایت ۱۸۶۹ ده بو استقر اضلر یوزندن افلاس ایتمشدر . بناء علیه غایت قاریشیق بر حاطده قالمش ، داخلمده بولونان منابعدن استفاده ایدیله مه مشدر .

فرانسه حکومتی ۱۸۸۱ ده تونس قبائلنك جزایر حدودینی تجاوز ایلدکیرینی بهانه ایدرک تونس اوفاق براردو کوندرمشدر .
 تونس بکی قارشى طورمغه هیچ اوغراشماندن اراضیسینی فرانسه
 حمایه سنه قویمایه راضی اولمش ، عنوانی ، سراینی و وارداتی
 اولدینی کبی محافظه ایتشددر . فرانسه تونسده عدلیه و مالیه کبی
 اداره لرده هر درلو اصلاحاتده بولونمغنی درعهده ایتمش ، لزوم
 کوردیکی محالرده عساکر محافظه بولوندیرمق حقیقی استحصال
 ایتشددر . مناسبات خارجه نك اداره سنی کندی اوزرینه آلمش ،
 فرانسزلردن مرکب خصوصی براداره تشکیل ایتشددر . بواداره
 برقاچ سنه ایچنده ویرکیلری تخفیف و مصارفاتی تنقیص ایدرک
 مالیه نی ده اصلاح ایتشددر .

ریلیر عادتیرینی ، قانونلیرینی ، ملکیرینی کاملاً محافظه ایتشددر .
 فقط منتظم براداره ایله امنیت تأسیس ایدنجه مملکته آوروپالیلرده
 کلکه باشلامشدر . بونلر آآنده بالکیز تجارت ایچون دکل ، حتی
 اراضی ایشلمک ایچون کلیورلر . ایوم جزایرده ۴۰۰۰۰
 آوروپالی وارددر . بونک ۱۵۰۰۰ نی فرانسزددر .

تونس ۱۳۰ : ۱۵۰۰۰۰۰ کیلومتر و سربعنده (فرانسه نك
 درنده بری قدر) در . جزایردن دهها محصولداردر . تونس
 وقتیله رومانک آفریقایالتنی تشکیل ایدیور و برجوق زمانلرده
 انباری مشابه سنده بولونیوردی . کذا تونسدهده باغ بیتشدیرمه
 باشلامشدر .

تونسک تجارتی ۱۸۸۱ء دہ ۱۲ میلیون ادخالات و ۱۱ میلیون اخراجات ایکن ۱۸۸۸ دہ ۳۰ میلیون ادخالات و ۱۹ میلیون اخراجات بالغ اولمشدر .

فرانسه بورایی اشغال ایچون تقریباً ۳۰۰ میلیون صرف ایتمشدر . فقط بواشغال مصارفی سنہ دن سنہ آزالمقدہ در . ایوم جزایر ایله تونسہ صاحب بولونان فرانسه ، آفریقای شمالی یہ تمامیلہ حاکم بولونمقدہ در .

آفریقانک غرب ساحلندہ ۱۸۵۴ سنہ سنہ کلنجیہ قدر فرانسنک یالکز (سن لوئی) و (غورہ) آطہ لرندن باشقہ یری یوقدی . بورایہ فرانسه عسکرینک حمایہ سی آتندہ اولارق برقاچ فرانسنز تاجر کلیر ، یریلرلہ تجارتدہ بولونوردی . سہ نہ غالک شمالدہ کی مملکت (طوقولور) دنیلن اسلام جنکاورلرینک آندہ ایدی . بونلر نہردن کچن سفائندن برنوع رسم آلیرلردی . سہ نہ غالک جنوبندہ کی مملکت بت پرست زنجیلرلہ مسکون بولونور و کندی جنسلرندن برطاقم اوافق قرالر طرفندن اداره اولونوردی . ۱۸۵۴ دن سوکرہ فرانسنز والیری سہ نہ غالک ہر ایکی ساحلندہ دہ فرانسه حاکمیتنی طانیتمغہ چالشمشدر .

بونلر جنوب ساحلندہ کی زنجی قرالریلہ مسالمتکارانہ برطرز دہ اوپوشمشلر ، ہدیہ لہر و عسکری نمایشلرلہ بربرینی متعاقب معاہدہ لہر عقد ایتمشلر ، بومعاہدہ لہر سایہ سندہ یالکز سہ نہ غال ساحلر ندہ دکل ، حتی « جنوب ساحلر دہ کی » بوتون حوالیدہ دہ عسکری موقعلر

تأسيس ايتمك و تجارتده بولونمق حتمنى فرانسه يه اعطا ايتدير مشلردر .
 فقط شمال ساحلده كى (طوقولور) لره قارشى قوت استعمالنه
 لزوم كورولمشدر . فرانسز عسكركلى تدريجى بر صورتده ، اوفاق
 اوفاق استحكاملر يابه يابه نهر بويجه ايلريه مشلر ، مسالمت پرور
 اهالى هپ بو استحكاملر ك اطرافنه كلوب طويلا نمشدر .
 (طوقولور) لر بو استحكاملره تعرض ايتمشلر سده دانما بوسكو-
 رتولمشلردر . نهايت بونلر ك حاكيمتلى كاملاً محو اولمشدر . ايسته
 بوتون بو حربلر هپ بر قاچ يوزكشيدن مركب هيئت سفر يه لر
 و محافظ عسكركل طرفندن اجرا ايدلشدر . بو قطعاتك يالكنز
 بر قسنى فرانسز اولوب متباقيسى فرانسز ضابطانك اداره سنده
 هپ ير ليردن تشكيل ايدلشدر .

فرانسز لر سه نه قال منبعلرينه كلدكلى زمان (يوقارى
 نيژه) . كيدن كاروان يولنى تعقيب ايدر ك بوسايه ده (سودان) .
 واصل اولمشلردر .

(سودان) واسع بر اراضيدر . (يوقارى نيژه) دن
 (نيل عليا) يه قدر بوتون آفريقانك مركزىنى اشغال ايدر .
 اك چوق قسمى چول و بلكدده چوراق بر اراضيدر . فقط
 كويلرى محو و پریشان ايدن متبادى حربلره ، اهالى بي قالد يروب
 كوتورن اسير تاجرلرينك سفرلرينه رغماً ينه سودانده كند ييلريه
 معاملاتده بولون يلابيله جك اولدجه چوق بر نفوس واردر .
 اوروپالير كندى امتعه لر ينى (بالخاصه قماش و خردواتى)

سودانك فيل ديشى، آلتون توزى، ضمع و حبوبا تيه مبادله ايتك
 ايچون بوراده كندى امتعه لينه مخرج آچغه چاليشمشلردر.
 فرانسزلرك سودانه كله بيلملىرى ايچون ايكي يول
 واردى. اونلرده صحراى كيردن كچوب (طومبوقطو) يه كلن
 جزاير يولى ايله (نيزه) نهري بويجه اينن سه نه غال يولى ايدى.
 فرانسزلر بردن ايكي شمندو فرانشاسنه باشلامشلردر. بونلردن برى
 جزايردن باشلاياجق اولان ماوراى صحراى كير شمندو فرى ايدى.
 فقط صحراى كيره كوندريلن فلاتهر هيتت سفريه سنك قتل عام
 ايدلسى اوزرينه (۱۸۸۲) ماوراى صحراى كير شمندو فرندن
 واز كچلدى. سه نه غالده انشاته باشلاندى. شمندو فرنك ۲۶۴
 كيلو متره سى ايشه دلدى. فقط انشآت اميد ايدلدك درجه ده
 بهالى چيقدى.

معاهده عقدينى قبول ايدن مملكتلرك كافه سنده فرانسه
 جزئى عساكر محافظه ايله عسكرى پوسته لر تاسيس ايتمشدر.
 اليوم سه نه غاله طوغرو ايلريله ين بو پوسته لر خطى كاملاً تمام
 ايدلمشدر. ۱۸۸۳ ده (نيزه) نهري اوزرنده كائن (باماقو) ده
 اشغال ايدلمش و شمندو فر خطى نه ر مذکور بويجه ايتمه
 باشلامشدر.

(سه نه غال) ده همان هيچ فرانسز يوقدر. اقليم غايت
 صيبجا قدر. فقط يرليلر كنديلرينى فرانسز تبعه سى عد ايتمه
 پك چابق آليشمشلردر. مملكتك تجارتنى پك زياده برسرعتله

آرتمقده در. سنهده تقریباً قرق ملیونه بالغ اولمقده در (۱).

(آکواتور) ك جنوبنده (غابون) مدخلنده اوفاق بر فرانسه اسكلهسی ، كشیفته نقطه حرکت خدمتی كورمشدر . بو كشیفات (اوغوته) نهری بویجه چقمش (۱۸۷۳ - ۷۸) و (قونفو) نهرنده نهایت بولمشدر . صاوورنان دوبرازا بو ائاده فرانسه حكومتی نامنه ۶۷۰۰۰۰ کیلومتره مرابی جسامتنده بریر استملاك ایتمش ، بورانك حدودی ۱۸۸۵ - ۸۶ ده برلین قونفرانسی معرفتیه تعیین ایدلمشدر . ایشته فرانسه دن دهاكنیش اولان بواراضی یالکیزیریلرله مسكوندر . فقط اقلیمی سه نه غال قدر فنا دكلدر . حتی بوراده بری (اوغوته) منبعلرنده ، دیکری ده (قونفو) نه رینك صاغ ساحلنده (برازا ویل) ده ایکی مؤسه تشکیل ایدلمشدر (برازا ویل ، قونفو نه رینك او بر ساحلنده باجیقا قرالی نامنه اولارق ستانلهی طرفندن تاسیس ایدیلن وقونفو حكومت مستقله سنك مركزز ادارهسی اولان (له ئوبولدویل) ك قارشیننده در) .

فرانسه آفریقانك شرق ساحلنده ده اون یدنجی و اون سگزنجی عصرلرده ماداغاسقار آطه سنی اشغاله چالیشه مشدر . فرانسه حكومتی دهاصو كرا بو آطه دن واز كچمش ، بو حوالیده ، وقتیه قهوه و شکر قامشی زراعتندن طولایی غایت زنکین اولدینی حالده ایوم طوپراغك قوه انباتیهسی بیتمش اولماسندن طولایی نیم خراب بر حالده بولونان (ره ئونیون) آطه جقلرندن باشقه

(۱) (کینه) ساحلنده کی فرانسه مؤسسائی برر اسکلدن باشقه برشی دكلدر . حتی بولونقلری برلر صحتهمقار و پك بهالی به اوطوردینی ایچون برزمانلر حكومت طرفندن متروك براقامشدی .

آلنده برشی قاللامشدر .

مع مافیه فرانسه حکومتی ، ماداغسقارده بر نوع حکومت
عسکریه تشکیل ایتمش اولان (هووا) اقوامی اوزرینه اجرای
نفوذ ایتمکه چالیشدی . بونرله بر چوق حمایه معاهده لری عقد ایدلدی .
هووالیرله خرسیتیانلنی قبول ایتدرمش اولان انکلیز میسیو -
نز لری اولا فرانسز نفوذینه مقابله ایتمکه چالیشدی لر . فرانسه
حکومتی ۱۸۸۵ معاهده سنی هووالیرله قبول ایتدردی . بو
معاهده موجینجه (دیه غو - سو آرس) لیمانی فرانسه یه ترك
ایدیلیور ، ماداغسقار ك مركز اداره سنده فرانسز لره بر ولی
بولوندر مق حقی بخش اولونیوردی . نهایت آطه نك وسطنده
عسکر ی بر سفر اجراسنه قرار ویرلدی . بو سفر ماداغسقار ك
الحاقی ایله نتیجه لندی (۱۸۹۵) .

ایشته فرانسه حکومتی بوضورتله آفریقانك درت منطقه سنده
حاکمیت قازاندی .

آسیاده اورویا دولترنك نرقی ورقابتی . - آسیا قطعه سی
اورویا دولترندن اوچ دولت طرفندن پایلاشلمغه باشلامشدر .
بونر ك هر بری همان متمادی بر صورتده ایلریلیه ایلریلیه ایوم
بر برینك قارشیسنه چیقمشدر لر .

روسیه حکومتی شمال ایله غربدن ایلریله دی . بو حکومت
اون آلتنجی عصر دن بری سبریایی اشغال ایلدی کی کبی ۱۷۹۹ ایله
۱۸۵۹ آره سنده ده قاققاسیه ممالکنی آله ایتمشدر .

انکلتره حکومتی جنوبدن کلدی. ۱۷۵۷ ده (بنکاله) دن باشلادی. ۱۸۵۷ ده هندستانی ضبط ایتمکه نهایت ویردی .
فرانسه اک صوک کلدی. ۱۸۶۲ ده جنوب شرقی به ، هند
چینی به یرلشدی .

بو اوچ مالکانه نك اک اهمیتسزی فرانسه نککیدر . فقط
بوده پك چاق ترقی ایتشدردر . فرانسز میسیونرلرینی قتل ایدن
آننام ایمپراطورلری اوچ ولایت ترکنه اجبار ایدلمش ، بو اوچ
ولایتلده فرانسه (قوشن شین)ی وجوده کتیرلشدردر . بو ولایت
۱۸۶۷ ده آریجه اوچ ولایتله تکرار بویدلشدردر . بو کون
نفوسی ۲ میلیون اولدینی کبی تجارتنی ده سنه ده ۱۲۳ میلیوندر .
بودجه سی ۱۸۶۸ ده سکز میلیون ایکن ۱۸۸۸ ده ۳۰ میلیونه
بالغ اولمشدر . مملکتک هواسی ، طاغلق طرفلر مستثنی اولمق
اوزره ، صحتیه براز مضردر . فقط فایت محصولدار وبالخاصه
پرنجی بولدر .

فرانسه ۱۸۶۳ دن اعتباراً اوفاق قامبوج قرالغنی ، بعده
(طونکین) حربندن صوکره آننام قرالغنی ده حمایه سی آتته
آمشدر (۱۸۸۳) . آننام ایالنندن طونکین حوالیسی فعلاً
استقلال کسب ایتمش و فرانسزلر طرفندن ایکی دفعه ضبط
ایدلشدردر . ۱۸۸۲ دن بری ده فرانسزلر طرفندن اداره ایدلمکده در .
فرانسه بو صورتله آزچوق علنی بر صورتده هندچینی نك
جنوبنده (مالاقا) و (سنگاپور) کبی ایکی مهم نقطه ده آلدی ایتشدردر
(۱۸۳۶) .

انگلتره نك مالكانه سی (هیالایا) دن (سیلان) آطه سنه قدر تکمیل هندستاندن عبارتدر. بوراسی ۴۵۰ ملیونلق بر یردر. بوواسع ایمراطورلنی هندستانك اوفاق و عسکری مستبدلرندن برعصرظرفنده (۱۷۵۷ - ۱۸۵۷) تماماً ضبط ایتمش اولان هند شرکتی ریلبره هیچ طانیشماندن هندستانی مستبدانه اداره ایتمکده دوام ایلشدی. فقط سپاهیله اوجسیم اختلالندن صوکره شرکتک یرینه انگلتره حکومتی قائم اولدی (۱۸۶۰). هندستانك بوتون امورینی درعهده ایتدی. بو اداره هندستانك هیچ کورمدیکی مسالمتك هیچ اولمازسه تأمیننه مدار اولدینی کبی اهلینك چالیشماسنی، زنکینلشمه سنی و چو ظالماسنی ده تامین ایدیور. هندلیلر کندیلرینی اداره ایدن انگلیزلردن دینا و اخلاقاً بام باشقه در. فقط هندستانده صنوف عالییه بی تشکیل ایدن (براهمانلر) آریا جنسندندر. بونلرده کی تشکلات جسمانیه ایله طرز افکارك آوروپالیرگکنه مشابته هر ایکی قومك ده عین جنسه منسوب اولدینی تحظر ایتدیرر. بورایه ایلك دفعه کلن انگلیز والیر هندلیلرک اکاسکی مدیتلرینه مفتون اولدقلری ایچون هندستانه نه آوروپا افکارینی، نه ده آوروپالسانی صوقایه اودرجه غیرت ایتمه شلردی. فقط ۱۸۳۶ ده ماقوله يك توصیه سی اوزرینه حکومت برقرار اتخاذا ایتدی. بو قرارك نتایج عظیمه سی کورولدی. هندستان مکتبلرنده مملکتك لسانیله برابر انگلیزجه نك ده

تدریسنه قرار ویرلدی (۱) .

سویس قنالی ایله تاغراف، هندستان ایله انکلتره بیننده اتصالی غایت سزیریع برحاله کتیردی. هندتجارتی دهشتلی بر صورتده ترقی ایستدی. ایکی مملکت بیننده رابطه غایت صتی اولمغه باشلادی. حتی برقاچ سنه دن بری هندلیلر آورو بامد نیتنه عادتا ایصینور کبی کورونیور لر. بونلر انکلیرجه اوکر ندکاری کبی قلاسیک تحصیلده دوام ایدیور لر. هندلساننده کتابلر وغزته لر چیقاریور لر. دیگر طرفدن انکلتره ده بونلره اداره حکومتده بر موقع تأمین ایدیور. حتی (قالدکوتا) دیوان عالیسی اعضاسی میاننده برچوق هندلی واردر .

روسیه نك اراضیسی واسع ، فقط همان ایصنر ، قسم اعظمی اسکانه غیر صالح سبریا اوواسندن عبارتدر . روسیه حکومتی برعصردن بری بورایه بیکلرجه محکومین نفی ایستدیکی حالده نفوسی حالابش ملیونه چیقماز .

جنوبی سبریانك منابع ارضیه سی بیله لایقیله معلوم دکلدر . شمیدی به قدر ممدنلردن باشقه برشی ایشله دله مشدر . بوراده غایت جسم اورمانلر واردر . اهالینك مقداری چوغالنججه اراضیدن استفاده ایدیله جک کبی کورونیور .

(۱) هندستانده سانسقریت لسانندن مشتق ، بنکاله وهندلسانی اولق اوزره برقاچ لسان تکلم ایذیلیر . فقط فرانسرجه فصلکه لاتینجه ایله ایتالیا نجه نك یرینه قائم اولمش ایسه بوراده ده السنه میته حاله کچن سانسقریت لسانک یرینه بوسانلر قائم اولمشدر .

مغولستانك بوزلی چوللری روسیه نك سبریا جهتندن
ایرله مسنه مانع اولمشدر . روس اراضیی یالکز (آمو)
نهرینك جنوبنده فرانسه قدر بویوک بریر قازانمشدر (۱۸۵۸) .
روسیه حکومتی بر قاج سنه دن بری چینه طوغرو ایرله مکه
باشلامشدر .

روسیه حکومتی آسیاده اك زیاده غریب دن ایرله مکه دوام
ایلمشدر . بو طرفده قافقاس طاغیرینی کچرک ایرانه طوغرو
صارقشدر . کذا تورکستانه طوغروهده توسیع اراضی ایتمکه
چالیشمشدر . تورکستان ، تورک نسلندن بدوی قبیله لرك تحت
حاکمیتنده در . بونلر سورولرینك حاصلاتی ایله وشقاوتله یاشار
بر طاقم جنیدیلردن عبارتدر . بو جنیدیلر ایرانك مسالمت پرور
زراعی اوزرینه چته چته آتیلرلر ، کویلرینی یغما ایدرلر ،
اهالیسنی بارکیلرینك آرقه سنه باغلا بهرق اسیر بازارینه کتیرو
صاتارلردی .

روسیه اولاشمالدن کله رك بونلری اطاعت آلتنه آلف
چالیشدی . فقط (خیوه) به کوندریان هیئت سفریه یولده محو
اولنجه (۱۸۴۱) ، بو یولی تعقیبدن صرف نظر ای
اوزمان تورکستانه (بحر حزر) طریق ایله داخل اولدی . قره دکز
ساحلنده کی (بوتی) ایله بحر حزر ساحلنده کی (باکو) ساحلنده
برشمندوفر انشا ایدیلرک اولاشمال بحر حزر ایله روسیه
برابطه وجوده کتیرلدی . دوناما باکودن ارزاق وعسکری

LIBRARY
OHIO STATE UNIVERSITY

